

Matthew Ayeye Jesus-akerte Matthew-clarle intelhe-ilemeke

*Abraham-eke-artweye-ngentyele Jesus-werne
atheke
(Luke 3:23-38)*

¹ Israel-arenye areyeke Angkentye nhenhe Jesus Christ-akerte. Jesus Christ arrateke David Akngerrepeake-artweye-ngentyele arrule-arle anetyarteke. David Akngerrepeake re akenhe Abraham-eke-artweye-ngentyele-arle arrateke arrule-arle ikwerenge arrekwele anetyarteke, kele David-engentyele atningke arrpenhe areye-arlke anteme inteka arrpenhe anteme arrpenhe anteme. Kele ikwerenge-ntyele arrulenje arrpenhele anteme Jesus anteme inteka. Abraham-engentyele nhenhe arritnye areye aneke arrpenhe-ngentyele arrpenhe anteme Jesus-arle inteka-werne-atheke, nhenhe-arle arritnye arrpenhe itne Jesus-enge arrekwele aneke: ² Alere Abraham-kenhe Isaac arritnye, alere Isaac-kenhe arritnye Jacob-arle, alere Jacob-kenhe areye aneke Judah uthene atyeye ikwerenhe areye-arlke. ³ Alere Judah-kenhe atherre Perez uthene Zerah uthene-arle arritnye. Mikwe ikwere-atherrenheke Tamar arritnye. Alere Perez-kenhe anteme Hezron aneke akenhe alere ikwerenhe akenhe Ram-arle aneke. ⁴ Alere Ram-kenhe arritnye akenhe Amminadab-arle aneke, alere Amminadab-kenhe Nahshon-arle

aneke, alere Nahshon-kenhe Salmon-arle aneke. ⁵ Salmon-ele arelhe Rahab arritnye anewe akeke alere anteme ikwere-atherrenhe Boaz arritnye aneke, Boaz-ele marle Ruth arritnye anewe akeke alere ikwere-atherrenhe anteme Obed arritnye aneke. Alere Obed-kenhe Jesse arritnye-arle aneke. ⁶ Alere Jesse-kenhe David-arle aneke, arrantherre itelareme Ngkartele-arle renhe akngakeke King anetyeke tyerrtye Israel-arenye areyeke.

Alere David-kenhe Solomon arritnye-arle aneke. Meye Solomon-kenhe anewe aneke artwe Uriah arritnyeke-arle arrekwele.

⁷ Alere Solomon-kenhe Rehoboam arritnye-arle aneke, kenhe alere ikwerenhe akenhe Abijah arritnye-arle aneke. Alere Abijah-kenhe Asaph arritnye-arle. ⁸ Alere Asaph-kenhe Jehoshaphat arritnye-arle aneke kenhe alere ikwerenhe akenhe Joram arritnye-arle aneke, alere Joram-kenhe Uzziah arritnye-arle. ⁹ Alere Uzziah-kenhe Jotham arritnye-arle, kenhe alere ikwerenhe akenhe Ahaz, alere Ahaz-kenhe Hezekiah arritnye-arle. ¹⁰ Alere Hezekiah-kenhe Manasseh arritnye-arle aneke alere ikwerenhe akenhe Amon arritnye-arle aneke, alere Amon-kenhe akenhe Josiah arritnye-arle. ¹¹ Alere Josiah-kenhe atningke aneke Jeconiah uthene kake ikwerenhe areye-arlke. Ikwerenge-ntyele anteme Babylon-arenye areye apetyemele Israel-arenye areye apmere Babylon-werne akngetye-alpeke.

¹² Alere Jeconiah-kenhe aneke Shealtiel arritnye kenhe alere ikwerenhe arritnye

Zerubbabel-arle aneke. ¹³ Alere Zerubbabel-kenhe aneke Abiud-arle alere ikwerenhe akenhe Eliakim arritnye-arle, kenhe alere ikwerenhe akenhe Azor arritnye-arle. ¹⁴ Alere Azorkenhe Zadok arritnye-arle, alere ikwerenhe akenhe Akim arritnye-arle, alere Akim-kenhe Eluid-arle aneke. ¹⁵ Eluid-eke alere akenhe Eleazar arritnye-arle aneke, alere ikwerenhe akenhe Matthan arritnye-arle, alere ikwerenhe akenhe Jacob-arle aneke. ¹⁶ Alere Jacob-eke Joseph-arle aneke, arrantherre itelareme anewe Mary-kenhe, kele Mary-ele anteme ampe atnyeneke Jesus arritnye, arritnye arrpenhe Christ, nhenge Ngkartele-arle alhileke. ¹⁷ Altye nhenhe areye-ngentyele Jesus intekte, arrenge-arrenge Abraham-kenhe 14-pele anthurre aneke anyente-ame-anyente itne arrateke David-eke-atwetye. Kele David-engentyele awethe arrenge-arrenge areye-akerte. Kele ikwerenge awethe 14-pele arrateke arrenge-arrenge itne anyente-ame-anyente anteme itne ilweke. Kele thultye areye anteme apetyeke itnenhe Babylon-werne akngetyeke. Kele ikwerenge awethe 14-pele arrateke arrenge-arrenge itne anyente-ame-anyente anteme itne ilweke, itneke-ngentyele anteme Jesus intekte.

*Jesus anteme inteme
(Luke 2:1-7)*

¹⁸ Angkentye nhenhe nthakenhe-arle Christ intekte-akerte, re akenhe Ngkartele-arle alhileke-arle yernetyeke. Arelhe awenke anyente Mary arritnye, artwe Joseph arritnye-arle, ratherre nhenge inerretyeke. Urreke-arle Joseph-ele Mary

anewe aketyenhenge, Utnenge Akngerre ikwere-werne apetyeke renhe atnerte-atnerte mpwaretyeke. ¹⁹ Nhenge Joseph-ele Mary areke re apale itirreke artwe arrpenhele-arle akwele ingkernenge akurne mpwarekeke, rarle akutne aneke nthakenhe-arle Utnenge Akngerrele mpwarekeke. Joseph artwe mwerre anthurre aneke re atywerrenge Jew-arenye areye-kenheke akangkwe-irretyarte re Mary apurele-anthetyekwenye ahentye-aneke atningkele awerlenga. Re itirreke, “Iwenhenge-arle-ame the marle atnerte-atnerte anewe aketyeke ahentye aneme? Ayenge ikwere nterte-nterte angkeye, renhe ipmentye impemele.”

²⁰ Nhenge Joseph-arle alakenhe itirretyamenge, alkere-arenye Ngkarte-kenhe arrateke Joseph-eke, re altyerre arerle-anerlenga, re anteme ikwere angkeke, “Joseph, David-oke-artweye, apure-irretyalaye Mary anewe aketyeke, ampe akweke nhenhe Utnenge Akngerre-ngentyele-arle, artwe arrpenhekenhe anetyakenhe-arle. ²¹ Re anteme ampe atnyenetyenhe, re akweke renhe atnyenemele unte renhe Jesus arritnye anthetyeke, rarle tyerrtye ikwerenhe areye itetheke mpwaretyenhenge ilweketye, itne-arle arne akurne mpwarewarrerlenga.” Alakenhe renhe utnenge alkere-arenye Joseph-eke angkeke.

²² Angkentye nhenhe areye alakenhe-irreke Ngkartele-arle arrule anthurre ilekenge artwe angkentye Ngkarte-kenhe awemele ilerlapentye akngerre Isaiah-eke alakenhe kwenhe arratyenhe. Re alakenhe angkeke,

23 “Awaye, arelhe awenke anyente artwengearlke arrekwelenge intetyakenhe atnerteatnerte-irretyenhe imerte ampe akweke atnyenemele,

itne anteme renhe “Immanuel” ileyenhe,” arritnye nhenhe alakenhe ileme, “Ngkarte anwernekenge apurte aneme.”

Isaiah 7:14.

Alakenhe-arle alkere-arenye utnenge Joseph-eke angkeke.

24 Joseph re anteme akeme-irremele ankwenge-ntyele utnenge alkere-arenye renhe-arle aweke-iperre re Mary anewe akeke imerte renhe arntarnte-aremele apmere ikwerenhenge.

25 Ratherre akenhe apurte intetyakenhe-arle aneke ampe akweke ikwere akarelhemele intetyeke. Yanhe iperre ampe akweke rarle intekenge anteme ratherre akweke renhe Jesus arritnye antheke.

2

Ayeye Jesus inteme-akerte

1 Jesus intekte apmere Bethlehem arritnye-enge apmere akngerre Judea-nge, ikwerenge artwe anyente Herod arritnye apmere Judeake akngerrepatte aneke. Kele Jesus-arle intekte-iperre artwe akaltye anthurre urrpetye ikngerengentyele Jerusalem-werne apetyeke. Itne akngerre itelareke kwerralye areye arerlte-apemele ware. **2** Itne Jerusalem-eke-irremele itne tyerrtye apmere-arenye areye apayuthneke,

“Nthenhele-ame ampe akweke re intekte, aknger-repate Jew areye-kenhe arrantherre itelareme? Iknge-rele anerlte-aneme anwerne areke kw-erralye akngerre arraterlenge lyete-ante. Kw-erralye renhe areke-arle iperre anwerne itir-reke, ‘Jew areyeke akngerrepate-arle intekte.’ Alakenhenge anteme anwerne apetyeke ikwere akangkentye.”

³ Kele nhenge Herod Akngerrepatele awemele artwe akngerre urrpetye-arle untherlte-apekenge ampe akweke intekte-arle ikwere, re akwele akngerrepate anetyenhenge, Herod arnterre anthurre itirremele, ingkerte-irremele itirreke, “Ampe akweke nhenhe apeke amangkemele apmere atyinheke-artweyeke akngerrepate irreme, ayenge-tetye.” Jerusalem-arenye areye atere-irreke, Herod-arle anyingkeke awemele. ⁴ Aweke-arle iperre, Herod-ele kwertengerle akngerrepate tyatye-arenye areye apurtelhe-ileke angkentye Moses-kenhe akaltyele-anthenhe-anthenhe areye-arlke, re anteme itnenhe apayuthneke, “Nthenhenge-ame angkentye Ngkarte-kenhe awemele ilerle-apentye akngerre areyele ileke Christ, Ngkartele-arle alhileke-arle intetyenheke?”

⁵ Itne akenhe ikwere ilerlenge, “Re kwenhe apmere Bethlehem-ele intetyenhe apmere Judea ikwerekere. Anwerne itelareme artwe angkentye Ngkarte-kenhe awemele ilerle-apentye akngerre Micah-clarle arrule intelhe-ilekenge. Alakenhe-arle re intelhe-ileke:

⁶ ‘Awerrirraye apmere akweke nhenge Bethlehem-arenye areyele, apmere

akngerre Judea ampinyele!

Apmere arrekantherrenhe impene anthurre, artwe-arle apmere arrekantherrenge-
ngentyele akngerrepatanetyenhenge.

Re Israel-arenye atyinhe areye arntarnte-
aretyenhe,
yepo-yepe arntarnte-arentye akngerrele
yepo-yepe ikwerenhe areye arntarnte-
areme-arteke.’”

Micah

5:2.

Alakenhe-arle itne Herod-eke angkeke.

⁷ Herod-ele alakenhe awemele re angkentye yerneke artwe akaltye anthurre urrpetyeke renhe nterte-ntertele aretyeke apetyetyeke. Kele re anteme akaltye-irreke ilengare anthurre-arle kwerralye arrule arratekeke. ⁸ Re anteme itnenhe ularele ileke itneke alakenhe angkemele, “Bethlehem-werne alherlte-iwaye ampe akweke ikwere mwantyele aretyeke imerte apetyalpemele atyenge iletyeke ayenge anteme alhetyenhenge renhe aretyeke.” Re anteme itnenhe Bethlehem-werne yerneke.

⁹⁻¹⁰ Kele renhe-arle aweke-iperre itne alheke anteme. Itne imerte aremele kwerralye renhe ikngerrenge-arle arrateke renhe itne imerte akangkemele anthurre aremele arteke. Kwerralye re itnekenge arrekwelele akwete alheke apmere Bethlehem-ele apmere nthenhelearle ampe akweke rarle intetyame ikwerenge tnye-alpetyeke. ¹¹ Apetyemele arteke itne apmere kwene-werne irrpenheke imerte ampe akweke renhe aremele Mary meye ikwerenhenge. Itne anteme kwene-irremele akweke

renhe tnakemele arne mwerre akngerre itne-arle akngetyeke areye imerte altywere-ilemele anthemele apwerte gold, mwerre akngerre ntyentye akngerre arne atherre frankincense uthene myrrh uthene.

¹² Yanhe-ngentyele itne itirremele Herod-werne alpetyeke, kenhe ingwe ikwerele itne-arle ankwe anekenge Ngkartele itnenhe altyerrenge ileke Herod-werne alpetyale anetyeke. Ingweleme anteme itne apmere itnekenhe-werne alperlte-iweke Herod-ketye iwerre arrpenhele.

Jesus-kenheke-artweye areyele renhe apmere Egypt-werne akngeme Herod-ketyenge

¹³ Artwe yanhe urrpetye alpekenge-arle anteme, alkere-arenye Ngkarte-kenhe arrateke Joseph-eke ingwele altyerrenge imerte ikwere angkemele, “Iparrpe akeme-irraye, akweke nhenhe akngetyeke meye ikwerenhe uthene apmere Egypt-werne thultye Herod-kenhe areye-arle akweke nhenhe atwetyeke unthetyenhe-ketye. Ikwerele urrekeke-atwetye anemele the ngenhe iletyeke ilengareke-atwetye unte apetyalpetyeke the ngenhe ilerlenge.”

¹⁴ Kele ingwe ikwerele antime Joseph akeme-irreke imerte menhenge atherre akngemele Egypt-werne. ¹⁵ Egypt-eke arteke-irremele itne aneke akweke renhe arntarnte-aremele arruleke-atwetye Herod ilwetyeke-atwetye. Alakenhenge anteme iwenhe-arle Ngkarte angkeke arrule artwe angkentye Ikwerenhe awemele ilerle-apentye akngerre Hosea-ke

arraty-e-arle irrerlenge. Hosea alakenhe angkeke,

“Ampe atyinhe alhetyeke Egypt-werne anetyeke, yanhe-ngentyele anteme the renhe iletyenhe apmere ikwerenge impememe apetyalpetyenhenge.” *Hosea 11:1.*

Thultye Herod-kenhe areyele urreye akweke areye atweme apmere Bethlehem-enge

16 Herod uyarne akarelheke artwe akaltye anthurre urrpetyeke apetyalpetyeke re anteme aweke itne-arle renhe ularele ileke itne imerte apmere itnekenhe-werne anteme alperlte-iwemele re ahele anthurre irreke. Kele imerte re thultye ikwerenhe areye ileke ampe urreye akweke areye atwetyeke Bethlehem-ele apmere itwele-arle aneme areyeke-arlke. Re ileke ampe akngerre ulkere areye-arlke atwetyeke, nhenge uterne atherreke-arle aneke areye-arlke. Re alakenhe irreke re itelarekenge artwe urrpetye itne-arle ileke kwerralye arrekwelenye renhe aremele, re anteme itirreke, “Re kwenhe ampe akweke ware apeke, lyete-ante apeke-arle unthentye irreme.” Thultye ikwerenhe areyele akenhe arraty-e-arle ampe urreye areye atweke.

17-18 Alakenhenge anteme iwenhe-arle Ngkarte angkeke arrule artwe angkentye Ikwerenhe awemele ilerle-apentye akngerre Jeremiah-nge anpere-irrenheme arraty-e-arle irrerlenge. Alakenhe anteme re intelhe-ileke,

“Apmere Ramah arritnyenge itne aweme arelhe arnterre anthurre artnerlenge,
Re akenhe arelhe Rachel-arle aneke irrare-irrare,

ampe ingkirreke-ante-arle ikwerenhe uyer-rekenge.

Itne anteme uyarne anthurre renhe ntertele ileke ampe areye-arle ilwekenge ikwerenhe.”

Jeremiah

31:15.

Angkentye nhenhe akenhe arratye-arle aneke.

Joseph-ele renhe-atherrenhe apmere Israel-werne akngirtneme

¹⁹ Ikwerenge-ntyele Herod-arle ilwekenge anteme alkere-arenye Ngkarte-kenhe awethe arrateke Joseph-eke nhenge re altyerre aremele Egypt-nge. ²⁰ Alkere-arenye utnenge re ikwere angkeke, “Akeme-irraye, menhenge atherre inerle-alhememe alpaye apmere ngkwinhe Israel-werne. Kele mwerre anteme artwe ampe akweke renhe-arle atwetyeke aneke-arle kele ilwekenge.”

²¹ Kele arratye Joseph-ele renhe-atherrenhe inerle-alhememe alpeke apmere Israel-werne.

²² Kele re arrernelhememe aweke Archelaus, alerikwe Herod-kenhe akngerrepate anerlenge apmere Judea ikwerele. Akngeye ikwerenhe ilweke-arle iperrenge re anteme-arle apmere Judea-ke akngerrepate aneke. Nhenge Joseph-ele awemele re atere-irreke re ahentye-anetyakenhe-irreke apmere ikwere-werne alpetyeke. Kele awethe, altyerre arrpenhe anteme re areke utnenge alkere-arenye nhengele renhe ileke re Judea-werne alpetyale anetyeke re ayerrere alhetyeke apmere kwatye alaye itwele Galilee-werne rarle mwerre anetyenheke.

²³ Re anteme alheke apmere akngerre Nazareth arritnye-werne ikwerele anteme re aneke. Re Nazareth-werne alhemele alpeke alakenhenge anteme arratye aneke Jesus Anwerneke-artweye-arle angkeke arrule artwe angkentye Ngkartekenhe awemele ilerle-apentye akngerre areyeke, itne anteme alakenhe renhe intelhe-ileke, “Artwe Ngkartele-arle alhileke rarle Nazareth-arenye-arle anetyenhe, tyerrtye areye anteme ikwere angkerriretryenhe artwe nhenhe-arle Nazareth-arenye-arle.”

Nhenge Joseph-ele anteme Jesus Nazareth-werne akngeke, angkentye nhenhe akenhe arratye-arle aneke.

3

John kwatyke akwernentye akngerrele angkentye ileme

(Mark 1:1-8; Luke 3:1-18; John 1:19-28)

¹ Ikwerenge-ntyele uterne arrpe-anenhe-arle anpere irrenhekenge, artwe John arritnye, nhenge tyerrtye areye kwatyke akwernentye akngerre, angkentye iletyame Ngkartekete tyerrtye atningkeke apmere ahurratyre Judea ikwere. ² Re anteme alakenhe angkeke, “Akurnenge utepe-irraye Ngkartekete-werne-atheke, kele arlte angathe anteme-arle irremenge Ngkartekete-arle tyerrtye areyeke akngerrepate anetyenhenge itnenhe arntarnte-aremele.” ³ John akwele artwe re, arrantherre itelareme angkentye Ngkartekene awemele ilerle-apentye akngerre

Isaiah arritnyele-arle ileke ikwere-akerte alakenhe ilemele,

“Tyerrtye anyente kwenhe apmere ahurratyarenye arlkerle-apeme tyerrtye areyeke ikwere-werne apetyerlenge-arle, alakenhe:

‘Ngkarte Anwerneke-artweyeke arratye-irreraye arrekwele nhenge re apetyemele angkerlenge, arrantherre mwantyele awerrirrtyeke.

Arrantherre itelareme artwele iwerre arratye-ilerlenge akngerrepate ingkerne apetyetyenhenge.

Alakenhe akwele arrantherre arratye-irremele akarelhemele anetyeke, Nhenge Ngkarte Anwerneke-artweye apetyemele angketyeke, arrantherre renhe mwantyele awetyeke ikwere akangkwe-irremele.’”

Isaiah 40:3.

⁴ Nhenge mantere ikwerenhe akenhe alte kamule-kenhe-ngentyele-arle mpwareke, re ulte ikwerenge ayernelheke irrntyne kere-kenhelearle. Re intelye uthene ngkwarle urltampe uthene arlkwetyarte. ⁵ Tyerrtye atningke apetyewarretylete renhe angkerlenge awetyeke. Itne apmere Judea-ngentyele apetyewarreke, apmere Jerusalem-engentyele anteye apetyewarretylete, apmere itweke-itweke arrpenhe areye-ngentyele-arlke, lhere akngerre Jordan-engentyele-arlke, lhere nhenhe kwatye urewearlle. ⁶ Re angkerlenge itne renhe awemele apure-irrerirreke, itne anteme ingkirreke ikwere akethe ilelheke arne akurne areye itne

mpwaretyarte-arle. Re anteme aweke-arle-iperre itne ilelherlenga, re itnenhe kwayteke akwerneke Jordan lhhereke imerte itnenhe baptiseeme-ilemele.

⁷ Artwe Phariee uthene Sadducee uthene areyele renhe apayuthneke itnenhe-arlke kwayteke akwernetyeke. John-ele itnenhe aremele alakenhe angkeke, “Iwenhenge-ame arrantherre kwayteke irrpetyeke apetyeke? Arraty-ame arrantherre akurne imperlte-alhemele akngarte-iwelheke? Arrangkwe, arrantherre-arle urrtiyirrentye akngerre areye-arle! Arrantherre apeke-arle apale-arle itirreme Ngkartele-arle arrenhantherrenhe ipeltye-ilemeke tharle arrenhantherrenhe kwayteke akwernerlenga. Kele arrangkwe-arle! Ngkarte ahele anthurre aneme arrantherre-arle akurne mpwarekenge. ⁸ Arrantherre ingkirrekele awerrirraye. Arrantherre akurne areye arraty-impetyeke akngarte-iwelhemele mwerre mpwaretyeke mwerre anemele. Kele yanhengentyele, Ngkartele aremele arrantherre-arle mwerre mpwaremenge, kele re arrekantherre akangkemele-arle aneme. ⁹ Kenhe arrantherre alakenhe apeke-arle itirreme, ‘Ngkartele anwernenhe akurne areye-arteke aretyakenhe, anwerne-arle arrenge-arrenge Abraham-kenhe areye anerlenga. Alakenhe ikwerenge anteme re anwernenhe atwetyakenhe.’ Kenhe arrangkwe-arle, arrantherre-arle apale-arle itirreme. Kele apwerte nhenhe areye araye. Ngkarte apeke-arle ahentye-aneke re arrenge-arrenge Abraham-kenhe areye apwerte nhenhe areye-

ngentyele mpwaretyeke. **10** Awerrirraye! Arrantherre akurne anerrirreme, arne merne-kwenye-arteke, angwenhele apeke-arle arne merne-kwenye aremele, ikwere akarelhetyakenhe, arrangkwe-arle, renhe akemele ureke iwetyenhenge. Ngkarte Re artwe-arteke arne areye irntwernetyeke aneme, Re akarelhemele tyerrtye atwetyeke itnenhene ureke iwetyeke akurne akwetethe-arle anerrirrerlenge.” Alakenhe renhe-arle John-ele itneke ileke.

11 Kele John tyerrtye itneke alakenhe angkeke, “The arrenhantherrenhe kватye-werne irrpelhe-ilemele baptise-eme-iletyeke. Kenhe urreke, tyerrtye arrpenhe anyente apetyeme atyengenge awethe arntwarre anthurre. Ayenge akenhe urrkapentye akngerre ikwerenhe-arteke ware-arle. Tharle ingke-kenhe ikwerenhe uyarne-arle ilyweme, ayenge-arle akweke-ulkere. Urreke re arrenhantherrenhe urele uthene Utenga uthenele-arle baptise-eme-iletyenhe. Re Utenga Akngerre ikwerenhe arrpenhemekarleke akwernetyenhe, arrantherre anteme akngarte-iwelhetyenhenge. Arrpenheme areye Re ure akngerreke-arleke akwernetyenhe. **12** Re apetyetyenhe tyerrtye areye akngaketyeke, arelhele-arle ntange areye alkereke iweme-arteke kenhe akenge areye rlkele akngerlenge kenhe mwerre areye ante-arle anerlenge. Alakenhenge re mwerre areye akngakemele itnenhe arntarnte-aretyeke, kele akurne areye akenhe re itnenhe akngakeme imerte itnenhe yernemele aywepemele. Re mwerre areye

atnyenetyenhe tyerrtye akurne areye-ngentyele. Re mwerre atnyeneme akayake-ilemele akurneketye, akurne areye akenhe re ureke-arle iweme, ure nhenge akwetethe anthurre-arle ampepampemeke.”

John-ele Jesus kwayteke akwerneme renhe baptise-eme-ilemele

(Mark 1:9-11; Luke 3:21-22)

¹³ Yanhe-ngentyele anteme Jesus apmere Galilee-ngentyele apetyeke lhere Jordan-werne imerte John apayuthnemele renhe kwayteke akwernemele baptise-eme-iletyeke. ¹⁴ Kenhe John Iterke akwete aneke, ikwere angkemele, “Arrangkwe, unte ayenge-tetye kwayteke akwernemele baptise-eme-ilaye. Iwenhenge-arle-ame the ngenhe kwayteke akwerneye?”

¹⁵ Jesus imerte ikwere angkirtnemele, “Arrangkwe, kele mwerre, unte ayenge kwayteke akwernaye, Ngkarte-arle ahentye-aneme unte ayenge kwayteke akwernemele baptise-eme-iletyeke.”

Jesus-arle alakenhe angkekenge, John itirreke mwarrantye imerte renhe kwayteke akwernemele baptise-eme-ilemele.

¹⁶ Jesus-arle kwayte-ngentyele akeme-irrekenge alkere altywere-irreke re areke Utenga Ngkarte-kenhe anteme atnarnperlenge thipe urelyarre-arteke imerte ikwere-arleke arrernalhemene. ¹⁷ Alkere-ngentyele anteme Ngkarte alakenhe angkeke, “Nhenhe-arle ampe impene atyinhe-arle, ayenge-arle ikwere ahentye

anthurre-arle ayenge-arle ikwere akangkentye anthurre-arle aneme.”

4

*Arrentye Satan-le Jesus arrkerneme
(Mark 1:12,13; Luke 4:1-13)*

¹ Utnenge Akngerre-arle Jesus-eke-arleke arrernelheke-iperre re Jesus apmere ahurratye-werne akngeke, apmere ikwere-werne nhenge tyerrtye-arlke anetyakenhe-werne, arrentye Satan-ele renhe uternetyenhenge. ² Re akenhe merne-arlke arlkwetyakenhe arrule aneke arlte 40-eke-atwetye re angayakwe aneke. ³ Arrentye Satan anteme apetyeke ikwere alakenhe angkeke, “Unte-ame angayakwe? Unte apeke-arlke Alere Ngkarte-kenhe, apwerte nhenhe areye akngarte-iwaye merne irretyeke.”

⁴ Kenhe Jesus akenhe ikwere alakenhe-arlke angkirtnerlenge, “Arrangkwe, alakenhe-arlke pweke-nge arrule intelhe-ileke, ‘Tyerrtye areye itethe akwete anetyakenhe merne-ante ware arlkwemele, itne itethe akwete aneme angkentye Ngkarte-kenhe awemele.’” *Deuteronomy 8:3.*

⁵ Arrentye Satan-ele anteme Jesus apmere akngerre Jerusalem-werne akngeke imerte renhe ileme tyatye akngerre Jew areye-kenhe akertnele tnetyeke. ⁶ Re imerte renhe ileme uternemele-arteke, “Alere Ngkarte-kenhe akwele unte, tyatye akngerre nhenhe akertne-ngentyele ahelheke antewelhaye. Intelhe-ilentye Ngkarte-kenhele alakenhe-arlle ileme,

'Ngkartele alkere-arenye Ikwerenhe areye yerneytyenhenge ngenhe arntarnte-aretyeke
unte apeke atnyerlenga itne ngenhe akertnetaheke arntwirrketyenhenge apwertele ingke ngenhe atweme-ketye.'"
Psalm 91:11,12.

⁷ Kenhe Jesus akenhe ikwere alakenhe-arle angkerlenga, "Arrangkwe, ayenge-arle antewelhetyeke arrangkwe-arle, alakenhe-arle akenhe pweke-nge arrule aneke, 'Unte Ngkarte ware apayuthnetyale arrkenelhetyeke, renhe uternetyale ngenhe akayake-iletyeke.' Alakenhe ikwerenge-ntyele-arle ayenge apmere akertne nhenhenge-ntyele ahelheke antewelhetyakenhe."
Deuteronomy 6:16.

⁸ Awethe Arrentyele renhe apwerte akngerre anthurre-werne akngeke, yanhe-ngentyele anteme re ikwere imerneke ahelhe ingkirreke anthurre, apmere arrpe-anenhe mwerre areye-akerte tyerrtye areye-arlke. Re anteme Jesus-eke angkeke, ⁹ "Awaye! Unte apeke atyenge kwene-irreme akangkwe-irremele the ngenhe apmere nhenhe areye ingkirreke-arle antheme."

¹⁰ Kenhe Jesus akenhe ikwere alakenhe-arle angkirtnerlenga, "Atyenge-ketyenge alhaye! Ayenge-arle ngkwenge akangkwe-irretyeke arrangkwe-arle, alakenhe-arle Moses-ele arrule intelhe-ilekenge tyerrtye Israel-arenye areyeke, 'Arrantherre Ngkarteke-ante ware kwene-irremele Renhe utyernemele anthurre tnaketyeke. Ikwere-ante ware awemele akangkwe-irretyeke.'"
Deuteronomy 6:13.

11 Arrentye re anteme renhe imperle-alheke, alkere-arenye utnenge areye anteme renhe apetyemele arntarnte-aretyeke.

*Jesus-ele angkentye ileme kwatye alaye Galilee itwele
(Mark 1:14,15; Luke 4:14,15)*

12 Jesus-arle apmere ahurratyе ikwerengentyele arratemele apetyeke aweke Herod-clarle John jail-ke akwerneke, awemele arteke re apmere Galilee-werne-atheke alheke. **13** Apmere Nazareth-eke arteke irremele re ikwerele anetyakenhe anpere akwete alheke apmere Capernaum-werne, yanhe ikwerele aneke. Apmere yanhe kwatye alaye Galilee itwele. Kenhe apmere yanhe re akenhe Galilee arrantherre itelareme arrenge-arrenge Zebulun uthene Naphtali uthene areye-kenhe apmere-arle. * **14** Jesus anerle-aneke apmere Galilee-le. Nhenhe alakenhe-irreke Ngkarte-arle arrekwele angkekenge angkentye Ikwerenhe ilerle-apentye

* **4:13** Zebulun uthene Naphtali uthene apele alere Jacob-kenhe atherre-arle arrule aneke. Arritnye Jacob-kenhe arrpenhe aneke Israel-arle, re anteme alere 12-pele-akerte, itneke-ngentyele anteme Israel-arenye areye atningke-irreke. Yanhe-ngentyele anteme Israel-arenye areye Egypt-ngentyele alheke apmere Israel-werne aneke anteme apmere ikwerele. Yanhenge ureke Ngkartele apmere renhe akngakeke imerte Israel-arenye areye anthemele itne anerlte-anetyeke. Kele re anteme arrenge-arrenge Zebulun uthene Naphtali uthene-kenhe areye re anthek apmere altule-werne kwatye alaye Galilee-werne-atheke itne apmere arrpe-anenhe mpwaretyenhenge itne ikwerele anerlte-anetyeke.

akngerre Isaiah-eke, nthakenhe-arle arraty-irretyenhe. Re angkentye renhe intelhe-ileke arrule anthurre alakenhe,

15 “Arrenge-arrenge areye Zebulun uthene Naph-tali uthene-kenhe nhenhe awerrirraye!

Iwerre akngerre inteme kwatye alaye Galilee-werne, arrantherre ingkirre anetyeke lhere Jordan altulenge.

Jew anetyakenhe areye-arlke ayenge awerrir-raye, kele arrantherre-arlke Jew areyenge apmere Galilee-nge anepaneme.

16 Arrantherre kwenhe ingwemertele anerlte-aneme arrantherre-arle Ngkarteké akutne anerlte-anekenge, ikwere akangkwe-irretyakenhe,

arrantherre anteme ilweketye atere-irrerlte-aneme.

Kele urreke alkngenthe akngerre arratetyenhe ingweleme pwarntyemele uterne-arteke arratetyenhe re tyerrtye areyeke arratemele apmere tyerrtye ilweke-arle areye-kenhele-arle anerlte-anemeke,

alkngenthe re anteme akwete pwarntyerle-anetyenhe ingwemertele-arle aneme areye itne Ngkarté aretyenhe uterne-arteke pwarntyerlenga.” *Isaiah 9:1-2.*

Alakenhe-arle Isaiah-ele arrule intelhe-ileke, arraty-arlke akenhe irrerlenga Jesus-arlke apetyemele apmere Galilee-le aneke.

17 Yanhenge anteme Jesus untherle-apemele angkentye ilderle-apemele. Alakenhe anteme re ileke, “Akurne-arle mpwareke-iperre utepe-irraye akurne mpwaretyale, angathe irrerlenga

Ngkarte-arle tyerrtye areyeke akngerrepatte anteme anetyenhe itnenhe lterrke akwete atnyene-tyeke.”

Jesus-ele irrpennge arntirrkwentye akngerre urreptye itnenhene ikwere akngakeme renhe apenterlte-apetyeke

(Mark 1:16-20; Luke 5:1-11)

18 Jesus nhenge kватye alaye Galilee iterele alhepalhemele areke arrwempenhenge atherre Simon uthene Andrew uthene. Ratherre-arle kere kватye-arenье areye arntirrkwetyame netnge, arne nhenge inwerle akngerre-artekenge.

19 Re anteme ikwere-atherre angkeke, “Apetye-alherraye, ayenge apenterle-anerraye, the mpwelenhe akaltyele-anthetyenhenge mpwele tyerrtye areyeke angketyeke itne atyengе itweke-irremele anetyenhenge, itne atyinhe apententye akngerre irretyenhenge.” **20** Angkentye anyente-negare aweke-arle iperre, ratherre arne arntirrkwentye akngerre areye iparrpe imperle-alheke, renhe ratherre apentenheke.

21 Arlenge-werne irreke-arle Jesus-ele areke ampe-ikwe Zebedee-kenhe atherre James uthene John uthene anerle-anerrerlenga anyikwele-arlenga. Ratherre-arle anetyame boat kwenele net-ele ayernemele uyarne, arne nhenge areye inwerle-artekele ultakerle-alheke. Jesus-ele renhe-atherrenhe apurte aremele ikwere-atherre antangkeke renhe apentetyeke. **22** Ratherre akngeye ikwere-atherrenhe Zebedee boat ikwere-atherrenhe impemele renhe apenterle-anerreke.

*Jesus-ele tyerrtye areye akaltyele-antheme, rlkerte areye angkwerre-iwemele anteye
(Luke 6:17-19)*

²³ Jesus untherle-apemele apmere arrpenanhe-ngentyele tantyipe arrpe-anenhele imerte alhemele tyatye Jew areye-kenhe-werne angkentye Ngkarte-kenhe iletyeke tyerrtye areyeke. Re anteme itneke Angkentye Mwerre ileke nhenge Ngkartele-arle tyerrtye areye akngerrepate itnekenhele-arteke arntarntearetyeke. Apmere arrpe-anenhele re rlkerte areye apanemele ngangkerele angkwerre-iwemele rlkerte atningke arrpenhe arrpenanhe angkwerre-iweke. ²⁴ Apmere arrpenanhe-ngentyele itne awerrirreke Ngkartele-arle rlkerte areye angkwerre-iwerle-apemele-akerte apmere Syria-ngentyele-arlke. † Awemele arteke itne rlkerte atningke akngetyeke angkwerre-iwetyeke, arrwengkelthe atningke-akerte areye. Arrpenhe areyele arrentye-arle atnyeneke, arrpenhe areye akenhe arrewerlenge imerte atnyemele ahelhe-werne-atheke, arrpenhe areye akenhe lterke-irreke ngkwerne uye imerte alhemele. Jesus-ele anteme ingkirreke itnenhe angkwerre-iweke. ²⁵ Tyerrtye areyele anteme renhe akwetethe anthurre anteme apentetyarte. Ikwere-akerte awemele, itne apmere arrpenanhe-ngentyele apetyewarreke, apmere nhenge areye Galilee itwele, tantyipe 10-pelegentyele, arntwarrenge-arlke apmere Judea-

† **4:24** Apmere Syria re akenhe Galilee-nge ayerrere-atheke-arle.

nge, Jerusalem-enge, ikngerrenge lhere Jordan-enge-arlke.

5

Jesus tyerrtye areyeke angkeme apwerte akert-nenge

(Luke 6:20-23)

¹ Jesus-ele aremele tyerrtye atningke anthurre ikwere irrperremele angathe-irrerlenge, re alheke apwerteke antyenheke arrernelhetye-alhemele, apententye akngerre ikwerenhe areyele imerte renhe apenteke. ² Re anteme itneke angkeke, alakenhe akaltyele-anthemele,

³ “Kele mwerre-arle tyerrtye arrpenhe areye itne Ngkartenge arrekwelele tnerlenge itelarelhemele itne iwenhe-arteke apure-irremele.

Kenhe tyerrtye nhenhe areye Ngkartele atyewe Ikwerenhe-arle aketyenhe, itnenhe arntarnte-aremele, alakenhenge anteme itne akangkentye an-tyenhe.

⁴ Mwerre-arle tyerrtye arrpenhe areye atnerte akurne awelheme.

Kenhe Ngkartele-arle itnenhe amantye-aketyenhe ntertelhe-ilemeli, alakenhenge anteme itne akangkentye anthurre anetyenhe.

⁵ Mwerre-arle alakenhe tyerrtye arrpenhe areye-arle ahe-akngerre kwenye.

Tyerrtye nhenhe areyeke Ngkartele arne mwerre areye-arle anthetyenhe,

- alakenhe ikwerenge anteme itne akangkentye anthurre anetyenhe.
- 6** Mwerre-arle alakenhe tyerrtye areye ahenntyе anthurre aneme Ngkartekе akwetethе akangkwe-irremele.
 Itne akangkentye anerlte-aneme Ngkartelearle itnenhe atnyenerlengе, itne alakenhe anerrirretyeke.
- 7** Mwerre-arle alakenhe nhenge tyerrtye arrpenheme arrpenhe areyeke alhwarrpe-irreme mwantye-mwantye-ilemele,
 alakenhenge anteme itne mwerre anetyenhe akangkemele.
 Itne akangkentye anerlte-aneme Ngkartelearle itnenhe mwantye-mwantye-ilekengе.
- 8** Mwerre-arle alakenhe tyerrtye arrpenhe areye utnenge itnekenhele akangkwe-irrerlengе Ngkarte akangketyeke mpwarememe.
 Itne ingkirrekele-arle Ngkarte aretyenhe, alakenhenge anteme itne akangkentye anetyenhe.
- 9** Mwerre-arle alakenhe tyerrtye areyele arrpenhe itnenhe arrkngente-iwemele atwerreketyenge, itne ipeltye-ilerretyeke.
 Ngkartele tyerrtye nhenhe areye Ikwereartweye aketyenhe, itne ampe Ikwerenhe areye anteme anetyenhenge,
 alakenhenge anteme itne akangketyenhenge.
- 10** Mwerre-arle alakenhe tyerrtye arrpenheme areye Ngkartenge arratyе anerlte-anerlengе kenhe arrpenhe areye itnekte tyele angkemenge.

Kenhe Ngkartele akenhe Akngerrepate itnekenhe-arle, itnenhe Ikwerenhe areye aketyenhe, itnenhe arntarnte-aremele, alakenhenge anteme itne akangketyenhe.

11-12 Mwerre-arle alakenhe tyerrtye arrpenhe areye arrekantherre apale angkemele arrenhantherrenhe atwerrirrerlenga. Arrekantherre itne-arlke tyele angkerremele arrantherre-arle ayenge apenterlte-anemenge.

Tyerrtye areyele arrekantherre arne akurne mpwaretyenhe itne-arle arrule angkentye Ngkarte-kenhe awemele ilerle-apentye akngerre areyeke akurne mpwareke-arteke.

Kenhe Ngkartele akenhe arne mwerre anthurre-arle arrekantherre alkere akert-nele atnyenerle-aneme.

Alakenhenge anteme arrantherre akangkentye anetyeke.”

*Tyerrtye areye Jesus-arle apentewarreme-arle
apirnte uthene alkngenthe uthene-arteke-arle
(Mark 9:50; Luke 14:34-35)*

13 “Arrantherre-arle apirnte-arteke-arle tyerrtye areyeke. Nhenge tyerrtyele apirnte arrerneme kere ikwemeye ilemele. Kele alakenhe-arle, nhenge arrantherre Ngkarteke akangkwe-irremele. Itne arrenhantherrenhe aremele alakenhe anerlenga, kele itne ahentye-arle-aneme atyewe Ngkarte-kenhe anetyeke. Kele nhenge apirnte akurne-irremele arrpenhele imerte kereke-arleke arrernemele kere renhe akurne-arle-ileme. Kele re akurne arrkernele

kele impemele anteme. Kele re apirnte renhe ahelheke iwemele tyerrtye areyele anteme ingkele ultherreme. Alakenhe anteye-arle arrantherre mwernte-irremele akngakelheme Ngkarte-ketyenge, arrenhantherrenhe tyerrtye areyele arerlenga, kele itne Ngkarteng apurte-irretyeke ahentye anetyakenhe-arle aneme. Alakenhenge anteme arrantherre atyenge uyarne mwerre urrkapeme.

¹⁴ “Arrantherre alkngenthe-arteke-arle anerlte-aneme tyerrtye areyeke. Itelaraye, nhenge alkngenthe ingwele pwarrrtyerlenga iwerre akethe imernemele, tyerrtye areyele iwerre renhe arratye aremele, itne arratye anteme alheme. Kele alakenhe-arle arrantherre iwerre imerneme tyerrtye ahelhe nhenhe-arenye areyeke Ngkarte-werne apetyetyeke. Nhenge tantyipe apwerte akertneke-arle arteke akethe renhe tyerrtye areyele aretyenhenge. ¹⁵ Kele alakenhe-arle, nhenge tyerrtyele apmere kweneke-arle lamp alkngenthe-ilemele, urtne akwekele artetyakenhe-arle anemele, kenhe re akenhe akertneke arrernemele-tetye ingkirrekele alkngenthe aretyenhenge. ¹⁶ Alakenhenge anteme alengke-iwelhewarretyale. Kele itne anteme arrenhantherrenhe areme arne mwerre mpwarerlenga kele itne Akngeye arrekantherrenhe akertnele-arle anemeke akangkwe-irreme anteye.”

Angkentye Moses-kenheke arratye itirretyeke

¹⁷ “Arrantherre apeke-arle atyenge apale itirrewarreme alakenhe, ‘Tyerrtye nhenhe

apeke-arle apetyeke angkentye Moses-kenhe impetyeke, angkentye Ngkarte-kenhe awemele ilerle-apentye akngerre areyele ileke-arlke.' Kele arrangkwe-arle, ayenge-arle angkentye yanhe areye iwetyeke apetyetyakenhe-arle, kele ayenge apetyeke angkentye arrulenye arratyе irretyeke. ¹⁸ Tharle arrenhantherrenhe arratyе-arle ileme, alkere uthene ahelhe nhenhe uthene nterte tnerlenge angkentye ingkirreke itne-arle arrekantherre akwete-arle anetyenhe arrantherre akangkwe-irremele mpwaretyeke, angkentye akngerre uthene angkentye akweke ware uthene. Angkentye itne-arle uyerretyeke arrangkwe-arle, angkentye itne-arle arratyе irrekenge ante-arle uyerretyenhe arlte ingkerne nhakwenge. ¹⁹ Alakenhenge anteme arrantherre angkentye itneke akangkwe-irretyeke. Kele angwenhe apeke angkentye nhenheke akangkwe-irretyakenhe anyente apeke-arle re itirreke angkentye renhe ingkirreke arrpenhenge akweke ulkere, arrpenhe areye akaltyele-anthemele angkentye nhenhe impetyeke, kele Ngkartele areme tyerrtye nhenhe ikwere akangkentye anetyakenhe, re anteme angkeme tyerrtye nhakweke rarle arrpenhekenge anetyakenhe-arle arrpenhe ingkirrekenge akweke ulkere Ngkarte tyerrtye areyeke akngerrepate anteme anerlenge. Kenhe tyerrtye apeke akangkwe-irremele angkentye nhenhe areyeke mpwaremele itne-arle angkemeke tyerrtye arrpenhe areye-arlke akaltyele-anthemele itne arne-ante mpwaretyeke. Nhenge Ngkartele tyerrtye yanhe

aremele ikwere akangkeme-arle, re impene anetyenhenge Ngkarte tyerrtye ingkirrekeke akngerrepeate anerlenga. ²⁰ Nhenhe awerrirraye! Arrantherre nhenhe itelarerirreme, artwe areyele nhenge angkentye Moses-kenhe akaltyele-anthenhe-anthenhe-arlke, Pharisee areye-arlke, itne angkentye Moses-kenheke akangkwe-irrememe, aywerrkele mpwaremele, itne Ngkarteke arratyte anetyeke. Kenhe Ngkartele arrenhantherrenhe ikwerenhe areye mpwaretyakenhe arrantherre-arle itne-arteke akangkwe-irremenge ware. Nhenge arrantherre utnengele uthene urtakwertele uthene Ngkarteke ahentye-anemele, angkentye ikwerenhe aywerrke akangkwe-irrememe, yanhenge anteme Ngkartele arrenhantherrenhe ikwerenhe mpwareme arrenhantherrenhe arntarnte-aretyenhenge.”

Jesus-ele akaltyele-antheme ahele-irretyeke-kwenye anerlte-anetyeke akerte

²¹ Jesus-ele akwete akaltyele-antherle-anemele itnenhe ileke, “Itelareme nthakenhe-arle Ngkarte angkeke tyerrtye areyeke arrule anthurre, nhenge rarle angkeke arrule arrenge-arrenge arrekantherrenheke alakenhe:
‘Tyerrtye arrpenhe areye atwetyale anetyeke, arrantherre apeke tyerrtye atwemele itne-arle arrenhantherrenhe court-werne-arle akngetyenhenge.’ *Exodus 20:13.*

²² “Kenhe ayenge arrekantherre angkeme, Unte apeke arrpenheke ahele ware irreme, Ngkartele ngenhe court akngerre-werne akngetyenhe. Kele unte apeke arrpenheke angkeme alakenhe, ‘Unte

apele arerte!' Unte court-werne alhememe. Kele unte apeke arrpenhe renhe ilteme, ikwere alakenhe angkemele, 'Unte Ngkartek akutne!' Kele Ngkartele ngenhe ure akwetethe alkngentheke-arle iweme. ²³⁻²⁴ Alakenhe irremeketyenge anteme arrantherre mwerre anetyeke tyerrtye arrekantherre-artweye areyenge. Iwenhe apeke-arle unte akngetyeke tyatye arriwele tnemele Ngkartek anthetyeke kele unte itelaremele, 'Kweye, alakenhe akwele tharle akurne mpwarekenge atyenge-artweyeke, ahele re aneme atyenge.' Alakenhe itirremele akwele unte arrekwele alhetyeke anyente-irrememe ikwerenge ipeltye-irretyeke imerte apetylalpemele tyatye akngerre-werne, arne nhenge Ngkart anthemele.

²⁵ "Unte apeke tyerrtye arrpenheke akurne mpwaremele re ahele-irrememe ngenhe court-werne-arle akngeme. Kenhe nhenge re ngenhe court-werne akngerlenge unte ikwere mwarrantye angketyeke unte alhepalhemele unte anyente-irrememe ikwere ipeltye-irretyenhenge urreke unte court-werne alhetyenhenge. Re anteme apeke imerte ipmentyele impemele court-werne akngetyakenhe. Kenhe unte apeke angketyakenhe anemele unte apeke anyente-irretyakenhe ikwere akangkwe-irretyakenhe anemele, kele re ngenhe akngeme judge anteme aretyeke-arle, kele re ngenhe itelaretyenhenge akurne-arle re anteme ngenhe ileme apwerte ngkweltye anthetyeke, re anteme ngkwengenirkwentye inemele ngenhe jail-ke akwerneme.

26 Unte anteme aneme ikwerele akwete anthurre unto apwerte ngkweltye ingkirre anthetyeke-atwetye. Arratye-arle ayenge angkeme.”

Jesus-ele akaltyele-antheme angwenhe apeke re anewe arrpenhe-kenhe-nge intetyale anetyeke

27 Jesus re akwete angkeme, “Arrantherre nhenhe-arlke awerrirraye, arrantherre itelareme Ngkartele-arle arrenhantherrenhe arrule ileke alakenhe,

‘Unte anewe arrpenhe-kenhenge intetyale, anewe ngkwinhenge-ante intetyeke.’

Exodus 20:14.

28 “Kenhe ayenge arrekantherre alakenhe anteme angkeme, artwele apeke marle arrpenhe aremele imerte alakenhe ware itirremele, ‘Ayenge arelhe mwerre akngerre yanhenge intetyeke.’ Arrantherre apeke apale itirremele ketye re marle ikwerenge intemele Ngkartele renhe akurne-arle ileme. Kele re renhe aremele ware ikwerenge intetyeke ahentye-anemele kele Ngkartele renhe akurne-arle ileme.

29 “Kele unto apeke-arle alkngé arratye ngkwinehe areke-arle iperre, unto imerte akurne mpwaremele. Kele, unto alkngé renhe tyerremele iwetyeke unto akwete akurne mpwareketyenge. Kele mwerre-arle unto alkngé anyente-akerte anetyeke Ngkartele tyerrtye ngkwinehe ureke iweketyenge unto-arle akurne mpwarekengé.

30 “Alakenhe ante apeke unto iltye akwearratye ngkwinehe akurne mpwaremele. Kele, unto iltye ngkwinehe akemele iwetyeke unto-arle akurne akwete mpwareme-ketyenge.

Kele mwerre-arle iltyeke arrangkwe anetyeke Ngkartele ngenhe ureke iweketyenge unte-arle akurne mpwarekenge.”

Anewe ngkwinhe yernetyale, alakenhe akurne-arle

(Matthew 19:9; Mark 10:11-12; Luke 16:18)

³¹ Jesus alakenhe-arlke angkeke, “Itelareme nthakenhe-arle Ngkarte arrule anthurre angkeke, nhenge arrule anthurre re angkeke arrwekelenye arrekantherrenhe areyeke alakenhe, ‘Artwe apeke anewe ikwerenhenge akalke-irreme renhe yernemele, re pipe ke intelhe-ilteyeyeke renhe imerte anthemele re itelaretyenhenge rarle ikwere ahentye-anetyakenhe aneme.’

Deuteronomy 24:1.

³² Kenhe the akenhe arrenhantherrenhe alakenhe-arle ileme, ‘Artwele apeke anewe ikwerenhe pipe apeke anthemele renhe yernetyenhenge. Kenhe arelhe nhenge artwe arrpenhenge intetyakenhe. Urreke artwe arrpenhele anteme apeke renhe anewe aketyenhenge. Kele artwe arrekwelele arelhe renhe akurne-ileme, rarle artwe arrpenhenge intemenge. Artwe arrpenhele arelhe renhe ingkerne anewe akemele re-arlke-arle akurne mpwareme.’”

Jesus-ele akaltyele-antheme unte-arle mpwaretyeke iwenhe apeke renhe alhilekenge

³³ Jesus-ele itnenhe akwete akaltyele-anthemele, itnenhe ileke, “Arrantherre nhenhe-arlke awerrirraye, Ngkarte-arle angkeke

arrwekeleneye arrekantherrenheke arrule
anthurre,

‘Arrantherre apeke Ngkarte Akngerre alhilemele
iwenhe apeke renhe mpwaretyeke, kele
arraye mpwaraye.’ *Leviticus 19:12.*

³⁴⁻³⁷ “Arrantherre apeke alhiletyeke ahentye-anemele arne iwenhe apeke renhe mpwaretyeke, kele ware alhilaye, arritnye arrpenhekenhe ilemele alhiletyale. Tyerrtye arrpenheke apeke unte alhiletyeke arne iwenhe apeke renhe mpwaretyeke arritnye arrpenheurrke ilemele, arritnye alkere akertne-ngentyele apeke ahelhe nhenhenge apeke Jerusalem-enge apeke, tyerrtye re unte arritnye alakenhe atniwelenge aweme kele re ngenhe arraye aweme-arle. Kenhe the akenhe arrekantherre alakenhe-arle ileme, ‘Unte apeke alhiletyeke arraye ahentye-aneme arritnye arrpenhe-kenhe iletyalaye. Nhenge unte alhilemele arritnye arrpenhe-kenhe ilemele ngenhe-arle arrentyele-arle uterneme arritnye arrpenhe-kenhe ilemele alhiletyeke. Kele-arlke re akertnenye arritnye ilemele alhiletyalaye Ngkarte-arlke apmere yanheke akngerrepat anemenge. Alakenhe anteye arritnye ahelhe nhenhe-arenyenge-arlke alhiletyale ahelhe nhenhe Ikwerenhe antime-nge. Jerusalem arritnyenge-arlke alhiletyale, apmere yanhe-arle Ngkarte-kenhe-arlke Rarle apmere ikwere akngerrepat. Unte apeke-arle ahentye-aneme alhiletyeke arritnye arrpe-anenhe iletyale ware alhilaye.’ ”

*Tyerrtye areyele atwirtnetyeke arrangkwe
(Luke 6:27-28,32-36)*

³⁸ Kele Jesus angkeke, “Nhenhe-arlke awer-rirraye! Arrule anthurre Moses-ele alakenhe intelhe-ileke, ‘Ngenhe apeke tyerrtyele alkngé atwerlenge, renhe alkngé ware atwirtnaye, ngenhe apeke artitye atwerlenge ultakemele renhe artitye ware atwirtnetyeke ultakemele.’

Exodus 21:24.

³⁹ Kenhe the akenhe arrekantherre alakenhe-arle ileme, ‘Ngkwenge apeke akurne mpwarerlenge unte akenhe ikwere akurne mpwarintnetyale anetyeke. Ngenhe apeke arrelyennge anyente atwerlenge ikwere arrpenhe anthelhaye. ⁴⁰ Tyerrtye arrpenhele apeke ngenhe court-werne akngerlenge, unte-arle arne iwenhe apeke ikwere renhe arrekwele apayuthnekenge, anthirtnetyenhenge. Artwe court-eke aknger-repatelé apeke ngenhe ileme tyarte ilywetyeke tyerrtye renhe anthetyeke, kele tyarte ante ware renhe anthirtnetyale renhe mantere arrpenhe ngkwineh-arlké anthaye unte-arle apwerte mane atningkele ineke. ⁴¹ Thulye-le apeke ngenhe uternemele unte yakwethe ikwerenhe akngernetyeke ikwerenge alherle-apemele. Kele unte akwete akngernerle-apetyeke, kele re anteme ngkwenge angkemele renhe anteme an-thirtnetyeke kele unte ikwere alakenhe-arle angketyeke, “Kele mwerre-arle, the intwarre ulkere akngetyenhenge ngkwenge.” Ikwerenge imerte awethe intwarre alhemele yakwethe ikwerenhe akngernemele. ⁴² Tyerrtye arrpenhele apeke ngenhe iwenhe apeke renhe apayuthner-

lenge, kele renhe ipmentyele awetyale, renhe anthaye iwenheke-arle re ahentye-anemenge. Re apeke-arle arne arrpenhe iwenhe apeke ikwere inkeme, renhe anthaye.’”

Atyewe Ngkarte-kenhe areye tyerrtye ingkir-rekeke ahentye-anetyeke

⁴³ Jesus-ele akwete akaltyele-anthemele itnenhe ileke, “Nhenge angwenhe apeke rarle alakenhe arrule angkeke, ‘Unte atyewe ngkwinhe areyeke ahentye-anetyeke, ngkwenge-arle ahentye-anetyakenhe areyeke ahentye-anetyale.’

Leviticus 19:18.

⁴⁴ Kenhe the akenhe arrenhantherrenhe angkentye arrpenhe-arle akaltyele-antheme, ‘Arrantherre akangkelhe-iletyeke arrekantherre-arle ahentye-anetyakenhe areye arrenhantherrenhe-arle atweme areye-arlke, Ngkarteke imerte angkemele arrekantherre-arle ahentye-anetyakenhe areyeke re itnenhene mwantyele arntarnte-aretyenhenge.’

⁴⁵ Arrantherre alakenhe mpwaremele Ngkartele akertne-arenyele aremele itirreme, ‘Arratyte apelaye! Tyerrtye nhenhe areye arratyte atyinhe, itne-arle ayenge angwaremenge.’ Arrantherre itelareme, Ngkartele uterne-arle akertne-ileme tyerrtye mwerre areyeke-arleke pwarrtyetyeke tyerrtye akurne areyeke-arleke-arlke. Kwatyte mwerre-arlke-arle re yerneme tyerrtye mwerre areyeke akurne mpwarentyte akngerre areyeke-arlke. ⁴⁶ Arrantherre apeke tyerrtye arrpenheke mwerre mpwaremele rarle arrekantherre mwerre mpwarekengante ware. Kenhe Ngkartele nhenhe aremele

re-ame arrekantherre akangkeme? Arrangkwe, arrantherre awethe arnterre ulkere mpwaraye. Kenhe artwe akurne areyele government-eke-arle mane inerlte-aneme areye alakenhe antime-arle mwerre mpwareme, tyerrtye arrpenhele ikwere mwerre mpwarerlenga-ante. * Kenhe arrantherre akenhe mwerre anetyeke atherre anteyeke, atyewe arrekantherrenhe areyeke uthene akurne mpwarentyne akngerre itneke-arlke. ⁴⁷ Ngkartele arrenhantherrenhe areme arrantherre atyewe arrekantherrenhe-werne itneke akangkentyele angkemele apetyerlenga, Re arrekantherre akangketyakenhe anetyenhe, arrantherre-arle awethe arnterre ulkere mpwaretyeke. Kenhe tyerrtye Ngkartekke akutne areye mwerre angkeme atyewe itne-kenheke. Arrantherre kwenhe mwerre angketyeke atherre antimeke atyewe arrekantherrenheke, atyewe anetyakenhe areyeke-arlke. ⁴⁸ Yewe, arrantherre kwenhe mwarrantye anthurre anetyeke, arrantherre itelareme Ngkarte-arle mwarrantye aneme-arteke, alakenhe-athewe.”

6

Alengke-iwemele anthetyeke arrangkwe-arle aneme areyeke

* **5:46** Artwe nhenhe areye-arle Jew areye-arle, itne ak-enhe apmere Rome akngerrepatke-arle urrkapewarretyarte, tax mane inetyarte Jew areye-ngentyele akngerrepatte itne-kenheke yernetyenhenge. Kele Jew areye ahele anteme irreke itne-arle Jew anetyakenhe areyeke urrkapemenge.

¹ Jesus-ele akwete atyewe ikwerenhe areye akaltyele-anthemele itnenhe ileke, “Nhenge arrantherre Ngkarte utsyernemele tnaketyeke arrantherre akwetethe-arle arne arrpenheke-arrpenhe mpwareme, apwerte ngkweltyeke arrangkwe areye anthememe, imerte merne arkwetyakenhe anemele ikwere angketyeke. Kenhe tyerrtye arrpenhe areyele akenhe alakenhe mpwarentyе akngerre arrpenhe areyele arerlenga itnenhe akwele tnaketyenhenge. Itne-arteke anetyalaye. Arrantherre apeke alakenhe irremele, kele Ngkarte alkere akertnenye-arenye arrekantherre akangkentye kwenye-arle anetyenhe.

² “Arrantherre apeke-arle arneke arrangkwe areyeke anthetyeke ahentye-anemele, itnenhene anthetyakenhe arrpenhe areyele arrenhantherrenhe arerlenga. Alakenhe renhe urrtyalthe areyele mpwareme. Itne alethe alhemele iwerrele akunye-apenhe areye aremele, anthememe tyerrtye areyele arerlenga itnenhe tnakewarretyeke. Alakenhe awethe, itne anthememe tyatye Jew-kenhe areyeke arrpenhe areyele arerlenga nhenge, itne itnenhe aremele, itne itnenhene tnakemele. Alakenhe the arrekantherre arratyе ileme, nhenge Ngkartele aremele itne alakenhe mpwarerlenga, rarle itnenhe tnaketyakenhe, arrpenhe areyele-arle itnenhe kele arerlenga tnakewarreke. ³ Nhenge arrantherre apeke-arle ahentye-anemele tyerrtye akunye-apenhe areye anthetyeke, alengke-iwelhe anteme itnenhe anthaye arrpenhe areyele

aretyakenhenge. **4** Yewe, arrantherre anthemele alengke-iwemele anthetyeke arrpenhe areyele itelaretyakenhenge. Akngeyeante arrekantherre-akerte akaltye anemele arrantherre-arle alengke-iwemele antherlte-anemenge arrenhantherrenhe-arle re arekenge anteme re arrekantherre arne mwerre antheme.”

*Ngkarteke angkeme-akerte
(Luke 11:2-4)*

5 Jesus angkeke, “Arrekantherre-arrpe arelhe-warraye, Ngkarteke angketyale nhenge ularele arrpenhe areyele-arteke. Itne nhenge Ngkarteke angkeme akangkemele tnemele tyatye kwenele, akethele-arlke, tyerrtye arrpenhe areyele akwele aretyenhenge. Kele ingkirrekele itelaraye: Ngkartele itnenhe tnaketyeke arrangkwe-arle, arrpenhe areyele-arle itnenhe kele tnakewar-rerlenge. **6** Nhenge unte Ngkarteke angkemele apmere ngkwinhe arriwe martemele anyente-ante ikwere angketyeke. Kele Ngkarte-ante-arle akaltye aneme unte-arrpe-arle angkeke, re anteme, ngenhe areke-arle-iperrenge, ngenhe arne mwerre anthurre anthetyenhe.

7 “Unte apeke Ngkarteke angkemele, angkentye akwete-akwete angketyale. Alakenhe renhe tyerrtye areye Ngkarteke akutne angkeme. Itne apale itirremele itne-arle akwete-akwete angkentye angkepangkeme, re itnenhe awerlenge. **8** Itnenhe angwaretyale arrantherre Ngkarteke angkemele, kele Ngkarte anwerne-kenhe-arle akaltye-arle iwenheke-arle arrantherre ahentye-anemeke urreke-arle

arrantherre apayuthnetyenhenge-ante. ⁹ Kele nhenge arrantherre Ngkarteke angkemele, alakenhe angketyeke,

‘Ngkarte Akngeyaye, alkerele-arle aneme.

Impene anthurre kwenhe arritnye ngkwinhe aneye.

Altyerre Ngkwinhe apetyaye.

¹⁰ Alakenhe anetyenhe ahelhe nhenhele apmere Ngkwinhe-arteke.

¹¹ Arlte nhenhenge merne anwernenhe anthaye.

¹² Anwerne akurne mpwareke-arle iperre, anwernenhe ilpernetyakenhe anaye.

Alakenhe-arteke, nhenge arrpenhe areyele anwernenhe akurne mpwaremele, anwerne itnenhe ilpernetyakenhe anerlenga.

¹³ Anwernenhe akurne-werne-atheke akngetyalaye.

Anwernenhe akngarte-iwaye akurne-ketye.’”

¹⁴ Jesus alakenhe-arlke itneke angkeke, “Angwenhele apeke arrekantherre akurne mpwareme, arrantherre anteme itnenhe ilpernetyakenhe anetyeke. Kele Akngeye alkere akertne-arenyele arrenhantherrenhe ilpernetyakenhe aneme nhenge arrantherre akurne mpwarerlenga. ¹⁵ Kenhe arrantherre apeke tyerrtye arrpenhe areye ilpernemele aneme itnekenge ipeltye-irretyakenhe anemele itne arrekantherre akurne mpwarerlenga, kele Akngeye arrekantherrenhe alkere akertne-arenyele arrenhantherrenhe ilperneme ipeltye-irretyakenhe anemele nhenge arrantherre akurne mpwarerlenga.”

Merneke arrangkwe anemele Ngkarteke angketyeke

¹⁶ Jesus angkeke, “Arrantherre apeke-arle merne arlkwetyakenhe Ngkarteke angkerlte-anetyenhenge. Kenhe arrantherre apeke alakenhe mpwaremele artwe arrpenhe areye angwareketyenge urrtiyirremele-arle mwerre akwele anerlte-aneme. Tyerrtye yanhe arrpenhe areyele aretyenhenge ahentye-anemele merneke arrangkwe anemele, itnenhe akwele tnaketyenhenge. Nhenge itne-arle arlpmenye inngerreke arrernalhemele untherlte-apemele alhwarrpe akwele arrpenhe areyele itnenhe aremele alakenhe akwele itirretyenhenge, ‘Yewe, arratyae apelaye, tyerrtye mwerre nhenhe areye-arle arlkwetyakenhe-arle Ngkarteke angkerrirretyenhenge.’ Kenhe the akenhe arrenhantherrenhe arratyae-arle ileme, Ngkartele itnenhe aremele rarle itnenhe tnaketyakenhele, tyerrtye areyele-arle itnenhe tnakemele arekenge. ¹⁷ Unte apeke-arle merne arlkwetyakenhe Ngkarteke angketyenhenge, alte ngkwinhe comb-eme-ilehemele inngerre ngkwinhe kwayele alhewelhaye. ¹⁸ Kele arrpenhe areyele ngenhe aremele itne itelaretyakenhe unte-arle merne arlkwetyakenhe. Kele Akgayele-ante-arle ngenhe areke nthakenhe-arle-irreke. Areke-arle iperrenge Re ngenhe arne mwerre areye anthirtnetyenhenge.”

Arne ahelhe nhenhe-arenye areyeke arnterre

*itirretyale**(Luke 12:22-34; Luke 16:13)*

¹⁹ Jesus angkeke, “Arne arrpe-anenhearlke, apwerte ngkweltye-arlke inetyale alengke-iwetyeke arrantherre apmere ahelhe nhenhele anepanemele, itne-arle akurne-irretyenhenge. Apmere ahelhe nhenhele interrke areyele-arle arne ingkirreke arlkweme. Anyelngalthe areyele-arlke anteme apmere arrekantherrenheke irrperlenge anyelkngale inetyenhe arne yanhe areye. ²⁰ Kele ahelhe nhenhele anerlte-anemele arrantherre Ngkartekke akwete urrkapewarretyeke re anteme arrekantherre arne mwerre akngerre areye renhe-arle akngakemele arrerneme arrekantherre alkerenge. Alkerele akenhe arne itne mwerre akwete-arle aneme, apmere yanhenge-arle arne angkweye-irretyeke arrangkwe-arle interrkeke-arlke arrangkwe-arle, anyelngalthe areyeke arrangkwe. ²¹ Unte apeke-arle ahentye-aneme arne alkere-arenye utnengeke unte-arle arne ahelhe-arenye areyeke ahentye-anemele unte-arle arne itneke akwete-arle itirrekele anteme. Unte apeke arnterre ahentye-aneme arne alkere-arenye utnenge itneke unte alkngwirretyeke arne ahelhe-arenye areyeke alkere-arenye utnengeke anteme itirremele imerte Ngkartekke-ante akangkwe-irremele.”

Anwerne ingkirre alkngenthele anerlte-anetyeke

²²⁻²³ Jesus angkeke, “Alknge ngkwinhe-arle alkngenthe-arteke tyerrtye ngkwinheke. Alknge

mwerre apeke unte mwerre aretyeke, unthemele mwerre. Kenhe alknge ngkwinhe akurne apeke, ingwemertele aneme-arteke, aretyeke arrangkwe-arle, unte itelaretyakenhe-arle irreme. Alakenhe-arle, unte apeke akwetethe mwantye-mwantyele arrpenhe areye antherle-anemele kele utnenge alkngenthe-akerte anetyenhenge. Kenhe unte apeke arne areye atnure-irremele atnyenemele, kele utnenge apele ingwemerte-arle anetyenhenge.”

Apwerte ngkweltye-akerte

²⁴ Jesus angkeke, “Tyerrtye-arle akngerrepate atherreke urrkapetyeke arrangkwe-arle. Re apeke-arle arrpenheke impenele awelhememe, arrpenhe irlpe artepele aweme. Re arrpenhe yanheke apeke-arle ahentye-arle-aneme arrpenheke akenhe re ahentye anetyakenhe apeke-arle. Alakenhe-arteke, unte apeke apwerte ngkweltyeke ahentye-anemele kele unte Ngkartek ahentye-anetyakenhe-arle, Unte Ngkarte uthene mane uthene anyentelhe-iletyeke arrangkwe-arle imerte itirremele anteme. Unte Ngkarte anyenteke-ante akangkwe-irretyeke-tetye, mane ngkweltyeke itirretyale.”

Arne iwenhe apeke areyeke itirretyalaye

²⁵ Jesus anteme angkeke, “Arlte arrpenheme arrantherre apeke arnterre itirremele alakenhe, ‘Nthenhenge-ame anwerne merne inetyenhe anwerne anhelke anetyenhenge, kwayte antywetyeke anteye? Nthenheke-ame mantere ineme anwerne untyetye anetyeke?’ Kenhe the akenhe arrekantherre ileme, Ngkartele kwenhe

anwernenhe mpwareke mwerre anetyeke. Re anwerneke alkngwirretyakenhe anwernenhe ipmentye-iwetyakenhe, anwernenhe arntarnte-arerle-anetyenhe. Kenhe nhenhe ikwerenge-ntyele anwerne merneke-arlke mantereke-arlke itirrewarretyale.

26 “Thipe areye aremele itirrewarraye, itne ntange areye-arlke ahelheke ngkernewarretyakenhe merne lyapelhe-iletyeke, arrangkwe-arlke. Nhenge ntange mpenger-irrerlenge, itne-arlke kutyewarretyakenhe-arlke apurtelhe-ilemele apmere itnekenhe-werne akngirtnewarretyeke arlte arrpenhele arlkwerrirretyeke, arrangkwe-arlke. Kenhe itne Ngkarte merneke apayuthnetyeke arrangkwe-arlke, re itnenhene arntarnte-arerle-aerlenge. Kenhe Ngkarte arrekantherre ahentye anthurre aneme thipe areyenge arntwarre ulkere. Yanhe ikwerenge-ntyele merneke akwenpe anerrirraye itirrewarretyale. **27** Iwenheke-ame arrantherre merneke itirrewarreme? Arrantherre merneke itirrewarremele, arrenhantherrenhe itethe-iletyakenhe, arrangkwe-arlke.”

28 Jesus alakenhe akwete angkeke, “Kele iwenhenge-arlke akenhe arrantherre mantereke itirrewarreme? Antethe itnenhene araye, itneke itirreke nthakenhe-arlke itne lyaperlenge, mwerre anthurre-arlke itne aneme, kele itne-arlke urrkapetyakenhe-arlke mantere itnekenhe mpwaretyeke irrpetyenhenge. **29** Kenhe arrantherre itelarerrireme artwe akngerrepate Solomon arritnye aneke, arrule anthurre akngerrepate anetyarte, rarle mantere mwerre

akngerre areyeke-arlke irrpetyarte. Kenhe antethe nhenhe areye ikwerenge mwerre akngerre ulkere. ³⁰ Atherrke antethe-akerte-arle itne akenhe akwete anthurre arruleke-atwetye anerrirretyeke arrangkwe-arle, akweke ware, lyeteke-atwetye ware itne anerrirreme. Kele antyerrke-irremele, urele anteme ampeme uyerretyeke-ante. Kele-arle itne akweke ware aneke, Ngkartele akenhe atherrke renhe mwerre akngerre akwete-arle mpwareme. Alakenhe-arle re atherrkeke mpwareme, kele re mantere antheme-arle arrantherre ahentye-anemenge, arlte lyetenyenge. Kenhe arrantherre akenhe itirreme rarle uyarne mpwaremeke-athene.

³¹ “Kele yanhenge itirretyale alakenhe ware angkaye, ‘Ayenge akunye-apenhe, kватые uthene merne utheneke arrangkwenge, ayenge-ame nthakenhe-irretyenhe? Nthenhenge-arle-ame the inetyenhe?’ Alakenhe-arlke itirretyale angkemele, ‘Ayenge akunye-apenhe, mantere atyinhe-arle alterrelhekenge. Nthakenhe-arle-ame ayenge irretyenhe? Nthenhenge-ame the mantere inetyenhe irrpetyeke?’ ³² Ayenge alakenhe angkeme, alakenhe rarle Ngkarteleke akutne areye-arle itirrerlte-anemenge. Kenhe Ngkartele-arle ingkirrenyeke anthurre itelareme iwenheke-arle arrantherre ahentye-anemeke re anteme arrenhantherrenhe anthemele-arle. ³³ Kele arrantherre akenhe arne atningkeke itirrewarretyale anetyeke, ware, kele anerlte-anaye. Kele ikwere-ante akwete itirrerlte-anemele anaye Rarle arrenhantherrenhe akwetethenhe-arle arntarnte-arerlenga. Ikwere

aywerrkele akangkwe-irremele iwenhe apeke renhe-arle re arrekantherre angkeme iparrpele mpwarewarre, re anteme arrenhantherrenhe merne anthemele mantere-arlke, arne atningke arrpenhe areyeke-arlke arrantherre ahentye-anerlenge, arlte lyetenyenge. ³⁴ Arne areye ingwentheke inetyeke itirrewarretyale. Kele itneke alakenhe itirrewarretyale, ‘Nthenhengentyele-arle-ame anwerne arne inetyenhe?’ Arrantherre itelareme yanhenge anteme-arle Ngkartele arrekantherre anthetyenhe, arrantherre anteme arnsterre itirrewarremele anetyale arlte arrpenheke, arrantherre itirrewarraye lyeteke-arle arrantherre ahentye-anemeke-ante.”

7

Angketyale tyerrtye arrpenhe-arle akurne akwele anemeke

(Luke 6:37,38,41,42)

¹ Jesus-ele apententye akngerre ikwerenhe areye akaltyele-anthetyame alakenhe, “Kenhe arrantherre apeke arrpenhe areye ilperneme, Ngkartele anteme arrenhantherrenhe ilperneme. ² Nhenge arrantherre apeke arrpenhe areyeke angkemele itnenhe akurne akeme, Ngkarte alakenhe-arle angkeme arrenhantherrenhe akurne akeme. Kenhe arrantherre akenhe tyerrtye arrpenhe areyeke angkemele itneke akangketyeke mpwaremele itnenhe ilpernetyakenhele kele arrenhantherrenhe Ngkartele-arle alakenhe akangketyeke mpwaremele ilpernetyakenhele.

3-5 “Iwenhenge-arle-ame arrantherre akurne-irreme arrpenhe areyeke apale angkemele itnenhe arratye-iletyeke akwele? Arrantherre itirrewarraye arrekantherre-urrke, urreke arrantherre arrpenhe areyeke akenge itirretyenhenge. The arrekantherre arratye ileke arrantherre itelarerrirretyeke arrantherre akurne mpwarerlenga kele Ngkarte-kenhe arrpenheke anteme angkemele arrantherre apeke renhe aremele akurne-irrerlenga.”

6 Jesus-ele itnenhe akwete akaltyele-anthetyame, “Angkentye Mwerre Ngkarte-kenhe kwenhe atyeperre anthurre. Kele arlte arrpenheme arrantherre angkentye nhenheke angkemele kele tyerrtye arrpenhe areye akenhe akangkwe-irretyakenhe-arle. Kele itne apeke ipmentye-iweme iwenhe renhe itneke arrantherre-arle ilerlenga, itneke awethe ileyalyaye. Nhenge tyerrtye itne akenhe akngwelye ahe akngerre-arteke, pike-pike-arteke-arlke. Arrantherre apeke akwete angkentye Ngkarte-kenhe itneke mwerre ilerlte-apemele itne-arle irlpe martelhentye-arle akangkwe-irretyakenhe, itne anteme arrekantherre ahele angkerrememe, akngwelye nhenge ahe akngerrele tyerrtye uthneme, alakenhe athewe. Itne anteme akurne-ileme angkentye arrantherre-arle angkeme, tyerrtyele nhenge pike-pike merne anthemele imerte itne ahelhe urrkngake akwernemele imerte ulthemele, alakenhe akwele itne angkentye renhe akurne-ilentye akngerre. Arrantherre akenhe Angkentye Mwerre Ngkarte-kenhe

akwete itneke ilerle-apetyale anetyeke-arle, kele impetyeke ante, angkentye yanhe-arle atyeperre anthurrenge.”

*Akwete anthurre Ngkarteke angketyeke,
mwernte-irretyale
(Luke 11:9-13)*

7-8 Kele Jesus-ele itnenhe akaltyele-antheke alakenhe Ngkarteke angketyeke, “Kele, angwenhele apeke arne iwenhe-iwenheke renhe Ngkarteke akwete anthurre apayuthnerle-aneme re renhe ineme-arle. Kenhe angwenhe apeke arne iwenhe ikwere apale unthemele kele re renhe aretye-alheme-arle. Kenhe angwenhele apeke re arriwe renhe ltare-atwetye-alhemele, Ngkartele renhe altywere-ileme re Ikwere-werne alhetyeke renhe aretye-alhetyeke. Alakenhe ikwerenge anteme arrantherre Ngkarte renhe arne iwenhe-iwenhe apeke ikwere apayuthnerrirretyeke, kele Re arrenhantherrenhe anthetyenhe-arle. Kenhe arrantherre apeke Ikwere akwete-arle untherlte-anemele, Re kele arrekantherre imernelheme. Kenhe arrantherre apeke arriwe renhe akwete-arle ltare-atwerlte-aneme, kenhe Re kele arriwe renhe arrekantherre altywere-ileme-arle arrantherre-arle irrperrirretyenhenge.

9 Kenhe arrantherre nthakenhe-arle irretyenhe nhenge alere arrekantherrenhele apeke merneke apayuthnerlenga? Arrantherre-ame renhe apwerte anthetyenhe? Arrangkwe!

10 Nhenge re arrenhantherrenhe irrpenngeke apayuthnerlenga, renhe akenhe apmwe

anthetyakenhe. Arrantherre renhe irrpennge-arle anthetyenhe arlkwetyeke.

11 Kele arrantherre ampe arrekantherrenhe areye arne mwerre antherlte-aneme itne arrenhantherrenhe apayuthnerlenge, kele arrantherre-arle akurne akwete mpwarerlte-anemenge. Kele Akngeye arrekantherrenhe alkere akertnele-arle anemeke, arrantherre itirrewarremele iwenhe-arteke-arle Re aneke? Rarle nhenge mwerre anthurre aneme, arrekantherrenge mwerre akngerreulkere. Re akenhe arne mwerre akngerre aywerrkele anthentye akngerre-arle arrantherre apayuthnerlenge.”

12 Jesus angkeke, “Arrantherre ahentye-aneme tyerrtye arrpenhe areyele mwerre aywerrkele mpwaretyeke arrekantherre. Kele arrantherre-arlke akenhe akwete mwerre aywerrkele mpwaretyeke tyerrtye arrpenhe areyeke alakenhe-arle Moses uthene artwe angkentye Ngkartekenhe awemele ilerle-apentye akngerre areye uthenele-arle intelhe-ileke arrule anthurre, anwerne alakenhe mpwaretyeke.”

*Iwerre urlpmeke unthemele renhe apentetyeke
(Luke 13:24)*

13-14 Jesus angkeke, “Ingkirrekele awerrirraye! Iwerre atherre kwenhe aneme tyerrtye areyele apentetyeke. Iwerre anyente arriwe anteke-akerte-arle aneme, iwerre arrpenhe akenhe urlpme anthurre-arle, arriwe urlpme-akerte. Kenhe iwerre anteke re akenhe impeltye anthurre-arle mwerre anthurre, iwerre

ikwerenge akenhe tyerrtye atningke anthurre-arle irrpenheme arriwe antekenge. Kele iwerre re akenhe apmere akurne-werne-arle tyerrtye areye Ngkarte-ketyenge akngakemele irrare anerlte-anetyenhe. Kele iwerre urlpme re akenhe impeltye anetyakenhe-arle lterrike anthurre apentetyeke, tyerrtye urrpetye warearle akenhe arriwe urlpme ikwere irrpenheme iwerre renhe apentemele. Kele iwerre re akenhe alheme apmere mwerre akngerre ikwere-werne Ngkartenge-arle anyente-irremewerne, akwetethe-arle akangkentye anerlte-aneme-werne. Kele, arrantherre iwerre urlpme ikwere irrpenhemele akwete urlpme renhe apentetyeke.”

*Arrantherre ameke-arelhetyeke
(Luke 6:43-44)*

¹⁵ Jesus-ele atyewe ikwerenhe areye alkngarre-ileke alakenhe, “Ameke-arelhewarraye akwetethe yanhe areye-ketye urrtiyirremele ilemenge itnarle angkentye Ngkarte-kenhe ilerlte-apeme akwele. Itne akngwelye artnwere-arteke yepe-yepe yenpeke irrpemenge yepe-yepe akwele anteme, itne-arle alengke-iwelheke iperre, apetyewarremele anteme yepe-yepe itnenhe uthnemele arlkwetyeke. ¹⁶ Kele arrantherre itnenhe alhengke-arle-areme itne-arle mpwaremenge, arrantherre arerrirremele itne akurne atningke mpwarerlenge kele arrantherre itelareme-arle urrtiyirrentye akngerre nhenhe areye. Merne ntange areye-akerte itelaraye, merne kripethe areye-arle

arne lyeke-lyekenge lyapetyakenhe-arle, nhenge merne utyerrke arne ilpeyenge lyapetyakenhe-arle. ¹⁷⁻¹⁸ Arrantherre itelareme arne mwerrenge-ante kwenhe merne ntange lyapeme mpenze-irremele ikwemeye-irremele, kenhe arne akurnenge akenhe merne akurne-arle aneme. Nhenge alakenhe-arlke arne mwerrenge merne akurne-arle lyapetyakenhe aneme, alakenhe anteye arne akurnenge merne mwerre lyapetyeke arrangkwe-arle. Awemele anteme akaltye-irraye angkentye nhenhe areyeke, angkentye Ngkarte-kenhe awemele ilerle-apentye akngerre areyele mwerre-ante-arle mpwareme, kenhe angkentye Ngkarte-kenhe akngarte-iwentye akngerre areyele akenhe akurne-ante-arle mpwarerlenga. ¹⁹ Arrantherre itelareme artwe garden-eke-artweye, re areme arnele merne ntange akurne akwete atnyenerlenga, re ultakemele-arle ureke iweme. ²⁰ Alakenhe-arteke, arrantherre arerrirremele angkentye Ngkarte-kenhe awemele ilerle-apentye akngerre areyele akurne mpwarerlte-aneme kele arrantherre itelarerirreme itne-arle urrtiyirreme-arle angkentye Ngkarte-kenhe ileme.”

Jesus-arle angketyenhe rarle tyerrtye arrpen-heme areyeke akutne-arle
(Luke 13:25-27)

²¹ Jesus awethe angkeke, “Arrantherre itelareme arrpenhemele ayenge-arle akngerrepare ilemenge. Arrpenhe areye akenhe urrtiyirremele ileme ayenge-arle akwele akngerrepare

itnekenhe. Kenhe itne akenhe akangkwe-irretyakenhe awetyakenhe-arlke mpwaretyakenhe Ngkartele-arle itnenhe ilekeke. Alakenhenge anteme Ngkartele itnenhe atyewe aketyakenhe itnenhene arntarnte-aretye-arlke-akenhe akngerrepatele-arteke. ²² The arrekantherre ileme arlte ingkernenge tyerrtye areye tnetyenhe Ngkartenge arrekwele-arle atningkele ayenge-arle akngerrepate ileme areye akenhe alakenhe-arle angketyenhe, ‘Akngerrepate! Arritnye ngkwinhe angkeke-arle iperre anwerne angkentye ngkwinhe tyerrtye areyeke ilemele, anwerne-arle arrentye areye aywepeke tyerrtye areye-ngentyele arritnye ngkwinhe ilemele, awethe ante, arritnye ngkwinhe ilemele, anwerne arne ilyernpenye atningke ngangkerele mpwareke.’ ²³ Kenhe ayenge akenhe itneke alakenhe-arle angkirtnetyenhe-arle, ‘Arrangkwe, the arrenhantherrenhe itelaretyakenhe-arle. Arrantherre akwetethe-arle akurne mpwaretyarte Ngkartek. Atyenge-ketyenge alhaye!’ ”

*Ayeye apmere artentye akngerre atherre-akerte
(Luke 6:47-49)*

²⁴ Jesus angkeke, “Awerrirraye! Tyerrtye angwenhele ayenge-arle awemeke nthakenhe-arle angkeke-arle iperre, renhe anteme aywerkele mpwaremele, artwe-artekele-arle ilthe ikwerenhe apwerte athirnteke-arleke arteke. Nhenge artwe nhenhe itelarentyele-arle apwerte athirnte angwareke apmere arteke re

apwerteke-arleke mwantyele arteke, rarle lterke anekenge. ²⁵ Ikwerenge-ntyele kватье akngerre apetyeke imerte anhememe, lherenge-arleke kватье urewe akngerre anteke-irreke kele apmere re akenhe atnyetyakenhe akwete-arle anerlenga. Rlke akngerrele-arle werneke apmere renhe ankerte-iwemele, kele atakelhetyakenhe akwete-arle anerlenga, artwe rarle apwerte athirnteke artekenge apmere ikwerenhe, mwerre akwete tneke akngelhetyakenhe-arlke. Alakenhe arrantherre apeke angkentye atyinhe awerrirreke-arle iperre, renhe anteme aywerkele mpwaremele, kele arrantherre atnyetyakenhe, kele lterke-arle aneme arrekantherre apeke akurne-irrelenga. ²⁶ Kele tyerrtye angwenhele apeke aweke-arle iperre nthakenhe-arle ayenge angkeke imerte ipmentye-iwemele-arle rarle artwe arrpenhe apmere artentye akngerre-arteke-arle. Artwe nhenhele akenhe arerte apeke lhere itereke-arle apmere ikwerenhe arteke ahelhe urrkngelle-arle. ²⁷ Ikwerenge-ntyele kватье akngerrele anheke, lherele kватье urewe akngerre anteme irreke anteke-irremele. Kватье ikwerenge akenhe rlke akngerrele-arle werneke apmere renhe ankerte-iwemele, iparpe anthurre apmere re atakelheke imerte atnyemele uyerretyeke-ante.”

Jesus ilernpenye angkeme

²⁸ Jesus-arle angkentye nhenhe areyeke angkeke iperre tyerrtye renhe-arle aweke itne arnterre anthurre apatewarreke, rarle nhenge

ilernpenye anthurrele angkerlenge. ²⁹ Alakenhe-arle nhenge Jesus-clarle tyerrtye areye akaltyele-anthetyarte, re itneke angkentye ileke Ngkartelarle renhe anhekenge. Kenhe angkentye Moses-kenhe akaltyele-anthenhe-anthenhe areyele tyerrtye itnenhe akaltyele-anthetyarte, itne itneke angkentye itnekenhe-arrpe ileyarte, angkentye itnekenge-arrpe ware.

8

*Jesus-ele artwe rlkerte angkwerre-iweme
(Mark 1:40-45; Luke 5:12-16)*

¹ Jesus apwerte akertne-ngentyele atnarn-pemele iperre tyerrtye atningke anthurrele renhe apentewarreke. ² Kenhe artwe anyente utyene irkelhe-irkelhe ilentye akngerre-akerte apetyeke nhenge Jesus aremele re amperele-arlenge tnemele renhe apayuthneke, “Jesus-aye, ayenge utyene nhenhe angkwerre-iwaye. The itelareme unte-arle ayenge angkwerre-iwemere, unte-arrpe apeke awelhemele.” ³ Kele Jesus-ele iltye ikwerenhele renhe anpeke, ik-were angkirtnemele, “The ngenhe angkwerre-iwetyeke ahentye-aneme.” Kenhe iparrpe anthurrele utyene akngerre uyerrerlenge, yenpe alyere-alyere-irremele. ⁴ Kele anteme Jesus ikwere angkeke, “Arrpenhe areyeke ilelhetyale tharle ngenhe angkwerre-iweke. Angkentye Moses-kenhe alakenhe angkeme: Kenhe arrewe kwertengerle tyatye-arenyeke imernel-hetyeke alhaye ngenhe-arle angkwerre-iwekeke. Kele re ngenhe areke-arle-iperre ilemele yenpe

ngkwinhe ulkere anteme, kele thipe akweke atherre inaye ampetyeke Ngkartek yanhe atherre tyawerrellyele anthetyenhenge. Kele mwerrantye mpwareke-ngentyele itne itelar-errirretyenhenge unte-arle mwerre-irrekenge.”

Jesus-ele urrkapentye akngerre thultye-kenhe angkwerre-iweme
(Luke 7:1-10)

⁵ Nhenge Jesus-arle apmere nhenge Capernaum-werne alherlenga thultye akngerrepate ikwere-werne apetyeke. Artwe nhenhe apmere Rome-arenye thultye Rome-arenye 100-eke alartetye-arle apmere Capernaum-ele. Re anteme Jesus-eke angkeke, alakenhe renhe apayuthnemele, ⁶ “Akngerrepate anwerne-kenhe, urrkapentye akngerre atyinhe rlkerte apmerele interle-aneme, akngelhetyakenhe-arlke arekare awelhemele.”

⁷ Awemele Jesus ikwere alakenhe angkeke, “Kele mwerre-arle! Ayenge iparrpe alheme renhe angkwerre-iwemele mwerre iletyeye.”

⁸ Kenhe akngerrepate thultye-kenhe re akenhe angkerlenga, “Arrangkwe akngerrepate, unte kwenhe akngerre aneme, kele ayenge akenhe artwe akurne akweke ware-arle ayenge apure-arle-irreme unte apmere atyinhe-werne apetyetyeke. Unte nhenhenge ware angkeye arrwengkelthe re nhenhenge-ntyele ware mwerre-iletyenhenge. ⁹ The itelareme unte-arle Ngkartek mpwarepareme. Kenhe Re ngenhe ileme mpwaretyeke, nge Renhe awemele, kele nge mpwareme-arle. Alakenhe rarle

ayenge warrke-irreme Rome-arenye areyeke akngerrepare. Kenhe ayenge akngerrepare aneme thultye arunthe anthurre-akerte. Ayenge anyenteke angkemele yanhe-werne alhetyeke, kenhe re iparrpe anthurre alherlenga. Kenhe ayenge apeke anyenteke angkemele, "Nhenhe-werne apetyaye!" Kele re iparrpe anthurre apetyeme. Kenhe ayenge anyenteke angkemele mpwaretyeke, kenhe re iparrpe anthurrele mpwarerlenga. Kele unte-arteke rarle. Kele unte-arle angkemele arteke kenhe iparrpe anthurre urrkapentye akngerre atyinhe re mwerre-irrerlenga."

10 Nhenge Jesus-ele nhenhe awemele re apatemele anthurre. Re imerte tyerrtye areyeke angkemele renhe-arle apentewarremake, "The arrenhantherrenhe arratyte ileme, artwe nhenhe thultye atningkeke akngerrepare-arle anemeke re Jew anetyakenhe-arle, re akenhe arratyte itirreme tharle mpwaretyeke, Jew areye-arteke kwenye. Apmere nhenhe Israel-enge the arrpenhe aretyakenhe artwe nhenhe-arteke-arle arratyte itirremeke tharle iwenhe apeke renhe mpwaretyeke. **11** The arrekantherre arratyte ileme, tyerrtye apmere arrpe-anenhe-ngentyele Jew anetyakenhe areye apetyetyenhe. Itne-arle apetyetyenhe Abraham-eke anyente-irretyeke, Isaac-eke, Jacob-eke-arlke akangkemele merne apurtele arrpenhe areyenge arlkwetyenhe Ngkarte akngerrepare anerlenga itnenhe arntarnte-aretyenhele. **12** Kele Jew arrpenhe areye itnekenge apurte anetyeke arrangkwe-arle. Ngkartele-arle itnenhe arrule

akngakeke Ikwerenhe areye anetyeke. Itne-arle akenhe Ikwerenhe areye anetyeke ahentye-anetyakenhe-arle anekenge Re akenhe itnenhe uliletyenhe, kenhe itne ingkirreke arrangkemele artitye lterrkemele utsyene-ante-irretyeke alkngultyeke-ante artnemele anerle-atherre-anetyenhe.”

¹³ Jesus anteme thultye akngerrepateke angkeke, “Kele, apmere-werne alpaye! The urrkapentye akngerre ngkwinhe mwerre-ileke unte-arle itirreke the mpwaretyeke.” Ikwerenge anteme urrkapentye akngerre re iparrpe anthurre mwerre-irreke.

*Jesus-ele tyerrtye arunthe itnenhene
angkwerre-iweme*

(Mark 1:29-34; Luke 4:38-41)

¹⁴ Jesus apmere yanhe ikwerenge-ntyele imperle-alhememele apmere Peter-kenhe-werne alheke nthenhele-arle mwerikwe Simon-kenhe rlkerte anthurre apmere kwenele intekenge, amperlenge anthurre re awelheke. ¹⁵ Jesus-ele iltye ikwerenhe apaneke, iparrpe anthurre rlkerte imperle-alhememele arratintyeye, arelhe re akenhe mwerre-arle-irrrelenge. Re akeme-irrememele merne-arlke itetyeke. Re anteme Jesus-arlke anthemele arrpenhe areye-arlke.

¹⁶ Kele-arle alernnge irrpeke-arle arrpenhe areyele apmere yanhe ikwere areye-ngenetyele arrentye areye-akerte Ngkartewerne akngetyewarreke re itnenhe mwerre-iletyeke. Rarle angkentyele ware arrentye itneke-ngenetyele arratelhe-ilemele aywepeke,

itne mwerre-irreke. Jesus-ele rlkerte areye ingkirreke angkwerre-iweke. ¹⁷ Nhenge Jesus-ele tyerrtye areye alakenhe angkwerre-iweke, alhilentye Ngkarte-kenhe arraty-irretyeke, angkentye Ngkarte-kenhe awemele ilerle-apentye akngerre Isaiah-ele intelhe-ilekenge-arteke arrule anthurre pwekeke-arleke alakenhe,

“Re arrengkwelthe anwerne-kenhe areye uyerrelhe-ileke

anwernenhe mwerre-ilemele.” *Isaiah 53:4.*

*Ayeye Artwe Atherre Jesus apentetyeke-arle itirreke-akerte
(Luke 9:57-62)*

¹⁸ Jesus-ele areke tyerrtye atningke anthurre ikwere-werne apetyewarremele tnerirrerlenge re angkeke apententye akngerre ikwerenhe areyeke, “Mpe, boat-eke antyemele alhetyek-eye ahelhe irntwarre-werne kwayte alayele arrengakwe-werne!”

¹⁹ Nhenge re angkeke alhetyeke, artwe angkentye Moses-kenhe-arle akaltyele-anthetyarte apetyeke Jesus-eke angkemele, “The ngenhe apenterle-apetyeke nthenhe-werne apeke unte alherlenge.”

²⁰ Kele Jesus akenhe ikwere angkerlenge, “Kere rapite itne alhwengele anerrirreme, kenhe thipe areye akenhe arne akertnele antywele anerrirreme. Kenhe ayenge akenhe, Alere alkere-arenye apmere ahelhe nhenhele-arle akweke intekte, apmere-kwenye-arle, arrangkwe. Ayenge-arle akwetethe re intetyeke. Ayenge-arle akwetethe-arle unthetyarte.”

21 Kele apententye akngerre Jesus-kenhe arpenhe anteme ikwere angkeke, “Ayenge apele alhampwe-irreke-arle. Ayenge urekeke impaye ayenge-arle apmere-werne alpetyeke, akngeye atyinhe artetyeke. Kenhe yanhe iperrele the ngenhe apenterle-apetyenhenge.”

22 Kele Jesus akenhe ikwere alakenhe-arle angkirtnerlenge, “Arrangkwe, lyete nhenhe ayenge apentaye, atyenge akangkwe-irretyakenhe areyele renhe iperteke artetyeke re ilwerlenge.”

Jesus-ele rlke nttertelhe-ileme

(Mark 4:35-41; Luke 8:22-25)

23 Kele Jesus boat-eke antyemele kwatye alayele tyanemele alhetyeke-irreme apententye akngerre areye-akerte. **24** Itne alaye talkwe alherlte-iwepiwemele, rlke akngerrele wernerlenge impeltye-ngentyele. Kwatye alyepe boat ikwere-arleke irrpeke, itne akenhe atere-irrerirrerlenge alhekwarle-irrerirre-ketyenge. Kenhe Jesus boat ikwerele ankwe-interle-aperlenge akwenpe anthurre. **25** Kenhe ikwerenhe areyele akarrelhe-ilemele akemelhe-ilerrirremele angkerirreke, “Akngerrepataye! Anwernenhe itetheke mpwaraye, alhekwarle-irrerirre-ketyenge!”

26 Kele Jesus itneke angkirtneke, “Iwenhekeame arrantherre atere-irreme? Arrantherre itirretyakenhe tharle arrenhantherrenhe ulyeyele arntarnte-arerle-aneme.”

Yanhe ikwerenge-ntyele, re akeme-irremele rlke mwantye-irretyeke kwatye arnmarre-arle akweke-irretyeke ileke. Iparrpe anthurrele

rlke atnengke-irreke kватye arnmarre akweke-irreke. ²⁷ Itne apatemele angkerreke, “Artwe iwenhe-arle-ame nhenhe re? Re rlke uthene kватye arnmarre uthene akweke-irretyeke ileke, kenhe ratherre atnengke-irrerlenge-arle!”

Jesus-ele arrentye itnenhene artwe atherrengeleye aywepeme

(Mark 5:1-20; Luke 8:26-39)

²⁸ Kele Jesus apententye akngerre ikwerenhe areye-arlke kватye alayenge intwarreke-irremele itne alherlte-iweke apmere Gadara arritnye-werne. Apmere yanhe re, arratyte apwerte akngerre areye-arle interrirrume inteye arpe-anenhe aneme-akerte. Yanhe ikwere areye itne ilweke-arle areye inteye kweneke arrernewarretyarte. Kenhe artwe arerte atherre apmere yanhe ikwerekere anerle-anerretyarte, arrentye atningke areye-arle ikwere-atherrelearlengenhe aneme-akerte. Tyerrtye apmere ikwere-arenye areye iwerrele inteye itwele alhetyakenhe ahe-akngerre ikwere-atherrekeye. ²⁹ Ratherre untetyemele Jesusnge arrekwele tneke, arrentye areye ikwere arlkemele, “Alere Ngkarte-kenhe, ingkirreke anthurreke akngerre anerlengenhe-arle. Unte-ame anwernenhe nthakenhe-iletyenhe? Unte-ame anwernenhe apmere akurne anthurre-werne yernetyeke lyete ware, urrekeke impetyakenhe?”

³⁰ Kenhe pike-pike atningke apwerte itwele tnerrirreke arlkwerrirremele. ³¹ Arrentye areyele Jesus renhe ileke, “Unte apeke nhenhe

atherrenge arratelhe-ilemele anwernenhe pike-pike itneke-werne yernaye anwerne tyerrtye itne-kenheke irrentyeke.”

³² Kele Jesus itneke angkirtnerlenga, “Kele mwerre-arle, pike-pike itneke irrperrirraye.”

Iparrpele arrentye itne artwe yanhe atherrenge-ntyele arratewarremele pike-pike itne areyeke-arleke irrperrirreke. Kele imerte pike-pike itne apwerte kwene-werne unterlte-iwemele apwerte arnke-werne, ingkirreke akertne-ngentyele atnyerrirremele kватье kweneke, ingkirreke anthurre anteme itne alhekwarle-irrerirreke.

³³ Kenhe tyerrtye yanhe itne pike-pike itnenhene arntarnte-arerlte-anemele arerrirreke nthakenhe-arle-irrerne, kele itne anteme-arle apmere-werne-arleke-irreme. Kenhe itne ingkirrenyekeke ilerrirreke nthakenhe Jesus-ele mpwareke-akerte, artwe atherre-arle arrentye areye atnyeneke-akerte-arlke. ³⁴ Kele ikwerengentyele, tyerrtye apmere yanhe-arenye itne Jesus-eke atwareemele alherlte-iweke. Itne renhe aremele, Gadara-arenye yanhe areye atere-irrerirremele, ikwere angkerirreke, “Apmere nhenhenge-ntyele alperlte-iwaye!”

9

Jesus-ele artwe inwerre angkwerre-iweme (Mark 2:1-12; Luke 5:17-26)

¹ Kele Jesus, apententye akngerre ikwerenhe areye-arlke boat-eke antyemele kватье alayele tyanemele alpeke apmere nthenhe re anetyarte-werne. ² Apmereke-irrerlenga, artwe four-pele

artwe anathe antyameke arrernemele inerlte-alheke renhe imerte Jesus-werne akngetyemele. Kele Jesus-ele renhe-arle akngetyewarrekenge aremele itirreke, “Artwe nhenhe areye arratyte itirreme tharle artwe anathe nhenhe mwerre-iletyenheke.” Re anteme artwe rlkerte ik-were angkeke, “Aye artwe-aye, atere-irretyalaye Ngkartele-arle ngenhe ilpernetyakenhe aneme unte-arle akurne mpwarekenge. Rarle ngkwengenge ipeltye-irreke-arle.”

³ Kenhe artwe areyele, angkentye Moses-kenhe akaltyele-anthenhe-anthenhe areyele Jesus awemele, alakenhe itirremele, “Aye! Artwe nhenhele-arle Ngkarte angwareme, re-arrpe-arle Ngkarte akwele itirreme.”

⁴ Kele Jesus-ele itelareke nthakenhe-arle itne ikwere-akerte itirreme imerte itneke angkemele, “Arrantherre akurnentye itirretyale anetyeke!” ⁵⁻⁶ Arrantherre-arle ayenge areke-arle artwe nhenheke ayenge angkerlenga, kenhe arrantherre akenhe iwenhe apeke renhe aretyakenhe-arle aneke. Kele arrantherre apeke-arle atyenge apale itirreme ayenge-arle ware angkerlenga, kele arrantherre itirretyakenhe tharle mpwaretyeke. Kele ayenge lyete angkeme artwe inwerre nhenheke renhe mwerre-iletyeke. Kele arrantherre renhe areme, artwe inwerre nhenhe akngelhetyakenhe akeme-irrerlenga, kele anteme arrantherre itelaretyenhenge nthakenhe-arle ayenge arrekwele angkeke, the, Alere alkere-arenye apmere ahelhe nhenhele-arle akweke intek, angwenhe apeke renhe Ngkartenge ipeltye-ilerreme mpwaretyeke,

Ngkartele anteme renhe ilpernetyakenhe aneme. Re anteme awethe angkeke artwe inwerre ikwere, “Artwe-aye, akeme-irraye, antyame ngkwinhe inemele apmere-werne alpaye!”⁷ Kele arratyre re iparrpe akeme-irreke apmere-werne alpemele.⁸ Kele tyerrtye arunthe angathiele-arle tneke areyele areke-arle itne atere-irremele Ngkartele anteme utsyernemele tnakemele angkeke alakenhe itirremele, “Aye! Arratyelarle Ngkartele artwe nhenhe ngangkere antheke re, ngangkere akngerre-akertele tyerrtye areye mwerre-iletyenhenge.”

*Jesus-ele Matthew akngakeme
(Mark 2:13-17; Luke 5:27-32)*

⁹ Kele yanhe-ngentyele Jesus-ele apmere renhe impemele alheke artwe Matthew arritnye areke iwerre iterele ilthe akwekele anerle-anerlenge apwerte ngkweltye inemele government-eke. Nhenge artwe yanhele tyerrtye areye aremele iwerre ikwerele alherlenge re apwerte ngkweltye itneke-ngentyele inetyame government-eke.

* Jesus anteme ikwere angkeke, “Apetyaye, ayenge apentetyeke.” Kele Matthew akeme-irremele alheke apentetye akngerre arrpenhe areyenge apurte-irremele.

¹⁰ Jesus apentetye akngerre ikwerenhe areye-akerte alheke apmere Matthew-kenhe-werne

* **9:9** Matthew re akenhe Jew-arenye-arle aneke, Re akenhe Rome-arenye government areyeke-arle urrkapetyarte, imerte Jew areyenge tax mane inemele yernetyarte Rome-werne. Jew areye akenhe ikwere ahentye-anetyakenhe-arle anetyarte rarle Jew anetyakenhe areyeke urrkapetyartengen.

merne arlkwetyeke. Kenhe arrpenhe areyele-arlke mane-arle inerlte-anetyarteke arrpenhe areyele-arle akurne mpwaretyarteke itnekenge apurte-irremele merne arlkwerrirretyeke.

11 Pharisee areyele itnenhe areke merne arlkwerlenge Jesus-enge, itne ikwerenhe areye alakenhe apayuthneke, “Aye! Iwenhenge-arle-ame akaltyele-anthenhe-anthenhe arrekantherrenhe apurtele arlkweme apwerte ngkweltye inentye akngerre areyenge tyerrtye akurne mpwarentyte akngerre areyenge-arlke? Re itnekenge apurte-irretyale anetyeke, re kwenhe artwe mwerre areyenge anetyeke.”

12 Kele Jesus-ele itnenhe awemele alakenhe angkerlenge, imerte itneke alakenhe angkemele, “Nhenhe awerrirraye! Tyerrtye mwerre areye ngangkere aretyeke alhetyakenhe-arle! Rlkerte areyele-ante-arle renhe aretyeke alheme.

13 Arrantherre apeke apale itirreme ayenge-arle akwele apetyeke mwerre areye akwele ikngwetyeke. Arrangkwe, ayenge-arle apetyeke tyerrtye akurne areye ikngwetyeke. Akwete anteme itelaretyeke angkentye nhenhe arrpenhele arrule-arle Bible-nge intelhe-ileke. Ngkarte-arle alakenhe angkeke, ‘Kere atwetyale ayenge anthetyeke. Alakenhe-ante-arle ayenge ahentye-aneme; arrantherre arrpenhe areyeke alhwarrpe-irremele alpe-eme-iletyeke. The areme alakenhe arrantherre mpwarerlenge kele ayenge arnterre anthurre-arle akangkeme.’”

Hosea 6:6.

Tyerrtye areyele Jesus apayuthneme merne

*arlkwetyale anetyeke-akerte
(Mark 2:18-22; Luke 5:33-39)*

¹⁴ Arlte anyentele apententye akngerre John kватye akwernentye akngerre-kenhe arrpenhe areye apetyemele Jesus apayuthneke, “Anwerne Pharisee areyele-arlke merne arlkwentye akngerre kwenhe anwerne-arle Ngkarteke angketyeke ante-arle ahentye-aneme. Iwenhenge-arle-ame apententye akngerre ngkwinhe areyele akwetethe merne arlkweme, arraetyakenhele-arlke?”

¹⁵ Jesus itneke angkirtnerlenga, “Nhenge artwele apeke anewe-akemele, atyewe atningke-arle apurte-irremele akangkentyele merne arlkwerrirretyeke. Re itnekenge akwete anemele, itne arlkwerrirremenge akwete. Kele yanhe-ngentyele arrpenhe areyele artwe renhe atyewe ikwerenhenge arntwirrkemele akngeme. Kele alakenhe ikwerenge itne, irrare-irremenge-arle, merne arlkwetyakenhe-arle. Kenhe itne akenhe ayenge arntirrkwemele akngeme apententye akngerre atyinhe areyele merne arlkwetyakenhe-arle anerlenga.” †

¹⁶ Jesus-ele itneke ileke angkentye alengkiwentye mantere-akerte. “Arrantherre itelareme mantere tyerrtye-kenhe ingkweye-irrerlenga altywere-akerte re, artetyeke, re mantere akweke alkarlenga-ntyele aketyakenhe

† **9:15** Alakenhe-arle Jesus angketyame ikwere-arrpe-akerte, re itelareke urreke-arle arrpenhe ikwere ahentye-anetyakenhe itne-arle renhe inetyenhe raketyenhenge imerte renhe irrerlkngé atwemele. Kele atyewe ikwerenhenge areye akenhe irrare-irremele merne arlkwetyakenhe-arle anerlenga.

ingkweye ikwere-arleke arrernetyeke, alterrelheketye alhewerlenge. Kele unte apeke renhe alheweme, mantere akweke alkarle rarle arrerneke re akenhe akweke-arle-irrerlenga imerte alterrelhemele-arle, kele mantere altywere-akerte re akenhe altywere akngerre-arle-irrerlenga.”

¹⁷ Jesus-ele itneke ileke angkentye alengkiwentye arrpenhe ngkwarle-kenhe ayakwethe-akerte. “Awethe anteme angkentye arrpenhe-ulkere nhenhe awerrirraye ngkwarle-kenhe yakwethe-akerte. Artwe arrpenhele mpwareme yakwethe kere yenpe-ngentyele ngkwarle lyetenye akwernetyeke atnyenemele. Kenhe re akenhe yakwethe angkweyeke ngkwarle lyetenye akwernetyeke arrangkwe-arle, re apeke ngkwarle lyetenye thelemele ngkwarle rarle akurne-arle-irrerlenga. Yakwethe angkweyenge, antyer-kenge, alterrelhemele, ngkwarle re altyiwel-hemele ahelhe-werne-atheke-arle. Alakenhe-irreme-ketye anteme re ngkwarle lyetenye renhe akwernemele yakwethe atyete-atyete mwerre lyetenyeke-arleke kele yakwethe re mwerre alterrelhetyakenhe-arle aneme kele yakwethe uthene ngkwarle uthene kele mwerre-arle aneme.” Alakenhe-arle Jesus itneke angkeke itne-arle angkentye ikwerenhe Moses-kenheke-arleke anyentelhe-ileme-ketye.

*Jesus-ele amenhenge atherre angkwerre-iweme
(Mark 5:21-43; Luke 8:40-56)*

¹⁸ Nhenge Jesus-arle itneke angketyamenge artwe Jew areyeke tyatye-arenye akngerrepare apetyeke. Jesus-eke kwene-irremele ikwere

angkeke, “Ampe marle atyinhe apele ilwerne lyete ware. Aretyeke apetyaye, renhe anpemele re itethe-irrirtnetyenhenge.”

¹⁹ Jesus-ele awemele artwe renhe apentenheke, atyewe ikwerenhe areye-arlke apentenheke.

²⁰⁻²¹ Itne ingkerre artwe ikwerenhe apmere-werne alherlte-iweke, kele arelhe rlkerte arrpenhe apetyeke-arle mpwepe-mpwepel. Rarle alhwe itnyetyarte akwetethenhe akwetethe arrule-arrule-ngentyele year 12-peleke-atwetye. Re Jesus-werne angathe-irremele re itirreke, “The nterte-ntertele ware mpwaremele mantere ikwerenhe anpeme, kele ayenge mwerre-arle-irreme.” Kele arratyre re mantere atrartenge ikwerenhe anpeke.

²² Jesus-ele alkngarelhemele renhe areke re renhe mwantye-mwantye-ilemele angkeke, “Akunye-apenhe! The ngenhe angkwerre-iweke unte-arle ayenge arratyre itelarekenge. Apmere-werne alpaye itirretyakenhenge, unte-arle kele mwerre aneme.”

²³ Kele Jesus apmere artwe irrare-kenhe-werne alheke, re apetyemele areke tyerrtye areye akayale artnelhe-ilerrerlenge, arrpenhe areyele horn pewe-ileke irrarele. ²⁴ Re anteme itneke angkeke, “Akeme-irrerirraye, akethe-werne alherlte-iwaye! Ampe nhenhe kwenhe ilwetyakenhe rarle interle-aneme ware.” Nhenhe itne awemele itne atherreke Jesus ikwere, itne-arle itelareke marle renhe kele ilweke-arle.

²⁵ Kele akngeye ampe marle-kenhele anteme itnenhe akethe-werne alhetyeke ileke. Kele Jesus irrpenheke ampe rarle intetyame-werne

imerte renhe iltyenge inemele, kele ampe re akenhe akeme-irrerlenga mwerre anteme-irremele. ²⁶ Tyerrtye areyele awerrirreke ampe akeme-arle-irreke ikwere-akerte imerte angkentye antekelhe-ilemele apmere arrpe-anenhe-werne.

*Jesus-ele artwe alknge pwenge atherre anpeme
imerte alknge altywere-ilemele ratherre aretyeke*

²⁷ Kele Jesus-ele apmere rarle imperle-alheke. Rarle iwerrele alhetyamenge artwe pwenge atherrele renhe apenteke alakenhe arlkerle-aperremele. “David-eke-artweye-aye! Ilerneke alhwarrpe-irraye.” ‡

²⁸ Jesus apmereke-irremele re kwene-werne alpeke, artwe ratherre renhe apentemele kweneke irrperle-anerreke. Kele Jesus-ele renhe-atherrenhe apayuthneke, “Mpwele-ame arratyte itirremele tharle mpwelenhe alknge ulyeyele altywere-ilemere?”

Ratherre angkirtnerlenga, “Yewe Ngkarte, ilerne arratyte itelareme.”

²⁹ Kele renhe-atherrenhe alknge anpeke imerte angkemele, “Kele mwerre, alknge mpwele-kenhe-arle altywere-arle-irretyenhe mpwele-arle itirremenge tharle mpwelenhe angkwerre-iwetyeke.” ³⁰ Kele arratyte, alknge ikwere-atherrenhe altywere-irreke ratherre imerte aremele. Kele Jesus-ele renhe-atherrenhe ileke tyerrtye arrpenhe areyeke iletyale anetyeke.

‡ **9:27** Re Jesus ileke David-eke-artweye rarle itirrekenge, Jesus akwele Ngkartele-arle alhileke apetyetyenhe-arle, David-eke-artweye.

31 Kele ratherre akenhe akangkwe-irretakenhe-arle aneke, ratherre alheke apmere arrpe-anenhe-werne tyerrtye areyeke ilelhemele Jesus-ele-arle renhe-atherrenhe mpwareke angkwerre-iwemele.

Jesus-ele angkwerre-iweme artwe angkenhe-angkenhe kwenye-arle

32 Kele ratherre-arle alhekenge kele tyerrtye arrpenhe areye anteme Jesus-werne apetyemele akngetyeke artwe angketyakenhe anyente arrentye-arle ikwerele-arlenge anekenge. **33** Kele Jesus-ele arrentye renhe ileke arratemele alhetyeke, kele artwe arrakerte altywere-irreke kele re anteme angkeke. Tyerrtye areyele aremele itne apatewarreke imerte angkemele, “Ayekaye! Anwerne-arle alakenhe aretyakenhe-arle apmere nhenhe Israel-eke.”

34 Kele artwe Pharisee itne akenhe angkeke, “Arrangkwe, rarle arrentye areye aywepemele tyerrtye areye-ngentyele arrentye akngerrepatele-arle renhe ngangkere anthekenge-arle.”

Jesus alhwarrpe-irreme tyerrtye ingkirrekeke

35 Jesus apmere arrpe-anenhele untherleapeke apmere akweke areyele apmere akngerre areyele-arlke, re tyatye Jew areye-kenhe-werne-arlke alheke. Re itneke Angkentye Mwerre Ngkarte-kenhe ileke Ngkarte-arle itneke akngerrepate aneme itnenhe arntarnte-aremele. Apmere arrpe-anenhele re rlkertearlke inwerre areye-arlke angkwerre-iweke. **36** Re tyerrtye areye aremele re itneke alhwarrpe

anthurre awelheke, itne akunye-apenhe-arle apatewarrerlenge untherlte-apekengye peyepe areye-arle aparlpe-irreke, arrpenheke arrangkwele itnenhe arntarnte-aretyeke nhengeulkere-arteke. ³⁷ Jesus tyerrtye areyeke alhwarrpe-irremele atyewe ikwerenhe areyeke angkeke, “Tyerrtye arrpenhe arunthe areye apmere arrpe-anenhe yanhe ikwerele-arle anerrirremeke. Kenhe the atyenge urrkapentye akngerre urrpetye ware atnyeneme tyerrtye ingkirreke-arle inemeke Ngkarte Ikwere-werne akngetye-akngetye-alhetyenhe. ³⁸ Kenhe Ngkartele ingkirreke yanhe areye Ikwere-arrpe anteme-arle atnyenetyeke. Kenhe arrantherre akenhe Ngkarte Ikwere angkerrirraye Renhe apayuthnerrirraye urrkapentye akngerre awethe arrpenhe areye nhenhe-werne yernetyeke, Re itnenhe ingkirreke Ikwere-werne akngetyeke.”

10

Jesus-ele apententye akngerre 12-pele ikwerenhe areye akngakeme

¹⁻⁴ Kele Jesus-ele atyewe 12-pele ikwerenhe areye ikngwemele akngakemele, anyente Simon arritnye Peter-arle arritnye arrpenhe ikwerenhe aneke, kake ikwerenhe Andrew, alere Zebedeenkenhe atherre James uthene John uthene, Philip uthene Bartholomew-arlke, Thomas uthene Matthew uthene apwerte mane inentye akngerre-arle government-eke, James alere Althaea-kenhe-arle, Thaddaeus uthene Simon

uthene, Rome-arenye areyeke akngerrepat-
arle ahentye kwenye anthurre, Judas Iscariot,
re akenhe urreke-arle Jesus Jew areye-
kenhe akngerrepat areyeke imernetyenhe
itne renhe arntwirrketyenhenge. Jesus-ele
artwe nhenhe areye ikngweke ikwere-werne
apetyetyeke, ngangkere anthemele, itnenhe
ileke alhetyeke arrentye areye tyerrtye areye-
ngentyele aywepetyenhenge tyerrtye areye-arlke
angkwerre-iwemele mwerre-iletyeke.

*Jesus-ele apententye akngerre 12-pele yerneme
(Mark 3:13-19; Luke 6:12-16)*

⁵ Nhenge Jesus-ele apententye akngerre
12-pele yernemele, ngangkere anthemele
itnenhe ilemele Israel-arenye areyeke-ante
ware alhetyeke imerte itneke alakenhe
angkemele, “Apmere Jew anetyakenhe areye-
werne alhetyale. Samaria-arenye areye-werne-
arlke alhetyale! ⁶ Anwerne-kenhe areye-
werne-ante alherlte-iwaye, nhenge tyerrtye
Israel-arenye areye itne-arle yepe-yepe areye-
arteke aparlpe-aparlpe anerlenga, arntarnte-
arentye akngerrenge-ntyele untherrirrekengen.
⁷ Arrantherre itneke-werne alherlte-iwemele
Angkentye Mwerre Ngkarte-kenhe iletyeke,
alakenhe itneke ilaye, ‘Kele angathe anteme-
irreme Ngkartele anwernenhe ikwerenhe
mpwaretyeke anwernenhe arntarnte-aremele
akngerrepatel.’ ⁸ The arrenhantherrenhe
ngangkere anthekengen, tyerrtye rlkerte
areye angkwerre-iwemele mwerre-iletyeke,
arrantherre apeke aremele tyerrtye ilweke-arle,

renhe akemelhe-ilaye itethe-ilirtnemele, tyerrtye utyene-akerte areye-arlke angkwerre-iwaye mwerre-iletyeke, arrentye areye-arlke tyerrtye areye-ngentyele aywepaye. Kele itne mwerre-irrerlenge, itnenhe maneke apayuthnetyale tharle arrenhantherrenhe yernerlenge areye mwerre-iletyeke, kele arrantherre akenhe akangkentyele itnenhe angkwerre-iwetyeke mane kwenye. ⁹⁻¹⁰ Imerte iltye-ante alherlte-iwemele yakwethe akngetyale. Mantere arrpenhe apeke, ingke-kenhe arrpenhe-arlke apeke urrekeke akngetyale, atneme-arlke akngetyale, iltye-ante alethe alherlte-iwaye. Tyerrtye areyele arrenhantherrenhe iwenhe apeke renhe antheme arrantherre-arle atyenge urrkapemenge.

¹¹ “Arrantherre apmere arrpenhe-werne alherlte-iwemele aremele tyerrtye mwerreke arrenhantherrenhe-arle apmerekere akwerne-tyenheke. Apmere ikwerenhele akwete anaye altheke-arlekele-ante iwerle-alhetyeke-atwetye. ¹² Kenhe urreke arrantherre ilthe arrpenhe-kenheke irrpetyenhenge itneke alakenhe angkerriarraye, ‘Ngkartele arrekantherrele-arlenge aneme-arle akwetethenhe-akwetethe.’ ¹³ Kenhe yanhe-arenye apeke arrekantherre mwerre angkerrirrorlenga, Ngkartele itnekenge anetyenhe akwetethenhe-akwetethe. Kenhe itne apeke arrekantherre ahentye-kwenye anerrirrerlenga, itnenhene imperre-arle-irraye, Ngkartele itnenhe imperlenge anteye. ¹⁴ Kele itne apeke arrenhantherrenhe apmerekere akwernetyakenhe ikngwetyakenhe

itne angkentye-arlke arrekantherrenheke akangkwe-irretyakenhenge. Kele arrantherre apmere renhe impemele alhaye, kenhe urreke arrantherre apmere ikwerenge alhetyenhenge ahelhe lernelhetyeke ingke-kenhe arrekantherrenhe-ngentyele. Itne aremele ahelhe lernerlenge kele itne itelaremele-arle Ngkarte-arle itneke ahele-arle-irreme. ¹⁵ Ayenge-arle arrekantherre arratyae-arle angkeme, arlte ingkernenge Ngkartele-arle tyerrtye areye akgakemele akalkelhe-iletyenhe apmere arrpenanhe-ngentyele. Re aywepemele yernetyenhe Sodom-arenye areye uthene Gomorrah-arenye areye uthene apmere akurne arrengkwelthe-arle akwetethe aneme-werne. Re tyerrtye areye angkentye arrekantherrenhe-arle aweke-arle iperre, akangkwe-irretyakenhe areye-arlke yerneme. Kenhe itne akenhe rlkerte akngerre anthurre renhe inetyenhe Sodom-arenye areye uthene Gomorrah-arenye areyenge awethe arntwarre ulkere.” *

Jesus-ele apententye akngerre ikwerenhe areyeke alkngarre-ileme

(Mark 13:9-13; Luke 21:12-17)

¹⁶ Kele Jesus awethe itneke angkeke, “Ye, the arrenhantherrenhe apmere areye-werne yerneme, arrantherre angkentye atyinhe iletyeke. Kenhe apmere itnekenge

* **10:15** Sodom uthene Gomorrah uthene anetyarte, Ngkartele akenhe itnenhe ingkirreke akethe-ante arrerneke tyerrtye ingkirreke apmere yanhe atherre-arenye-arle akwetethe akurne mpwarewarretyarteng.

akenhe tyerrtye ahe akngerre areye-arle aneme, itne-arle arrekantherre ahele-irretyenhe, arrekantherre akurne-arle-irreme. Kele arrantherre yepe-yepe-arteke-arle akngwelye artnwere ahe-akngerre areyele utepe-akerrirreke. Alakenhenge anteme arrantherre mwantyele awerrirretyeke, ameke-arelhewarremele itneke ahele-irrirtnetyale, nterte ware anemele thipe urrelyarre-arteke.

¹⁷ Yewe ameke-arelhewarraye, itne-arle arrenhantherrenhe arntwirrkemele court-ekte arrernetyenhe. Itne arrenhantherrenhe atwetyenhe, tyatye Jew areye-kenhe arrpenanhenge, arrantherre-arle angkentye atyinhe ilemenge. ¹⁸ Alakenhe-arlke itne arrenhantherrenhe akngetyenhe ngkernetyeke akngerrepate areyeke-arleke arrantherre-arle ayenge apentemenge. Kenhe arrantherre anteme Ayeye Mwerre itneke akwenpele ileyenhe, Jew anetyakenhe areyeke-arlke. ¹⁹ Itne apeke arrenhantherrenhe arntirrkwerlenga arrenhantherrenhe court-werne akngetyeke atere-irretyle anaye, akwenpe. Arrantherre apateketye nthakenhe akngerrepateke angketyeke. Arnterre itirretyle nthakenhe angketyeke, Ngkartele-arle arrenhantherrenhe angkentye anthetyenhenge nthakenhe angketyeke. ²⁰ Utnenge ikwerenhele-arle arrekantherre imernetyenhe nthakenhe angketyeke arraty. Arrantherre-arle itirrentye arrekantherrenhenge angketyeke arrangkwearle, kele arrantherre-arle angketyenhe rarle arrenhantherrenhe ileme-arteke-arle.

21-22 “Ye, tyerrtye areye arrekantherre ahentye-anetyakenhe anetyenhe arrantherre-arle atyinhe anemenge. Artwe ayenge apentetyakenhele-arle kake ikwerenhe iltye anthetyenhe akurne areyeke rarle ayenge apenterlenge itne anteme renhe awtetyenhenge. Alakenhe anteye akngeyele apeke mpwareme ampe ikwerenhe areyeke ayenge-arle itne apentemenge. Ampele apeke iltye anthemele mikwe uthene anyikwe uthene iltye anthemele artwe ahe akngerre itnenhe awtetyeke itne-arle atyinhe anemenge. Kele arrantherre apeke ayenge akwetethe apenterlte-anemele arrantherre ilwetyeke-atwetye kele arrenhantherrenhe Ngkartele mwantyele-arle arntarnte-areme arrantherre akwete-ante ikwere anerlte-anetyeke. **23** Arrantherre apeke apetyemele apmere arrpenheke arratetye-alhemele arrenhantherrenhe tyerrtye areyele awemele-arle ilterreme arrantherre-arle angkentye atyinhe ilemenge, kele arrantherre apmere arrpenhe-werne untetyeke-arle. Kele the akenhe arrenhantherrenhe arratye-arle ileme, arrantherre Israel-ele akwete untherlte-anemenge angkentye atyenge-akerte ilerlte-apemele, ayenge Alere alkere-arenye apmere ahelhe nhenhele-arle akweke inteka, apetyalpetyenhe akngerrepatte anteme anetyeke.

24 “Awerrirraye, tyerrtye ahele akngerre areye atyenge-akerte angkerreme, atyenge-arle itne akurne-irrekenge itne arrekantherre anteme akurne-irretyenhe arrantherre-arle atyewe atyinhe anemenge. Angkentye

nhenheke akangkwe-irraye, ‘Arrantherre itelareme artwe akaltye-arle-irrerle-aneme, rarle akaltyele-anthenhe-anthenhe ikwerenhenge akngerreulkere anetyakenhe-arle, alakenhe anteye urrkapentye akngerre areye akngerre-irretyakenhe akngerrepate ikwerenhenge ulkere.’ ²⁵ Alakenhenge arrantherre itirrewarretyeke, tyerrtye areyele apeke akaltyele-anthenhe-anthenhe ilterrirrerlenge kele itne ikwerenge-arle akaltye-irreke areye-arlke-arle ilteke. Itne apeke akngerrepate akurne-ilemele, alakenhe itne akurne-ileme urrkapentye akngerre ikwerenhe areyeke. Itne kwenhe atyenge ahele-irremele alakenhe angkeme, ‘Unte kwenhe arrentye nhenge Beelzebul, arrentye areyeke akngerrepate.’ Itne apeke atyenge apale angkemele kele itne akurne awethe arntwarre-arle arrekantherre, arrantherre-arle atyinhe anemenge.”

*Ngkarte-ketye atere-irretyeke, tyerrtye areye-
ngentyele kwenye*
(Luke 12:2-7)

²⁶ Kele imerte Jesus angkemele, “Tyerrtye yanhe areyenge atere-irretyale tharle arrekantherre ileme-arle itne-arle tyele angkerlte-anemenge, arne yanhe apele Ngkartele ileyenhe-arle urreke tyerrtye ingkirrekele awetyenhenge. ²⁷ Angkentye nhenge tharle arrekantherre ileke anyelkngé-anyelkngéle ingwele arrantherre arltele akethe angketyeke tyerrtye areyeke. Angkentye tharle arrekantherre arretyemele ileke,

arrantherre arntherre arlketyeke tyerrtye areyele awetyenhenge. ²⁸ Atere-irretyalaye tyerrtye areyele arrenhantherrenhe atweketye, itne-arle tyerrtye arrekantherrenhe warearle atwerlenga, itne akenhe utnenge arrekantherrenhe uyarne atweme. Kele Ngkarte-ketyenge-ante akwete atere-irretyeke, Ngkartele-ante-arle kwenhe tyerrtye uthene utnenge-arlke apmere akurne ureke iweme. ²⁹ Ngkarte-arle arrekantherre akwetethe-arle mwerrantye itirrerle-aneme alkngwirretyakenhele. Thipe nhenge nyingkeke itirraye. Unte apeke thipe atherre alakenhe inemele mane akwekele ware. Arrantherre apeke itirreme Ngkarte-arle akwele thipeke itirretyakenheke-athene. Arrangkwe, Ngkarte-arle itneke akwetethe-arle itirrerle-aneme nhenge thipe anyente atnyeme imerte ilwemele, kele re itelareme-arle. ³⁰⁻³¹ Ngkarte arrekantherre thipe areyenge awethe anthurreulkere ahentye-aneme. Re itelareme nthakentyeke alte akapertele arrekantherrelearlenga, re yanhe areyeke ingkirreke anthurreke alkngwirretyakenhe. Alakenhe ikwerenge anteme arrantherre arrpenhe itne-ketye atere-irrerirretyale anetyeke itne apeke apetyewarrerlenga arrenhantherrenhe atwerrirretyeke. Kele arrenhantherrenhe Ngkartele arntarnte-aretyenhe.”

*Akwенpe iлehetyeke аtyewe Jesus-kenhe
anemele akerte
(Luke 12:8-9)*

³² “Unte apeke akwenpe ilelheme tyerrtye atningkenge unte-arle atyewe atyinhe aneme, kele ayenge alakenhe anteye-arle angkeme alkere akertnenge akngeye atyinhe anerlenge alakenhe, ‘Nhenhe areye-arle atyinhe areye-arle.’ ³³ Kenhe unte apeke atyenge akutne angkemele tyerrtye atningke arrekwelenge, kele ayenge ngkwenge akutne-arle ilelheme Akngeye atyinheke alkere akertnele anemeke.”

*Jesus-eke ahentye-anetyeke arrekantherre-artweye areyenge awetheulkere
(Luke 12:51-53; 14:26-27)*

³⁴ Jesus itneke akwete angkeke alakenhe, “Arrantherre apeke-arle apale itirrewarreke ayenge-arle ahelhe-werne apetyeke nhenge tyerrtye areye akwele arrpenhe-arrpe anyente-irrerlte-anetyenhenge. Kele arrangkwe, tyerrtye areye-arle ahele-irremele atwerreme-arle atyengenge. ³⁵ Akngeye alerikweke ahentye-anetyakenhe rarle ayenge-ante apentemenge. Kenhe meye ampikweke ahentye-anetyakenhe rarle ayenge-ante apentemenge. Kenhe arelhe arrpenhe akenhe anherre-anherre ikwerenheke ahentye-anetyakenhe rarle ayenge-ante apentemenge. ³⁶ Ye, ngkwenge-artweye areyele ayenge arratyе apentetyakenhe ngkwenge ahentye-anetyakenhe-arle unte-arle ayenge apentemenge. ³⁷ Unte apeke-arle ngkwenge-artweye areyeke ahentye anthurre aneme apeke, akngeye uthene meye uthene ngkwinhe ampearlke ngkwenge, kele mwerre-arle. Kele unte

ayenge apentetyeke unte atyenge-arle ahentye-anetyeke itnekenge awethe ulkere. Kele, unte arle atyenge ahentye-aneme alakenhe-arteke, kele unte apententye akngerre atyinhe arratyne anetyenhe-arle.”

³⁸ Jesus angkeke, “Kenhe ayenge apmere Jerusalem-werne alhemele arne arntarlweke-arleke ilwetyeke. Kenhe arrantherre apeke akangkemele atyengele-arlenga ilwetye-alhetyeke, kele mwerre-arle. Apetyaye atyewe atyinhe anaye. Kenhe arrantherre apeke akenhe atyengele-arlenga ilwetyeke ahentye-anetyakenhe, nthakenhe-ame arrantherre atyenge atyewe-irretyenhe? ³⁹ Kenhe angwenhe apeke itethe anetyeke-arle itirremele ilweketyenge, re ilwetyenhe akwete. Kenhe angwenhe apeke ilwetyenhe rarle ayenge apentemenge, the renhe itethe atnyenetyenhe.”

*Ngkartele anthintye-alpeme
(Mark 9:41; Luke 10:16; John 13:20)*

⁴⁰ Jesus angkeke, “Tyerrtyele apeke arrenhantherrenhe aremele, akangkemele arrenhantherrenhe ikngweme, imerte apmere kweneke arrernemele arrenhantherrenhe arntarnte-aremele, kele ayenge ikwerenge akangkentye anthurre-arle aneme rarle ayenge ikngwemenge-arteke ayenge arntarnte-aretyeke-arteke. Rarle aleme altywerele renhe apmere-werne ikngwememele alakenhe. Rarle ikngweme anteye arrpenhe ayenge-arle yerneke-arlke. ⁴¹ Angwenhele artwe angkentye Ngkartele-kenhe awemele ilerle-apentye akngerre akangkemele

ikngweme rarle angkentye ilemenge, kele, Ngkartele renhe-atherre-ante-arle arne mwerre-arteke antheme-arlke. Kele angwenhele apeke artwe mwerre ikngweme rarle mwerrenge, kele, Ngkartele renhe-atherre-ante-arle arne mwerre-arteke antheme. ⁴² Nhenhe itelareye. Angwenhele apeke kватye irrernte anthemele apententye akngerre kwenhe rarle ayenge apentemenge, kele, akwetethenhe-arle Ngkartele renhe arne mwerre arratyе antherle-aneme.” Alakenhe-arle Jesus-ele apententye akngerre 12 pele ikwerenhe areye akaltyele-antheke urreke re itnenhe yernetyenhenge.

11

Jesus-arle John-akerte angkeme (Luke 7:18-35)

¹ Nhenge Jesus-ele 12 pele itnenhene akaltyele-antheke-arle iperre, re apmere ikwerengentyele alheke apmere akweke itweke-itweke arrpenhe areye-werne tyerrtye ingkirrekeke angkentye Ngkartekete akerte ilerle-apemele itne akangkwe-irremele awetyeke. ² Artwe nhenhe John, tyerrtye areye kватyeke akwernentye akngerre-arle, re aweke jail-ngentyele Christele-arle arne atningke ngangkere akngerrele mpwareke, re apententye akngerre ikwerenhe areye ilekenge Jesus apayuthnyeke alhetyeke. ³ Itne anteme alherlte-iweke, ikwerenge anyente-irremele apayuthneke, “Unte-ame artwe John-clarle iletyame urreke apetyetenhe-arle? Unte apeke-arle tyerrtye arrpenhe apeke-arle, kele

anwerne ikwere akarelheme akwete-arle.” ⁴ Kele re itneke angkirtneke, “John-eke ilerretye-alhaye arne atningke arrantherre-arle areke awemele-arlke. ⁵ Pwenge aneke-arle areye kele aretyeke anteme akenhe, inwerre areye akenhe akeme-irremele untheme anteme-arle, arrengkwelthe-akerte areye kele mwerre anteme-arle, kele irlpe awetyakenhe areyele kele aweme anteme-arle, tyerrtye ilweke-arle areye akenhe itethe anteme-arle. Tyerrtye ingkirreke alhwar-rpe aneke kele Angkentye Mwerre Ngkartekenhe anteme aweme. ⁶ Ye, kele awethe anteye John-eke iletye-alpaye Ngkartele yanhe areyeke-arle akangkeme atyenge-arle arratye akwete akangkwe-irremenge.” Alakenhe-arle Jesus angkeke nhenge re itnenhe John-werne yernirt-nemele.

⁷ Kele itne alherlenga, Jesus tyerrtye areyeke angkeke John-akerte alakenhe, “Arrantherre itelareme arrule anthurre, urreke Herod-ele-arle renhe jail-eke akwernetyenhenge, arrantherre apmere ahurratyewerne, apmere nhenge arntwarre tyerrtye areye-arle aneme-ketye, artwe John renhe aretyeke. Kele iwenhenge-arle-ame arrantherre renhe aretyeke alheke? Artwe iwenhe-arteke-arle-ame arrantherre aretyeke alheke? Arrantherre apeke apale-arle alakenhe itirreke John-arle angkentye ikwerenhe akwethenhe-akwetethe akngarte-iwerle-anetyame. Arrangkwe, rarle angkentye anyente akwete-arle ilerle-aneme. ⁸ Kele iwenhenge-arle-ame arrantherre renhe aretyeke alheke? Arrantherre apeke-arle artwe mantere

mwerre akngerre-akerte apeke-arle aretyeke alheke? Kele arrangkwe-arle, John-arle alakenhe anetyakenhe-arle, artwe mantere mwerreke irrpentye akngerre-arle akngerrepare itnekenhe akenhe apmerele-ante-arle anentye akngerre-arle ahurratyele anetyakenhe, tyerrtye areye-ketyenge arntwarrele. ⁹ Atyenge ilaye! Artwe iwenhe-arteke-ame arrantherre aretyeke alheke? Arrantherre apeke-arle artwe angkentye Ngkarte-kenhe awemele ilerle-apentye akngerre apeke areke? Ye, kele arrantherre arratyte-arle areke! John-arle atyeperre rarle angkentye Ngkarte-kenhe ilentye akngerrenge awetheulkere. Arrpenhe areyenge atyeperre anthurre ulkere. ¹⁰ Arrpenhele angkentye ikwere-akerte intelhe-ileke pipe-ke-arleke arrule, Ngkarte-arle ikwere alakenhe angkeke-akerte,
“The angkentye ilenhe-ilenhe yernetyenhe ngkwengenge arrekwele.

Re ngkwengenge arrekwele-arle alhetyenhe, tyerrtye itneke iletyeke ngkwengen akwetante mpwaretyeke unte-arle apetyetyeke.” *Malachi 3:1.*

¹¹ Jesus awethe itneke angkeke, “Nhenhe itelaraye! Artwe John, tyerrtye areye kwayteke akwernentye akngerre-arle, re arrpenhe ingkirrekenge atyeperre anthurre ulkere, ikwerenge-arle arrekwele anerrirrekeke. Kenhe lyete-ngentyele akenhe iwerre arrpenhe-arle aneme. Ampe akweke areye Ngkartele-arle atyewe ikwerenhe areye akeme, itne kwenhe John-enge atyeperre anthurre ulkere-arle. ¹² John Baptist apetyeke tyerrtye areyeke ilemele

Ngkarte-werne utepe-irretyeke, itneke ilemele Ngkarte rarle itneke ahentye-anerlenge arnenge-ikwe mpwaretyeke, itnenhene arntarnte-aretyeke. Lyete tyerrtye arrpenhemele akwete arrkernewarremele arnterre anthurre Ngkarte akngerrepate itnekenhe mpwaretyeke, itne Jesus-nge anyente-irretyeke ahentye anthurre anemele.

¹³ “Arrule anthurre Moses-ele-arlke, angkentye Ngkarte-kenhe ilentye akngerre arrpenhe areyele-arlke intelhe-ileke Ngkartele-arle akwetethe anteme tyerrtye areyeke akngerrepate anerle-anetyenhenge. Kele nyurrpe arrpenenhe re anteme akngerre-irreke, ilweke anteme. Kele arrpenheke-artweyeke-artweye irreme ilwerrirreke anteme. Kele John anteme ingkernenge apetyeke. ¹⁴ Itne ileke-arle arrekwele akwete urreke-arle angkentye ilentye akngerre arrpenhe artwe Elijah arritnye-arle apetye-alpetyenhe arrekwele akngerrepate alhileke-arle ikwerenge. * Alakenhenge anteme arrantherre angkentye ikwere akangkwe-irretyeke, anyente Elijah-arteke-arle apetyetyenhenge, arrantherre itelareme artwe nhenge John. ¹⁵ Ye, kele arrantherre apeke akaltye-irretyeke ahentye-aneme, kele mwantyele awaye nthakenhe-arle ayenge angkerneke.”

¹⁶ Kele Jesus itneke alakenhe awethe angkeke, “Iwenhe-arteke-arle-ame arrantherre? Arrantherre-arle akurrknge akwetethe akngarte-iwelhewarreme ampe areye-arteke. Arrantherre

* **11:14** Malachi 4:5

itelareme nthakenhe-arle ampe areye apurte-irremele tnemele arlkerrentye akngerre nhenge alakenhe angkemele,¹⁷ ‘Anwerne kwenhe alyelhetyame arrkerneme-arlke irlpentye mwerreke, arrantherre akenhe urntetyeke apetyetyakenhe-arle.’ Kele arrpenhe areye akenhe itne alakenhe-arle angkirtnerlenge, ‘Yewe, kele anwerne akenhe artnemele-arle irrare-irremele-arle alyelhetyame alyelhentye irrare-irrareke. Kenhe arrantherre anwernenhe awemele, anwerneke anyente-irretyakenhe, anwernenge artnetyakenhe-arle.’¹⁸⁻¹⁹ Alakenhe rarle arrantherre John ilerneke ipmentye-iweme. John apetyeke re ngkwarle antywetyakenhe aneke, awethe-ngare merne-arlke arlkwetyakenhe anetyarte Ngkartek-ante angketyenhenge. Kele nhenge arrantherre renhe arerrirremele, arrantherre angkeke rarle arrentye-akerte ikwerenge untyeme-irreke. Kele nhenge arrantherre ayenge aremele, Alere alkere-arenye apmere ahelhe nhenehele-arle akweke intek, kele arrantherre apale angkemele alakenhe, ‘Artwe yanhe-arle atnure-arle-irreme merne uthene ngkwarle utheneke, atyewe akemele tyerrtye akurne areyenge anemele, arrantherre itelareme artwe areye mane inenhe-inenhe government areyeke-arle, tyerrtye akurne arrpenhe areye-arlke.’ Arrantherre alakenhe rarle atyenge angkerirreke. Alakenhe ikwerenge anteme arrantherre ampe areye-arteke. Kele nheneh-arle awerrirraye, Ngkarte akenhe akaltye anthurre re, iwerre arrpenheke-arrpenhe

tyerrtye arrpe-anenheke mpwareke. Urreke tyerrtye areyele itelaretyenhe John-clarle iwerre Ngkarte-kenhe apenteke ikwere, kenhe the akenhe iwerre Ngkarte-kenhe apenteme atyenge.”

*Tyerrtye areye apmere urrpetye-arenye-arle
Jesus-eke akangkwe-irretyakenhe
(Luke 10:13-15)*

²⁰ Kele Jesus aletheke-irretyame apmere nhenhe areye-werne Chorazin, Bethsaida, Capernaum-werne-arlke, re rlkerte areye angkwerre-iwerle-apetyame itneke ngangkerele arne mwerre-arlke mpwarememe. Tyerrtye apmere yanhe-arenye areyele akethe areke ngangkerele mpwarerle-aperlenge, itne akenhe ikwere akangkwe-irretyakenhe-arle aneke. Itne apure-irretyakenhe aneke akurne areye-arle mpwarekenge. Itne Ngkarte-werne utepe-irretyakenhe. Kele Jesus itneke alakenhe ahele-ahele angkeke, ²¹ “Akurne akngerre-arle anetyenhe Chorazin-arenye areyeke-arlke Bethsaida-arenye areyeke-arlke. Apmere arrekantherrenge tharle tyerrtye rlkerte areye-arle angkwerre-iwekenge ngangkerele-arlke itnenhe mwerre-ileke, ngangkerele-arlke atningke arrpenhe mpwareke. Kele arrantherre areke-arle iperre, Ngkarte-werne utepe-irretyakenhe-arle. The apeke alakenhe arrekwele mpwareke-arle apmere Tyre uthene Sidon uthenele tyerrtye apmere yanhe atherre-arenye areye-arle kele iparrpe-arle apure-irremere akurne itnekenhe-ngentyele.

Kele imerte mantere ingkweyeke irrpemele imerte arlpmenyele inngerre apernelhemele imernetyeke apure-irremele akurnentye impemele. † ²² Nhenhe awerrirraye! Urreke, arlte ingkernenge, Ngkartele-arle inemele akgaketyenhe tyerrtye apmere arrpe-anenhe-ngentyeye, re alkngetherre ilemele tyerrtye areye Tyre-arenye, arrpenhe areye-arlke Sidon-arenye itnenhe apmere akurne-werne yernetyenhe, itne arrengkwelthe inetyenhenge rlkerte-irretyeke. Re arrenhantherrenhe alkngetherre ilemele yernemele arrantherre-arlke arrpenhe yanhe areyenge alhetyeke, kele apmere yanhenge arrantherre rlkerte arrpenhe-arle ineme tyerrtye itnekengen awetheulkere, arrenhantherrenhe kwarneme anthurre. ²³ Kenhe arrantherre apmere Capernaum-clarle anerrirremeke, arrantherre-ame itirrewarreme Ngkartele-arle arrenhantherrenhe alkere akertne anthurre-werne utyernetyenhe apeke? Arrangkwe! Kenhe Re akenhe arrenhantherrenhe ure atetherre-werne iwetyenhe-tetye. Arrekantherre arrekwelenge kwenhe the atningke-ngare ngangkerele mpwareke-arle, kele arrantherre areke-arliperrele akenhe akurne areye impetyakenhe, akgarte-iwelhetyakenhe. The apeke-arle arne areye ngangkerele mpwareke apmere Sodom-ele arrule anthurre, kele itne apeke-arle areke,

† **11:21** Apmere Tyre uthene Sidon uthenele tyerrtye Jew anetyakenhe areyele-arle akwetethe-arle akurne mpwarelte-anetyarte, kele Israel-arenye angkentye Ngkarte-kenhe ilentye akngerre areyele ileke tyerrtye yanhe areye akurne-arle.

akurne impemele akngarte-arle-iwelheme. Kele apmere itnekenhe kele akwete-arle tneme, kenhe arrangkwe-arle akenhe. ‡ 24 Urreke, arlte ingkernenge, Ngkartele-arle tyerrtye areye inemele akngaketyenhe Re anteme itnenhe akayake-iletyakenhe imerte itnenhe yernemele Sodom-arenye itnenhe apmere ahelhe akurne-werne, ure alkngenthe-werne arrwengkelthe akngerre inetyeke itnenhene atwetyeke anthurre. Re arrenhantherrenhe akayake-iletyakenhe itnekenge yernemele, kele apmere yanhenge arrantherre rlkerte arntwarre-arle ineme arrantherre-arle ayenge arekenge atningke-ngare ngangkerele arne arunthe mpwarerlenge, kele arrantherre akenhe atyenge akangkwe-irretyakenhe akwete-arle aneke.” Alakenhe-arle itneke Jesus angkeke.

*Jesus-ele Ngkarte utyername tnakemele
(Luke 10:21-22)*

25 Kele Jesus Akngeye ikwerenheke angkeke, “Akngeye-aye, unte kwenhe tyerrtye ingkirrekeke alartetye anthurre, apmere ahelhe nhenhele-arlke alkere akertnele-arlke. Kele the ngenhe utyernamele tnakeme, unte-arle angkentye mwerre nhenhe tyerrtye areyeke imernekenge nhenge ngkwenge akutne areyeke, unte akaltye areyeke imernetyakenhe aneke, unte-arle alengke-arle-iweke itne-ketyenge.

‡ 11:23 Arrule anthurre-arle apmere Sodom-arenye areye akurne anthurre anerirrretyarte, Ngkartele anteme ure akngerre alkere-ngentyele yerneke, apmere-arlke tyerrtye areye-arlke am-petyeke akethelhe-ilemele.

26 Yewe Akngeye-aye, unte alakenhe mpwareke unte-arle ahentye-anekenge warte.”

27 Kele ikwerenge-ntyele, Jesus itneke angkeke, “Akngeye atyinhele ayenge ingkirreke anthurre antheke alartetye anetyeke. Ayenge-arle Alere Ikwerenhe. Re-ante ayenge itelareme anthurre. Kenhe ayenge-arle akenhe, Alerikwe-arle, the-ante Renhe itelareme anthurre. Kenhe yanhe areye the akngakeke-arle, tharle itneke Ngkarte Ikwere-akerte ileke, yanhe areye-arle atyeng- artweye-arle anemeke. Itne Ngkarte awerrirretyenhe.”

28 Kele Jesus itneke angkeke, “Yewe, angkentye Moses-kenhe akaltyele-anthenhe-anthenhe areyele-arle arrenhantherrenhe uterneke arne arrpe-anenhe mpwaretyeke, arrenhantherrenhe apurrkele-antheme. Kele nhenhe anteme awerrirraye, arrantherre apeke-arle apurrke anthurre awelhemele atyenge-werne apetyewarraye the arrenhantherrenhe ltyerretyeke arrernetyenhenge. **29** Yewe, atyenge-ngentyele akwete akaltye-irraye atyenge akangkwe-irremele ayenge angkerlenge, tharle arrenhantherrenhe mwantye-mwantye-ileme akangkemele. Kele the arrenhantherrenhe ltyerretyeke-arle arrerneme arrantherre akangkentye anetyeke. **30** Angkentye atyinhe arrantherre awemele akangkwe-irremele, arrantherre akangkentye anthurre-arle aneme.” Alakenhe-arle Jesus itneke angkeke itne akwenpe anetyenhenge.

12

*Arlte Apurrkele Urrkapeme akerte
(Mark 2:23-28; Luke 6:1-5)*

¹ Kele yanhe-ngentyele Jesus apmere arrpenhe-ngentyele alheke apententye akngerre ikwerenhe areye-akerte arlte apurrkele Saturday-enge. Itne merne ulpe mpwarentyne akngerre-arle amangkeke-mpele alheke. Kele apententye akngerre ikwerenhe areye akenhe angayakwe irreke itne merne ulpe mpwarentyne akngerre ntange areye akemele arlkwerlte-aperlenge alherle-apemele. ² Kenhe Pharisee arrpenhemele itnenhe merne ulpe mpwarentyne akngerre ntange areye inerlenge areke imerte Jesus-eke angkemele, “Aye, nhenhe araye! Arlte apurrkele apententye akngerre ngkwinhe areyele kwenhe merne ulpe mpwarentyne akngerre ntange areye akemele arlkweme. Itne urrkapemele kwenhe angkentye anwerne-kenhe ultakeme. Kenhe angkentye anwerne-kenhe alakenhe-arle, arlte apurrkenge urrkapetyale anetyeke.”

³⁻⁴ Kele Jesus itneke angkirtnerlenge, “Kele arrantherre-ame aretyakenhe pipe-nge David-arle angayakwe-irremele alheke ilthe ameke-ameke Ngkartekenhe-werne imerte merne impene-werne renhe arlkwemele imerte arrpenhe areye ikwerenge-arle aneke areye arlkwetyeke anthemele. Kele arratyeharle angkentye ileme kwertengerle tyatye-arenye areyele-ante merne renhe arlkwetyeke. Kele itne akenhe akangkwe-irretyakenhe-arle aneke

imerte merne renhe arlkwemele itnenhe iltetyakenhe-arle aneke itne-arle angayakwe anekenge ware.”

⁵ Jesus akwete angkeke, “Kele awethe, arrantherre-ame aretyakenhe pipe-nge angkentye Moses-kenhenge: Arlte apurrkele kwertengerle tyatye-arenye areye tyatyeke akwetethe irrpenherlenge ikwerele urrkapetyeke. Nhenge Ngkartele itnenhe urrkaperlenge areme itneke ahele-irretyakenhe-arle, itne-arle urrkapewarrerlenge. Re akwenpele anerle-aneme. ⁶ Kele lyete the angkentye arrpenhe arrekantherre ileme. Ngkartele-arle ayenge yerneke angkentye atyeperre anthurre iletyeke, angkentye atyinhe atyeperre anthurre ulkere angkentye templenge ileme-akerte. ⁷ Arrantherre itelaretyenhele nthakenhe-arle angkentye nhenhele ileme Ngkartele-arle arrule angkeke: “Kere atwetyale ayenge anthetyeke.” Nhenheke-ante-arle ayenge ahentye-aneme; arrantherre arrpenhe areyeke alhwarpe-irremele alpe-eme-iletyeke. Nhenge The arerlenge arrantherre alakenhe mpwarerlenge, kele ayenge arnterre anthurre-arle akangketyenhe.

Hosea

6:6.

“Arrantherre apeke renhe itelarerrirremele, kele arrantherre apententye akngerre atyinhe areyeke ahele-irretyale-arle, itnenhe ilemele itne-arle akwele akurne mpwarekeke. ⁸ Yewe, arrantherre itelaretyakenhe-arle ayenge, Alere alkere-arenye apmere ahelhe nhenhele-arle akweke inteka, alartetye anthurre, the kwenhe ile-

tyenhe nthakenhe-irretyeke arlte apurrkenge.” Alakenhe-arle Jesus angkeke Pharisee areyeke.

Arlte apurrkele Jesus-ele angkwerre-iweme artwe iltye tharre-akerte

⁹ Yanhe-ngentyele anteme Jesus arrpenhe areyele-arlenge apmere ikwerenge-ntyele alheke imerte tyatye Jew areye-kenheke irrpemele. Arrernalheke-arle iperre itne kweneke irrpenherlte-iweke. ¹⁰ Yanheke anteme Jesus-ele areke artwe iltye tharre-arle-irreke tyer-rye areyenge. Kele Pharisee areyele anemele arerlenge Jesus nhenge itne renhe iltetyen-henge re apeke ahele-irrelenge. Nhenge itne artwe iltye tharre renhe aremele alakenhe itir-reke, “Re apeke-arle lyete renhe angkwerre-iwemele mwerre mpwaremele arlte apurrkele angkentye Moses-kenhe akurne-ilemele.” Kele itne anteme renhe apayuthneke, “Iwenhe-arteke-arle-ame angkentye Moses-kenhe? Mwerre-ame tyerrtye rlkerte areye mwerre-iletyeke arlte apurrkele, arrangkwe apeke?”

¹¹ Kele Jesus itneke angkirtnerlenge, “Nhenge yepe-yepe apeke ipertekе atnyerlenge-artaye arlte apurrkele, arrantherre-ame renhe impeme urrekeke tyerretyakenhe imerte anemele? Arrangkwe, tyerremele-arle ingwelemeke impetyakenhe. ¹² Artwe akunye nhenhe akenhe yepe-yepenge impene anthurre-ulkere! Angkentye Moses-kenhenge-arle akenhe anwerne arpenheke alhwarrpe-irretyeke alpe-eme-iletyeke arlte apurrkele-arlke.” ¹³ Jesus anteme angkeke artweke iltye tharre-akerte, “Iltye aternelhaye!”

Kele arratyre re iltye antekelhe-ileke, iltye arratyre mwerre-irreke iltye arrpenhe-arteke. ¹⁴ Pharisee areyele nhenhe areke-arle iperre itne anteme al-hemele angkerretyamele Jesus akwele irrerlkngé atwetyeke.

Ngkartele Jesus akngakeme urrkapentye Ikwerenhe mpwaretyeke

¹⁵ Kele Jesus-ele aweke itne-arle renhe irrerlkngé atwetyeke angkerreke re anteme apmere renhe impemele alheke apmere arrpenhe-werne. Kenhe tyerrtye atningke anthurrele renhe apenteke, re anteme tyerrtye rlkerte areye anpemele angkwerre-iwemele mwerre mpwarerle-apeke. ¹⁶ Re itnenhe ileke arpenhe areyeke iletyaleke. ¹⁷ Kele angkentye nhenhe Jesus-akerte rlkerte areye angkwerre-iweme, Ngkarte arrekwele angkeke-arle angkentye ilerle-apentye akngerre Isaiah arritnyeke. Isaiah-ele arrule anthurre pwekeke intelhe-ileke alakenhe:

¹⁸ “The renhe akngakeke atyenge urrkapetyeke. Re impene anthurre atyinhe, ayenge-arle ikwere akangkentye anthurre-arle, the utnenge atyinhe ikwere-arleke arrerneme.

Re anteme tyerrtye areye iletyenhe, Ngkartele-arle Jew anetyakenhe areye itelaremele arratyre atnyenetyenhenge.

‘Ngkarte ahentye-aneme tyerrtye ingkirrekeke ikwerenhe irretyeke arratyre anemele.’ Alakenhe-arle re iletyenhe.

¹⁹ Re anteme ntete anetyenhe, tyerrtye areyeke ahele-irrerle-apetyakenhe,

iwerre arrpenhenge itwele tnemele arlkerle-apetyakenhe arrpenhele renhe awetyeke.

20 Nhenge re tyerrtye akunye areye ilwetyeke-irrerlenge aremele, re itnenhe impetyeke arrangkwe-arle, kele alhwarrpe-irremele itnenhe itethe-ilemele akemelhe-ilirtneme-arle.

Arrantherre itelareme, nhenge artwele ure akweke amperle-anerlenge areme, re mwantyele pewe-ileme akngerre irretyeke-atwetye,

alakenhe-arle re tyerrtye areye itethe atnyeneme.

Re apurrke-irretyakenhe-arle aneme mpwepenge apeke ingkirreke arratyte-ileke-ante-arle iperre, re imerte ltyerremele anteme-arle.

21 Tyerrtye ingkirreke apmere arrpe-anenhe-arenye areye ikwere akarelhemele arel-heke re itnenhe apetyemele itetheke mpwaretyeke.” *Isaiah 42:1-4.*

Alakenhe-arle Ngkarte arrule angkeke, kele arratyte anteme alakenhe-irreke.

*Tyerrtye arrpenhemele Jesus ilpernewarreme
(Mark 3:20-30; Luke 11:14-23)*

22 Tyerrtye arrpenhe areyele artwe rlkerte Jesus-werne akngetyeke. Artwe re akenhe pwenge-arle aneke angketye-arlke-akenhe arrentye-arle ikwerele-arlenga anerlenge. Kele Jesus-ele artwe renhe angkwerre-iweke, alknge alkngampe-ileke arratyte aretyeke artwe angketyeke-irreme anteme. **23** Kele tyerrtye

areyele areke apatemele anthurre imerte alakenhe angkerremele, “Artwe nhenhe David-
eke-artweye apeke Ngkartele-arle alhileke.”

24 Kele nhenge Pharisee areyele nthakenhe-
irrekenge awemele itne arrpenhe areyeke ileke,
“Arrangkwe, arrentye nhenge Beelzebul-ele
ngangkere ikwerenhe renhe antheke, arran-
therre itelareme re arrentye arrpenhe areyeke
akngerrepate nhenge, alakenhenge akwele re
arrentye ayweperle-anetyeke tyerrtye areye-
ngentyele.”

25 Jesus-ele kele itelareke nthakenhe-
arle ikwere-akerte itirreke re anteme
alakenhe angkeke, “Nhenhe awerrirraye!
Tyerrtye apmere anyente-arenye areye apeke
atwerrentye akngerre itne akenhe akwetek-
ilemele atwerreme, tyerrtye areyeke arrangkwe
anetyeke-atwetye. Alakenhe anteye artweye-
nhenge areye apeke warle anyente-arenye
areye atwerrerlte-aneme imerte akwetek-
ilemele atwerreme, tyerrtye areyeke arrangkwe
anetyeke-atwetye.

26 Alakenhe-ante-arle
Arrentyeke, re apeke arrentye ikwere akwerrke
areye tyerrtye areye-ngentyele aywepetyeke
aneke kele itne ikwere ahentye-anetyakenhe-
arle aneme ikwere anetyakenhe. Kele re
itnenhe uyarne uterneme, alyepe-alyepe-
irremere alartetye itnekenhe anetyakenhe
anteme. **27** Kenhe arrantherre akenhe
angkeme arrentye Beelzebul arritnyele-arle
akwele ngangkere ayenge antheme arrentye
areye ayweperle-anetyeke tyerrtye areye-
ngentyele. The apeke-arle arrentye aywepeme

ngangkere ikwerenhele, angwenhele-arle akenhe arrenhantherrenhe ngangkere antheke arrentye aywepetyeke? Arrentye Satan-eleye? Arrangkwe, Ngkartele-arle itnenhe ngangkere anthekenge arrentye areye aywepetyeke. Arrantherre apale angkeme Beelzebul-e akwele ayenge ngangkere ikwerenhe anthemenge arrentye areye aywepetyeke.

²⁸ Kenhe Utnenge Ngkarte-kenhe re apele ayenge ngangkere-arle antheme the arrentye areye aywepetyeke. Arrantherre ayenge areke-arle iperrele arrentye ayweperlenge itelaretyenhe Ngkarte-arle apetyeke arrenhantherrenhe apurtelhe-iletyeke arrekantherre Alartetye anetyenhenge.”

²⁹ Kele Jesus-ele angkentye arrpenhe anteme itneke ileke itnenhe akaltyele-anthemele alakenhe, “Artwe-ame apmere lterrke akngerkenhe-werne arne areye akwenpele anyelkngèle inetyeke? Arrangkwe-arle. Re artwe lterrke-urrke ayernetyekeke-amparre kele imerte re arne itnenhe anteme inetyenhenge.”

³⁰ Jesus awethe angkeke, “Tyerrtye apeke atyengenge apurte urrkapetyakenhe, re arrentye Satan-kenhe-arle, atyenge ahele-irremele. Re apeke tyerrtye areye Ngkarte-werne akngetye-alpetyakenhe, kele re itnenhe aterele-anthemele atyenge-ketyenge aywepemele. ³¹ Kele nhenhe-arle itelarerrirraye, arrantherre apeke-arle apure anerlte-aneme akurne atningke mpwarekenge, Ngkartele arrenhantherrenhe ilpernetyakenhe aneme. Arrantherre apeke-arle apure-irreme arrantherre-arle Renhe

arrkentye-ilekenge, kele Re arrenhantherrenhe ilpernetyakenhe aneme-arle. Kenhe arrantherre akenhe arrkentye-ilemele Utngenje Akngerreke, Re arrekantherrenge ipeltye-irretyakenhe, arrenhantherrenhe ilwetyeke-arle arrerneme. ³² Yewe, angwenhe apeke atyenge-akerte akurnentye angkeme, Alere alkere-arenye apmere ahelhe nhenhelearle akweke intke, kele Ngkartele tyerrtye renhe ilpernetyakenhe aneme-arle. Kenhe arrantherre akenhe arrkentye-ilemele Utngenje Akngerreke, ikwerenge ipeltye-irretyakenhe arrekantherrenge, re arrenhantherrenhe ilwetyeke-arle arrerneme, renhe ilwetyeke-arle ngkerneme arlte ingkerneke-atwetye.” *

*Jesus-ele angkentye merne ntange-akerte ileme
(Luke 6:43-45)*

³³ Jesus Pharisee itneke akwete angkeke, “The angkentye merne ntange-akerte ileme. Arne mwerre-ngentyele merne mwerre-arle lyapeme, kenhe arne akurne akenhe merne akurne-arle lyapeme. ³⁴ Arrantherre untherlte-aneme, arrpenhe areyeke urrtyirremele. Kele arrantherre-arle akurnentye anemenge, kele arrantherre angkentye mwerre uyanne angkeme. Kenhe tyerrtye mwarrantye itirrentye akngerre-arle angkentye mwerre akngetyeke. ³⁵ Tyerrtye

* **12:32** Nhenge Pharisee areyele-arle ileke Jesus-clarle arrentye atnyeneke, itne-arle Utngenje Akngerre ware-arle arrkentye-iletyame rarle akenhe arrentye itnenhe aywepetyamele areye-ngentyele arrentyele kwenye.

mwarrantye angkeme rarle itirrentye mwerre-akerte, arne akurnele merne akurne lyapelhe-ileme-arteke, tyerrtye akurnentye angkeme rarle itirrentye akurne-akerte-arle.

³⁶ “Alakenhenge anteme akwete itirretyeke, urreke arlte ingkernenge Ngkartele akalkelhe-iletyenhe tyerrtye ingkirreke, itneke anyentekanyente Re akaltye alakenhe angketyenhe, ‘Iwenhenge-arle-ame’ unte mwarrantye itirretyakenhe, apale angkemele ahelhe nhenhele anetyarte?” ³⁷ Yewe, arlte ikwerele Re arrenhantherrenhe akngaketyenhe nthakenhe-arle arrantherre angkekenge. Kele mwarrantye apeke-arle arrantherre angkekenge re mwarrantye arrekantherre anetyenhe arraty. Kenhe akurnentye apeke-arle arrantherre angkeke re arrenhantherrenhe akurne akwete aketyenhe re arrenhantherrenhe apmere akurne ikwere-werne yernetyenhe.”

*Tyerrtye areyele Jesus arrerlkelhe-ileme
ngangkere lterrkele mpwaretyeke
(Mark 8:11,12; Luke 11:29-32)*

³⁸ Kele Pharisee areye uthene angkentye Moses-kenhe akaltyele-anthenhe-anthenhe areye Jesus-eke alakenhe angkeke, “Akaltyele-anthenhe-anthenhe-aye! Kele unte apeke-arle ngangkere ngkwinhele mpwaremele-artaye anwerne aretyenhenge kele anwerne anteme itelareme Ngkartele-arle ngenhe yerneke.”

³⁹ Kele Jesus akenhe ayenelhe-ileke itneke alakenhe-arle angkemele, “Kele arraty-arle

arrantherre akurne areye Ngkarteké akangkwe-irretyakenhe-arle. Arrantherre ayenge akwete apayuthneme ngangkerele mpwaretyeke, ayenge areke-arle iperrenge arrantherre akwele ayenge arratyé itelaretyenhenge. Kele arrangkwe, Ngkartele iwenhe apeke renhe ngangkerele mpwaretyakenhe arrantherre-arle aretyenhenge ware akwele. Urreke-arle arrantherre aretyenhe arne nhenge-arle Jonah-eke nthakenhe-irrekengé, arrantherre anteme itelaremele-arle. Jonah re angkentye Ngkarte-kenhe awemele ilerle-apentye akngerre anetyarte. ⁴⁰ Re kere kwatye-arenye akngerre-apenhe atnerte kwenele anetyarte arlte urrpetyeke-atwetye, ingwe urrpetyeke-atwetye-arlke. Alakenhe-arteke-arle Alere alkere-arenye apmere ahelhe nhenhele-arle akweke intekte, ahelhe kwenele anerle-anetyenhe arlte urrpetyeke ingwe urrpetyeke-arlke.

⁴¹ “Kenhe the akenhe arrekantherre awethe ileyteke ahentye-aneme artwe nhenge Jonah angkentye Ngkarte-kenhe awemele ilerle-apentye akngerre-akerte. Arrule anthurrenge re, apmere Nineveh-arenye areyele awerrirrerlenge Jonah-ele itneke angkentye Ngkarte-kenhe ileke. Re itneke Ngkarte-akerte ileyteke. Kele re itneke ileke-arle iperre, itne arne akurne ingkirreke anthurre itnenhe imperlte-alheke itne-arle mpwarewarretyarte Ngkarte Ikwere-werne itne utepe-irrintyete-alpeke. Kenhe urreke re anteme, arlte ingkernenge, Ngkarte tyerrtye ingkirrekeke itirretyenhe nthakenhe itnenhe mpwaretyeke. Kenhe apmere Nineveh-arenye

areye tnerrirremele angkerrirreme arrantherre kwenhe mwerre anerrirretyakenhe anteye-arle. Alakenhenge angkentye atyinhe akenhe angkentye Jonah ikwerenhenge akngerre-ulkerarle. Itne angkentye ikwerenhe awerrirreke, kenhe arrantherre akenhe angkentye atyinhe awerrirretyakenhe.

42 “The arrekantherre angkentye arrpenhe iletyenhe: Arrule anthurre arelhe alartetye Shebaarenye, apmere arlenge anthurre-ngentyele apetyeke artwe akaltye anthurre Solomon awetyeke. Kenhe lyete nhenhe akenhe angkentye atyinhe angkentye Solomon ikwerenhenge akngerre-ulkerarle, kenhe arrantherre angkentye atyinhe awerrirretyakenhe. Kele arlte ingkernenge, Ngkarte tyerrtye ingkirreke anthurreke itirretyenhe nthakenhe itneke mpwaretyeke. Kenhe arelhe nhenge re akenhe tnemele angkeme arrantherre kwenhe mwerre anetyakenhe arrantherre-arle angkentye atyinhe awerrirretyakenhenge-arle.”

*Ayeye arrentye areye-akerte
(Luke 11:24-26)*

43 Jesus-ele itneke awethe ileke, “Nhenge arrentye tyerrtye ikwerenge-ntyele arratemele, re apmere ingkinyele-arteke anteme anemenge, tyerrtye arrpenhe anetyakenhe anteme, arrangkwe anthurre. Kenhe arrentye-arle apmere kwatye-kwenyele-arlke ahurrate untherle-apemele, apmere mwerreke arerle-apemele anetyeke. Kenhe re apeke apmere mwerreke uyarne aremele anetyeke, **44** re

ilelhemele alhepalheme, ‘Ayenge-arle tyerrtye nhenge-werne alpetyeke itirreme ikwerele-arlenge arrekwele ayenge-arle aneke-werne. Kenhe arrpenheke arrangkwe rarle re lyete aneme.’ Arratyte rarle, arrentye tyerrtye nhenge-werne alpemele renhe aretye-alpeke apmere alkarle-arteke renhe ingkirreke-arle akngarte-iwerlenga. ⁴⁵ Re anteme alpemele arrentye 7-pele arrpenhele-arlenge, ikwerenge akurne anthurre ulkere-arle. Kele itne tyerrtye yanheke irrpirtnewarremele atneme ikwerele-arlenge apmere mpwaremele. Kenhe yanhe ikwerengentyele, tyerrtye arrentye areye-akerte re akurne awethe-arle re anekenge-ntyele anpere anthurre anteme aneme. Alakenhe-irretyenhe tyerrtye akurne areyeke angkentye atyinhe aweke-arle iperre.” Alakenhe-arle Jesus-ele itnenhe akaltyele-antheke.

Ayeye meye Jesus-kenhe-akerte, atyeyikwe areye-akerte-arlke

(Mark 3:31-35; Luke 8:19-21)

⁴⁶ Nhenge Jesus apmere kwenele anetyamele atningkeke angkemele, mikwe-arlke atyeyikwe areye-arlke renhe arerrirretyeke apetyewarreke. Kele itne aketheli tneyetalhemele arrpenhe itneke angketyete-alheke, “Anwerne Jesus-eke angkerirretyeke.” ⁴⁷ Kele anyentele ware Jesus-eke iletyeke alheke, “Jesus-aye, mangkwe-arlke atyeyangkwe areye-arlke aketheli yanhe tneyetalheme. Itne ngkwenge angkerirretyeke ahentye-anerrirreme.”

48 Kenhe Jesus re ikwere angkirtneke, “The ngkwenge meye atyinhe uthene atyeye atyinhe areye uthene-akerte ileme. Unte-ame itelareme angwenhe apeke tyerrtye areye the akeme meye atyinhe uthene atyeye atyinhe uthene?”

49 Ikwere iperrele Jesus apententye akngerre ikwerenhe areye thilemele angkeke, “Nhenhe-arle meye atyinhe atyeye atyinhe areye-arlke!

50 Angwenhe apeke Akngeye alkere akertne-arenyeke akangkwe-irremele, Ikwere aywerrke arne mwerre areye mpwareme, itne atyeye atyinhe uthene meye atyinhe uthene-arle aneme.”

13

Ayeye ntange areye-akerte (Mark 4:1-20; Luke 8:4-15)

1 Arlte yanhe ikwerele, Jesus anteme apmere ikwerenge arratemele alhemele kватye alaye Galilee iterele aneke. **2** Tyerrtye atningke anthurre anteme renhe awetyeke apetyewarreke re akaltyele-antherlenga. Re akeme-irremele boat-eke antyemele itneke angketyame. Kenhe tyerrtye areye akenhe kватye iterele tnerrierlenga. **3** Re itnenhe angkentye alengki-wentye akngerre atningke alakenhe akaltyele-anthetyame:

“Awerrirraye. Artwe arrpenhe nhengele ntange areye iwerle-apeke ahelhe rarle atyerte-ilekeke. **4** Ntange areye iwemele, ntange arrpenhe areye akenhe iwerreke-arle atnyerlenga. Kenhe thirole anteme apetyemele itnenhe arlkweke. **5** Kenhe ntange arrpenhe areye

akenhe ahelhe apwerte-apwerteke-arle atnyerlenge. Kenhe atherrke anteme iparrpe anthurre lyapeke iwenhe-akwewayenge ahelhe akweke-arle yanhe anekenge. ⁶ Nhenge uterne arratemele arne itnenhe ampeke antyerrke-ilemele itne-arle artekerre ntarneke ware arrernerlenge. ⁷ Kenhe ntange arrpenhe areye akenhe atnyeke lyeke akngerre-arle lyapetyartenge. Lyeke akngerre lyapemele arrpenhe itnenhe ayelpayernemele akurne-ileke. Merne ntange lyapetyakenhe aneke. ⁸ Kenhe ntange arrpenhe areye akenhe ahelhe mwerreke atnyeke. Arne nhenhe areye lyapeke akngerre anthurre. Arrpenhememe merne akweke ware atnyeneke, arrpenhememe akngerre awerne atnyeneke, arrpenhe areyele akenhe akngerre anthurre-arle atnyeneke. Ayeye alakenhe-arle aneke.” ⁹ Jesus itneke angkeke, “Yewe, angkentye nhenhe awerrirraye, arrantherre ingkirreke akwetethe itirreme nhenge itelarerrirretyeke.”

Jesus-ele itneke ayeye alengke-iwelhentye areye ilerle-apeme

¹⁰ Kele apententye akngerre Jesus-kenhe areye apetyemele renhe alakenhe apayuthneke, “Iwenhenge-arle-ame unte tyerrtye areyeke angkentye alengke-iwelhentye areye alakenhe ilerle-apeme, arratyae-arratyae iletyakenhe?”

¹¹ Re anteme itneke angkirtneke, “Ngkarte angketyenhe arrekantherre imernemele angkentye-arle artemeke, arrantherre anteme itelarerrirretyeke, kenhe arrpenhe areyele itelarerrirretyeke. Angkentye nhenge

arrekantherre alartetye anetyenhenge-akerte. Arrpenhemele nhenge akwetethe awemele angkentye nhenhe-ante ware nhenge angkentye akngerre anthurre, re itneke imernetyakenhe. ¹² Angwenhele apeke Ngkarte-akerteke akweke ware itelaremele, re apeke awethe itelaretyeke, Ngkartele ikwere awethe imernetyenhe-arle. Kenhe angwenhe apeke akenhe Ngkarteke akangkwe-irretyakenhe iwenhe apeke-arle itne Ikwere-akerte aweke-arle, kele Ngkartele itnekenge repe-akemele iwenhe apeke renhe itne atnyenerlenga, itne Ikwere-akerte alkngwirretyenhe.”

¹³ Jesus itneke angkeke, “Tharle angkentye ileme tyerrtye areyeke, arratyeyiletyakenhe iwenhe renhe tharle itneke ileme, kele-arle itne areme-itanye nthakenhe-arle the mpwareme, kele itne akenhe itelaretyakenhe-arle nthakenhe-arle the ileme. Kele itne akwetethe awerlte-anemele itne akenhe uyarne itelarerrirreme. ¹⁴ Arrule anthurre angkentye Ngkarte-kenhe awemele ilerle-apentye akngerre Isaiah-ele itneke-akerte alakenhe intelhe-ileke,

‘Arrantherre iwenhe apeke renhe akwete awerlte-aneme ayenge angkerlenga, kenhe arrantherre uyarne itelarerrirreme.

Awethe ante, arrantherre akwetethe arerlte-anemele iwenhe apeke renhe the mpwarerlenga, kenhe arrantherre uyarne itelarerrirreme.

¹⁵ Ayenge alakenhe angkerne tyerrtye nhenhe areye-arle akenhe akaperte

martelhekenge itne anteme akaltye-arlke-irretyakenhe anteme.

Kele-arle itne irlpe-akerte-itanye, itne-arle atyenge ahentye-anetyakenhe akangkwe-irretyeke nthakenhe-arle ayenge angkemeke.

Itne apeke-arle alkngae apeke-arle martelheke-arteke itne-arle akangkwe-irretye-kwenye-arle iwenhe-arle arratye anemeke.

Itne apeke-arle arratye awemele, itne anteme arratye akangkwe-irremere warte, itne-arle alkngae arekenge,

irlpele-arlkce awemele.

Kele itne apeke arratye itelarentyele akangkwe-irremele-arlkce angkentye tharle ileke areyeke.

Alakenhe-arle mpwarekenge itne untyeme-irremele arne akurne itne-arle mpwaretyarte-ketye itne atyenge-werne apetye-apeke-alpetyenhenge.

Kele yanhe-ngentyele the itnenhe mwerre-ileme. Kenhe itne akenhe alakenhe mpwaretyeke ahentye-anetyakenhe-arle.' *Isaiah 6:9-10.*

Alakenhe-arle Isaiah-ele intelhe-ileke."

¹⁶ Jesus alakenhe anteme angkeke apententye akngerre ikwerenhe areyeke, "Arrantherre akenhe ayenge alkngae areme, atyenge irlpele akangkwe-irremele. Alakenhe ikwerenge anteme arrantherre akangkentye anthurre. ¹⁷ Kenhe the akenhe arrekantherre arratye-arle ileme: Arrule anthurre tyerrtye areye angkentye

Ngkarte-kenhe-arle awemele ilerle-apetyarte, arrpenhe areye-arlke Ngkarteke-arle arratyentye anerrirretyarte, itne kwenhe ahentye-anetyarte aretyeke iwenhe-arle arrantherre areme. Kele itne akenhe uyerreke-arle, aretyakenhe akwete. Itne akwele awetyeke-arlke ahentye-aneke arrantherre-arteke, itne akenhe awetyakenhe akwete-arle uyerreke.”

Jesus-ele ayeye ntange areye-akerte akethelhe-ileme
(Mark 4:13-20; Luke 8:11-15)

18 Kele Jesus itneke angkeke, “Awerrirraye, tharle arrekantherre ileme angkentye merne ntange-akerte. **19** Tyerrtye arrpenheme areye ntange iwerreke-arle atnyeke-arteke. Itne angkentye Ngkarte-akerte awerrirreme rarle alartetye anetyenhe-akerte, kele itne akenhe itelaretyakenhe-arle. Kele arrentye-arle apetyemele itnenhene alkngwe-iletyeke. **20** Tyerrtye arrpenheme akenhe ntange ahelhe apwerte-apwerteke-arle atnyeke-arteke-arle. Itne angkentye renhe awemele iparrpele arnterre anthurre-arle akangkeme. **21** Kenhe itne angkentye renhe awerrirreme. Kenhe ikwerenge-ntyele apeke itneke akurne akngerre-irrerirretyenhe, arrpenhe apeke itneke ahentye-anetyakenhe itne-arle angkentye Ngkarte-kenheke akangkwe-irrerlenga, kenhe itne akenhe Ngkarte ikwere iparrpe alkngwirrewarrerlenga, ikwere-ketye untyeme-irrerirremele. **22** Tyerrtye arrpenheme areye

ntange-arteke nhenge ahelhe lyeke akngerre-akerteke-arle atnyeke. Angkentye yanhe renhe awemele akangkwe-irremele akweke ware. Kenhe itne imerte itirrewarremele arne iwenhe-iwenhe apeke ahelhe nhenhe-arenyeke. Kele yanhe areyele itne angkentye Ngkartekenhe renhe awerrirremele, kenhe itne akenhe angkentye renhe lterrke atnyenewarretyakenhe-arle, arrpenhe itnenhe akaltyele-anthetyakenhe Ngkarte-akerte. ²³ Kenhe tyerrtye arrpenhemе yanhe areye itne ahelhe ulpmerre yanhe areye-arteke, itne yanhe areye apele angkentye Ngkarte-kenhe renhe awerrirremele, arratyе rarle itne awemele renhe arratyе itelarerrirremе anerrirreke. Kenhe yanhe iperrele itne anteme tyerrtye arrpenhe areye anteme Ngkarte-akerte akaltyele-antherrirreme. Arrpenhemе akweke ware mpwareme. Arrpenhemе akenhe akngerre-ulkere-arle mpwarerlenga. Arrpenhe areyele akenhe akngerre anthurre-arle mpwarerlenga. Tyerrtye atningke anthurre Ngkarteke akangkwe-irretyenhenge.”

Ntange mwerre uthene ntange akurne uthene-akerte

²⁴ Jesus-ele anteme angkentye alengke-iwelhentye arrpenhe itneke ileke, “Ngkarte tyerrtye areyeke alartetye irrerlenga itnenhe arntarnte-aremele, alakenhe-arle anetyenhe: Artwe anyente, garden arntarnte-arentye akngerre, ntange mwerre areye iweke ahelhe rarle atyerte-ilekeke. ²⁵ Kele ingwele artwe rarle ankwe intekenge urrkapentye akngerre

ikwerenhe areye-arlke, artwe anyente apetyeke, re apmereke-artweyeke ahentye-anetyakenhe, re ahelhe ikwere-werne alheke imerte anyelknge-anyelkngele annge akurne areye irrarnpelhe-ilemele iwemele. Re anteme ikwere-iperre alheke. ²⁶ Ikwere iperre merne ntange akngerre amangkeke ntange areye-akerte, annge akurne itne-arlke lyapeke itnekenge imerte akngerre anthurre lyapemele. ²⁷ Nhenge urrkapentye akngerre areyele aremele itne alartetye itne-kenheke alakenhe angkeke, ‘Alartetye-aye! Nthenhe-ngentyele-ame arne akurne nhenhe areye lyapeke? Unte itelareme, unte kwenhe ntange mwerre areye-ante-arlengkerneke.’

²⁸ “Re akenhe angkirtnerlenge, ‘Arrangkwe, tharle annge akurne ngkernetyakenhe-arl, artwe atyenge ahentye-anetyakenhenge apeke anyelknge-anyelkngele apetyemele annge akurne areye iweke.’

“Itne anteme renhe apayuthneke, ‘Anwerne-ame itnenhe tyerremele iweme?’

²⁹ “Re angkirtnerlenge, ‘Kele impaye! Arne akurne areye tyerretyale arne mwerre-arlke anteme tyerreme-ketyenge-arlke. ³⁰ Apurte lyapetyeke impaye, kele ikwerenge-ntyele, ntange itne mpenge anteme irremele. The anteme ileme ntange inemele akentye akngerre areye uthnemele arrekwele akurne areye apurtelhe-iletyeke inemele urele itetyeke. Ntange mwerre arrpenhe areye imerte arrernemele apmereke merne ntangeke.’ Alakenhe-arl anetyenhe arlte ingkerne

nhakwenge.” Alakenhe-arle Jesus-ele itneke ileke.

*Ayeye anne akweke anyente-akerte
(Mark 4:30-32; Luke 13:18-19)*

31 Jesus-ele anteme angkentye alengke-iwelhentye arrpenhe itneke ileke, alakenhe, “Ngkarte tyerrtye areyeke alartetye irrerlenge itnenhe arntarnte-aremele, alakenhe-arle anetyenhe. Artwe garden arntarntarentye akngerrele anne mustard anyente inemele ahelheke ngkernemele renhe arteke. **32** Anne re akenhe akweke anthurre-arle, arrpenhe ingkirrekenge akweke-ulkere. Kele amangkemele akenhe ulye akngerre anthurre anentye akngerre-arle, arne arrpenhe areyenje akngerre-ulkere. Arne ikwerenge akenhe thipe areye apetyemele untye itnekenhe mpwaremele aneme.” Alakenhe-arle Jesus-ele itneke ileke.

*Ayeye merne urlpmernte arlware-ilentye
akngerre-akerte
(Luke 13:20-21)*

33 Jesus-ele anteme angkentye alengke-iwelhentye arrpenhe itneke ileke, alakenhe, “Ngkarte tyerrtye areyeke alartetye irrerlenge itnenhe arntarnte-aremele, alakenhe-arle anetyenhe. Nhenge arelhe anyentele merne arlware-ilentye akngerre akweke arrerneme ulpmerre akngerreke-arleke anyentelhe-ilemele itetyeke. Kele nhenge re anteme arlware-ilentye akngerre akwekele merne renhe arlware-ileme.”

*Jesus-clarle angkentye alengke-iwentye ak-wetethe ileme-akerte
(Mark 4:33-34)*

³⁴ Yewe, Jesus-ele tyerrtye areyeke angkentye alengke-iwentye alakenhe ilemele, itnenhe akngarte-iweke. Rarle angkentye arrpenhe-arteke iletyakenhe-arle. ³⁵ Re alakenhe angkemele, angkentye Ngkarte-kenhe awemele ilerle-apentye akngerre anyentele arrule anthurre ileke, arratyte-arle aneke. Angkentye alakenhe:

“The angkentye alengke-arle-iweke areye-arlke ileme arne atningke-akerte.

The itneke angkentye arrpenhe artemele angkeme,

Ngkartele-arle angkentye nhenhe areye alengke-iweke nhenge rarle ahelhe uthene alkere uthene mpwarekenge.

Alakenhe akwete rarle the ilerle-anetyenhe.”

Isaiah 6:9-10.

Arne akurne areye-akerte

³⁶ Kele Jesus-ele areye impemele alheke imerte apmere kwene-werne irrpenhememe. Kele apentye akngerre ikwerenhe areye apetyemele ikwere alakenhe angkeke, “Anwerneke angkaye, angkentye arne akurne areye-akerte arratyilemele.”

³⁷ Kele Jesus angkeke, “Ayenge, Alere alkere-arenye apmere ahelhe nhenhele-arle akweke intek, annge mwerre-arle iweke re-arteke-arle. ³⁸ Apmere ahelhe anteke akenhe ahelhe-arle atyerte-ileme-arteke-arle. Kele tyerrtye

Ngkarte-arle alartetye irremele atnyeneke akenhe annge mwerre areye-arteke-arle. Kele tyerrtye Satan-ele-arle atnyeneme areye akenhe annge akurne areye-arle arrentye-kenhe areye-arteke. ³⁹⁻⁴⁰ Artwe-arle apmereke-artweye ik-were ahentye-anetyakenhe aneke nhenge annge akurne-arle ngkerneke, re akenhe arrentye-arteke-arle. Kele annge mpenge areye-arle kutyek areye akenhe, utnenge alkere-arenye areye-arteke-arle. Arrantherre itelareme, urreke ahelhe uthene alkere uthene uyerrerlenge kele itne tyerrtye arrentye Satan-kenhe areye-arle apurtelhe-ileme, nhenge areye arne akurne-arteke imerte ureke iwemele. ⁴¹ Urreke, arrantherre itelareme the, Alere alkere-arenye apmere ahelhe nhenhele-arle akweke inteke, utnenge alkere-arenye atyinhe areye yernetyenhe, itne anteme tyerrtye arne akurne areye mpwarentyte akngerre areye apurtelhe-iletyeke alheme, tyerrtye nhenge areye-arlke arrpenhe areye-arle uterneme akurne mpwaretyeke. ⁴² Itne itnenhe apurtelhe-ilekarle-iperre ure akngerreke iweme amperle-arle-anemeke, itne anteme akwetethe artnerlte-anetyenhe rlkerte akngerre-akerte, uyarne itirremele. ⁴³ Kenhe Ngkartele kele tyerrtye ikwerenhe areye apmere mwerre akngerrele-arle atnyeneme, itne anteme pwar-tyetyenhe uterne-arteke. Ye, arrantherre apeke akaltye-irretyeke ahentye-aneme, mwantyele anteme awe nthakenhe-arle ayenge arrekantherre angkeme.”

Ayeye mane akngerre iperteke alengke-iweme

akerte

⁴⁴ Jesus-ele anteme angkentye alengke-iwelhentye arrpenhe itneke ileke, alakenhe, “Ngkarte tyerrtye areyeke alartetye irrerlenge itnenhe arntarnte-aremele, alakenhe-arle anetyenhe. Arne mwerre akngerre arrpenhe areye mane akngerreke ipertele artelherlte-aneme ahelhe kwenele. Artwe arrpenhe akutne-arle anekete apetyemele tnyemele renhe areke, areke-arle iperre anteme re akangkeke imerte ahelhele artirtnemele alpemele arne ingkirreke anthurre ikwerenhe areye maneke antheke. Kele mane atningke-akertele anteme re alpemele ahelhe renhe pay-eme-ileke arne mwerre nhenge areye-akerte arrpenhele-arle arteke.”

Ayeye apwerte impene-akerte

⁴⁵ Jesus-ele anteme angkentye alengke-iwelhentye arrpenhe ileke, alakenhe, “Ngkarte tyerrtye areyeke alartetye irrerlenge itnenhe arntarnte-aremele, alakenhe-arle anetyenhe: Artwe apwerte impene inenhe-inenhe apmere arrpe-anenhe-werne alherle-aneme apwerte mwerre akngerre anthurreke aremele pay-eme-iletyeke. ⁴⁶ Re anteme apwerte impene anthurre areke arrpenhe areyenge mwerre akngerre-ulkere artwe arrpenheke-arleke. Re alpemele arne ingkirreke anthurre ikwerenhe areye maneke antheke, mane ikwerekere anteme re apwerte impene renhe pay-eme-ileke.”

Ayeye kere kwatye-arenye-akerte

47 Jesus-ele anteme angkentye alengke-iwelhentye arrpenhe itneke ileke, alakenhe “Ngkarte tyerrtye areyeke alartetye irrerlenge itnenhe arntarnte-aremele, alakenhe-arle anetyenhe: Arrantherre itelareme, artwe areyele net iweme kватye iperte akngerreke kere kватye-arenye arrpe-anenhe inetyeke.

48 Kele itne tyarre-inemele kватye alayenge-ntyele kele imerte kватye iterele anemele akngakerle-anemele mwerre areye imerte tyampite-ke arrernemele imerte akurne areye iwemele. **49** Alakenhe-arle anetyenhe urreke nhenge ahelhe uthene alkere uthene uyerrerlenge. Yanhenge anteme utnenge alkere-arenye areye alhetyenhe akurne areye uthene mwerre areye apurte anerlte-anerlenge. Itne imerte tyerrtye akurne mpwarentyre akngerre areye anyentelhe-ilemele, **50** itnenhe imerte ure akngerreke iwemele, itne anteme yanhele akwete-ante anerlte-aneme rlkerte-akerte artnerlte-anemele, uyarne itirremele.”

Ayeye lyetenye uthene ayeye arrulenye uthene-akerte

51 Jesus-ele anteme apententye akngerre ikwerenhe areye apayuthneke, “Arrantherre apeke angkentye nhenhe areye arratyte itelarerrirreme?”

Itne anteme angkirtneke, “Yewe, anwerne-arle itele-arle-areme.”

52 Re anteme angkeke, “Yewe, arrantherre arratyte-arle akaltye-irreke angkentye Ngkartekenheke, nhenge Rarle alartetye irremele tyerrtye itnenhe arntarnte-areme-akerte. Arran-

therre angkentye atherreke akaltye, angkentye lyetenyeke uthene arrulenyeke uthene, arrantherre itelareme angkentye atherre nhenge tharle arrekantherre ileke, nhenge Ngkartele Moses-eke-arlke-arle ileke. Arrantherre itelareme artwe anyentele arne mwerre areye atnyenentye akngerre arne box kwenele apmere ikwerenhele arne angkweye uthene lyetenye-arlke apurte. Re akenhe ahentye arne angkweye uthene lyetenye utheneke-arlke. Alakenhenge anteme arrantherre atyengenge akaltye-irreke angkentye atherre atnyenetyeke, atherre anteye lyetenye uthene arrulenye uthene.”

*Yanhe areye apmere Jesus-kenhe-arenyele
renhe itelaretyakenhe
(Mark 6:1-6; Luke 4:16-30)*

⁵³⁻⁵⁴ Jesus-clarle angkentye nhenhe areye ileke-iperre re apmere ikwerenge-ntyele alheke apmere ikwerenhe Nazareth-werne. Apmere ik-were irremele re tyatye Jew areye-kenheke ir-penheke imerte itneke angkentye angkemele akaltyele-anthemele. Itne renhe awemele ap-atewarremele angkerreke, “Aye! Angwenhele-ame renhe akaltyele-antheke angkentye il-ernpenyele angketyeke? Nthakenhe-ame re ngangkere akngerre-akertele arne arrpenheke-arrpenhe mpwarerle-apeme? ⁵⁵ Re alere-arlle artwe apmere artentye akngerre nhenge-kenhe, meye ikwerenhe akenhe Mary-arlle, kele ikwere atyeye areye akenhe James, Joseph, Simon, Judas uthene nhenhele aneme. ⁵⁶ Ikwerenhe marle atyeye areye-arlke-arlle nhenhele aneme.

Kele, nthakenhe anteme re alakenhe ilyenpenye-irreke?”⁵⁷ Itne-arle itirrewarretyakenhe-arle aneke rarle arne iwenhe apeke renhe ngangkerele mpwaretyeke, itne anteme ikwere awelhetyakenhe aneke.

Kele Jesus, nhenhe awemele, angkeke, “Tyerrtye apmere arrpenhe-arenye areyele-arle akwetethe-arle tnakewarreme tyerrtye areye angkentye Ngkarte-kenhe-arle awemele ilerle-apetyameke. Kele apmere ikwerenhe-arenye areyele-arlke akenhe ikwere akangkwe-irretye-kwenye-arle renhe tnakewarretyakenhe re angkerlenge itne renhe awetyakenhe-arle aneme.”⁵⁸ Kele apmere yanhe ikwerele Jesus-ele ngangkerele mpwaretyakenhe aneke tyerrtye atningkeke, itne-arle itirrewarrekenge rarle uyarne mpwaremeke-athene, kele re urrpetye-arppe ware-arle angkwerre-iweke.

14

Itne John Kwaty Akwernentye Akngerre irrerlknge atweme

(Mark 6:17-29)

3-4 Arrule-arle Herod-ele arelhe atyeyikwenhe ineke-arle renhe anewe akeke. Arelhe Herodias arritnye aneke. John-ele arnterre iletyame Herod renhe alakenhe, “Unte apale-apale mpwareme renhe anewe akemele.” Alakenhenge anteme Herod-ele, thultye ikwerenhe areye yerneke arntwirrketyeke John, renhe ayernemele jail-ke akwernetyenhe. Arratyte itne arntwirrkeke renhe jail-ke akwernemele.

5 Alakenhe ikwerenge anteme re ingkwe John

irrerlknge atwetyeke aneke, Herod re kwenhe atere aneke tyerrtye areye-ketye. Itne itirreke John-arle artwe nhenge angkentye Ngkartekenhe awemele ilerle-apentye akngerre-arle.

6 Kele, urreke-ulkere-nge anteme, tyerrtye atningke apurte-irreke nhenge itne merne arunthe arlkwetyenhenge Herod ikwerenge akangketyeke. Alakenhe re itne mpwarerlenga, marle wenke Herodias-kenhe apetyetyame unterle-apemele nhenge itne renhe arerrirretyenhenge. Herod akangkeke anthurre marle anthepe-irrerlenga aremele. **7** Kele, Herod marleke angkeke, “Iwenhe ikwere-ame atnerte ngkwinhe ahentye anthurre aneme? Iwenhe ikwere apeke-arle unte itirreme, the ngenhe arne ingkirreke antheme nhenge unte-arle ahentye-anemeke. Ngkartele itelareme ayengearle ngkwenge arratyat ilelhemeke.”

8 Kele imerte re meye ikwerenhe Herodias-werne alhemele renhe apayuthneke, “Meye, Alartetye yanhele kwenhe ayenge ileke nhenge the akwele yanhe renhe apayuthnetyeke arne iwenhe apeke ikwere, yanhe ikwerenge-ntyele anteme re ayenge antheme. Iwenheke-ame the renhe apayuthneye?”

Meye ikwerenhe akenhe angkirtnerlenga, “Alakenhe ikwere angkaye, ‘Akaperte John Baptist-kenhe ultakaye imerte akngetye-alpemele atyenge imernetyeke!’ ”

Kele, re untirtneke Herod-werne, ikwere angkeke, “Akaperte John Baptist-kenhe ultakaye atyenge-werne akngetyeke!”

9 Nhenge Herod-ele renhe alakenhe angkerlenge aweke-arle, kele re alhwarre anthurre awelherlenge John-eke. Re uyanne anthurre itirreke marle nhenhe ikwere alakenhenge re kwenhe renhe alhileke-arle arne areye renhe anthetyeke, arrekwele arrpenhe areyenge. Kele re yerneke thultye anyente ikwerenhe sword akngerre-akerte. **10-11** Re jail-ke irrpenheke John Kwayeke Akwernentye Akngerre akaperte ultaketyeke. Re akaperte ware apantheke arrernemele akngetye-alpeke. Nhenge akwete-arle aneke re marle renhe antheke, re anteme akngeke meye ikwerenhe Herodias-werne. **12** Nhenge apententye akngerre Johnkenhe areyele angkentye nhenhe renhe awerrirremele, itne apetyewarremele renhe ineke renhe ipertek akwernewarreke mwerrentyel artemele. Itne anteme alhemele ileke Jesus-eke John-arle uyerreke-akerte.

*Herod apale itirreme
(Mark 6:14-16; Luke 9:7-9)*

1 Nhenhe ikwerele ureke Herod Antipas-ele, artwe nhenge Galilee-arenye areyeke-arle alarte-tye aneme, angkentye Jesus-akerte aweke tyerrtye areyele ilerlte-aperlenge apmere arrpenenhenge. **2** Herod mpwarentyte akngerre ikwerenhe areyeke angkeke, “Artwe yanhe-ame John kwayeke akwernentye akngerre? Itnemane renhe atweke? Ilweke-arle-iperre-ame re nhenhe itethe-irrintye-alpeke? Alakenhenge-ame re ilyernpenye arne arunthe anteme mpwareme?”

*Jesus-ele tyerrtye atningke wanteme, 5,000 anthurre
(Mark 6:3-44; Luke 9:10-17; John 6:1-14)*

13 Nhenge Jesus-ele aweke John-arle ilweke-akerte, re boat-eke antyemele alheke apmere arrpenhe-werne re-arrpe anetyeke. Kenhe tyerrtye areyele awerlenge rarle yanhe ikwere-werne alheke. Apmere arrpe-anenhe-ngentyele itne ingkele apetyeke nthenhele Jesus anemenge.

14 Nhenge Jesus apmere yanheke irremele boat-engentyele atnarnpemele, re areke tyerrtye atningke anthurre tnerirrerlenge, itne ikwere akarelheke. Re itneke alhwarre awelheke rlk-erte itnekenhe-arle angkwerre-iwekenge.

15 Angwerre-angwerre-anteme-irreke, apententye akngerre ikwerenhe areye apetyemele ikwere angkeke, “Apmere nhenhe apmere arpenhenge arlenge-ulkere, uterne kwenhe irrpeme. Itnenhene yernaye merne itneke-arrpe alhetyeke inetyenhenge.”

16 Jesus akenhe itneke angkerlenge, “Itne kwenhe nhenhele aneme. Arrantherre itnenhe merne anthaye!”

17 Apententye akngerre areye ikwere angkirtnerlenge, “Anwerne kwenhe merne tampe 5 pele ware atnyeneme kere kwatye-arenye atherre-arlke ware.”

18 Jesus itneke angkeke, “Merne uthene kere kwatye uthene akngetyaye, ayenge anthetyeke.”

19 Tyerrtye areyeke anteme re ileke nhenge itne arrernelhetyeke atherrke-karleke. Kele

Jesus anteme merne 5 pele kere kwatye-arenye atherre ineke. Re alkere akertne-werne-atheke areke Ngkarte utyernemele tnakeke. “Akngeyaye, ayenge kwenhe lyete ngkwenge akangkemele angkeme merne nhenheke.” Kele re anteme merne renhe ultakeke, kere kwatye-arenye nhenge ngkweltye-ngkweltye-ilemele, re antheke apententye akngerre ikwerenhe areye. Itne untherlte-apemele merne uthene kere kwatye-arenye akweke ware anthirtnaneke tyerrtye apurte-arle anerrirreke itnenhe.

20 Tyerrtye ingkirreke anthurrele arlkweke anhelke-irretyeke. Ikwere iperrele apententye akngerre ikwerenhe areyele kutyerlte-apeke nhenge merne uthene kere kwatye-arenye uthene impekele areye yakwethe akngerre 12-pele areye-akertele. Yakwethe ikwerekere ipmentye-ipmentye anthurre inteke.

21 Artwe areyele nhenge arlkweke atnerte ulhelkeke-atwetye, areye kwenhe aneke 5,000 anthurre. Arelhe-arlke ampe areyele-arlke merne uthene irpennge uthene arlkweke.

*Jesus kwatye artepele alheme
(Mark 6:45-52; John 6:15-21)*

22 Jesus anteme apententye akngerre ikwerenhe areyeke angkeke, “Arrantherre arwekele alhaye boat-enge kwatye alayenge arrengakwe ampinye-werne. The kwenhe tyerrtye nhenhe areye apmere itnekenhe-werne yernirtneme.” Apententye akngerre ikwerenhe areye anteme boat-eke antyemele alheke kwatye alayenge arrengakwe ampinye-werne-atheke.

Jesus-ele tyerrtye areye apmere itnekenhewerne yernirtneke. ²³ Nhenge itnenhe apmerewerne yerneke-arle iperrele, re apwerte akertneke antyekere re-arrpe angketyeke Ngkartekere. Ingwele anteme-irreke, Jesus anyente-arenye anetyame.

²⁴ Yanhe ikwerenge apententye akngerre Jesus-kenhe kwatye alaye mpwepele akwete alhetyame, kenhe itne uyanne anthurre arrengkere-irreke nhenge rlkele inngerre itnekenhe wernekenge, kwatyele itnenhe ulpertelhe-ilemele iweke. ²⁵ Ingwemertele akwete, Jesus apwerte-ngentyele atnarnpeke, kwatye artepele itneke-werne atheke ingke apetyemele. ²⁶ Apententye akngerre areyele renhe areke kwatye artepele apetyerlengen, itne atere anthurre irrereke arlkerrirremene, “Ayekaye! Lthane-aketye alaye!”

²⁷ Jesus akenhe itneke angkerlengen, “Atereirretyle anaye! Ayengetay! Atnerre anerrirraye!”

²⁸ Peter anteme angkeke, “Akngerrepataye! Unte-ame yanhe? Unte apeke-arle arratyeyanhele tnemenge atyenge antangkaye ayenge boat-engentyele atnarnpemele alhetyenhenge ngkwenge-werne kwatye artepele.”

²⁹ Re anteme angkeke, “Kele, atnarnpemele atyenge-werne apetyaye!”

Re anteme boat-engentyele atnarnpemele alheke kwatye artepele Jesus ikwere-werneatheke. ³⁰ Nhenge re alherle-apemene rlkele kwatye akngelhetyeke mpwarerlengen re anteme atere-irreke mpwepe anthurreke-irremene re

anteme kwatye kweneke irrpetyeke alhemele re arlkeke, “Akngerrepataye! Ayenge kwatye-ketye inaye!”

³¹ Iparrpe anthurrele Jesus-ele renhe amultenje tyarre-ineke imerte renhe kwatye-ngentyele tyarre-inemele imerte ikwere alakenhe angkemele, “Aye! Iwenhenge-ame unte itirreke tharle ngenhe uyarne mpwaretyame?”

³² Kele ratherre boat-eke antyemele rlke atyenpe anteme irrerlenga. ³³ Apententye akngerre arrpenhe areye boat-esarle aneke areye Jesus-nge arrekwele kwene-irremele renhe tnakewarremele ikwere angkeke, “Arratyeharle unte Alere Ngkarte-kenhe.”

*Jesus-ele rlkerte atningke angkwerre-iweme apmere Gennesaret arritnye-arenye areye
(Mark 6:53-56)*

³⁴ Ikwerenge anteme itne kwatye alayenge arengakwe ampinyeke-irreke apmere Gennesaret ikwerenge. ³⁵ Tyerrtye atningke anthurrele renhe alhengke-areke, itne iparrpe angkentye antekelhe-ileke Jesus-arle apmere ikwerele anetye-alheke. Itne tyerrtye rlkerte areye ikwere-werne akngetyeke. ³⁶ Rlkerte areye Jesus-eke arlketyame, “Anwerne ahentye aneme mantere akantye-ante ware ngkwinhe anpetyeke nhenge yanhe-arle anpeme-iperrele anwerne iparrpe mwerrelhe-ileke ingkirrekele-arle mantere ikwerenhe anpekenge.

15

*Ayeye tyerrtye areye-akerte, angkentye
 Ngkarte-kenhe-arle arratye atnyenetyakenhe
 (Mark 7:1-13)*

¹ Ikwerenge Pharisee urrpetye-arlke angkentye Moses-kenhe akaltyele-anthenhe-anthenhe areye-arlke Jerusalem-engentyele apetyeke Jesus aretyeke. Itne renhe apayuthneke, ² “Nthakenhe-arle-ame apententye akngerre ngkwinhe areyele apentetyakenhe akngerrepate arrulenye anwerne-kenhele-arle anwernenhe akaltyele-antheke? Itne kwenhe iltye alhewelhetyakenhe, akngerrepate arrulenye anwerne-kenhele anwernenhe akaltyele-antheke-arteke, nhenge merne arlkwetyenhenge.” ³ Re itneke angkirtnerlenga, “Iwenheke-ame arrantherre angkentye Ngkarte-kenhe awerrirretyakenhe, angkentye akngerrepate arrulenye anwerne-kenhe ware awerrirremele? ⁴ Nhenge angkentye Ngkarte-kenhe alakenhe angkeke, ‘Arrantherre akngeye uthene meye utheneke akurne angkirtnetyale, renhe-atherrenhe aywerrke-irremele awetyeke. Angwenhe apeke akurne angkerlenga akngeye uthene meye utheneke, arrpenhe areyele renhe irrerlkng-e-arle atwetyeke.’ ⁵ Kenhe arrantherre akenhe alakenhe-arle apale akaltyele-antherlenga, ‘Unte mangkwe uthene anyangkwe utheneke angketyeke, “The mpwelenhe alpe-eme-iletyeke arrangkwe-arle. Arne nhenge tharle mpwelenhe anthetyeke

aneke arntarnte-aretyeke, the Ngkarte anteme alhileke renhe anteme anthetyeke.” ”

⁶ Jesus anteme itneke angkeke, “Alakenhe-arteke arrantherre angkentye Ngkarte-kenhe untyeme-ileme. Angkentye arrekantherrenhe-arpe akaltyele-anthemele.” ⁷ Yewe, arrantherre-arle ularele mwerre aneme akwele. Kenhe angkentye Ngkarte-kenhe-arle ileke, Isaiah-ele, arratyte anthurre-arle arrule arrekantherre-akerte alakenhe intelhe-ileke,

⁸ “Tyerrtye nhenhe areyele ayenge tnakeme arrakerte itnekenhenge ware.

Kenhe itne akenhe angkentye atyinheke akangkwe-irretyakenhe-arle, atyenge ahentye-anerrirretyakenhe. ⁹ Itne urrtyirremele kwene-irremele ayenge tnakeme.

Alakenhenge itne akaltyele-anthemele angkentye itnekenhe-arpe.

Itne urrtyirremele ileme angkentye atyinhe alakenhe re.” *Isaiah 29:13.*

Tyerrtye areye-arle akurne-irrerirreme-akerte (Mark 7:14-23)

¹⁰ Kele Jesus-ele tyerrtye areyeke antangkeke, itne angathe-irremele apetyeke renhe awetyeke. Re anteme itneke alakenhe angkeke, “Ayenge awemele akaltye-irraye! ¹¹ Iwenhe apeke renhe tyerrtyele-arle arrakerte ikwere-arleke akwerneme, renhe akurne-iletyeke arrangkwe Ngkartenge alkngetherre. Tyerrtye akurne-irreme Ngkartenge alkngetherre, rarle angkentye akenge areye angkemenge.”

¹² Urreke, apententye akngerre areye ikwere alakenhe angkeke, “Unte-ame itelareme Pharisee yanhe areye-arle ahele anthurre irrereke, angkentye-arle unto angkekenge?”

¹³ Jesus imerte itneke angkemele, “Ngkarte akertne-arenye atyinhe, Re tyerrtye areye angkentye apale-arle akaltyele-antheme iwetyenhe-arle, arne nhenge Ngkarte-ketye, merne ngkernentye akngerrele-arteke-arle arne areye iwetyenhenge rarle ngkernetyakenhe. Re arne nhenge areye tyarre-inetyenhe, artekerrearlke. ¹⁴ Kele Phariee itneke akangkwe-irretyale anaye, itne kwenhe pwenge areye-arteke ware pwenge arrpenhe areye-arle arntirrkwemele akngerle-apeme. Nhenge pwenge arrpenhele pwenge arrpenhe arntwirrkerle-apeme ratherre imerte alhemele iperte akngerreke atnyerle-anerremele.”

¹⁵ Peter imerte Jesus-eke angkemele, “Anwerneke ilaye angkentye nhenhe areye akethelhe-ilemele anwerne anteme itelarerrirretyenhenge.”

¹⁶ Jesus anteme itneke angkeke, “Arrantherre-inpe ayenge itelarerrirretyakenhe.

¹⁷ Arrantherre itelarerrirretyeke, nhenge tyerrtye areyele arlkwemele, merne re arrakerteke irpperlenge kele imerte merne nhenge anpere-irrenhemele arratetyenhenge.

¹⁸ Kele itirrewarraye iwenhe-arle arrakertengentyele arratemek, angkentye akurne areye-arle! Tyerrtye akurne areye-akerte itirremele, re anteme akurne angkeme, alakenhenge-arle re Ngkarte tnaketyakenhe. ¹⁹ Nhenge tyerrtye

akurnentye itirremele, alakenhenge anteme re tyerrtye arrpenhe atweme, arelhe arrpenhe anyelkngelle intelhe-ilemele, imerte anewe arrpenhe-kenhe mpwenye akngemele. Re imerte arne arrpenhe-kenhe anyelkngelle inemele, imerte urrtyirremele-arlke ilemele, arrpenhe areye-akerte akurne angkemele. ²⁰ Ye, tyerrtye akenge-irremele rarle akenge itirremele-arlle akenge mpwareke-arlle. Kele Ngkartele aremele tyerrtye iltye alhewelhetyakenhele merne inemele arlkwerlenge rarle itnenhe akenge iletyakenhe-arlle.” Alakenhe-arlle Jesus apententye akngerre areyeke angkeke.

*Arelhe apmere arrpenhe-arenyele Jesus arratyne aweme
(Mark 7:24-30)*

²¹ Yanhe-ngentyele Jesus alheke apmere yanhe iwerle-alhemele akweke ware anetyeke apmere Tyre uthene Sidon uthene itwele. ²² Apmere yanhe ikwerele arelhe anyente apmere Canaan-arenye apetyeke Jesus-werne imerte ikwerenge arrekwele tnemele angkemele, “David-eke-artweye-aye, atyenge mwerre anemele atyenge alhwarrpe-irraye! Ampe atyinhe akunye rlkerte anthurre arrentyele-arlle renhe rlkerte mpwarekenge.”

²³ Jesus-ele akenhe renhe irlpe artepele-arlle awerlenge nthakenhe-arlle re angkekenge, ikwere angkirtnetyakenhe anemele. Kele arelhe re renhe akwete apentemele ikwere arlkerleapeke. Kele apententye akngerre Jesus-kenhe areye anteme ikwere angkeke, “Renhe aywepaye!

Re kwenhe anwerneke arlkemele apenterle-apeme.”

24 Kele Jesus arelheke angkeke, “Arrangkwe, Ngkartele-arle ayenge Israel-arenye areyewerne-ante-arle yerneke, itne-arle yepe-yepe aparnte-arle-irreke-arteke-arle anemenge itnenhe-arle arntarnte-aretyakenhe.”

25 Nhenhe awemele arelhe re amperelerarlenga tnemele Jesus-eke angkeke, “Alartetyeaye, atyenge mwerre anemele renhe mwerre-iletyeke apetyaye!”

26 Kele Jesus renhe ayene-ilemele, angkentye artemele ikwere angkeke, “Atyenge kwenhe mwerre anetyakenhe merne ampe areyenge rakemele akngwelye areye anthetyeke-arteke.” Alakenhe-arle re angkeke, Ngkartele-arle renhe yerneke Jew areye-ante angkwerre-iwetyeke, Jew anetyakenhe areye-kwenye.

27 Arelhe re akenhe ikwere angkirtnerlenga, “Ye, arratyeyarle akngerrepatke lete unte itelareme nhenge ampe areyele arlkwerlenga, merne ngkweltye-ngkweltye table-ngentyele atnyerlenga, kele akngwelyele arlkwerlenga-arle.”

28 Jesus imerte ikwere angkemele, “Arelhaye, unte kwenhe arratyeyangkeke. Unte-arle arratyeyitirreme tharle mpwaretyeke, kele ikwerenge anteme the mpwareme iwenhe-arle unte ahentye anemeke.” Kele arratyeyanthurre anteme ampe ikwerenhe mwerre-irreke.

Jesus-ele tyerrye atningke angkwerre-iweme

29 Ikwerenge Jesus-ele apmere renhe impemele alpeke apmere Galilee-werne ikwerele

anteme re kwatye iterele alhetyame re imerte apwerte akertneke antyenhemele anetye-alpeke. ³⁰ Kele tyerrtye atningke anteme ikwere-werne apetyewarreke, itne tyerrtye rlkerte atningke renhe akngetyeke, nhenge, inwerre areye, pwenge areye, angketyakenhe areye, awetyakenhe areye-arlke arrengkwelthe arunthe-akerte arrpenhe areye-arlke. Jesus-werne akngetyemele itne ingkeke athenemele, re akenhe itnenhe angkwerre-iwerlenga-arle ingkirre. ³¹ Tyerrtye areyele aremele nhenhe itne arnterre apatewarreke, angketyakenhe areye angkerlenga awemele, inwerre areye mwerre-irrerlenga, unthetyakenhe areye untherlenga, pwenge areyele arerlenga anteme. Itne anteme ingkirreke Ngkarte tnakewarreke, Israel-arenye areyele-arle utyer nemele tnakewarreme renhe.

*Jesus-ele tyerrtye atningke merne antheme,
4,000 anthurre
(Mark 8:1-10)*

³² Jesus antangkeke-arle-iperrele apententye akngerre ikwerenhe areyeke, re itneke angkemele, “Ayekaye, ayenge alhwarrpe awelheme tyerrtye nhenhe areyeke itne-arle atyengenge anekenge arlte urrpetyenge merne itnekenhe uyerreke anteme. Tharle itnenhe uyarne yernekenge alhemele apeke itne angayakwe atnyeketyenge. Nhenge arrpenhe areye itne apmere arlenge-ntyele apetyeke.”

³³ Apententye akngerre ikwerenhe akenhe angkerlenga, “Anwerne apmere unpenyele

anemele, nthenhe-ngentyele anteme anwerne merne inetyenhe atningke nhenhe areye wantetyeke?”

³⁴ Jesus itneke angkirtneke, “Merne tampe nthakentye-arle-ame arrantherre atnyeneme.”

Itne akenhe angkirtnerlenge, “Seven pele, kere kwatye-arenye akweke urrpetye-arlke.”

³⁵ Re ileke tyerrtye areye ahelheke ar-
rernelhetyeke. ³⁶ Merne tampe seven-pele,
kere kwatye-arenye akweke urrpetye-arlke it-
nenhe akngeke-iperrele, Ngkartek angkemele
ultakeke. Re antheke apententye akngerre ikw-
erenhe areye tyerrtye areye antherle-apetyeke.
Itne akngernerlte-apemele anthirtnaneke it-
nenhe. ³⁷ Tyerrtye ingkirrekele arlkwemele
atnerte ulhelke anteme. Apententye akngerre
ikwerenhe areye yakwethe seven-pele in-
emele, merne ipmentye-ipmentye areye kutyek
apurtelhe-ileke itnenhe. ³⁸ Artwe 4,000 at-
ningkele arlkwemele atnerte ulhelke anteme,
arelhe arrpenhe atningkele-arlke ampe areye-
arlke arlkwerrirreke. ³⁹ Jesus-ele tyerrtye areye
yerneke apmere-werne alpetyeke. Apententye
akngerre ikwerenhe areye boat-eke antyek.
Itne kwatyele alheke arrengakwe-werne apmere
Magadan-werne.

16

*Tyerrtye areyele Jesus uterneme arrker nemele
re iwenhe apeke renhe ulyeyele mpwaretyeke
(Mark 8:11-13; Luke 12:54-56)*

¹ Kele Pharisee areye uthene Sadducee areye uthene Jesus-werne apetyeke renhe uternetyeke arne ulyeyele mpwaretyeke, itneke imernetyeke Ngkartele-arle arratyte renhe ngangkere antheke.

² Kele Jesus itneke angkeke, “Nhenhe awerrirraye. Arrantherre itelareme nhenge uterne irrperlenge angkulye mwarrantye athetheke-irreme, renhe aremele arrantherre angkerirremele, ‘Araye, angkulye areye athetheke-irreme. Kele ingweleme alkere akethe anetyenhe, kwatyeke arrangkwe.’

³ Arlte arrpenhe akenhe ingweleme, urreke uterne akertne-irretyenhenge, alakenhe ante-arle angkulye athetheke-irremele imparrkeme, alakenhe irremele arrantherre angkerirreme, ‘Araye angkulye athetheke-irrekeyaye. Kwatyele apeke lyete anhetyenhe.’ Kele, arrantherre alkere aremele arrantherre akaltyele itelaremele-arle angkeme. Kele arrantherre areme nthakenhe-arle lyete-irreme arrantherre itelaretyakenhe-arle nthakenhe-arle Ngkartele mpwareme.” ⁴ Kele Jesus itneke angkerlenge, “Kele arratyte-arle arrantherre akurne areye Ngkarteké akangkwe-irretyakenhe. Arrantherre ayenge akwete apayuthneme the akwele ngangkerele mpwaretyeke arrantherre-arle atyenge-ante-arle akangkwe-irreme ayenge aremele alakenhe mpwarerlenge. Kele arrangkwe, Ngkartele iwenhe apeke renhe ngangkerele mpwaretyakenhe arrantherre aretyenhenge ware akwele. Urreke-arle arrantherre aretyenhe arne nhenge Jonah-ekarle irreke-arteke kele arrantherre itele-arle-areme.”

* Alakenhe-arle itne angkeke-iperre re alheke anteme.

*Merne arlware-ilentye akngerre Phariee areye uthene Sadducee areye uthene-kenhe
(Mark 8:14-21)*

⁵ Itne apurte antyemele boat-eke kwatye alaye akngerrele alheke. Kenhe apententye akngerre areye akenhe alkngwirreke-arle merne tampe akngetyetyeke. ⁶ Jesus anteme angkelpe-angkeke, itnenhe alakenhe ilemele, “Mwantye itirremele ameke-arelhewarretyeke arne nhenge merne arlware-ilentye akngerre Phariee areye uthene Sadducee areye uthene-kenhe-ketyenge.”

⁷ Nhenge apententye akngerre areyele awemele alakenhe itne angkerreke, “Nthakenheame re angkeme? Re apeke-arle alakenhe angkeme anwerne-arle merne imperlte-alhekenge.”

⁸ Kenhe Jesus-ele awerlengen nthakenhe-arle itne angkeke imerte itneke angkemele, “Iwenhenge-arle-ame arrantherre angkerreme arrantherre-arle merne akngetyetyakenhe? Arrantherre apeke-arle itirreme tharle arrenhantherrenhe uyarne wantemeke-athene.

⁹ Arrantherre-ame ayenge ipmentyele-arle areme ayenge itele-arlke-aretyakenhele? Arrantherre apeke-arle alkngwirreke-arle tharle artwe 5,000 wanteke merne 5-pele-ngentyele ware, kele itne arlkweke-arle iperre atnerte anhelke-ilelhemele, arrantherre merne ampenye

* **16:4** Jonah-akerte angkentye 1:15-2:6, Matthew 12:40 Jonah-arle irrpennge akngerre atnertele aneke arlte urrpetyeke-atwetye ingwe urrpetyeke-arlke.

ineke imerte kutyemele yakwethe 12 pele anthurreke arrernemele. ¹⁰ Arrantherre apeke alkngwirreke tharle tyerrtye arrpenhe atningke anthurre 4,000 ingkirreke wantekeke merne 7-pelele ware, arrantherre anteme urtne 7-peleke merne ampenye areye arrerneke. ¹¹ Nthakenhe anteme arrantherre itelaretyakenhe akwete nthakenhe-arle ayenge angkemeke? Ayenge-arle arrekantherre merne-akerte angketyakenhe-arle, kele the akenhe arrenhantherrenhe ileme mwantye itirrtyeke-arle ameke-arelhemele merne arlware-ilentye akngerre Pharisee areye uthene Sadducee areye uthene-kenhe-ketye.”

¹² Kele apententye akngerre itne itele-anteme-areke nthakenhe-arle re angkeke, itne-arle apale-arle itirreke Jesus-eke rarle angkekengen merne arlware-ilentye akngerre-akerte. Kele arrangkwe-arle, re ileke itnenhe alkngarre-ilemele Pharisee areye uthene Sadducee areye uthene-ketye angkentye urrtiyirrentye-arle ilemenga.

Peter arratyе angkeme Ngkartele-arle alhilekeke Jesus-akerte

(Mark 8:27-30; Luke 9:18-20)

¹³ Kele Jesus itne-akerte apmere arrpenhe-werne alheke, Caesarea Philippi arritnye-werne, re anteme apententye akngerre itnenhe alakenhe apayuthneke, “Atyenge ilaye! Nthakenhe-ame tyerrtye arrpenhe areye atyenge-akerte angkerreme, Alere alkere-arenye apmere ahelhe nhnhele-arle akweke intek-e-akerte?”

¹⁴ Itne akenhe ikwere angkirtnerlenge, “Arrpenheme areye itirreme unte-arle akweke John

nhenge tyerrtye areye-arle kwatycke akwernet-yarteke, itethe-arle-irrintye-alpeke. Arrpenhe areye akenhe itirreme unte-arle Elijah-arle akwele itethe-arle-irrintye-alpeke. Arrpenhe areye akenhe itirreke unte-arle Jeremiah-arle, itethe-arle-irrintye-alpeke. Arrpenhe areye akenhe itirreke unte-arle akwele arrule-arle angkentye Ngkarte-kenhe awemele ilerle-apentye akngerre, itethe-arle-irrintye-alpeke.”

¹⁵ Kele Jesus itneke angkeke, “Kele angwenhe anteme arrantherre-arle ayenge ileme?”

¹⁶ Kenhe Simon Peter akenhe angkirtnerlenga, “Unte-arle Christ-arle, nhenge Ngkartele-arle alhileke. Unte Alere Ngkarte-kenhe-arle, Ngkarte lterrke akngerre-arle aneme akenhe.”

¹⁷ Kele Jesus anteme ikwere angkeke, “Yewe arratye Simon, Jonah-eke alere! Unte arratye-arle angkeme. Kele mwerre-arle, artwe arrpenhele-arle ngenhe akaltyele-anthetyakenhenge. Unte alakenhe angkeke Akgeye akertne-arenyele ngenhe alakenhe akaltyele-anthekenge. ¹⁸ Awaye! Lyete the ngenhe ileme, Peter arritnye ngkwinhe, arritnye yanhele ileme “apwerte.” Unte apwerte-arteke, apmere artentye akngerrele arrekwele apwerte arrerneme warle artetyenhenge. Unte arrpenhe atningke anthurreke atyenge-akerte ileyenhe, itne ayenge apentetyenhenge. Itne ayenge akwete apentewarretyenhe, iperte-werne atheke apeke. ¹⁹ Kele Peter, the ngenhe arrernetyenhe, unte-arle tyerrtye itneke arriwe altywere-ileyenhe, nhenge tyerrtye areyeke Ngkarte-arle alartetye anetyeke. Apmere ahelhe nhenhele

unte arrpenhe areye arratyeyenhe iwenhe apeke renhe mpwarerlenga, Ngkartele-arle akertnenge kele ayakekengenye. Apmere ahelhe nhenhele unte arrpenhe areyeke arratyeyenhe iwenhe apeke renhe mpwarerlenga, Ngkartele-arle akertnenge kele yewe angkekengenye.”

20 Kele Jesus alakenhe itneke angkeke, “Tyerrye arrpenhe areyeke atyenge-akerte iletyale, kele arrantherre itelareme ayenge-arle Christ aneme Ngkartele-arle alhileke!”

*Jesus angkeme ilwetyenhe-arle akerte
(Mark 8:31—9:1; Luke 9:22-27)*

21 Kele Jesus anteme apententye akngerre ikwerenhe areyeke alakenhe angkeke, “Urreke ulkere ayenge apmere Jerusalem-werne alhetyeke, yanhe ikwerele Jew akngerrepatayatye-arenye areyeke, angkentye Moses-kenhe akaltyele-anthenhe-anthenhe areyeke atyenge anyurre-irremele, akurne anthurre irretayenhe areyeke, ayenge rlkerte anthurre atwetyenhe. Apmere yanhenge itne ayenge iltye anthetyenhe arrpenhe areyeke ayenge atwetyeke. Itne-arle ayenge irrerlknge atwekengenye ingwe atherre-ipperrele ayenge itethe-irrirtneyenhe akeme-irremele.” Alakenhe-arle Jesus-ele apententye akngerre itneke ileke.

22 Peter-ele Jesus-eke antangkeke akngakelhe-ilemele, ikwere ahele angkemele, “Itne kwenhe ngenhe irrerlknge atwetyakenhe. Ngkartele ngenhe mwantyele arntarnte-aretyenhe!”

23 Jesus Peter-werne ularre-irremele ikwere ahele angkeke, "Arrentye-aye ayenge impememe alhaye. Unte akenhe itirreme tyerrtye ahelhe-arenye-arteke-arle. Unte kwenhe Ngkarte-arteke itirretyakenhe."

24 Kenhe Jesus apententye akngerre ikwerenhe itneke angkeke, "Angwenhele apeke-arle ayenge apenterle-anetyeke ahentye-aneme, re ikwere-arpe alkngwirretyeke, atyenge-ante itirremele ayenge apenterle-anetyeke. Kenhe arrpenhe areyele apeke ngenhe atwerrirretyenhe arne arntarlkweke-arleke, unte-arle ayenge apentemenge, kele mwerre-arle. Atere-irretyalaye ilweme-ketye, ayenge apenterlte-akwete-anaye!"

25 Kenhe unte apeke-arle akwete itethe anetyeke ahentye-aneme, unte imerte ilelhemele unte-arle atyenge akutne-arle, arrpenhe areyele ngenhe atweketye, kele unte Ngkartenge itethe akwete-ante anetyakenhe-arle. Kenhe arrpenhe areyele apeke ngenhe atweme unte-arle ayenge apentemenge, kele unte Ngkartenge itethe akwete-ante-arle aneme.

26 Kele tyerrtye nhenge ahentye-aneme arne ahelhe nhenhe-arenye ingkirreke inetyeke, kele re apententye akngerre-irretyakenhe-arle, nthakenhe anteme irretyenhe re ilwerlenga? Kele, re ilwemele, aparnte-irretyenhe, Ngkartenge akwete-ante anetyeke arrangkwe. Anwerne arne areye Ngkarte uyarne antheme, ikwerenge itethe akwete-ante anetyenhenge.

27

Urreke, ayenge Alere alkere-arenye ahelhe nhenhele-arle alkngirreke, Ngkarte-ngentyele kwene-werne apetyetyenhe,

utnenge alkere-arenye atningke anthurre atyengenge irlkwatherre. Ayenge arratemele pwarrtyetyenhe alkngenthe akngerre-arteke, ingkirrekeke imernemele Ngkarte-arle mwerre akngerre aneme. Ayenge-arle apetyalpeke iperre ayenge ingkirrekeke itirretyenhe nthakenhe itnenhe iletyeke, the arne mwerre anthetyenhe tyerrtye mwerre-arle mpwaretyarte areyeke. The akenhe ilpernentye akngerrele atwetyenhe, tyerrtye arne akurne-arle mpwaretyarte areye.
28 Mwantyele awerrirraye! Arrpenhe areye lyete nhenhele tnerrirremele ayenge arerrirretyenhe, Alere alkere-arenye ahelhe nhenhele-arle akweke intek, apetyalpetyenhe Akngerrepate anetyeke. Urreke itne ilwerrirretyenhenge nhenhe aretyenhe.” Alakenhe re, Jesus-ele itneke ileke.

17

Jesus arrpenhe-irreme apwerte antherrtye akertnele

(Mark 9:2-13; Luke 9:28-36)

¹ Arlte six pele iperrele Jesus antangkeke Peter, James, John-ekarlke. Re itnenhe akngeke apwerte akertne anthurre-werne, itne-arrpe anetyeke. ² Itne aretyame, Jesus arrpenhe anthurre irrerlenge, inngerre arrpenhe-irreke alernnge-arteke pwarrtyeke, mantere-arlke ikwerenhe mperlkere alernnge-alernnge anthurre irrerlenge. ³ Iparrpele, Elijah uthene Moses uthene arraterle-anerremele Jesus ikwere angkerle-anerreke.

4 Peter anteme Jesus-eke angkeke, “Aknger-repataye, Mwerre kwenhe anwerne ngkwenge nhenhele aneme. Unte apeke-arle ahentye-anemenge anwerne ilthe urrpetye artetyeke, ngkwenge anyente, Moses-eke anyente, anyente arrpenhe Elijah-eke-arle? Mwerreye?”

5 Kenhe Peter angkerlenga, kenhe angkulye alernnge-alernngele itnenhene urrpetye-arlke ingkirreke arterlenga. Angkulye-ngentyele angkerlenga itne aweke, “Nhenhe kwenhe alere atyeperre anyente atyinhe. Renhe akwetethe anthurre awerlte-anaye ingkirrekele.”

6 Kenhe yanhe ikwerenge re, apententye akngerre Jesus-kenhe areye atere-irremele atnyerrirreke.

7 Jesus re akenhe itneke-werne alhemele anpetyeke, itneke angkeke, “Akeme-irraye! Atere-irretyale!” **8** Nhenge utnyeneke-arle-ipenhele, itne areke Jesus re-arrpe anteme tnerle-anerlenga ikwerele.

9 Itne apwerte kwenerkerle-alhemele Jesus-ele itneke ileke, “Arrantherre iletyale anetyeke tyerrtye areyeke iwenhe-arle arrantherre nhenheke arerne. Nhenge urreke ayenge, Alere alkere-arenye apmere ahelhe nhenhele-arle akweke intek, itethe-arle-irreke irrerlkngele aneke akeme-irretyenhe. Ikwere iperre anteme arrpenhe areye iletyenhenge.”

10 Apententye akngerre Jesus-kenhe areyele renhe apayuthneke, “Iwenhenge-arle angkentye Moses-kenhe akaltyele-anthenhe-anthenhe angkeme nhenge Elijah arrwekele apetyetyenhe?

Nhenge itnekenge, artwe Ngkartele alhileke-arle ipenhe urreke akwele apetyeme intertele?”

¹¹ Re itneke angkirtneke, “Yewe, Elijah anteme arrekwele apetyemele arne ingkirreke mpwaretyeke. ¹² The arrekantherre arratyte ileme: Elijah kele apetyeke, kenhe itne akenhe renhe alengkaretyakenhe-arle anerlenga. Itne ikwere irrpelthe-irreke. Itne renhe atweke alakenhe-arteke itne ayenge atwetyenhe, ayenge-arle Alere alkere-arenye apmere ahelhe nhenhele-arle akweke inteket atwetyeke-arteke.” ¹³ Kele anteme itne itelarerrirreke rarle John kwatyeke akwernentye akngerre-akerte itneke angkeke.

*Jesus-ele ampe arrentye-akerte mwerre-ileme
(Mark 9:14-29; Luke 9:37-43a)*

¹⁴ Jesus apententye akngerre-akerte apwerte akertne-ngentyele atnarnpeke atningke arrpenhe tnerrirretyamenge-werne. Kenhe artwe anyentele Jesus ikwere-werne apetyemele kwene-irremele ikwere angkeke, ¹⁵ “Alartetye-aye, alere atyinhe-werne apetyaye. Re akwetethe arerte-irremele akurne anthurre aneme, re akwete-akwete ureke-arleke atnyerle-aneme, kwatyeke-arleke-arlke. ¹⁶ The apententye akngerre ngkwinhe areye apayuthneke renhe mwerre-iletyeke. Itne akenhe uyarne-arle angkwerre-iwerlenga renhe.”

¹⁷ Nhenge Jesus-ele nhenhe awemele re imerte itneke angkeke, “Arratyte, tyerrtye arrantherre-arle Ngkartekke akangkwe-irretyakenhe-arle arrantherre akwetethe-arle apale itirrentye akngerre. Arrantherre-ame

ayenge akwete ulpertelhe-ileme arrantherre-arle itelarerirrertyakenhe? Ilengareke-atwetye ayenge arrekantherrenge anerle-anetyeke urreke anthurreke-atwetye apeke? Kele ampe urreye atyenge-werne akngetyaye!” ¹⁸ Kele imerte Jesus-ele arrentye ampe urreyeke-arleke ileke, “Arrentyaye, the ngenhe uterneme ampe urreye nhenhenge-ntyele arratintyeye awethe apetyalpetyale alhaye!” Iparrpe arrentye ampe urreye-ngentyele arratemele alheke. Urreye iparrpe mwerre-irrerle-alheke.

¹⁹ Ikwere-ipenhe Jesus alpeke apmere rarle aneke-werne. Jesus re-arrpe anerlenge, apententye akngerre areyele renhe apayuthneke, “Iwenhenge-arle-ame anwerne uyarne arrentye yanhe ayweperne?”

²⁰⁻²¹ Jesus anteme angkirtneke, “The arrekantherre arratyelie, arrantherre itirrertyakenhe rarle arratyelie anetyeke arrantherre-arle akweke ware-arle akwenpe aneke. Alakenhenge anteme arrantherre mpwaretyakenhe aneke aywepemele anetyeke. Arrantherre itirreme rarle arratyelie anetyenhe, arrantherre apwerte akngerre nhenhe alakenhe angkemele, ‘Nhenhengentyele akeme-irraye, nhakwe-werne alhaye!’ Kele arratyelie-re alheme arrantherre-arle ilekenge, arrantherre anteme arne akngerre atningke ngangkerele mpwareke.” *

* **17:20-21** Artwe arrpenhele angkentye nhenhe intelhe-ileke imerte ayeye Matthew-kenheke-arleke arrernemele alakenhe. *Kenhe arrentye nhenhe-arteke akenhe arrantherre aywepetyeke ahentyele arrantherre merne arlkwetyale anetyeke Ngkartekem* imerte angkemele.

*Jesus ilelheme rarle ilwetyenhe-akerte
(Mark 9:30-32; Luke 9:43b-45)*

²² Kele apententye akngerre areye apmere renhe imperlte-alhemele apmere Galilee-werne alheke imerte ikwerekere apurte-irremele. Jesus imerte itneke angkemele, “Artwe anyentele ayenge imernetyenhe itneke, Alere alkerearenye apmere ahelhe nhenhele-arle akweke intekere, imerte ayenge artwe areye iltye anthemele, itne imerte ayenge inemele akngerlteriwemele ayenge atwetyeke. ²³ Kele ingwe atherre iperre ayenge itethe-irrirtnemele ilwekearle iperre akeme-irretyenhe.”

Nhenge apententye akngerre areyele renhe alakenhe angkerlenge awemele, itne atnerte akurne anthurre awelheke.

Apwerte mane-arle tyatye Jew areye-kenheke antheme akerte

²⁴ Jesus ikwerenhe areye-akerte apetyeke apmere Capernaum-werne artwe maneke apurte irrentye akngerre areye tyatye Jew-kenheke apetyemele. Itne Peter apayuthneke alakenhe, “Arrekantherrenhe akaltyele-anthenhe-anthenhele-ame mane tyatye-ke anthentye akngerre?”

²⁵ Kele Peter akenhe angkirtnerlenge, “Kele, arratyeharle!”

Kele itne apmere-werne anteme alpeke kele Peter apmereke irremele Jesus ikwere angkeke, “Simon, nthakenhe-ame unte itirreme? Tyerrtye areyeke akngerrepathe nhenhe areyele-ame angwenhenge tax mane inerreperreme?

Alere itnekenhe-ngentyele apeke, tyerrtye apmere itnekenhe-ngentyele areyenge apeke?”

²⁶ Kele Peter angkirtnerlenge, “Kele, itne tyerrtye apmere itnekenhe areye-ngentyele-arle ineme.”

Kele Jesus angkeke, “Ye, arratyte alere akngerrepare areye-kenhe areyele itnenhe mane tax-eke anthetyeke arrangkwe-arle. ²⁷ Kele mwerre-arle, anwerne itnenhe antheme-arle itne anwerneke ahele-irreme-ketyenge. Kele unte apeke-arle kватье аlaye akngerre-werne alhemele-artaye, imerte hook iwemele kere kватье аrenye inetyeke kватье kwene-werne, unte kere kватье аrenye arrekwele-iperre arratyte inemele unte areme kere kватье аrenye ikwerenhe arrakerte kweneke mane ngkweltye anyente. Peter alhemele arratyte mpwaremele. Mane yanhe-arle ilerneke-arle tyatye renhe anthetyeke, kele inemele akngaye mane inerlte-apentye akngerre areye-arle anthetyeke tyatye Jew areye-kenheke.”

18

Angwenhe-ame alartetye impene anetyenhe?
(Mark 9:33-37; Luke 9:46-48)

¹ Yanhenge anteme apententye akngerre areye Jesus-werne apetyemele renhe apayuthneke, “Nhenge Ngkartele anwernenhe arntarnte-arerle-anerlenge alartetyele-arteke, angwenhe anteme re itelareme akngerre anthurre-arle aneme, arrpenhe areyenge akngerre anthurre-ulkere?”

² Aweke-arle iperre re ampe akweke anyenteké antangkeke re imerte renhe itneke mpwepeke ngkernemele. ³ Re imerte itneke alakenhe angkemele, “Ayenge-arle arrekantherre arratyé-arle angkeme, arrantherre apeke akngarte-iwelhemele ampe nhenhe-arteke anerlenga, Ngkartele arrenhantherrenhe ikwerenhe ileme arrenhantherrenhe arntarnte-aremele akwete alartetye warte. ⁴ Ampe akweke nhenhe aremele nhenheke itirrewarraye, rarle akangkemele tnakelhetyakenhe-arle. Arrantherre apeke atyeperre anthurre anetyeke ahentye-aneme, kele ampe nhenhe-arteke irremele-ante, Ngkartele arrenhantherrenhe atyeperre-ileme re alartetye irrerlenga. ⁵ Kele angwenhele apeke ampe akweke nhenhe-arteke atyewe akeme, the renhe atyewe akeme-anteye.”

*Apententye akngerre akurne mpwaretyeke
ileyale, kele impetyeke ante*

⁶ Jesus itneke akwete angkeke, “Kele arrantherre apeke apententye akngerre atyinhe anyente akurne mpwaretyeke ileme, ampe akweke nhenhe-arteke apeke, Ngkartele arrenhantherrenhe akenge-arle-ileme. Arrpenhele apeke apwerte akngerre iteke-arleke ayernerlenga ngenhe kватye iperteke iwemele, kenhe tyerrtye areye itirrewarremere arne akenge-arle ngkwenge irrekeke. Kenhe Ngkartele akenhe ngkwenge akenge awethe ulkere-arle mpwarerlenga, unte apeke arrpenhe, ampe akweke nhenhe-arteke renhe, akurne mpwaretyeke ilerlenga.

7 “Yewe, apmere arrpe-anenhele tyerrtye akurne atningke aneme itne anteme akwetethe tyerrtye arrpenhe areye uterneme akurne mpwaretyeke. Ngkartele-arle itnenhe atwetyenhe-arle akngerre anthurre itne tyerrtye itnenhe ularele uternerlenge akurne-irretyeke.

8 Kele, unte apeke iltye ngkwinhele apeke ingke ngkwinhele apeke akurne mpwareme. Kele, unte iltye apeke ingke apeke anyente ultakemele iwetyeke unte akwete akurne mpwareme-ketyenge. Kele mwerre-arle unte iltye anyente apeke ingke anyente apeke atnyeneme, kele unte itethe akwete anetyenhenge Ngkartenge. Kele akurne anthurre unte-arle iltye atherrele apeke ingke atherrele apeke akurne mpwarerle-aneme, Ngkartele akenhe ngenhe apmere akurne ikwere-arle iwerlenge, ure akngerreke-arleke.

9 Unte apeke alknge ngkwinhele arerlenge akurne mpwarerlenge. Kele unte alknge ngkwinhe tyerremele iwetyeke unte akurne awethe mpwarerle-aneme-ketye. Kele mwerre-arle unte apeke alknge mwerre anyente aneme itethe akwete anetyeke Ngkartenge. Kele unte akurne akwete mpwarerle-aneme alknge atherre-akertele Ngkartele ngenhe iweme-arle apmere akurne ikwere-werne, ure akngerreke-arleke.” Alakenhe-arle Jesus itneke angkeke.

*Angkentye yepe-yepe aparlpe-arle-irreke-akerte
(Luke 15:3-7)*

10-11 Kele Jesus tyerrtye itneke angkeke, “Ameke-arelhewarraye! Akurne-iletyale ampe

akweke nhenhe areye. Alkere-arenye ingkirreke ampe nhenhe areye-kenhe, alkere akertnele Ngkartenge, akwetethe akweke areye arntarnte-arerlte-aneme. Kenhe ayenge akenhe apmere nhenhe-werne apetyeke aparlpe-arle-irreke areye mwantyele arntarnte-aretyeke.

¹² “The arrekantherre angkentye ileyenhe artwe anyente-akerte yepe-yepe 100 anthurre-arle atnyeneke. Yepe-yepe anyente akenhe aparlpe-arle-irrerlenga. Anyente-arle aparlpe-ilekenge, nthakenhe anteme re irretyenhe? Arratye, rarle yepe-yepe 99 arrpenhe areye apwerte areyeke impemele, arrpenhe anyente ikwere-arle unthetyeke alhemere. ¹³ Kenhe arntarnte-arentye akngerrele apeke areke yepe-yepe anyente aparlpe-arle-irreke renhe, re ikwere akangkeyenhe anthurre-arle. Arratye apelaye. Re anyente ikwere akangkeyte anthurre awethe ulkere arrpenhe 99-pelelenga, nhenge aparlpe-arle-irretyakenhe areyenge. ¹⁴ Akngeye arrekantherrenhe alkere akertnenye yepe-yepe arntarnte-arentye akngerre yanhe-arteke, re arrpenhe aparlpe-ileyeyeke ahentye anetyakenhe. Re ampe akweke areyeke ahentye anthurre aneme. Re itneke ahentye-aneme arntarnte-aretyeke ikwerenge uteperireme-ketye.”

Atyewe Ngkarte-kenhe arrpenhele akurne ngkwenge mpwarerlenga, alakenhe nhenhe mpwaraye

¹⁵ “Atyewe Ngkarte-kenhe arrpenhe apeke ngkwenge apale angkeme, akurne mpwaremele

apeke. Kele unte ikwere-werne alhetyeke mpwele apurte-irremele nthenhenge apeke imerte mwantyele ilemele rarle ngkwenge akurne mpwarekengen. Re apeke ngkwenge akangkwe-irremele ahele-irretye-kwenye anetyenhenge, apure-irremele ipeltye-irremele ngkwengenge.

¹⁶ Re apeke ngkwenge akangkwe-irretyakenhe, atyewe Ngkarte-kenhe anyente apeke, atherrame apeke inemele alhaye apurte imerte angketyeke alhemene. The ngkwenge nhenhe ileme arrule tyerrtye anyentele intelhe-ileke Bible-nge unte alakenhe mpwaretyeke. ‘Tyerrtye anyentele apeke arrpenhe ilperneme rarle akwele renhe akurne mpwarekengen. Kele re akenhe anyente-arrpe angketyeke alhetyale anetyeke, imerte akngemele tyerrtye arrpenhe anyente apeke atherrame apeke areke-arle akurne-arle mpwarerlenga imerte yanhe urrpetye apurte-irremele angkerremele ikwere.’

¹⁷ Re apeke-arle ngenhe irlpe artepele aweke, renhe atyewe Ngkarte-kenhe-werne areye akngaye, imerte ikwere angkemele atningkengen alkngetherre. Re apeke mwernte akwete tneme atningkele arerlenga, kele ikwereketye untyeme-irremele anetyeke. Re anteme Ngkarteke akutne areye-arteke aneme.”

Nthenhele apeke urrpetye apurte-irrerlenga Jesus yanhele itneke-nge aneme

¹⁸ Kele Jesus awethe angkeke apententye akngerre ikwerenhe areyeke, “Awerrirraye! The angkentye nhenhe arrekantherre arratyte ileme. Apmere ahelhe nhenhe arrantherre arrpenhe

areye arratyenhe iwenhe apeke renhe mpwarerlenga, Ngkartele-arle akertnenge kele ayakeke. Apmere ahelhe nhenhele arrantherre arrpenhe areyeke arratyenhe yewe angketyenhe iwenhe apeke renhe mwerre mpwarerlenga, Ngkarte-arle akertnenge kele yewe angkekengenhe.

¹⁹ “Awethe ayenge arrekantherre angkeme alakenhe: tyerrtye atherre apeke apurte-irremele imerte yewe angkerremete iwenhe apeke ikwere, kele imerte Ngkarte anteme ikwere-akerte apayuthnemele. Kele re mpwareme-arle iwenhe-arle ratherre apayuthneke. ²⁰ The arrekantherre ileme tyerrtye atherre apeke urrpetye apeke atyenge akangkwe-irrentye akngerre apurte-irremele Ngkarteke angkeme, kele ayenge itnekengenhe apurte-irretye-alheme-arle yanhele.”

Mwantye-mwantye akwete anetyeke tyerrtye areyenge

²¹ Kele Peter Jesus-werne apetyemele renhe apayuthneke, “Alartetye, atyewe Ngkartekenhe arrpenhele apeke atyenge akurne akwete mpwarerle-anerlenga, nthakentye-ngare-ame the renhe ipmentyele impetyeke renhe ilpernetyakenhe anemele? The-ame renhe 7-ngare anthurre impeme, re apeke awethe akurne-irrerlenga the-ame renhe atweye?”

²² Kele Jesus akenhe ikwere angkerlenga, “Arrangkwe, renhe ipmentyele impetyeke renhe atwetyale. ²³ The arrekantherre ileme, Ngkarte tyerrtye areyeke alartetye irrerlenga itnenhe arntarnte-aremele, alakenhe-arle anetyenhe:

Artwe akngerrepeate aneke re mane anthetyarte ingwenthike ware urrkapentye akngerre ikwerenhe areye, itne imerte anthirtnemele anteme. Arlte anyentele re itirreke, ‘The pipe nhenhe areye, aretyeke angwenhele-arle ayenge mane anthirtnetyenheke.’ ²⁴ Re imerte pweke altywere-ilemele aremenge re imerte arritnye anyente-arle aremele, mane akngerre anthurre-arle anthirtnetyeke aneke. Akngerrepeate imerte urrkapentye akngerre anyente ilemele tyerrtye yanhe renhe ikwerewerne akngetyetyeke. Re anteme alhemele renhe ikngweke imerte renhe akngety-alpemele. ²⁵ Kele artwe re uyarne itirreke nthakenhe anthirtnetyeke rarle akweke ware atnyenekenge. Akngerrepeate imerte alakenhe-arle angkemele, ‘Artwe nhenhe akngaye anewearlke ampe-arlke ikwerenhe areye-arlke arne itnekenhe-arlke ingkirreke imerte tyerrtye arrpenhe anthemele maneke, kele unte mane renhe inemele atyenge anteme-arle akngety-alpemele.’

²⁶ “Kenhe artwe re akenhe amperele-arlenga tnemele angkerlenga, ‘Mwantyele akarelhaye, kele the ngenhe ingkirreke anthurre-arle mwantyele antherle-anetyenhenge!’ ²⁷ Akngerrepeate ikwere alhwarrpe-irremele renhe yerneke alhetyeke anteme.

²⁸ “Kele artwe urrkapentye rarle alhekenge anteme re urrkapentye akngerre arrpenhe areke imerte itirremele, ‘The kwenhe artwe nhenhe mane ngkweltye akweke ware antheke arrekwele, re kwenhe ayenge anthirtnetyakenhe ak-

wete.’ Re artwe renhe arntwirrkemele ahen-tyenge tnerneke imerte ikwere angkemele, ‘Ipar-pe ayenge mane atyinhe anthirtnaye tharle ngenhe arrekwele antheke!’

²⁹ “Urrkapentye akngerre re akenhe ikwere amperele-arlenge tnemele angkerlenga-arle, ‘Mwantye ulkere atyenge akarelhaye, the ngkwenge urreke anthirtnetyenhenge!’ ³⁰ Kele artwe re akenhe ikwere alhwarrpe-arlke-irretyakenhele renhe jail-ke akwerneke re jail-le anemele renhe anthirtnetyenhenge.

³¹ “Kenhe urrkapentye akngerre arrpenhe areyele renhe aremele alakenhe irrelenge itne ahele-irremele itne alheke akngerrepatite itne-kenheke iletyekie iwenhe-arle itne areke ipenhe. ³² Kele akngerrepatite itnenhe ileke artwe renhe ikwere inetyekie. Kele itne anteme alhemele renhe inerle-alpeke. Kele aknger-repatite anteme ikwere angkeke, ‘Unte kwenhe akurne anthurre, unte kwenhe ayenge mane akngerre anthintye-alpetyekie, unte-arle ayenge apayuthneke iperre the ngenhe mwantyele-arle impeke. ³³ Unte-arle urrkapentye akngerre nhengeke alhwarrpe-irretyakenhe-arle irreke, ayenge-arle ngkwenge alhwarrpe-irreke-arteke.’ ³⁴ Kele akngerrepatite re ahele anthurre irreke urrkapentye akngerre ikwerenheke imerte alakenhe angkemele, ‘Artwe nhenhe jail-werne akngerlte-iwaye thultye areyele renhe tnyante atwetyekie. Kele re-arrpe apeke jail-ele anemele, mane atyinhe ingkirreke anthirtnemele-ante re arratetyenhenge.’ ”

35 Kele Jesus-arle itneke alakenhe angkeke-iperre re itneke angkeke, “Akngeye atyinhe alkere akertnele-arle aneme kwenhe akngerrepare nhenhe-arteke aneme. The arrekantherre ileme arrantherre apeke arrpenhe areyenge ipeltye-irrerlenge itnenhe atwirtnetyakenhe anemele, Akngeye akertnearenye akenhe arrekantherrenge ipeltye anteye-arle irreme imerte atwirtnetyakenhe-arle anemele. Kenhe arrantherre apeke ahentye-anetyakenhe aneme ipeltye-irretyeke kele re ipeltye-irretyakenhe anteye-arle aneme arrekantherrenge.”

19

Anewe ngkwinhe impetyalaye (Mark 10:1-12)

1 Alakenhe angkeke-arle iperre, Jesus apmere Galilee imperle-alheke Judea ampinyewerne. Re kватye lhere Jordan-enge arntwarre aneke. **2** Tyerrtye atningke anthurre ikwere-werne apetyewarremele tnerirreke ikwerenge. Kele re akenhe itnekenhe rlkerte areye angkwerre-arle-iwerlenge.

3 Artwe Pharisee urrpetye apetyemele Jesus renhe apayuthneke nhenge itne alknginye-alknginyele ahentye-anemele renhe alhule-iwetyeke. Kele itne renhe apayuthneke, “Anwerneke ilaye! Mwerre-ame artwe anewe ikwerenhenge akalke-irreme arelhe renhe mikwe anyikwe-werne yernirtnemele nthakenhe apeke-arle re irrekenge?”

⁴ Kenhe Jesus itneke alakenhe-arle angkirtnerlenge, “Arrantherre-ame Bible-nge apeke aretyakenhe? Arlte arrwekele-arle Ngkartele-arle urreye uthene marle uthene aknganeke.

⁵ Kele alakenhenge anteme artwele anyikwe uthene mikwe uthene imperle-alhemele arelhe anewe akemele anyente-irretyeke. ⁶ Yewe, ratherre atherre-arle aneke anyente anteme irreke, alakenhenge anteme artwe re arelhe ikwerenhe yernetyale anetyeke ikwerenge akwete, Ngkartele-arle artwe renhe anyentelhe-ilekenge arelhe anewe ikwerenheke-arleke.”

⁷ Itne ikwere angkeke, “Iwenhenge-ame angkentye Moses-kenhe alakenhe angkeke? Nhenge artwe apeke ahentye-aneme anewe ikwerenhenge akalke-irretyeke, re apeke intelhiletyeke pipe-ke-arleke renhe re anthetyeke renhe yernetyenhenge.”

⁸ Jesus itneke angkirtnerlenge, “Nhenge Ngkartele urreye uthene marle uthene arrwekele aknganeke, ratherre anewe akerretyeke akwetethe anerle-anerretyeke. Kenhe arrantherre-arle angkentye Ngkartekenhe impeme, iwenhe apeke renhe akwenpele mpwarewarreme. Alakenhe ikwerengentye Moses-ele arrenhantherrenhe angkentye antheke artwele anewe ikwerenhe kele impetyeke. ⁹ Artwe apeke anewe ikwerenhenge akalke-irremele yernirtnemele arelhe-arle artwe arrpenhenge intekenge, kele mwerre rarle. Kenhe the akenhe arrekantherre ileme, artwe angwenhe apeke anewe ikwerenhenge akalke-irremele renhe yernirtnemele re anteme arelhe

arrpenhe anewe akemele, rarle mpwenye ikngwemele, akurne anthurre rarle.”

¹⁰ Kele apententye akngerre Jesus-kenhe areye ikwere angkeke, “Alakenhe apeke-arle anewarte-arle aneme-akerte unte ileme, kele anwerne mwerre-arle anewe akerretyakenhe aneme!”

¹¹ Kenhe Jesus itneke angkirtnerlenga, “Artwe arrpenheme ware anewe aketyakenhe. Kenhe Ngkartele apeke artwe nhenge areye ileme anewe aketyale, kele alakenhenge-arle itne anyente anetyeke. ¹² Artwe arrpenheme uyarne anewe akerreme itne-arle arne akurne-akerte intekenge. Kenhe arrpenheme uyarne anewe akerreme artwe arrpenhele-arle itnenhe iwenhe apeke renhe mpwarekenge. Kenhe arrpenheme anewe akerretyakenhe aneme itne Ngkartekke urrkapetyenhenge. Kenhe artwe arrpenheme impentyele aneme anewe akerretyakenhe, kele mwerre-arle.”

Jesus ampe akweke areyeke antangkeme ikwere-werne apetyetyeke

(Mark 10:13-16; Luke 18:15-17)

¹³ Urreke re, tyerrtye arrpenhemele ampe akweke itnekenhe Jesus-werne akngetyewarreke, re itnenhene iltyle itneke-arleke arrernetyeke, Ngkartekke itneke angketyeke. Kenhe apententye akngerre Jesus-kenhe areye ahele-irremele-arle itneke angkerrirreke.

¹⁴ Kele Jesus angkeke apententye akngerre ikwerenhe areyeke, “Arrantherre apeke areme ampe akweke areye atyenge-werne apetyerlenga itnenhe ayaketyale! The arrekantherre ileme

angwenhe apeke ampe akweke nhenhe areye-arteke anemele Ngkartele itnenhe atyewe Ik-werenhe aketyenhe arntarnte-aremele aknger-repate itnekenhele-arteke.” ¹⁵ Kele anteme Jesus-ele ampe akweke areye iltyele anapeke Ngkartekite itneke angkemele, re itnenhe mwerre mpwaretyenhenge. Re anteme itnenhe impemele alheke.

*Ayeye artwe apmerrke mane atningke-akerte
arne-arlke atningke-akerte*

(Mark 10:17-31; Luke 18:18-30)

¹⁶ Arlte arrpenhele tyerrtye anyente apetyeke imerte Jesus apayuthnemele, “Akaltyele-anthenhe-anthenhe-aye! Arne iwenheame mwerre the mpwaretyeke Ngkartekite anyente-irremele ikwerenge akwete-ante anetyenhenge?”

¹⁷ Kenhe Jesus ikwere angkirtnerlenga, “Iwenheke-ame unte ayenge apayuthnerne iwenhe mwerre-akerte? Tyerrtye arrpenhe mwerre anetyakenhe, kenhe Ngkartekite mwerre. Unte apeke ahentye-aneme itethe akwete-ante anetyeke, kele antime unte akwetethe angkentye Moses-kenhe akngerre apenterle-anetyeke.”

¹⁸ Artwele Jesus renhe apayuthneke, “Iwenheame angkentye Moses-kenhe the apentetyeke?”

Jesus ikwere angkirtnerlenga, “Tyerrtye arrpenhe renhe irrerlkngé atwetyale! Intetyale anewe tyerrtye arrpenhe-kenhenge, impetyeke akwete. Anyelkngéle inetyale! Ularele apwerte ngkweltye inetyale anetyeke! Arrpenheke akurne ilpernetyale! ¹⁹ Meye uthene akngeye

uthene awerle-anetyeke ikwere-atherre ahele-irretyle! Arrpenhe areyeke ahentye-anetyeke ngkwenge-arrpe ahentye-aneme-arteke.”

20 Kenhe apmerrke re awethe angkeke, “Akngerrepataye, the angkentye akngerre renhe areye apenteke, renhe akwetethe awerle-apemele. The-ame angkentye arrpenhe apenteme re?”

21 Jesus imerte ikwere alakenhe-arle angkemele, “Unte apeke mwerre anthurre anetyeke ahentye-anemele, unte alhetyeke arne ingkirreke ngkwinhe anthetyeke maneke, kele mane anthemele mane atnyenetyakenhe areyeke imerte apetyemele ayenge apentetyeke. Yanhe-ngentyele anteme, unte ineme arne mwerre anthurre alkere akertne-ngentyele.”

22 Nhenge artwele nhenhe awemele re irrare-irreke imerte alpemele rarle mane-arlke mantere-arlke atningke atnyenekenge, re akenhe ikwere-arrpe atnyenetyeke-arle ahentye-aneke.

23 Nhenge Jesus-ele areke artwe renhe alherlenge re angkeke apententye akngerre ikwerenhe areyeke, “The arrekantherre arratyte ileme, tyerrtye mane-arlke mantere-arlke atningke-akerte areye arrpernkeme Ngkarte renhe apayuthnetyeke akngerrepate irretyenhenge itnenhe arntarnte-aretyenhenge.

24 Ayenge awerrirraye! Arrantherre itelareme alhwenge yerre-kenhe altywere akweke anthurre-akerte, kamule apeke-ame altywere ikwerenge irrpennemere? Arrangkwe. Alakenhe akwele angwenhe apeke mane atningke-akerte, arrpernkeme Ngkarte renhe

apayuthnetyeke akngerrepare irretiyenhenge itnenhe arntarnte-aretyenhenge.”

25 Kele apententye akngerrele awekenge anteme, apatemele itne Jesus apayuthneke, “Kele, tyerrtye iwenhe-arteke-ame Ngkartele itethe akwete-ante atnyenetyenhe?”

26 Kele Jesus-ele itnenhe arratyе aremele angkeke, “The arrenhantherrenhe ileme, tyerrtye-arle arntarnte-arelhetyeke arrangkwe-arle, kele Ngkartele-ante-arle arntarnte-areme.”

27 Kele Peter angkerlenga, “Awaye, unte itelareme anwerne kwenhe arne areye impememe apetyeke ngenhe apentetyenhenge, kele iwenhe anteme anwernenhe Ngkartele anthetyenhe?”

28 Kele Jesus angkirtnerlenga, “Urreke-arle utehene uthene alkere uthene uyerretiyenhenge, ayenge, Alere alkere-arenye apmere ahelhe nhnhele-arle akweke intekе, alartetye anetyenhe chair atyeperre anthurrenge, ahelhe uthene alkere uthene arrpenhenge. Kele arrantherre apententye akngerre 12 pele atyinhe, alakenhe-arteke chair atyeperre 12-pele-nge anetyenhe, kele arrantherre Israel-arenye arrwekelenye areyeke itirretiyenhe nthakenhe itneke mpwaretyeke. **29** Kele angwenhele apeke ayenge apentetyenhenge, re apeke-arle apmere impekengе, kake akngerre uthene yaye akngerre uthene-arlke, mikwe uthene anyikwe uthene-arlke, ampe-arlke, kartene ikwerenhe-arlke. Kele alakenhenge Ngkartele renhe antheme awethe ulkere rarle arrekwele atnyenekengе, kele re Ngkartenge aneme akwete-ante apurte

anteme. ³⁰ Arrantherre itelareme tyerrtye arrpenhe areye atyeperre anthurre anteme, kele arrpenhe areye akenhe anetyakenhe-arle. Kele atyeperre-arle aneke itne akweke anteme-arle irreme, kele atyeperre anetyakenhe itne anteme-arle atyeperre anthurre irretyenhe.” Alakenhe-arle Jesus angkeke apententye akngerre ikwerenhe areyeke.

20

Ayeye urrkapentye akngerre areye-akerte

¹ Jesus-ele anteme angkentye alengke-iwentye arrpenhe itneke ileke, alakenhe, “Ngkart tyerrtye areyeke alartetye irrerlenge itnenhe arntarnte-aremele, alakenhe-arle anetyenhe: Artwe anyentele atnyeneke garden mwerre anthurre merne kripethe areye-akerte. Arlte anyentele, ingweleme anthurre re alheke apmere arrpenhe-werne urrkapentye akngerre artwe areyeke unthetyeke, garden ikwerenhenge urrkapetyeke. ² Re alhemele areke artwe urrpetye urrkapetyeke tnerlte-anerlenge itneke re antangkemele ileke, ‘Apetyewarraye, garden atyinhenge urrkapetyeke, the anteme mane antheme arrantherre ingweleme-ngentyele ingweke-atwetye urrkaperlenga.’ Alakenhe awemele itne mwerre angkeke. Re anteme itnenhe ileke urrkapetyeke alhetyeke.

³ “Kele uterne-arle akertne anteme irrekengen re awethe alheke artwe urrkapentye akngerre

arrpenhe areye aretyeke re arratyre areke arpenhe areye tnerlte-anerlenga urrkapetyakenhe. ⁴ Re anteme itne angkeke, ‘Apetyewarraye garden atyinhenge urrkapetyeke, kele the mane anthetyenhenge ingweke-atwetye urkaperlenga.’ ⁵ Kele itne alhemele urrkerlpurrkapeke. Kele arlte mpwepele alartetye re awethe apmere arrpenhe-werne alheke artwe arrpenhe areye aremele re ileke urrkapetyeke alhetyeke. Alakenhe anteye re alheke angwerrele artwe arrpenhe areye anteme ileke urkapetyeke garden ikwerenhenge.

⁶ “Kele ulye arlpentyele re alheke awethe imerte aremele artwe areye tnerlte-anerlenga urrkapetyakenhe. Re imerte itneke angkemele, ‘Iwenhenge-ame arrantherre akwete ingweke-atwetye tnerlte-aneme urrkapetyakenhe?’

⁷ “Kele itne angkirtnerlenga, ‘Arrangkwe anwerne kwenhe, tyerrtyele anwernenhe urkapetyeke ikngwetyakenhe-arle.’

“Re anteme itneke angkeke, ‘Yewe, arrantherre-arlke apetyewarraye garden atyinhele urrkapetyeke.’ Kele itne alheke urrkerlpurrkapeke.

⁸ “Kele uterne-arle irrpekenge anteme akngerrepatte artweke antangkeke, urrkapentye akngerre arrpenhe areye-arle arntarntearemeke, ikwere angkemele, ‘Antangkaye artwe urrkapentye akngerre areyeke itnenhe anteme mane anthemele. Ingkerne-arle apetyeke areye-urke anthaye, imerte mpwepenge-arle apetyeke areye anteme, kele imerte ingweleme anthurrearle apetyeke areye anteme anthemele.’

⁹ “Kele artwe re antangkeke yanhe areyeke ingkerne-arle apetyekeke, akweke ware-arle urrkapemeke, itnenhene mane anthemele arlte akngerreke. ¹⁰ Ingweleme-arle apetyeke areye akenhe aremele itirrerlenge, ‘Yewe, re itnenhene antheme arlte akngerrele-arle urrkapekenge kele re anwernenhe awethe-arle anthetyenhe anwerne-arle ingweke-atwetye urrkapekenge.’ Kele re akenhe itnenhene rante-rante ante-arle antherlenge. ¹¹⁻¹² Kele itne mane inemele itne ahele angkerreke imerte alartetyeke angkemele, ‘Unte itelareme artwe yanhe areye kwenhe apetyeke ulye akngerrele imerte akweke ware urrkapemele, kele anwerne akenhe ingweleme-ngentyele ingweke-atwetye-arle urrkapeke uterne akngerrenge, unte akenhe anwernenhe itnekenge awethe akngerre ulkere apeke anthetyakenhe-arle. Iwenhenge-arle-ame unte anwernenhe ingkirreke rante-rante antheke?’

¹³ “Kele alartetye re artwe anyenteke angkeke, ‘Atyewe-aye, the kwenhe ngenhe apalele anthetyakenhe the kwenhe arratyeharle antheke. Nhenge unte-arle ingweleme apetyekenge the ileke tharle ngenhe mane arlte akngerreke anthetyenhe unte-arle arlte akake urrkaperlenge. Unte itelareme, awemele, yewe angkerreke. ¹⁴ Kele mane ngkwinhe inemele anteme apmere-werne alpe! The apwerte mane mpwanke anthetyeke ahentye-aneme artwe ingkerne-arle apetyekeke nhenhe areye ngenhe-arle antheke-arteke. ¹⁵ Kele mwerre-arle the mwarrantye antheke ayenge-arle ahentye-anemenge, nhenhe-arle mane atyinhe-arle the antheme nthakenhe-

arle ayenge ahentye-aneme-arteke. Iwenhenge-arle-ame arrantherre ahele angkerreme? Arrantherre apeke-arle ingkerte-arle-irreme tharle anthemenge mwarrantye.’”

¹⁶ Kenhe Jesus angkentye-arle itneke ileke iperre itneke alakenhe angkeke, “Arrantherre telareme tyerrtye arrpenhe areye atyeperre anthurre anteme, kele arrpenhe areye akenhe anetyakenhe-arle. Kele tyerrtye atyeperre-arle aneke itne akweke anteme-arle irreme, kele tyerrtye atyeperre anetyakenhe itne anteme-arle atyeperre anthurre irretyenhe.”

*Jesus awethe angkeke ilweme-arle-akerte
(Mark 10:32-34; Luke 18:31-34)*

¹⁷ Jesus apententye akngerre ikwerenhe areye-arlke iwerrele alherlte-iwetyame Jerusalem-werne-atheke, re itneke antangkeke akngakelhe-ilemele, angkeke, ¹⁸ “Ayenge awerrirraye! Anwerne apmere Jerusalem-werne-atheke. Yanhe ikwerekere, tyerrtye arrpenhe apeke atyengenentyele artepe untyeme-irretyenhe, Alere alkere-arenye apmere ahelhe nhenhele-arle akweke intekere, iltye anthetyenhe kwertengerle akngerrepare tyatye-arenye areyeke, angkentye Moses-kenhe akaltyele-anthenhe-anthenhe areyeke-arlke. Kenhe itne ayenge imerrentye irrerlkngeke atwetyeke. ¹⁹ Kele itne anteme ayenge iltye anthetyenhe Jew anetyakenhe areyeke. Kele itne anteme atyenge anhelhetyenhe, imerte arne atyepete-arteke atwemele. Kele itne ayenge arne arntarlkwake-arleke irlpare arrernetyenhe ayenge ilwetyenhenge.

Kenhe ingwe atherre iperrele, ayenge itethe-irrirtnetyenhe akeme-irremele.”

*Anewe Zebedee-kenhele Jesus iwenhe apeke ikwere apayuthneke
(Mark 10:35-45)*

²⁰ Ikwerenge-ntyele anewikwe Zebedee-kenhele alerikwe atherre James uthene John uthene Jesus-werne akngeke kwene-irremele ikwere ankeye inkeke. ²¹ Kenhe Jesus ikwere angkerlenga, “Iwenhe-ame the ngkwenge mpwaretyeke?”

Re ikwere angkirtnerlenga, “Urreke, unte tyerrtye ingkirreke anthurreke akngerrepate anerlenga, ampe nhenhe atherre akngerrepate ngkwenge itwele anetyeke, ngkwenge itweke arrernalhetyeke anyente akwe-arratyeyeke, arpenhe akwe-alyengeke.”

²² Kenhe Jesus ikwere-atherre angkeke, “Akutne-akutne ware kwenhe mpwele ayenge apayuthneke. Mwerre-ame alakenhe itne renhe-atherrenhe rlkerteke atweme, irrerlknge atwetyeke, nhenge itne-arle ayenge irrerlknge atwetyeke-arteke?”

Ratherre ikwere angkirtnerlenga, “Yewe, kele mwerre-arle.”

²³ Jesus akenhe ikwere-atherre angkerlenga, “Mpwele kwenhe arratyeyeke rlkerteke akngerre inetyenhe. Mpwele ayenge-arteke ilwetyenhe. The kwenhe uyarne akngakeme angwenhe apeke re atyenge akwe-arratyeyeke akwe-alyengeke anetyeke. Nhenge Ngkartele-ante kwenhe akngakentye akngerre itnenhe.”

24 Nhenge apententye akngerre arrpenheten-pelele ikwere-atherre-akerte awemele, itne ahele-irreke atyeyenhenge. **25** Kele Jesus-ele itnenhe anyentelhe-ilemele angkeke, "Arrantherre itelareme nthakenhe-arle akngerrepare ahelhe nhenhe-arenye areyele tyerrtye ingkirreke uterneme mpwaretyeke. Itne uterneme itnenhe arne arrpe-anenhe renhe mpwaretyeke itne ahentye-anerlenge. **26** Kenhe arrantherre akenhe yanhe areye-arteke anerrirretyale anetyeke-arle! Kenhe angwenhe re apeke arrekantherrenge akngerrepare anetyeke, re arrpenhe itnekenge ingkerneke arrernalhetyeke, urrkapentye akngerre-arteke anetyeke, arrpenhe ingkirrekeke urrkaperleanetyeke. **27** Kenhe angwenhe re apeke arrekantherrenge arrekwele anetyeke, re arrpenhe areyeke mpwaretyeke. **28** Alakenhe apeke arrantherre apale itirreme, ayenge-arle, Alere alkere-arenye apmere ahelhe nhenhelearle akweke inteka, apetyeke nhenge arrpenhe areye akwele atyenge urrkapetyeke. Arrangkwearle! Ayenge-arle apetyeke tyerrtye areyeke urrkapetyeke, ingkirrekeke ilwetyeke Ngkarte-arle atnerte ulthelhetyenhenge."

Jesus-ele artwe pwenge atherre alkngampetyeke mpwareme

(Mark 10:46-52; Luke 18:35-43)

29 Apententye akngerre Jesus-kenhe areye anteme apmere Jericho imperlte-alhememe alheke, tyerrtye atningke anthurrele anteme itnenhe apentewarreke. **30** Itne arerrirreke

artwe alknge pwenge atherre iwerre iterele anerle-anerrerlenga. Ratherre aweke arrpenhe areye angkerrerlenga nhenge Jesus Nazareth-arenye-arle apetyeme. Ratherre arlkemele angkeke, “Jesus-aye. David-eke-artweye, ilerneke apeke alhwarpe awelhaye ilernenhe mwerre-ilemele mpwaraye.” ³¹ Tyerrtye areyele renhe-atherrenhe ntertelhe-ileke, “Nterte-irraye.”

Kenhe ratherre akenhe awethe anteye-arle arnterre anthurre arlkerlenga, “Jesus-aye, David-eke-artweye, ilerneke apeke alhwarpe awelhaye ilernenhe mwerre-ilemele mpwaraye.”

³² Kele Jesus ngkernelhemele renhe-atherrenhe apayuthneke, “Iwenheke-ame unte atyenge ahentye-aneme mpweleke mpwaretyeke?”

³³ Ratherre akenhe angkirtnerlenga, “Akngerrepataye! Alknge altywere-ilaye ilerne aretyeke.” ³⁴ Jesus pwenge ikwere-atherre alhwarpe-irreke, re alknge ikwere-atherrenhe anapeke, alkngampelhe-ileke-iperre, iparrpe anthurre arerle-anerreke ratherre Jesus apenterle-anerreke iwerrele alhetyeke.

21

Jesus Jerusalem-werne apetyeke tangkeye-ke antyemele

(Mark 11:1-11; Luke 19:28-38; John 12:12-19)

¹ Jesus, apententye akngerre ikwerenhe areye-akerte apetyemele, itne itwe-irretye-alheke apmere Jerusalem-eke, itne apmere nhenge

Apwerte Olive areye-akerte arritnyeke irretye-alheke, yanhe ikwerenge-ntyele itne apmere Bethphage areke. Jesus-ele yerneke apententye akngerre atherre arrwekele alhetyeke,² ikwere-atherre angkeke, “Apmere Bethphage nhakwe-werne alherraye, mpwele irrpenhe-irremele aretye-alherremele tangkeye menhenge atherre arneke-arleke ayerneke-arle iwerrele tnerle-anerrerlenge, yanhe atherre irlwemele atyengewerne akngetyetyeke.³ Kenhe tyerrtye angwenhele apeke mpwelenhe apayuthneme, ‘Iwenheke-ame mpwele tangkeye yanhe atherre akngerle-anerreme?’ Alakenhe ilerle-anerraye, ‘Ngkarte Anwerneke-artweye-arle ikwere-atherre ahentye-anemeke. Re renhe-atherrenhe iparrpe anthirtnetyenhe.’”⁴ Angkentye nhenhe tangkeye-akerte angkentye Ngkarte-kenhe awemele ilerle-apentye akngerre Zechariah-le-arle intelhe-ileke Pipe-nge arrule anthurre. Angkentye nhenhe arratyte anthurre-arle aneme:
⁵ “Angkentye antekelhe-ilaye apmere Jerusalem-arenye areyeke,
‘Araye! Alartetye arrekantherrenhe apetyer-lenge,
re tnakelhetyakenhe. Re apetyeme tangkeye-nge, tangkeye akweke ulkereke antyerle-alhemele.’”⁶ *Zechariah 9:9.*
⁶ Kele ratherre apmere-werne-athake arnpen-heke, mpwaretyeke iwenhe Jesus-clarle ileke.
⁷ Ratherre tangkeye renhe-atherrenhe Jesus-werne akngetyey-alperreke. Mantere ikwere-atherrenhe ilywelhe-ilemele tangkeye akweke

ikwere artepeke-arleke arrernerle-anerreke. Jesus tangkeye akweke-ulkereke-arleke antyerle-alheke.

⁸ Tyerrtye arrpenhe atningkele-arlke mantere itnekenhe ilywelhe-ilerrirremele antekelhe-ilemele iwerreke, arrpenhe areyele walye areye akemele iwerreke antekelhe-ilemele, Jesus ikwere arrwekele rarle alhetyenheke. Alakenhe re itne ikwere akangkentye renhe imernewarreke. ⁹ Nhenge arrwekele areye alherlte-apetyame, ingkernele areye-arlke alhetyame arkerlte-apetyeme angkemele, “Yewe, Ngkarte, artwe nhenhe arntarnte-araye unte-arle yerneke. Renhe impaye akngerrepate anemele anwernenhe arntarnte-aretyeke arrenge arrwekelenye David-ele-arteke. Yewe, Ngkarte kwenhe mwerre anthurre!”

¹⁰ Kele re Jerusalem-eke-arteke irremele tyerrtye areye apatewarreke, itne ikwere-werne untemele arlkemele, apayuthnerreke itne-arrpe, “Angwenhe-ame nhenhe?”

¹¹ Nhenge tyerrtye areye Jesus-nge Jerusalem-werne apetyewarreke, itneke angkirtnemele, “Artwe nhenhe Jesus, angkentye Ngkarte-kenhe awemele ilerle-apentye akngerre-arle, apmere Nazareth-arenye, apmere akngerre Galilee-nge.”

Jesus tyatye akngerre Jew areye-kenheke irrpenheke

(Mark 11:15-19; Luke 19:45-48; John 2:13-22)

¹² Kele Jesus yarte tyatye Jew-kenheke irrpenheke imerte aremele tyerrtye areyele arne arrpe-anenhe areye sell-eme-ilerlenga arrpenhe

areyeke. Kele re table areye nthenhele-arle itne mane antherrerlenge re irtwakeke, chair-arlke itnekenhe nthenhele-arle itne thipe mperlkere-arlke-arle sell-eme-ileke. ¹³ Re anteme itneke angkeke, “Iwenhe-arle pipe-le intelhe-ileke akwete-arle tneme, Ngkarte alakenhe angkeke, ‘Tyatye atyinhe, atyinhe akwete anetyeke-aye, tyerrtye areye atyenge angkerlte-anetyeke, ayenge utyer nemele tnakewarretyeke.’ *Isaiah 56:7.* Kenhe arrantherre akenhe maneke ntyelhe akngerre-arle tyatye nhenheke irrperreke kele, mane inemele tyerrtye arrpenhe areyengetyeye. Apmere nhenhe arrantherre akenge mpwaremele apmere anyelngalthe areyenkenhe-arteke mpwaremele.” *

¹⁴ Kele imerte pwenge areye uthene inwerre areye uthene ikwere-werne apetyewarreke, tyatye Jew-kenhe yanhe ikwere-werne, re itnenhe angkwerre-iwetyeke.

¹⁵ Tyatye Jew-kenhe nhenge ikwerekere ampe areyele renhe utyer nemele tnakewarretyame, alakenhe angkerrirremele, “Renhe impaye akngerrepatte anetyeke anwernenhe arntarnte-aretyeke arrenge arrwekelenye David-ele-arteke!”

Nhenge kwertengerle akngerrepatte tyatye-arenye areyele, angkentye akaltyele-anthenhe-anthenhe areyele-arlke ampe itnenhe awemele Jesus renhe utyer nelenge tnakewarrekele, renhe areke rlkerte areye angkwerre-iwerlenga, itne ahele anthurre awelheke. ¹⁶ Itne ikwere

* ^{21:13} Jeremiah 7:11 read-eme-ilay.

angkeke, “Unte ampe nhenhe areye ntertelhelietyeke. Unte apeke itnenhe awetyakenhe ngenhe utyernemele tnakewarrerlenge.”

Jesus akenhe itneke angkirtnerlenge, “Yewe, the itnenhe aweme. Arrantherre apeke angkentye Pipe-ke akutne, alakenhe angkerlenge, ‘Ngkarte, unte ampe-arlke, ampe akweke areye-arlke akaltyele-antheke itne Ngenhe arratyе utyernemele tnaketyeke!’”
¹⁷ Kele-arlre re angkeke iperre Jesus, apententye akngerre areye-arlke alheke Jerusalemengentyele apmere Bethany-werne yanhe ikwerele itne intekе.

Ayeye utyerrke-arlre antyerrke-irretyenhe akerte
(Mark 11:12-14,20-24)

¹⁸ Ingwe arrpenhele intemele arlte arrpenhele anteme, akeme-irremele alherlte-iweke Bethanyngentyele apmere Jerusalem-werne-atheke. Itne alherlte-iwemele Jesus angayakwe anteme-irreke. **¹⁹** Re areke arne utyerrke apurte-apurte iwerrele tnerlenge. Re alheke merne anngeke uyarne areke arlkwetyeke, arlpelhe-ante ikwerele, re arne ikwere angkeke, “Arrpenheke arrangkwe merne arlkwetyeke ngkwengenge urreke, akwete-ante unte merneke arrangkwe tneyenhe!” Iparrpe anthurre arne re antyerrke-irreke.

²⁰ Apententye akngerre Jesus-kenhe areyele aremele nthakenhe-arlre-irreke, itne apatewarreke, renhe apayuthnemele, “Nthakenhe-ame utyerrke nhenhe iparrpe antyerrke-irreke?”

21 Re itneke angkirtnerlenge, “Ayenge arratyē angkeme, arrantherre itirreme rarle arratyē anetyenhe, arrantherre arne utsyerrke ikwere angketyeke, ayenge-arle angkeke-arteke, kenhe re antyerrke-arle-irrerenge. Arrantherre apeke apwerte akngerre yanheke angketyeke, ‘Akeme-irraye, unte-arrpe kwaye alayeke iwellhaye!’ Apwerte yanhele arrenhantherrenhe awetyenhe, re akeme-irremel kwaye alaye kwene-werne iwellhetyenhenge. **22** Kele arrantherre ingkirreke apeke itirreme Ngkartele-arle renhe arrenhantherrenhe arratyē anthetyeke, kele arrantherre apeke renhe apayuthneme nhenge arne iwenhe ikwere apeke, kenhe Re arrenhantherrenhe antherlenge-arle.”

Angwenhele-ame Jesus angketyeke mpwareke akngerrepare-arteke anetyeke?

(Mark 11:27-33; Luke 20:1-8)

23 Jesus-kenhe areye arratetye-alheke Jerusalem-eke, Jesus tyatye akngerre Jew areye-kenheke irrpenheke tyerrtye areye akaltyele-anthetyame. Kenhe kwertengerle akngerrepare tyatye-arenye areyele-arlke, akaltyele-anthenhe-anthenhe areye-arlke, apmereke-artweye areye-arlke, artwe ampwe arrpenhe areye-arlke ikwere-werne alhemel renhe apayuthnike, “Angwenhele-ame akngerrepare anthurrele-arlke ngkwenge ileke mane-akerte artwe akngerrepare nhenge ingkirreke aywepetyeke apmere nhenhenge-ntyele? Anwerneke ilaye!”

24 Kenhe Jesus akenhe itneke angkirtnerlenge, “Awerrirraye, the arrenhantherrenhe apayuth-

neme, arrantherre atyenge iletyenhenge, kele anteme the arrekantherre iletyenhenge angwenhele ayenge alartetye arrerneke. ²⁵ Angwenhele apeke John kwatyek akwernentye akngerre renhe ileke tyerrtye itnenhene kwatyek akwernetye baptise-eme-iletyeke? Ngkartele apeke, artwe arrpenhele apeke? Atyenge ilerrirraye.”

Kenhe itne Jesus renhe awerirremele angkerlenga, itne angkerreke, “Anwerne ikwere angkerirretyakenhe Ngkartele-arle renhe ileke, tyerrtye itnenhene kwatyek akwernetyeke, rarle anwernenhe apayuthnetyenhe-ketye, ‘Iwenheke-ame arrantherre ikwere akangkweirretyakenhe?’ ²⁶ Kenhe anwerne ikwere alakenhe angkerirretyakenhe, ‘Artwe arrpenhele-arle renhe ileke-arle tyerrtye itnenhene kwatyek akwernetyeke,’ arrpenhe itne apeke anwerneke ahele-irrerirretyenhe-ketye apwertele atwerrirretyenhe itne-arle itirrewarrerlenga John-arle angkentye Ngkartekenhe awemele ilerle-apentye akngerre-arle aneke. Kele nthakenhe-ame anwerne angkerirreye?” ²⁷ Alakenhe ikwerenge anteme itne Jesus-eke angkirtnewarreke, “Anwerne akutne. Angwenhele-ame John ileke tyerrtye itnenhene kwatyek akwernetyeke?”

Kenhe Jesus re akenhe itneke angkirtnerlenga, “Arrantherre ayenge tyernewarretyakenhe, kenhe the akenhe arrenhantherrenhe tyernirnetyakenhe arrekantherre ilemele angwenhele-arle ayenge alartetye anetyeke arrerneke, arne nhenge areye mpwaremele.”

Ayeye kenhenge atherre-akerte

28 Kele Jesus angkeke kwertengerle tyatyearenaye areyeke, alakenhe, “Urrekaye the angkentye artemele arrekantherre iletyenhenge, kele arrantherre awerrirremele atyenge iletyeye nthakenhe arrantherre itirrewarreme. Artwe kenhenge atherre-akerte, alere akngerrepateke angkeke, ‘Akngerrepate atyinhe-aye, unte alhemele urrkapetyeke garden merne annge areye-akerte anwerne-kenhe-werne.’

29 “Kenhe alere akngerrepate re angkerlenga, ‘Arrangkwe! Ayenge ahentye kwenye-arle.’ Kele ingkerne ante anteme re itirreke urrkapetyeke alhetyeye, imerte urrkapetyeke alhemele garden ikwere-werne.

30 “Akngeye re imerte alere ingkernenyi ikwerenheke anteme alakenhe angkemele, ‘Garden-werne urrkapetyeke alhaye.’

“Ingkernenyi re akenhe angkirtnerlenga, ‘Yewe, ayenge alheme urrkapetyeke.’ Ikwerenge akenhe re alhetyakenhe urrkapetyeke.”

31 Kele Jesus-ele angkentye renhe-arle ileke iperrele itnenhe apayuthneke, “Alere angwenhe-ame aywerrkele akangkwe-irremele alhemele mpwareke akngeye ikwerenhele renhe ilekenge?”

Itne imerte angkirtnemele, “Alere akngerrepatele.”

Re anteme itneke angkeke, “Yewe, the arrekantherre arratyileme, Ngkarte akngerrepate irretyenhe mane inenhe-inenhe government-eke areye, arelhe artwe arrpenhe arrpe-anenhenge intentye akngerre areyenye maneke, itnenhe arntarnte-aretyenhe. Kenhe

arrantherre akenhe ingkerneke-arle iwerle-alhetyenhe, rarle arrekantherre akngerrepate irretiyakenhe, arntarnte-aretyakenhele.

32 Arrekwele-arle John kwatyeye akwernentye akngerrele arrenhantherrenhe ilekeke Ngkartek arratye-arratye anetyeke, arrantherre akenhe renhe irlpe artepele awerlenga, ikwere akangkwe-irretiyakenhe-arle. Kenhe mane inenhe-inenhe areyele renhe awemele, arelhe maneke artwe arrpenhe arrpe-anenhenge intentye akngerre areyele-arlke awemele, itne renhe awemele ikwere akangkwe-irreke imerte akurne-ketye untyeme-irremele anteme. Kele arrantherre areke itne-arle akangkwe-irremele akngarte-anteme-iwelhelenga kele arrantherre akenhe awelhetyakenhe-arle akngarte-arlke-iwelhetyakenhe-arle.” Alakenhe-arle Jesus angkeke kwertengerle tyatye-arenye akngerrepate areyeke artwe ampwe akngerrepate areyeke-arlke.

Artwe akurne areyele apmere akweke merne kripethe-akerte arntarnte-areme alartetye itne-kenheke

(Mark 12:1-12; Luke 20:9-19)

33 Jesus-ele angkentye alengkiwentye arrpenhe itneke ileke, alakenhe: “Apmere arrule re, apmereke-artweye anyentele arne kripethe areye kele ngkerneke. Re arrkngerte ngkerneke itepe arrpe-anenhèle, iperte atnyeke nhenge kripethe itnenhe ingkele arterte-ileme ngkwarle mpwaretyeke. Re apmere

arpentye akngerre arteke nhenge re akertnegentyele arerle-anetyenhenge tyerrtye areyele-arle merne anyelkngeli ineketye. Urreke re apmere arrpenhe-werne alhetyenhenge, re merne ngkernentye akngerre ikwerenhe artwe arrpenhe itnenhene antherle-alheke ikwere arntarnte-aretyeke. Kele imerte re apmere ikwerenhe-ngentyele impemele apmere arrpenhe ikwere-werne alhemele urrekeke-atwetye anetyeke. ³⁴ Kenhe urreke kripethe yanhe areye amangkemele mpengenirrerlenga, artwe apmere yanheke-artweye re urrkapentye urrpetye ikwerenhe yanhe ikwere-werne yernirtneke. Alartetyele anteme urrkapentye areye yerneke kripethe akngetye-alpetyeke akwele, akalkelhe-ilekenge ikwerenhe akwele. ³⁵ Kenhe mpwarentyre akngerre yanhe areyele itnenhe arnarewarremele itneke-werne-athewe apetyerlenga itnenhe anteme anyente arntirrkewarremele renhe atwerrirreke, kenhe arrpenhe renhe irrerlknge atweke, arrpenhe renhe apwerte areyele atweke. ³⁶ Kenhe artwe kripethe ngkernentye akngerre yanhe ikwere-artweye re awethe-arle artwe arrpenhe areye anteme yernirtneke. Kenhe mpwarentyre akngerrele itnenhene anteme arntirrkewarremele anthurre atwerrirretyeke anteye.

³⁷ “Kele imerte, artwe kripethe ngkernentye akngerre yanheke-artweye re-arrpe angkemele, ‘Iwenhe-ame the mpwaretyenhe? Atyinhe anyente-arle, the apeke renhe yernemere-artaye, itne apeke renhe awerrirretyenhenge atwerrir-

retyakenhele.’ Kele renhe yerneke.

38 “Kenhe mpwarentyе akngerre areyele akenhe renhe arnarewarremele itneke-werne-athеke apetyerlenga, itne-arrpe angkerreke, ‘Yanhe araye, alere apmereke-artweye-kenhe nhenhe-werne apetyerlenga. Anwerne renhe irrerlknge atwerrirreye, kele anwerne imerte ahelhe nhenhe ikwerenge rakewarremele!’

39 Kele itne renhe arntirrkewarremele apmere merne ngkernentye akngerrenge-ntyеle aketheke iwerrirremele renhe irrerlknge atwerrirreke.”

40 Ikwere iperrele Jesus-ele itnenhene apayuth-neke, “Iwenhe-ame artwe apmere yanheke-artweyele mpwaretyenhe urrkapentye akngerre areyeke re apmere ikwerenhe-werne apetyalper-lenga?”

41 Itne angkirtnerlenga, “Re apetyemele akurne anthurre yanhe areye irrerlknge atwetyenhe. Ikwere iperrele re mpwarentyе akngerre arrpenhe itnenhene kripethe ngkernentye akngerre renhe anthetyenhe itne arntarnte-aretyeke, merne kripethe mpenge-irrerlenga itne renhe anthirtnetyenhenge.”

42 Kenhe Jesus re akenhe itnenhene aremele angkeke, “Mwantye itirrewarraye nthakenhe-arle Payepule ikwerele atyenge-akerte angkeme: ‘Kenhe apwerte renhe-arle urrkapentye akngerre itne akethe-werne iwerrirreke, kenhe arrpenhe areyele akenhe apwerte nhenge apmere anthurreke arrerneke, apwerte nhenge arrpenhe ingkirrekengе mwerre akngerre anthurre ulkere aneke!

Ngkartele apwerte renhe akngakemele yanhe ikwere arrerneke, anwerne angketyame, “Re tnerle-aneme yanhe ikwerele arratyte mwerre akngerre anthurre.”,

Alakenhe itne Payepule-nge intelhe-ileke.” *Psalm 118:22-23.*

⁴³ Kele Jesus anteme akngerrepat areyeke angkeke, “Alakenhe angkentye Ngkarte-kenhe angkeme: ‘Ngkarte akngerrepat arrekantherrenhe anetyakenhe, arrenhantherrenhe arntarnte-aretyeke arrangkwe. Re anteme arrpenhe areyeke Alartetye anetyenhenge, nhenge areye ikwere aywerrkele akangkweirreme warrke ikwerenhe mpwaretyenhenge.

⁴⁴ Tyerrtye apeke-arle apetyetyenhenge. Apwerte yanhele anteme renhe tyelpelhe-ileme atnyetyeke mpwaretyenhenge. Kele ngkwerne ingkirreke ikwerenhe ultake-arle-lheme. Kele apwerte re apeke tyerrtye arrpenheke-arleke-arle atnyeke iperre, imerte tyerrtye renhe ngkweltye-arle-ilemele.’” †

⁴⁵ Kenhe nhenge Pharisee akngerrepat areyele kwertengerle akngerrepat tyatyearenye areyele awerrirremele angkentyearle Jesus-ele ilekenge kripethe ngkernentye akngerreke-artweye ikwere-akerte, kenhe itne akenhe itelarerrirreke re itneke-akerte-arle angkeke. ⁴⁶ Kele imerte itne ikwere itirrewarremele nthakenhe renhe arntirrkewarretyeke. Kenhe tyerrtye arrpenhe

† **21:44** Nhenge angkentye apwerte nhenhe-akerte angkemele Jesus kwenhe ikwere-arrpe angketyame.

areye akenhe itne itirrewarreke Jesus-arle angkentye Ngkarte-kenhe awemele ilerle-apentye akngerre-arle. Alakenhe ikwerengentyele akngerrepathe yanhe areye atere-irrerirreke renhe imperrirremele arrpenhele itnenhene atweketye.

22

*Artwe anyentele uyarne apayuthneme tyerrtye
areye apmere ikwerenhe-werne merne arlkwetyeke apetyetyeke*

(Luke 14:15-24)

¹ Awethe Jesus-ele angkentye alengkiwentye arrpenhe ileke alakenhe, ² “Ngkarte tyerrtye areyeke alartetye irrerlenge itnenhe arntarnte-aremele, alakenhe-arle anetyenhe: Artwe anyente aneke apmere arrpe-anenheke akngerrepathe-arle, kenhe alerikwele akenhe anewe aketyeke anteme-arle aneke. Kele alartetyele urrkapentye akngerre ikwerenhe areyeke ileke merne-arlke kere-arlke akngerre itetyeke. Re antangkeke atyewe ikwerenhe areyeke-arlke apetyetyeke apurte-irremele merne arlkwetyeke alere ikwerenhele-arle anewe akekenge. ³ Kele alartetyele areke kele-arle merne-arlke kere-arlke itekenge anteme re urrkapentye akngerre ikwerenhe areye yerneke alhetyeke tyerrtye areyeke antangketyeke, rarle kele ileke areyeke. Nhenge itne apetyewarremele, apurte anteme anemele merne arlkwetyenhenge. Kele itne alheke itnenhe ikngwetyeke. Kenhe ingkirrekele

awemele akenhe itne apetyetyakenhe-arle anerlenga. ⁴ Kele imerte re urrkapentye akngerre arrpenhe areye anteme-arle yernemele tyerrtye itnenhe ikngwetyeke apurtele merne arlkwetyeke. Itne imerte alhemele itneke angkemele, ‘Apetyewarraye! Alartetye anwernekenhele merne-arlke kere-arlke akngerre mpwarekeyaye, pweleke akngerre areye uthene pweleke akweke areye uthene kere tyelke mwerre anthurre-akerte. Re kwenhe ingkirreke iteke arrantherre apetyemele arlkwetyeke. Kele apetyewarraye akangkemele anwerne arlkwetyenhenge.’

⁵ “Kele arrpenhe areyele akenhe itnenhe irlpe artepele awemele, arne itnekenhe akwete mpwarerlte-anerlenga, arrpenheme areye garden itnekenhe-werne alperlte-iweke, arrpenheme areye akenhe urrkapetyeke-ante-arle alperlte-iweke mane awethe mpwaretyeke.

⁶ Kele arrpenhe areyele akenhe urrkapentye akngerre alartetyele-arle yerneke areye arntwirrkemele anthurre-arle atwerrirreke ilwetyeke-ante.

⁷ “Nhenge alartetyele awemele atwerre-arle-irreke-akerte re ahele anthurre irreke. Re thultye areye ileke alhetyeke. Itne alhemele tyerrtye itnenhe atwerrirreke imerte apmere itnekenhe urele itemele ngkweltye-ilemele.

⁸ Alartetye anteme urrkapentye akngerre ikwerenhe areyeke antangkemele imerte ilemele, ‘Awerrirraye, the merne-arlke kere-arlke akngerre anthurre itekeyaye. Kele tyerrtye areye tharle ikngweke apetyetyeke akenhe itne

ayene-ilelherlenge apetyetye-kwenye. ⁹ Apmere arrpenhe-werne alhemele anteme arrantherre apeke aremele tyerrtye iwerrele untherlte-anerlenge itnenhe-arlke ikngwaye apetyetyeke merne akngerre arlkwetyeke.’ ¹⁰ Kele itne alhemele tyerrtye iwerre iterele-arlke-arle aneke areye akngetyeke. Arrpenheme akurnearlke-arle akwetethe mpwareke, arrpenhe areye akenhe mwerre-arle mpwareke-arle, itne anteme apetyeke apmere alartetye-kenheke irrpeemele, atningke anthurre irremele.

¹¹ “Kele alartetye irrprintyemele aretyeke tyerrtye areye, re areke artwe anyente mantere angkweye-akerte. Nhenge artwele anewe ak-erlenge kele tyerrtye areye akenhe mantere mwerreke-arle irrperlenge imerte apetyemele anteme. Kele artwe nhenhe re akenhe mantere mwerreke irrptyakenhe-arle. ¹² Artwe alartetye imerte ikwere alakenhe angkemele, ‘Atyewe! Iwenhenge-ame unte mantere mwerreke irrptyakenhe apetyeke?’ Artwe re akenhe angketye-arlke-akenhe yanhe ikwerekere aneke. ¹³ Kele artwe alartetye anteme urrkapentye akngerre ikwerenhe areyeke antangkelheke imerte itnenhe ilemele, ‘Apetyewarraye, artwe nhenhe ingkenge uthene iltyenye uthene ayernaye imerte renhe aketheke ingwemertekewiwele, yanhele re akwete anetyeke akngerre artnemele.’ Kele itne renhe ayernemele aketheke iwerrirreke.”

¹⁴ Jesus-clarle angkentye nhenhe ileke-iperre re itneke angkeke, “Ngkartele kwenhe tyerrtye atningke anthurreke antangkeme renhe apente-

tyeke, kele re akenhe urrpetye ware-arle akngakeme, akangkwe-arle-irreme areye, renhe aywerrkele apentetyeke areye-ante.” Alakenhearle Jesus angkeke kwertengerle tyatye-arenye akngerrepat areyeke, artwe ampwe areye uthene Pharisee areye utheneke-arlke.

Mane apeke anthetyeke apmere Rome-arenye akngerrepat, arrangkwe apeke?

(Mark 12:13-17; Luke 20:20-26)

¹⁵ Artwe Pharisee areye apurte-irremele angkerretyame, Jesus renhe ularele apayuthnetyeke, urrtiyirremele, re apale angkemere. Itne itirrewarretyame, re apeke apale angkerlenge itne renhe arntirrkewarretyeke imerte Rome-arenye akngerrepat iltye anthemele. ¹⁶ Itne Pharisee areye, apententye akngerre Herod-kenhe areye-arlke Jesus-werne yerneke apayuthnetyeke nhenge re akwele apale angketyenhenge. Itne-arle ikwere-werne apetyewarreke-iperre ikwere alakenhe angkerrirreke, “Akaltyele-anthenhe-anthenhe-aye, anwerne itelareme unte tyerrtye ingkirrekeke akwetethe arratyte angkentye akngerre. Unte akngerrepat areyeke-arlke akwenpe anthurre angkenhe-angkenhe. Untearle angkentye arratyte Ngkarte-akerte itneke ileme. Kele arratyte mwerre-arle. ¹⁷ Nthakenhe-ame unte itirreme? Kele mwerre-arle anwerne apeke tax mane artwe akngerrepat Caesar anthetyeke? Nthakenhe-ame anwerne irreye?”

¹⁸ Kele Jesus-ele itelareke itne-arle renhe ularele ware apayuthnetyame, re imerte itneke

alakenhe-arle angkemele, “Arrantherre kwenhe tyerrtye urrtyirremele ware-arle anerlte-aneme mwerre akwele. Iwenheke-ame arrantherre ayenge urrtyirremele apayuthneme? ¹⁹ Atyenge-werne mane ngkweltye anyente akngetyaye, arrantherre-arle Caesar renhe anthemenge, the renhe aretyeke.” Itne arratyte akngetyemele renhe antheke. ²⁰ Mane ngkweltye areke-arle iperre, Jesus-ele itnenhe apayuthneme, “Inngerre-arlke arritnye-arlke angwenhe-kenhe-ame ngkweltye ikwerele aneme?”

²¹ Kenhe itne ikwere angkirtnerlenga, “Artwe nhenge Caeser.”

Awethe Jesus itneke angkeke, “Arne areye Caesar-kenhe renhe anthirtnewarraye. Kenhe iwenhe apeke renhe Ngkarte-kenhe, Renhe anthirtnewarremele.”

²² Kenhe itne Jesus renhe awerrirreke angker-lenga itne apatewarremele nthakenhe-irretyeke itirrewarreke. Kele itne ikwerenge-ntyele al-heke.

Ayeye nhenge Ngkarte-arltye tyerrtye areye itethe-ilirtneme-akerte

(Mark 12:18-27; Luke 20:27-40)

²³ Arlte yanhe ikwerele tyerrtye arrpenheme Sadducee areye Jesus-werne apetyewarreke. Nhenhe areye angkerirretyarte Ngkarte-arltye akwele tyerrtye ilweke-arle-ngentyele itethe-ilirtnetyakenhe-arltye. Itne renhe apayuthnerrirreke, ²⁴ “Akaltyele-anthenhe-anthenhe-aye, arrule artwe Moses-ele pipe-ke intelhe-ileke anewenhenge angwenhe apeke ikwere-atherre-akerte. Kele artwe apeke

ampeke arrangkwe akwete ilwerlenge, kenhe atyeyikwe re anteme-arle warlekwertere renhe anewe aketyeke, anewenhenge atherrele ampe atnyenetyeke kikweke. ²⁵ Kenhe lyete anwerne angkentye kenhenge-nhenge seven pele-akerte ngkwenga ileme. Kenhe artwe atyeyenhenge areye amangkemele akngerre-irrirrremele, meye uthene akngeye uthene anyente-ngentyele. Kenhe kake akngerre akenhe anewe akemele ampeke arrangkwe akwete-arle ilweke. ²⁶ Kenhe atyeyikwe re anteme-arle arelhe warlekwertere renhe anewe akeke, kele imerte re anteme-arle ampeke arrangkwe ilwemele. Kele anyenteke-anyentele atyeyikwe yanhe areyele arelhe warlekwertere yanhe renhe anewe akeke, kele imerte itne anyenteke-anyente anteme ilwerrirremele, ampeke arrangkwe akwete. ²⁷ Kele ikwerenge-ntyele, arelhe yanhe re anteme-arle ilweke. ²⁸ Kenhe urreke re akenhe, Ngkartele itnenhene itethe-ilintye-alpetyenhe, kenhe anewe angwenhe-kenhe-arle-ame arelhe re anetyenhe? Anwerneke ilaye.”

²⁹ Jesus itneke angkirtnerlenge, “Arrangkwe, arrantherre untyeme itirreme, akutne iwenhele arrule intelhe-ileke-akerte Payepuleke. Arrantherre akutne Ngkartek nhenge arne iwenhe apeke renhe ngangkerele mpwareme-arleke. ³⁰ Kenhe tyerrtye areye akenhe ilwemele itethe-irrirtneke-iperre, anewe akerretyakenhe anetyenhe. Itne utnenge alkere-arenye areye-arteke alkerele anetyenhe, anewe akerrentye akngerre kwenyenye.

³¹ “Arrantherre ayenge apayuthnerrirreke

Ngkartele-arle tyerrtye areye itethe-ilirtnemeke apeke ilweke-arle-iperre? Arrantherre-ame angkentye nhenge itelarerrirreme nhenge Ngkarte-arle Moses-eke angkeke, Abraham, Isaac, Jacob-arlke-arle apmere arrule ilwekenge,
³² ‘Ayenge Ngkarte, Abraham, Jacob, Isaac-clarle utsyernemele tnakewarreme akwete. Kenhe ilweke-arle areyele ayenge utsyernemele tnaketyakenhe-arle. Kenhe itethe areyele ayenge utsyernemele tnakewarreme akwete.’ Abraham, Isaac, Jacob arrule anthurre ilweke, urreke Moses intetyenhenge, kenhe Ngkarte angkerlenge itne-arle renhe utsyernemele tnakewarreme akwete-arle!’

³³ Kele renhe-arle awerrirreke iperre, itne apatewarremele nterte anthurre irrerirreke anteme.

*Angkentye Ngkarte-kenhe iwenhe-ame
arrpenhe areyenge atyeporre ulkere
(Mark 12:28-34; Luke 10:25-28)*

³⁴ Kenhe Pharisee areyele awerrirreke Jesus-
ele Sadducee itnenhe ntertelhe-ilerlenge, itne apurte-irrerirreke Jesus apayuthnerrirretyeke.

³⁵⁻³⁶ Kele artwe anyente itnekenge aneke, angkentye Moses-kenhe akaltyele-anthenhe-anthenhe, re Jesus ularele ware apayuthneke nthakenhe-arle re angketyenhenge alakenhe, “Ngkartele anwernenhe angkentye atningke akaltyele-antheke, angkentye iwenhe-ame akngerre-ulkere?”

³⁷ Jesus ikwere angkirtneke, “Unte Ngkarteke-ante ware ahentye-anetyeke atyepo-atyepo. Ikwerenge untyeme-irretyeke arrangkwe.

Ikwere-ante ware urrkaperle-anetyeke atyepe-
atyepa! ³⁸ Angkentye nhenhe arrpenhenge
arrekwele aneme, angkentye nhenhe arrpenhe
areyenge impene-ulkere. ³⁹ Angkentye
akngerre arrpenhe akenhe alakenhe-arle
aneme: Arrpenhe areyeke ahentye-anetyeke,
ngkwenge-arrpe-arle unte ahentye-aneme-
arteke. ⁴⁰ Arrantherre apele Ngkarteke
ahentye-anetyeke atyepe-atyepe, arrpenhe
areyeke ahentye-anetyeke, ngkwenge-arrpe-
arle unte ahentye-aneme-arteke, arrantherre
angkentye arrpenhe ingkirreke aywerrkele
apentewarretyenhe-arle, angkentye nhenge
areye Moses-clarle, angkentye Ngkarte-kenhe
awemele ilerle-apentye akngerre areyele-arlke-
arle anwernenhe akaltyele-antheke.”

*Christ apele aneme, anyente re Ngkartele-arle
alhileke*

(Mark 12:35-37; Luke 20:41-44)

⁴¹ Pharisee areye yanhele akwete anerlenge,
Jesus-ele itnenhe apayuthneke, ⁴² “Artwe nhenge
Ngkartele-arle alhileke, nthakenhe-ame arran-
therre itirrewarreme ikwere-akerte? Re-ame
angwenhe-kenhe arrwekelenye-ngentyele?”

Itne ikwere angkirtnerlenge, “Artwe nhenge
Ngkartele-arle alhileke, rarle David-eke-artweye-
ngentyele aneme.”

⁴³ Kele Jesus-ele itnenhene awethe apayuth-
nemele, “Arrule anthurre, David itethe akwete
anerlenge, Utnenge Akngerrele ikwere ileke
artwe nhenge-akerte Ngkartele-arle alhileke-
akerte, rarle renhe ileke, “Akngerrepate aty-
inhe.” Nthakenhe-arle-ame David-ele renhe

Alartetye akeke? ⁴⁴ Arrantherre itelareme, David Alartetyele-arle pipe-ke intelhe-ileke ikwere-akerte alakenhe:

‘Ngkarte Alartetye atyinheke angkeke,

“Unte atyenge itweke arrernelhaye atyengenye alartetye anetyeke,

tharle tyerrtye yanhe areye ngkwenge ahentye-kwenye areye ingke ngkwin-henge kwene-iletyenhenge,

kele itne ngkwenge akangkwe-irretyenhenge.” ’

Psalm 110:1.

⁴⁵ “Arrantherre apeke itelarerrirreme? David angkeke artwe nhenge Ngkartele-arle alhileke-arle, alartetye ikwerenhe aneme. Nthakenhe-arle-ame artwe re urreke-arle apetyetyenhe David-engentyele uthene anetyenhe? Rarle David-engentyele aneke-iperre, re alartetye ikwerenhe-arlke aneme. Artwe nhenge Ngkartele-arle alhileke David-enge awethe arntwarre-arle.”

⁴⁶ Itne ikwere angkirtnetyakenhe, arrangkwe-arle. Kele itne ntete anthurre irrerirreke anteme. Itne atere-irrerirreke renhe awethe apayuthnetyeke.

23

*Jesus-ele tyerrtye areyeke alkngarre-ileme
Pharisee areye-arlke-akerte angkentye Moses-kenhe akaltyele-anthenhe-anthenhe areye-arlke-akerte*

(Mark 12:38-39; Luke 11:43,46; 20:45-46)

¹ Yanhe-ngentyele Jesus angkeke apententye akngerre ikwerenhe areyeke tyerrtye arrpenhe

yanhele-arle aneke areyeke-arlke. ² “Arrantherre itelareme angkentye Moses-kenhe akaltyele-anthenhe-anthenhe areye-arlke, Pharissee areye-arlke-arle Ngkartele akngakeke Jew areye arrenhantherrenhe angkentye Moses-kenhe akaltyele-anthetyeke. ³ Alakenhenge anteme itne apeke angkerlenge, arrantherre kwenhe itneke akangkwe-irretyeke imerte aywerrkele mpwaremele iwenhe-arle itne angkeme. Kele itnenhe angwaretyale anetyeke iwenhe apeke-arlke itne mpwareme. Nhenge itne apeke arratyey-arratyey-arlke akaltyele-antherlenge yanhe areye-arlke itne-arrpe arratyey-mpwaretyakenhe-arlke. ⁴ Itne akwetethe-arlke itirreme arne arrpe-anenheke tyerrtye arrpenhe areyele mpwaretyeke itnenhe akwetethe-arlke uternemele arne itnenhe mpwaretyeke. Kele itne tyerrtye yanhe areye aremele, itnenhe alpe-eme-iletyeke arrangkwe-arlke. Nhenge alartetye-arlke urrkapentye akngerre ikwerenhe uternemele-arteke arne ulthentye akngernetyeke re-arrpe. Nhenge re-arrpe uyarne akemelhe-ilemele akertne-iletyeke anyentele, alartetye-arlke renhe akwenpele-arlke arerle-aneme. Alakenhe anetyale anetyeke.

⁵ “Alartetye yanhe areyele akenhe arne arrpe-anenhe-arlke mpwareme nhenge tyerrtye arrpenhe areyele akwele itnenhe aremele tnaketyenhenge akwele. Itnenhe arerrirraye! Arrantherre-ame areme arne akweke yanhe areye itne-arlke akngerneme amultele-arlke urlele-arlke? Itne anteme pipe angkentye Moses-kenhe-akerte ayerneke imerte arne akweke

yanheke akwerneke. Itnenhe arerrirraye! Itne mantere arlpentyeke irrpemele untherlteaperlenge tnakelhemele, itnenhe akwele tyerrtye areyele aretyenhenge.

6 “Kele itne imerte tyatye itne-kenheke apurte-irremele, apurtele apeke merne akngerre arlkwemele, itne chair impene anthurre areye-arle akngakeme, chair nhenge areye tyerrtye akngerre areyeke, tyerrtye areyele aretyenhenge itnenhe akwele tnaketyenhenge.

7 Nhenge itne alhemele merne uthene kere uthene inetyeke, itne arnterre anthurre-arle akangkemele tyerrtye arrpenhe areye itneke akaperte kwene-irrerlenge itnenhe akaltyele-anthenhe-anthenhe-arlke akerlenge.

8 “Kele awerrirraye! Tyerrtyele apeke arrenhantherrenhe “Akaltyele-anthenhe-anthenhe” akerlenge renhe ayakaye, arrantherre ingkirreke kake uthene yaye uthene-arle aneme alakenhe anteye-arle Akaltyele-anthenhe-anthenhe anyente aneme arrekantherre.

9 Tyerrtye arrpenhe renhe “akngeye” aketyale anetyeke. Arrantherre Akngeye anyente-ante-arle atnyeneme alkere akertnele-arle anerle-aneme. **10** Tyerrtyele apeke arrenhantherrenhe “akngerrepate” akerlenge, arrantherre akenhe renhe ayaketyeke-arle re arrenhantherrenhe apalele tnakeme-ketye arrekantherrenhe kwenhe Akngerrepate anyente-ante aneme, anyente nhenge Ngkartele-arle alhileke. **11** Kele angwenhe apeke-arle arrekantherrenhenge atyeperre anetyeke ahentye-aneme, kele re-arrpe arrekantherre ingkirrekeke urrkapetyeke.

12 Kenhe angwenhe apeke re ikwere-arrpe akngerre atniwelheme, arrpenhenge areye akngerre ulkere, urreke Ngkartele renhe ingkerne arrernetyenhenge renhe apurele-anthemele. Kenhe angwenhe apeke re tnakelhetyakenhe, kenhe ikwere-arrpe akurne-akurne itirremele, urreke Ngkartele renhe akngerre atniwetyenhe, arrpenhenge areye arrekwelenge arrernetyenhenge.”

*Jesus-ele yanhe areye alkngetherre ileme urrtyirremele-arle mwerre akwele aneme areye
(Mark 12:37b-40; Luke 11:39-42, 44, 52; 20:47)*

13 Kele Jesus angkentye Moses-kenhe akaltyele-anthenhe-anthenhe areye uthene Pharissee areye utheneke angkeke, “Akunye areye-aye! Arrekantherre akurne akngerre irretyenhe arrantherre-arle urrtyirrerlte-anemenge arne areye mpwarerlte-anemele. Nhenge tyerrtye areye Ngkarteké anerlte-anetyeke arrkernerlenga, arrantherre-arle arriwe metye-arteke-arle aneme, itnenhe ayakemele apmere Ngkarteké-kenheke irrpenheme-ketye. Kele, arrantherre-arlke irrpenhetyeke arrangkwearle, kele arrantherre tyerrtye arrpenhe areye ayakeme-arle irrpenheme-ketye.” 14 Kele Jesus angkentye Moses-kenhe akaltyele-anthenhe-anthenhe areye uthene Pharissee areye utheneke awethe angkeke, “Akunye areye-aye! Arrekantherre akurne akngerre irretyenhe arrantherre-arle urrtyirrerlte-anemenge arne areye mpwarerlte-anemele.

Arrantherre apmere warlekwerde areyekenheke irrpeme arne areye itnekenhe anyelkngèle inerlte-anemele. Kele imerte arrantherre mwerre akwele tyatye-ke irrpemele Ngkarteké akwete anthurre angketyeke. Kele mwerre anetyakenhe-arle alakenhe, akurnearle alakenhe! Ngkartele-arle arrenhantherre arerle-aneme alakenhe mpwarerlenga, kele re arrekantherre arne akenge anthurre mpwareme!

15 “Akunye areye-aye! Arrantherre angkentye Moses-kenhe akaltyele-anthenhe-anthenhe areye uthene Pharisee areye uthene. Arrekantherre akurne akngerre irretyenhe arrantherre-arle urrtyirrerlte-anemenge arne areye mpwarerlte-anemele. Arrantherre apeke apmere arrpe-anenhe-werne untherlte-apemele, apmere kwayte alayenge arntwarre apeke, apmere arlenge anthurre-werne-arlke, arrantherre tyerrtye anyente uternetyeke arrantherre-arteke anetyeke. Tyerrtye re anteme arrantherre-arteke irremele, re arrekantherrenge akurne awethe arntwarre-ulkere aneme, urreke re apmere arrentye Satan-kenhe-werne-arle alhetyenhe, arrantherre-arlke yanhe-werne ante-arle alherlte-iweme, apmere akurne urele akwetethe amperle-aneme-werne.

16 “Arrantherre angkentye Moses-kenhe akaltyele-anthenhe-anthenhe areye uthene Pharisee areye uthene. Akunye areye-aye! Ngkartele arrekantherre akurne anthurre mpwareme. Arrantherre-arle itelaretyakenhe-arle iwenhe arrantherre angkeme, arrantherre

akaltyele-antheme akutne areye, alakenhe itneke angkemele, ‘Unte apeke tyerrtye arrpenhe arne iwenhe apeke renhe mpwaretyeke alhileme, tyatye Jew-kenhe arritnyele ilemele, kele mwerre-arle mpwaretyakenhe apeke. Kenhe unte apeke tyerrtye arrpenhe nhakweke uternelheme apwerte gold arritnyele tyatye Jew-kenhe kwenele-arle aneme yanhenge. Kele urrtyirretyale! Arrantherre arratyе mpwaretyeke.’ Alakenhe-arle arrantherre itnenhe apale akaltyele-antheme. ¹⁷ Itirrentye arrekantherrenhe arratyе anetyakenhe. Tyatye Jew-kenhe impene anthurre aneme. Gold re akenhe impene anetyakenhe. Kenhe gold impene anteme-arle irreme, rarle tyatye akngerre Jew-kenhele anemenge ware, mwerre Ngkarteke.

¹⁸ “Arrantherre itelareme nthakenhe-arle arrantherre kere akngetyemele, kere renhe apwerte athereke-arleke ure itemele ntheke-iwemele Ngkarte anthemele, renhe tnakemele. Arrantherre awethe akaltyele-antheme alakenhe, “Unte apeke tyerrtye arrpenhe arne iwenhe apeke renhe mpwaretyeke alhileme, “apwerte athere kere ntheke-twentye akngerre” arritnyele ilemele, kele mwerre-arle mpwaretyakenhe apeke. Unte apeke tyerrtye arrpenhe arne iwenhe apeke renhe mpwaretyeke alhileme, “kere apwerte athereke-arleke-arle arrerneke” arritnye ilemele. Kele urrtyirretyale! Arrantherre arratyе mpwaretyeke. ¹⁹ Itirrentye arrekantherrenhe arratyе anetyakenhe! Kere nhenge apwerte

athere ntheke-iwentye akngerre ikwere-arle arrerneke impene aneme. Kenhe apwerte atherne ntheke-iwentye akngerre renhe kere yanhenge impene anthurre ulkere-arle, itne-arle apwerte atherne ntheke-iwentye nhengele kere areye amperlenge itne Ngkarte utyernemele tnakewarretyeke.

²⁰ Kere rarle impene-ante-arle irreme apwerte ikwere-arleke-arle arrernekenge ware. Apwerte atherne ntheke-iwentye rarle kerenge impene anthurre ulkere-arle. Angwenhele apeke tyerrtye arrpenhe arne iwenhe apeke renhe mpwaretyeke alhileme, “apwerte atherne ntheke-iwentye akngerre” kele re angkeme apwerte atherne ntheke-iwentye akngerre ikwere-akerte-arle iwenhe-arle akertnele ampeme ikwere-arlke-arle.

²¹ Angwenhele apeke tyerrtye arrpenhe arne iwenhe apeke renhe mpwaretyeke alhileme, “Tyatye Jew areye-kenhe” arritnye angkemele, kele rarle arritnye Ngkarte-kenhele-arle alhileme, Ngkarte-arle yanhe tyatye kwenele-arle anemenge.

²² Arrpenhele apeke arne iwenhe apeke renhe mpwaretyeke alhileme, “alkere akertne” arritnye angkemele, kele re alakenhe angkemele re arritnye Ngkarte-kenhele-ante-arle ileme, alkere-arle Ngkarte chair ikwerenhele anentye akngerre, ingkirreke anthurreke akngerrepat.” Alakenhe-arle Jesus angkeke angkentye Moses-kenhe akaltyele-anthenhe-anthenhe areye Pharisee areye utheneke.

²³ Awethe re angkeke angkentye Moses-kenhe akaltyele-anthenhe-anthenhe areyeke Pharisee

areyeke-arlke, “Akunye areye-aye! Arrantherre tyerrtye urrtyirremele mwerre akwele anerlte-aneme, arrangkwe. Alakenhe ikwerenge anteme akurne akngerre arrekantherre irretyenhe! Nhenge arrantherre arne akweke areye kartenek ngkerneme itne lyaperlenga, arunthe akweke arlpelhe-akerte areye, arne akweke nhenge mint-arlke, dill-arlke, cumin-arlke. Kele imerte itneke-ngentyele arrantherre merne anne 100 akngeme, imerte akngakemele Ngkarteke 10-pele anthemele. Alakenhe nhenhe rarle angkentye Moses-kenhenge ularre. Kele mwerre-arlle alakenhe arrantherre akwete mpwarerlte-anetyeke. Kenhe arrantherre akenhe angkentye impene anthurre areyeke alkngwirreke. Arrantherre tyerrtye areye arratyentye arntarnte-aretye-kwenye-arlle, arrantherre itneke urrtyirreme-arlle. Arrantherre itneke alhwarrpe-irretye-kwenye-arlle alpe-eme-iletyakenhe-arlle. Arrantherre-arlle Ngkarteke akwete awerrirretyakenhe.

²⁴ Yewe, arrantherre-arlle akutne-arlle, artwe pwengele-arteke-arlle arrantherre akngerlte-apeme tyerrtye arrpenhe areye arrantherre itelaremele-arteke, kele arrangkwe-arlle. Ayenge alakenhe akwete angkeme arrantherre-arlle akwete arne akweke areye alakenhe mpwarerlte-anemenge, kele arrantherre akenhe arne akngerre areye mpwaretyeke arrangkwe-arlle.

²⁵ “Akunye areye-aye! Arrantherre angkentye Moses-kenhe akaltyele-anthenhe-anthenhe areye Pharisee areye-arlke arrantherre

urrtyirremele ilentye akngerre mwerre akwele anerlte-anemele. Arrantherre tnakelhentye akngerre areye! Alakenhenge-arle arrekantherre akurne akngerre irretenhe! Arrantherre-arle itne-arteke nhenge tyampite uthene plate uthene akethe-ante urlkernemele, kwene akenhe aternnge-arle. Arrantherre arne arrpe-anenhe akethele mpwarerlte-aneme arrpenhe areyele aretyenhenge arrantherre mwerre akwele. Kele arrantherre akenhe atnure, ntyelhe-arle aneme-arle. ²⁶ Itirrentye arrekantherrenhe arratye anetyakenhe. Atnure ante ntyelhe anetyale! Kele imerte arrantherre mwerre apeke arne renhe arratye mpwaremele. Arrantherre apeke tyampite uthene plate uthene kwenele arrekwele alhewerlenga, kele itne alkarle anthurre anetyenhenge. Alakenhe arrantherre itirretyeke iwenhe-arle arrekantherrele-arlenga kwenele anemeke, akurne areye-ketye untyeme-irreme, kele yanhangentyele imerte arrantherre mwerre arratye anteme anetyenhele.

²⁷ “Akunye areye-aye! Angkentye Moses-kenhe akaltyele-anthenhe-anthenhe areye Pharissee areye-arlke arrantherre urrtyirremele mwerre akwele anerlte-aneme. Arrantherre tnakelhentye akngerre areye-arle! Alakenhenge anteme arrekantherre akurne akngerre irretenhe! Arrantherre-arle tyerrtye ilweke-arle areye-kenhe iperte-arteke-arle, arrpenhe areyele mperlkere intelhe-ileke. Arrpenhe areyele iperte yanhe areye arrelenga, itne akethele mwerre aneme, kenhe kwenele akenhe tyerrtye

areye-kenhe ngkwerne-ante-arle aneme, ilweke-arle arnerte-irrerlte-anerlenge. ²⁸ Alakenhe anthurre-arle arrantherre aneme. Tyerrtye areyele arrenhantherrenhe aremele, itne itirreme arrantherre mwerre akwele, kele arratyte anetyakenhe-arle, kwene akenhe arrantherre akurne anthurre-arle. Arrantherre angkeme arrantherre-arle angkentye Ngkarte-kenhe akwele apententye akngerre, kele arrangkwe-arle, arrantherre arratyentye apentetyakenhe-arle.”

Jesus-ele angkentye Moses-kenhe akaltyele-anthenhe-anthenhe areye uthene Pharisee areye utheneke ileme, akurne anthurre-arle itneke irretyenhe

(Luke 11:47-51)

²⁹ Jesus angkentye Moses-kenhe akaltyele-anthenhe-anthenhe areye uthene Pharisee areye utheneke awethe angkeke, “Akunye areye-aye! Arrantherre mwerre akwele anerlte-aneme. Apmere irrate nthenhele-arle, arrekantherrenhe arrekwelenye areyele angkentye Ngkarte-kenhe awemele ilerle-apentye akngerre areye artelheme, arrantherre warle impene arteme itnenhe itelaretyeke itne-arle atweke areye. Arrantherre awethe mwerre akngerre mpwareke apmere nthenhele-arle artwe arrpenhe areye Ngkarteke-arle arratyte anetyarte areye artelhemenge. ³⁰ Kele arrantherre atyenge alakenhe-arle angkeme, ‘Altyerre iperre anwerne-kenhe areyele-arle angkentye Ngkarte-kenhe awemele ilerle-apentye akngerre areye-arle atweke. Kenhe anwerne apeke-arle yanhe ikwerele ureke aneke, anwerne

itnenhe atwetyakenhe-arle anemere.’ ³¹ Kele arrantherre akaltye angkentye Ngkarte-kenhe awemele ilerle-apentye akngerre areye mwerre-arle. Kenhe arrantherre angkentye atyinhe akwenpele irlpe artepele awemele, imernemele arrantherre-arle arrekantherrenhe altyerre ipenhe areye-arteke anemenge. ³² Kele lyete arrantherre altyerre iperre arrekantherrenhe impatyte apenterlte-anetyenhe!” ³³ Arrantherre-arle tyerrtye akurne anthurre aneme apmwe arrengkwelthe akurne-akerte areye-arteke! Ngkarte-ketye alengke-iwelhetyeke arrangkwe-arle. Re arrenhantherrenhe ure akngerreke-arle iweme ampetyeke!

³⁴ “Awerrirraye! Ngkarte arrekantherre antangkelhetyenhe, yanhe areyeke angkentye Ikwerenhe awemele ilerle-apentye akngerre, ake altywere areye, akaltyele-anthenhe-anthenhe areyeke-arlke. Arrantherre arrpenhe areye atweme, arrpenhe areye akenhe arrantherre arne arntarlkwake-arleke irlpare arrerneme ilwetyeke, arrpenhe areye arrantherre tyatye kweneke-arle ngkerneme itnenhe whip-ele atwemele. Arrantherre itnenhe alwernerlte-anetyenhe antime apmere anyente-ngentyele apmere arrpenhe-werne-atheke. ³⁵ Alakenhenge anteme Ngkartele arrenhantherrenhe ilpernemele atwetyenhe, arrantherre-arle artwe arrpenhe mwerre areye apelkele atwekenge. Arrantherre itelareme angwenhele Abel atweke. Alakenhenge anteme altyerre iperre arrekantherrenhe areye, arrpenhe-ngentyele arrpenhe-werne-

atheke, itne tyerrtye areye akwetethe atwerlte-anemele anteme, ikwerenge anteme itne Barachiah-eke alerikwe Zechariah atweke. Itne aremele renhe tyatye arrkngerte kwene-werne irrpenherlenge, renhe atwerrirreke. ³⁶ Yewe, the arrenhantherrenhe arrayte alkngetherre ilemele Ngkartele arrenhantherrenhe-arlke atweme re anteme arrwekelenye areyele-arle artwe nhenhe areye atwekenge.” Alakenhe-arlke Jesus angkeke angkentye Moses-kenhe akaltyele-anthenhe-anthenhe areyeke Pharisee areyeke-arlke.

*Jesus artneme tyerrtye Jerusalem-arenye
areyeke rarle itneke alhwarrpe-irremenge
(Luke 13:34-35)*

³⁷ Kele Jesus alhwarrpe anthurre irremele tyerrtye Jerusalem-arenye areyeke angkeke, “Jerusalem-arenye areye-apenhe, Jerusalem-arenye areye-apenhe! Akunye areye! Kele arrule anthurrenge arrantherre angkentye Ngkarte-kenhe awemele ilerle-apentye akngerre areye apwertele wemele atwerrirretyarte Ngkartele-arlke angkentye-akerte areye-arlke yernetyarte apmere nhenhe-werne. Arrulenge-arrule ayenge ahentye-aneke arrenhantherre apurtelhe-ilemele arntarnte-aretyeke, nhenge thipe mikwele akweke ikwerenhe areye apurtelhe-ilemele arlpelhe kweneke arrernemele arntarnte-aremele-arteke, alakenhe athewe. Kele arrantherre akenhe ayenge ikwele-areke anthurre-arlke.

³⁸ Lyete ware Ngkartele Temple Jew areyenhe arrekantherrenhe ipmentye-iwetyenhe, apmere arltwe tnetyenhe, Re awethe yanhele

anetyakenhe anteme. ³⁹ Kenhe ayenge apmere nhenhenge-ntyele alpeme antime, arrantherre ayenge awethe urreke arerrirrettyakenhe, urrekeke-ante apeke. Kenhe urreke rarle, ayenge apetye-alpetyenhe, nhenge arrantherre ayenge arerrirremele arkerirrettyenhele, ‘Anwerne ingkirreke alyelhewarrettyekaye Ngkarte anwerne-kenhe-werne-atheke! Artwe nhenhe apele Ngkartele-arle anwerneke-werne yernekeke. Ngkarte-aye, unte-arle renhe akangkentye-ileme.’” Alakenhe-arle Jesus angkeke irrare-irremele tyerrtye apmere Jerusalem-arenye areyeke.

24

Jesus apententye akngerre ikwerenhe areyeke angkeme, “Tyatye Jew-kenhe ngkweltyeke atakel-hetyenhe.”

(Mark 13:1-2; Luke 21:5-6)

¹ Nhenge Jesus tyatye Jew areye-kenhe ikwerenge-ntyele arraterlenga, apententye akngerre ikwerenhe areye apetyeke ikwere angketyeke, “Akaltyele-anthenhe-anthenhe-aye, Tyatye mwerre akngerre yanhe araye.”

² Kenhe Jesus re akenhe itneke angkirtnerlenga, “Yewe, apmere akngerre nhenhe areye itne arteke apwerte akngerre areye-ngentyele, itne alakenhe anerrirrettyakenhe-arle anetyenhe, arrangkwe anthurre-arle. Urreke rarle, tyerrtye arrpenhe areyele itnenhene ahelhe-werne-atheke atakemele ankerte-iwerrirrettyenhe.”

*Jesus-ele apententye akngerre ikwerenhe
areyeke ileme akurne-arle itneke irretienhe
(Mark 13:3-13; Luke 21:7-19)*

³ Urreke, Jesus Apwerte Olive-akertele re-arrpe anetyame, apententye akngerre areye apetyemele renhe apayuthnerrirreke, “Anwerneke ilaye, ilengare-ame tyatye nhakwe renhe itne ultaketyenhe? Anwerneke ilaye, nthakenheke-amparre-arle irretienhe nhenge anwerne akaltye anetyenhenge ilengare-arle unte apetyalpetyeke, ahelhe-arlke alkere-arlke uyerretyeke anerlenge.”

⁴ Kenhe Jesus itneke angkirtnerlenga, “Arrantherre tyerrtye arrpenhe areye-ketye arntarnte-arelhewarraye, itne apeke arrekantherre urrtiyirreme-ketye, itne apeke arrenhantherrenhe utepelhe-ilemeketye atyengenge. ⁵ Kenhe atningke arrpenhe areye akenhe apetyewarremele, arrekantherre alakenhe apale angkerirretyenhe, ‘Ayenge Messiah, nhenge Ngkartele-arle arrekantherre alhileke yernetyeke! Atningkele-arle aweke-iperrele itnenhe apentewarretyenhenge. ⁶ Atere-irretiyele anaye nhenge arrantherre awemele thultye areye atwerrerlenge apmere arrpen-anenhele. Yanhe areyeke-amparre arrekwele irretienhe, kenhe yanhe ikwerekere ahelhe-arlke alkere-arlke uyerretyeke arrangkwe-arle. ⁷ Kenhe ureke ahelhe nhenhe uyerretyenhenge, tyerrtye apmere arrpe-anenhe-ngentyele-arlke ahele uthnerremele atwerrerretyenhe, tyerrtye ingkirreke itne ahele uthnerretyenhe. Ikwerenge-ntyele ahelhe anteke nhenhe

arrewemele irrerirretyenhe, apmere arrpenanenhele-arlke kele merneke arrangkwe anerrirretyenhe. ⁸ Alakenhe arrekwele-arlneke. Kenhe arne yanhe areyeke-amparre irretyenhe. Urreke ayenge apetyalpetyenhenge arne arrpenhe akurne anthurre areye-arlneke anetyenhe.

⁹ “Yanhenge anteme tyerrtye areye arrekantherre anteme ahele-irretyenhe, itne thultye areye itnekenhe iletyenhe arrenhantherrenhe arntwirrkemele irrerlknge atwetyeke. Yewe, tyerrtye areye apmere arrpe-anenhe-ngentyele arrekantherre ahentye-anetyakenhe anetyenhe arrantherre-arlneke atyewe atyinhe anekenge. ¹⁰ Yanhenge anteme atyinhe atyewe arrpenhememele ayenge-arlneke iperre untyeme-irrememele atyenge akangkwe-irretyakenhe anteme anetyenhe. Kenhe arrpenhememele arrpenhe itnenhe thultye areye iltye anthetyenhe itnenhe atwetyeke. ¹¹ Tyerrtye atningke urrtyirretyenhe, ilelhememele itne-arlneke angkentye Ngkarte-kenhe ilentye akngerre akwele. Tyerrtye atningkele awemele akangkwe-irretyenhe angkentye itnekenhe-ke imerte apale anteme alherlte-iwemele. ¹² Yewe, tyerrtye areye apmere arrpe-anenhe-ngentyele akurne-irretyenhe akwete akurne mpwarerlte-anemele. Tyerrtye areye Ngkarteke akangkwe-irretyakenhe, itne arrpenhe areye-ketye alhule-iwetyenhe, Ngkarte-arlneke awerrirremenge. ¹³ Kele arrantherre apeke ayenge akwetethe apenterlte-anemele ilwetyeke-atwetye kele arrenhantherrenhe Ngkarte

mwantyele-arle arntarnte-aretyenhe, akayakeilemele arrantherre anteme akwete-ante Ikwerenge anerlite-anetyenhe. ¹⁴ Apententye akngerre atyinhe areyele angkentye mwerre Ngkarte-akerte ilerlte-apetyenhe, angkentye nhenge Ngkarte-akerte tyerrtye areyeke-arle akngerrepate irremele itnenhe arntarnte-aremele. Kele tyerrtye areyele-arle kele apmere arrpe-anenhenge awekenge iperre ante-arle, ahelhe uthene alkere uthene uyerretyenhe.”

Akurne akngerre irretyenhe apmere Jerusalem-ele
(Mark 13:14-23; Luke 21:20-24)

¹⁵ Kenhe Jesus awethe apententye akngerre ikwerenhe areyeke angkeke, “Urreke, arrantherre arne akurne anthurre arerrirretyenhe Tyatye nhenhe kwene ikwerekere. Alakenhe ikwerenge Ngkartele tyatye renhe impetyenhe-arle, renhe arntarnte-aretyakenhe. Kenhe Daniel-ele, angkentye Ngkarte-kenhe awemele ilerle-apentye akngerrele arrule anthurre-arle nhenhe ikwerekere intelhe-ileke. Angwenhele apeke angkentye nhenhe read-eme-ileme, mwantye itirraye! ¹⁶ Kenhe arrantherre apmere Judea ikwerekere apeke aneme arne akenge areye alakenhe areye irrerlenge aremele, apwerte-werne iparrpe alherlte-iwetyeke-arle! ¹⁷ Yanhe ikwerekere ureke tyerrtye anyente apeke ulyentyele apmere itweke aneme, re akenhe apmere-werne alpetyale anetyeke-arle, arne ikwerenhe areye inetyeke, urreke alwirretyenhenge. ¹⁸ Alakenhe apeke arrantherre apmere akethole

urrkapemele, alpetyale anaye apmere-werne mantere arrekantherrenhe inetyeke, impemeleante alhaye. ¹⁹ Kenhe arelhe atnerte-atnerte areyeke arne iwenhe-iwenhe apeke renhe akurne anthurre-arle anetyenhe. Kenhe arelhe ampe arethape-akerte, itne uyarne alheme! ²⁰ Ngkarte apayuthnaye nhenge akurne yanhe areye alhwerrpele anetyale, arrantherre-arle uyarne untemenge. Awethe anteye Ngkarte apayuthneme nhenge akurne yanhe areye arlte apurkkele anetyale. ²¹ Yewe, akurne akngerre anthurre kwenhe anetyenhe, arrekwele-ngentyele nhenge Ngkartele-arle ahelhe nhenhe mpwareke arne arrpe-anenhe akurne aneke akwetethenhe. Kenhe tyerrtye areyele arrwekele arne akurne nhenhe-arteke irrerlenge aretyakenhe-arle. Alakenhe-arteke anteme awethe anetyakenhe anetyenhe. ²² Ngkarte kele angkeke akurne nhenge areye alakenhe-irrerlenge, urteke ware anetyenhe kele uyerremele. Re alakenhe mpwareke ingkirreke ilweketyenge. Re itirreke rarle arrekwele akngakeke areyeke. Alakenhe ikwerenge re angkeke akurne nhenge areye anetyenhe iparrpe uyerretyenhenge.

²³ “Kenhe arrpenhe apeke arrekantherre angketyenhe, ‘Apetyewarraye aretyeke, nhenhe anyente aneme Ngkartele-arle alhileke nhenhe-werne yernetyeke.’ Renhe irlpe artepele awetyeke! Angwenhe apeke alakenhe angkeme, ‘Nhakweyaye re!’ Renhe irlpe artepele awetyeke! ²⁴⁻²⁵ Kenhe arrpenhe areye akenhe urrtyirremele ware-arle angkerlenge

alakenhe, ‘Ayenge kwenhe artwe Ngkartelearle alhileke.’ Kenhe arrpenhe areye akenhe urrtyirremele ware angketyenhe, ‘Ayenge kwenhe aneme angkentye Ngkarte-kenhe awemele ilerle-apentye akngerre.’ Itne arne impene ngangkerele mpwareke tyerrtye itneke urrtyirretyeke, arrekantherre-arlke, nhenge areye Ngkartele-arle kele akngakeke. Kenhe itne arrekantherre uyarne-arle urrtyirreke tharle arrenhantherrenhe nhenhe areye-akerte arrekwele ilekenge.”

26 “Kenhe arrpenheme areye apeke apetye-warremele arrekantherre angkerrirretyenhe, ‘Nhakwe arerrirraye, artwe nhenge Ngkartelearle alhileke re apmere ahurratele anerlenge!’ Kenhe itne apeke akenhe angkerrirretyenhenge, ‘Re apmere kwenele alengke-iwelheme!’ Kenhe itne apeke arrekantherre alakenhe angkerrirrerlenge, itnenhene awerrirretyale!

27 Ayenge-arle Alere alkere-arenye apmere ahelhe nhenhele-arle akweke inteka. Nhenge ayenge apmere ahelhe nhenhe-werne apetye-alpemele, ayenge alarrkentye-arteke apetyetyenhe, alarrkemele alkere akertne alkngenthe-iletyenhe ikngerre-ngentyele alturle-werne-atheke. Alarrkentye-arteke, tyerrtye ingkirrekele ayenge arerrirretyenhe. **28** Thipe irretye areye itelaraye! Arrantherre itelareme nhenge kere apmere awangkele ilwerlenge yanhele intemele irretye areye irrperrerlenge. Kele anwerne itelareme iwenheke-arle itne yanhele aneme. Alakenhe-arle arrantherre ayenge akethe aretyenhe apetyalperleng,

iwenheke-arle ayenge nhenhele aneme-arlke.”

*Jesus angkeme apetye-arle-alpeme akerte
(Mark 13:24-27; Luke 21:25-28)*

²⁹ Jesus itneke awethe angkeke, “Akurne yanhe areye-arle irreke iperre, uterne ingwemerte-irretyenhe, atnyentye pwarrryetyakenhe anetyenhe. Kwerralye areye alkere-ngentyele atnyerrirretyenhe, Ngkartele altyerre-iperre alkere akertne-arenye areye lernetyenhe. ³⁰ Ayenge, Alere alkere-arenye apmere ahelhe nhenhele-arle akweke intek, angkulyenge arratemele, apetyetyenhe pwarrryemele. Nhenge ayenge nhenhe-werne ngangkere akngerre-akerte apetyetyenhe. Kenhe tyerrtye areye apmere arrpe-anenhe-arenyele ayenge aretyenhe, itne ingkirreke arrangkelhe-ilerremele atere anthurre irrerirretyenhe. ³¹ The utnenge alkere-arenye atyinhe areye yernetyenhe, trumpet itnekenhe arnterre angkelhe-angkelhe-iletyenhe, utnenge alkere-arenye atyinhe areye alhetyeke, ikngerre-werne, antekerre-werne, alturle-werne, ayerrre-werne. Itne alhetyenhe apurtelhe-iletyeke tyerrtye areye Ngkartele-arle akngakeke areye, imerte akngetye-alpemele ikwere-werne.”

*Jesus angkeme arne utyerrke-akerte
(Mark 13:28-31; Luke 21:29-33)*

³² Jesus anteme angkeke, “Arne utyerrke-akerte itirrewarraye. Arrantherre itelareme alhwerrpenge arlpelhe areye atnyentye akngerre uyerremele imerte. Ikwere-ipenhele, nhenge

arpelhe arrpenhe areye arraterlenga arrantherre itelareme uterne-arle itwe-irreme. ³³ Kele alakenhe rarle anetyenhe, arrantherre yanhe areye arerrirretyenhe alkerele anerlenga, kele arrantherre itelarerrirretyenhe ayenge-arle itwe anteme-irreme apetyalpetyeke.

³⁴ “Itelarerrirraye. Kenhe nhenge tyertye arrpenheme lyete itethe akwete anerlte-aneme, urreke itne ilwerrirretyenhenge, itne akurne anthurre ingkirreke arerrirretyenhe. ³⁵ Ahelhe-arlke alkere-arlke uyerretyenhe, kenhe angkentye atyinhe areye akenhe uyerretyakenhe akwete-arle anetyenhe.”

*Tyerrtye ingkirre akutne aneme ilengare-arle
Jesus apetyalpetyenheke*
(Mark 13:32-37; Luke 17:26-30,34-36)

³⁶ Jesus-ele apententye akngerre ikwerenhe areyeke alakenhe ileke, “Ingkirrenyeke akutne aneme ilengare-arle ayenge apetyalpetyenheke, Utngenge alkere-arenye areye-arlke akutne aneme. Ayenge-arlke, the-arlke itelaretyakenhe. Ngkarte-ante kwenhe akaltye aneme. ³⁷ Ayenge, Alere alkere-arenye apmere ahelhe nhenhele-arle akweke inteka, apetyalpetyeke aneme, ingkirreke arreware akwete anetyenhenge. Alakenhe-arteke, ahinpe anthurre Noah-arlke itethe anetyartenge. ³⁸ Urreke kwatyue urewe akngerre anetyenhenge tyerrtye ingkirreke arreware aneke. Itne merne arlkwetyarte, anewe akerretyarte. Kele imerte Noah ikwere-artweye areye-arlke boat-eke antyenhemele, rarle mpwarekeke. ³⁹ Kenhe

tyerrtye areye akenhe akwete arreware anerlte-aneke. Kele kватye urewe akngerre anteme apetyemele itnenhe atweke. Alakenhe-arle urreke tyerrtye areye arreware anthurre-arle anetyenhe, ilengare ayenge, Alere alkere-arenye apmere ahelhe nhenhele-arle akweke inteke, apetyalperlenga.

40 “Kenhe urreke-arle ayenge ahelhe nhenhe-werne apetyalpetyenhenge, yanhe ikwerele artwe atherre apeke akethele urrkaperle-anerrerlenga. Kenhe the akenhe anyente ware-arle akngetyenhe, kenhe arrpenhe akenhe ipmentye-arle irrerlenga. **41** Awethe-arlke, arlte yanhe ikwerele arelhe atherrele apeke merne ntange areye atherle-anerreme. Kenhe the akenhe anyente ware-arle akngetyenhe, kenhe arrpenhe akenhe ipmentye-arle irrerlenga. **42** Alakenhe rarle re, arrantherre arelherlte-anetyeke akwete atyenge, Alere alkere-arenye ahelhe nhenhele-arle alkngirreke, apetyalpetyeke-atwetye, arrantherre-arle akutne-arle ilengare-arle ayenge apetyalpetyenheke. **43** The arrekantherre angkentye akweke arrpenhe ileyteke ahentye-aneme artwe ikwere-akerte apmere iltheke-artweye. Kenhe re apeke apmere kwenele ankwe akngerre, kenhe arrpenhe apeke anyelkngeke apetyerlenga, kele re imerte ingkirrenyeke anthurre-arle anyelkngale inerle-alhemele. Kenhe apmereke-artweye re apeke-arle akarre aneke-arle, re aretyeke-arle aneke anyelkngalthe re apetyerlenga, re imerte renhe-arle ulilemele-arle arne

ikwerenhe areye anyelkngiele ineme-ketye. Kenhe arrantherre akenhe arratye nhenhe itelarerrirreme. ⁴⁴ Alakenhe rarle, arrantherre kwenhe arelherlte-anetyeke atyenge ilengare-arle ayenge apetyalpetyenheke. Ayenge, Ale're alkere-arenye apmere ahelhe nhenhele-arle akweke intekte, apetye-arle-alpetyenheke arrantherre akutne-arle aneme. Arrantherre alkngwe akwete anerlte-aneme ware." Jesus-arle ikwere-arrpe-arle angketyame apententye akngerre ikwerenhe areyeke.

*Ayeye urrkapentye akngerre atherre-akerte
(Luke 12:41-48)*

⁴⁵ Kenhe Jesus re angkentye nhenhe ileke: "Angwenhe-ame urrkapentye akngerre mwerre Ngkarte-kenhe? Kenhe ilthekeke-artweye re alethe alhetyeke, re kele urrkapentye akngerre anyente ware ikwere ineme urrkapentye akngerre arrpenhe areye arntarnte-aretyeke, itnenhene merne-arlke kere-arlke anthetyeke angayakwe irrerirrerlenge. ⁴⁶ Nhenge artwe iltheke-artweye alethe alhekenge-ntyele apetye-alpemele, re apeke urrkapentye akngerre renhe aretye-alpeme arnterre anthurre warrke-irrerlenge, iltheke-artweye re ikwere akangketye-alpeme. ⁴⁷ Kele the arrekantherre arratyae-arle ileme. Kenhe re imerte urrkapentye akngerre yanhe renhe-arle arne ingkirrenyeke ikwerenheke akngerrepatte arrernemele.

⁴⁸ "Kenhe urrkapentye akngerre akurne, re-arrpe angketyenhenge, 'The itelaretyakenhe, ilengare apeke-arle akngerrepatte atyinhe

apetyalpetyenhe, re apeke-arle akwete-ante anthurre-arle alhetyenhe, kele re akutne-arle aneme nthakenhe-arle ayenge irrememe.’⁴⁹ Re anteme urrkapentye akngerre arrpenhe areke ahele-irremele itnenhe atwemele. Kele re arrpenhe areyenge apurte-irretyenhe, merne akngerre-arlke arlkwemele, ngkwarle akngerre-arlke antywemele irrkaye-irrkaye-irremele.⁵⁰ Kele urreke, akngerrepate apetyalpetyenhe artwe yanhe re alkngwe anerlenga.⁵¹ Re renhe aremele akurne anthurre irrerlenga, re renhe iwetyenhe arnterre anthurre atwemele renhe apmere akurne nhenge-werne yernemele. Re kele alhetyeke arrpenhe areyele-arlenga anetyeke tyerrtye yanhe areyenge mwerre-arle akwele anerlte-anemenge. Re anemele artitye inkerrelhilemele rlkerte awelheke, uyarne itirremele.”

25

Ayeye arelhe awenke 10 pele-akerte

¹⁻² Jesus-ele itneke angkentye arrpenhe ileke, “Ayenge apetyalpemele ahelhe nhenhe-werne akngerrepate anteme anetyeke, alakenhe-arle irretyenhe. Arlte yanhe ikwerele tyerrtye ar-eye arelhe wenke 10 pele-arteke-arle apmere atyewe itnekenhe-werne alherlenga, akarel-hemele anewe akwerrke-iperreke apetyetyeke renhe anewe aketyeke. Itne ingwele alkngenthe-akerte alheke.³ Kenhe arelhe 5 pele akwen-pele aneke, alkngenthe itnekenhe alkngenthe-ileke iperre, antere awethe akngetyakenhe urekeke.⁴ Kenhe arelhe ilernpenye 5 pele ar-

rpenhele akenhe itelareke-arle, irlpangkemele antere awethe akngetyetyeke urrekeke, alkn-genthe ilwernelheketye. ⁵ Ingwele anteme, artwe re apetyetyakenhe akwete aneke. Arelhe itne akarelhemele akarelhemele-irreke, ankwe-anteme-interrirreke.

⁶ “Kele ingwe mpwepele anteme tyerrtye anyentele arkelhe-ileke alakenhe, ‘Iparrpe akeme-irraye! Artwe anewe-arle aketyenhe re angathe anteme apetyemenge, kele alhetyekeye ikwere arnekarnare irretyeke!’ ⁷ Kele itne akeme-irrerirreke ankwenge-ntyele alkngenthe itnekenhe-arle akngerre-ilemele alhetyeke.

⁸ Kele arerte-arerte itne uyarne itirreke alkngenthe itnekenhe akweke-arle-irrekengen, ‘Anwerne kwenhe antere akngerre inetyakenhe irreke.’ Uyarne itelaremele itne arelhe ⁵ pele arrpenhe areye apayuthneke. ‘Antere akweke anwernenhe anthaye! Alkngenthe anwerne-kenhe-arle ilwernelhekengen.’ ⁹ Kele itne angkirtnerlenge, ‘Arrangkwe, anwerne-kenhe-arle akweke ware-arle anwerneke-ante-arle. Shop-werne alherlte-iwaye antere awethe arrekantherre inetyeke!’

¹⁰ “Kele itne alherlte-iweke inerrirretyeke. Kele itne-arle alhekenge-ureke artwe re apetyeke anteme-arle anewe aketyeke akwerrke-iperre ikwerenhe renhe akngetyeye. Arelhe il-ernpenye areye-arlke apurte-iremele ikwere-atherrenge alheke lamp alkngenthe-akerte akng-eye ikwerenhe-kenhe apmere-werne arrernal-hemele itne kwene irrpenherlte-iweke imerte merne akngerre anthurre arlkwerrirremele,

artwe urrkapentye akngerrele anteme arriwe marteke. ¹¹ Kele antere awethe-arle ineke iperre arelhe 5-pele arrpenhe itne apetyalpeke apmere ikwere-werne aketheli tnemele arlkerirremele alakenhe, ‘Akngerrepataye! Altywere-ilaye anwerne irrpenhetyenhenge!’

¹² “Kele re alakenhe-arle angkerlenge, ‘Iwenhe ikweraye? Ayenge-arle arrekantherre akutne-arle.’”

¹³ Kele Jesus-ele angkentye nhenhe ileke-iperre re itneke angkeke, “Kele mwantyele anteme awerrirraye! Arrantherre kwenhe arelhe 5 pele itelarentye nhenge areye-arteke anetyeke. Akwetethe atyenge akarelherlte-anetyeke ayenge-arle ahelhe nhenhe-werne apetyalpetyenheke, arrantherre-arle akutne-arle ilengare-arle ayenge apetyalpetyenheke.”

Ayeye urrkapentye akngerre areye-akerte

¹⁴ Ikwere iperrele Jesus-ele angkentye itneke ileke, “Ayenge apetyalpemele ahelhe nhenheke-werne akngerrepatte anteme anetyeke, alakenhe-arle irretiyenhe: Artwele urrkapentye akngerre urrpetye atnyeneke. Artwe yanhe rarle arne ikwerenhe areye anyenteke-ilityame apmere arrpenhe-werne alethe-irrerle-alhetyeke. Urreke re alhetyenhenge re itneke antangkeke. Anyenteke-anyente re itneke mane ampenye ikwerenhe antheke, itne arntarnte-aretyeke akngerre-ilemele. ¹⁵ Artwe arrekwele-iperreke re antheke mane 5000 gold ngkweltye akngerre anthurre nhenge yanhenge re ikwere arntarnte-aretyenhenge. Artwe arrpenheke akenhe re

antheke mane 2000 gold ngkweltye ikwere re arntarnte-aretyeke anteye, kele artwe ingkerne-iperreke akenhe re antheke mane 1000 gold ngkweltye areye. Ikwere-iperrele anteme re alheke apmere arrpenhe-werne ilengareke-atwetye ikwere apeke.

¹⁶ “Urrkapentye arrekwele-iperrele nhenge 5,000 gold ngkweltye areye atnyenetyeke, re iparrpe alheke arne arrpenhe mpwaremele, apwerte nhenge atningke-irretyeke. Ikwere-iperre anteme 5,000 awethe mpwareke. Kele re 10,000 atnyeneke anteme. ¹⁷ Urrkapentye arrpenhele nhenge 2,000 gold ngkweltye areye atnyeneke, re alheke arne arrpenhe mpwaremele, rarle apwerte nhenge atningke-irretyeke. Ikwere-iperre anteme 2,000 awethe mpwareke. Kele re 4,000 atnyeneke anteme. ¹⁸ Urrkapentye ingkerne-iperrele 1,000 gold ngkweltye areye-arle ineke, re apele alhemele iperte tnyeke ahelheke, re ngkweltye itnenhe iperteke arteke.

¹⁹ “Urrekenge anteme, artwe akngerrepate re nhenge urrkapentye urrpetyeke re apetyalpeke apmere arrpenhe ikwerenge-ntyele, re itnenhe mane ikwere apayuthneke. ²⁰ Urrkapentye arrekwele-iperre nhenge 10,000 gold ngkweltye areye-arle atnyeneke re apetyemele ikwere angkeke, ‘Akngerrepataye unte kwenhe ayenge antheke-arle 5,000 gold ngkweltye areye ngkwenge atningke-iletyeke. Nhenhe araye! Nhenhe 5,000 unte-arle ayenge anthekenge, the kwenhe 5000 awethe mpwareke! Re anteme ingkirreke anthirtneke akngerrepate ikwerenhe renhe.’

21 “Yanhenge anteme artwe akngerrepatē re angkeke, ‘Unte kwenhe urrkapentye mwerre anthurre atyenge aneme. Unte kwenhe atyenge mwerre anthurre urrkapeke nhenge tharle ilerle-alhekeke. The kwenhe ngenhe mane akweke ware antheke unte atyenge atningke-iletyeke, unte akenhe ayenge mane akngerre-arle anthirtnerlenga. Yewe, arlte lyete-ngentyele the ngenhe arrerneme unte akngerrepatē anetyeke mane atningkeke atyinhe, apmere kwene atyinhe-werne irrprintyaye, anwerne apurte akangkemele anetyeke!’

22 “Ikwere-iperrele, kele urrkapentye arrpenhe nhenge 2,000 gold ngkweltye atnyeneke, re apetyemele angkeke pwathe ikwerenheke, ‘Akngerrepataye, unte kwenhe ayenge antheke 2,000 gold ngkweltye ngkwenge atningke-iletyeke. Nhenhe araye! Nhenhe 2,000 unte-arle ayenge antheke, the kwenhe 2,000 awethe mpwareke!’ Re anteme mane ingkirreke anthirtneke akngerrepatē ikwerenhe renhe.

23 “Ikwere-iperrele anteme artwe akngerrepatē ikwerenheke re angkeke, ‘Unte kwenhe urrkapentye mwerre anthurre atyenge mpwareke. Unte kwenhe urrkapeke tharle ngenhe ileke urrkapetyeke. The ngenhe mane akweke ware antheke atyenge atningke-iletyeke, unte akenhe ayenge mane akngerre-arle anthirtnerlenga. Yewe, arlte lyete-ngentyele the kwenhe ngenhe pwathe mpwareme unte mane atyinhe areye arntarnte-arerle-anetyeke. Apmere kwene-werne irrprintyaye anwerne apurte akangkemele anetyeke!’

24 “Yanhe ikwere-iperrele, artwe nhengele 1,000 gold ngkweltye areye-arle atnyeneke, re apetyemele angkeke akngerrepate ikweren-heke, ‘Akngerrepataye, the itelareke unte-arle ankeyalthe. Unte kwenhe akwetethe arne areye rakerle-aneme nhenge tyerrtye arrpenhe areye-ngentyele. Unte kwenhe uyarne ntange areye ngkerneme lyapelhe-ilemele, arrangkwe. Nhenge tyerrtye arrpenhe areyele wheat lyapelhe-ilerlenga, unte akenhe ware alhemele-arle itneke-nge rakemele inerlenga.

25 Nhenge unte ayenge yanhe 1,000 gold antheke ngkwenge atningke-iletyeke, ayenge-arle atere anthurre-arle awelheke the apeke aparlpe-ilemeketye. Kele, ayenge alhemele mane ngkwinhe areye the alengke-iweke. Nhenhe araye! Nhenhe kwenhe 1,000 gold ngkwinhe!”

26 “Yanhe ikwere-iperrele, akngerrepatele ileke urrkapentye akngerre renhe, ‘Unte kwenhe aname-atheke, akenge-arle ware! Unte kwenhe atyenge akaltye aneme. Arratyte kwenhe aneme nhenge tharle arne areye rakemele inerle-aneme tyerrtye areye-ngentyele, nhenge ntange wheat areye-arlke.

27 Kele mwerre, unte kwenhe nhenge mane nhenhe renhe inemele bank-ekarleke arrernemele, itne awethe mpware-tyeke. Nhenge unte apeke arrerneke, ayenge-arle apetyalpekenge mane arrpenheme ware inirtnemere bank-ngentyele.’

28 “Yanhe ikwere-iperrele anteme, akngerrepate re angkeke urrkapentye ikwerenhe areyeke, ‘Rakirtnaye 1,000 gold yanhe renhe urrkapentye akurne yanhe-ngentyele,

urrkapentye akngerre arrekwele-iperre yanheke anthaye nhenge 10,000 gold-akerte.
29 Angwenhele apeke mwerre mpwarerlenge, the renhe awethe akngerre antheme nhenge re mwerrentye atyenge urrkapetyenhenge. Kenhe angwenhele apeke aname-atheke, warrke akweke ware mpwarerlenge, kele the ikwerenge rakeme arrpenhe anthetyenhenge mpwaretyeke.
30 Warrkene ingkerne-iperre akenhe, akenge-arle ware anemeke, renhe apmere-ngentyele aywepaye apmere ingwemerte akwetethe-arle aneme-werne. Yanhele anteme re arlkemele artnetyenhe, artitye arrurrketyenhe re rlkerte awelhemele.’”

Jesus-ele tyerrtye areye akalkelhe-iletyenhe akurne areye uthene mwerre areye uthene anetyeke

31 Yanhe ikwere-iperrele anteme, Jesus-arle angkeke tyerrtye areyeke, “Urreke, ayenge, Alere alkere-arenye apmere ahelhe nhenhe-arle akweke intek, ahelhe nhenhe-werne apetyalpetyenhe alkngenthe akngerre-arle ampeme-arteke, ayenge apetyetyenhe utnenge alkere-arenye atyinhe areye-akerte. Yanhe ikwere-iperrele anteme ayenge chair mwerre akngerre atyinhele anetyenhe. **32** Utnenge alkere-arenye atyinhe areye alhetyenhe itne tyerrtye areye apurtelhe-ilemele inetyenhe apmere ahelhe nhenhenge, itne itnenhe akngetyetyenhe atyengenge arrekwele-arle tnetyeke. The tyerrtye areye akalkelhe-iletyenhe, nhenge yepe-yepe arntarnte-arentye akngerre areyele arrerneme yepe-yepe uthene

nanikute uthene akalkelhe-ilemele-arteke.
³³ Tyerrtye mwerre-arle aneme areye, the itnenhene akwe-arratye atyinheke-arleke arrernetyenhe, tyerrtye arrpenhe areye the akwe-alyenge atyinheke-arleke arrernetyenhe.”

³⁴ Jesus akwete itneke angkeke, “Kele imerte the ilemele tyerrtye yanhe itnenhe nhenge akwe-arratyele-arle aneme areye, ‘Tyerrtye areyaye, Akngeye atyinhele kwenhe arrenhantherrenhe mwerre atnyeneme, mwantyele arerle-anemele. Urreke Ngkartele-arle ahelhe uthene alkere uthene mpwaretyenhenge, re akwete-ante apmere mwerre akngerre arrekantherre mpwaretyeke, arrantherre ikwerenge alethe akwete anerrirretyenhenge. Yewe, apmere mwerre nhenhe-werne apetyewarraye nthenhele-arle arrantherre akangkemele anetyenhenge.’ ³⁵ Ayenge tyerrtye yanhe areyeke awethe angketyenhenge nhenge akwe-arratyele-arle aneme areye, ‘Nhenge ayenge angayakwe anerlenge, arrantherre ayenge merne antheke arlkwetyeke. Nhenge ayenge angkethakwe anerlenge, arrantherre ayenge kwatye antheke antywetyeke. Ayenge ipenye anerlenge, arrantherre ayenge apmere arrekantherrenheke kweneke. ³⁶ Nhenge ayenge tyerrtye akethe anerlenge, arrantherre ayenge mantere antheke irrpetyeke. Nhenge ayenge uyarne anthurre itirrerlenge, arrantherre ayenge arntarntareke. Nhenge ayenge jail-ele anerlenge, arrantherre apetyeke ayenge akangketyeke mpwaretyeke.’ Yanhe alakenhe re kwenhe ayenge angketyenhe tyerrtye akwe-arratyele-

arle aneme areyeke.

³⁷ “Yanhe ikwere-iperrele anteme, tyerrtye arratyeyanhe areyele ayenge apayuthnetyenhe, ‘Ngkartaye, iwenhenge-arle-ame’ unte anwerneke alakenhe angkeme? Anwerne kwenhe ngenhe angayakwe aretyakenhe, anwerne ngenhe merne anthetyakenhe. Anwerne ngenhe angkethakwe aretyakenhele aneke, anwerne ngenhe kwatye anthetyakenhe aneke, arrangkwe. ³⁸ Anwerne kwenhe ngenhe ipenye-arteke apmere anwerne-kenhe-werne akngetyakenhe aneke. Anwerne kwenhe ngenhe tyerrtye akethe aretyakenhe aneke nhenge mantere apeke anthetyakenhe aneke nhenge unte irrptyeke. ³⁹ Anwerne-arle ngenhe aretyeke apetyetyakenhe-arle aneke unte jail-ele anerlenga, unte rlkerte anerlenga.’ ”

⁴⁰ Jesus itneke akwete angkeke, “Arrantherre tyerrtye atyinhe akunye nhenhe ar-eye arntarnte-areke, arrantherre-arle ayenge arntarnte-areke-arteke, itne-arle ampernentye atyinhe anekenge.”

⁴¹ “Yanhe ikwere-iperrele anteme, ayenge angkeme tyerrtye akwe-alyengele-arle tneme areyeke, ‘Alherlte-iwaye. Ngkartele arrenhantherrenhe akwete-ante aywepeme Ikwerenge-ntyele, apmere urele akwete amperle-aneme-werne. Apmere yanhe kwenhe Ngkartele mpwareke arrentye, utnenge akurne alkere-arenye ikwerenhe areye-arlke iwetyeke. ⁴² Nhenge ayenge angayakwe anerlenga, arrantherre kwenhe ayenge merne anthetyakenhe aneke arlkwetyeke.

Nhenge ayenge angkethakwe anerlenge, arrantherre ayenge kwatye anthetyakenhe aneke antywetyeke. ⁴³ Nhenge ayenge ipenye anerlenge, arrantherre kwenhe ayenge apmere arrekantherrenhe-werne akngetyakenhe aneke ankwe-intetyeke. Nhenge ayenge tyerrtye akethe anerlenge, arrantherre kwenhe ayenge mantere anthetyakenhe aneke irrpetyeke. Nhenge ayenge jail kwenele anerlenge, arrantherre kwenhe apetyetyakenhe aneke nhenge ayenge akangketyeke mpwaretyeke.’

⁴⁴ “Yanhe ikwere-iperrele, tyerrtye ingkir-reke nhenge akwe-alyengele-arle tneme areye, itne atyenge angketyenhe, ‘Ngkartaye, anwerne kwenhe ngenhe angayakwe aretyakenhe aneke, nhenge angkethakwe apeke, ipenye apeke, tyerrtye akethe apeke, nhenge rlkerte apeke, jail-le anerlenge. Anwerne uyarne ngenhe ipmentyele impeke nhenge ngenhe arntarnte-aretyakenhele, arrangkwe.’

⁴⁵ “Kenhe ayenge akenhe yanhe areyeke angketyenhe, ‘Apmere ahelhe nhenhenge, arrantherre akunye areye arerrirretyarte itne-ketye untyemurle-irremele, alakenhe anteye anteme aneme nhenge arrantherre-arle atyenge-ketye untyemurle-irreke-arteke.’ ”

⁴⁶ Kele Jesus tyerrtye itneke angkeke, “Yanhe ikwere-iperrele, the itnenhe yernetyenhe apmere urele amperle-aneme-werne uyerretyakenhele. Kenhe tyerrtye areyele-arle mwerre mpwareme, itne Ngkartenge akwete-ante anerrirretyenhe.”

26

*Akngerrepatē areye anyelknge-anyelknge
angkerreme Jesus atwetyeke*

(Mark 14:1-2; Luke 22:1-2; John 11:45-53)

¹ Nhenge Jesus-clarle angkentye yanhe areye akaltyele-antheke iperre re apententye akngerre ikwerenhe areyeke alakenhe angkeke, ² “Arrantherre itelareme arlte atherre iperre anwerne arrawe-irrentye akngerre atnyenetyenhe Passover arritnye. Ikwerele ureke, tyerrtye areyele ayenge arntwirrketyenhe, Alere alkere-arenye apmere ahelhe nhenhele-arle akweke intek, imerte ayenge iltye anthemele itne atwetyeke arne arntarlkwake arlpate arrernetyenhenge.” * ³ Arlte yanhe ikwerele, kwertengerle akngerrepatē tyatye-arenye areye, artwe akngerrepatē arrpenhe areye-arlke apmere Caiaphas-kenhe-werne alheke, rarle kwertengerle tyeperre tyatye-arenye anekenge, itne ikwerenge angkerreke. ⁴ Itne anteme apayuthnerreke, “Nthakenhe-arle-ame anwerne Jesus anyelknge-anyelknge inerrirremete irrerlkngē atwetyenhe? ⁵ Anwerne akarelheye urrekeke-atwetye, Passover arrawe-irrentye akngerre nhenge kele uyerreke-arlengē. Anwerne apeke renhe lyete mpwarerlengē arrawe-irrentye akngerrele-ureke, tyerrtye-arle

* **26:2** Exodus 12:21 ff. Arlte yanhe ikwerele itne apurte-irrerretyarte merne athirnte-arle kere yepe-yepe akwerrke-arlke atwemele arlkwetyeke, itnarle irlpangketyeke nthakenhe-arle-irreke apmere Egypt-ele arrule anthurre.

nhenhe-werne apetyewarremele anwerneke ahele-irremere, ahele-ahele akemele, itne-arle itelareme rarle nhenge Ngkartele-arle alhileke yernetyeke.”

Arelhe anyentele antere mwerre akngerre theleme Jesus akaperteke-arleke

⁶ Jesus, apententye akngerre ikwerenhe areye-arlke apmere Bethany-ele anerlenge, itne apmere Simon-kenheke irrpetye-alheke. Artwe yanhe utyene irrkelle-irrkelle-ilentye akngerre-akerte aneme. ⁷ Jesus table-le anetyame arlk-wemele, arelhe anyente anteme irrpintyeke. Re kwene-werne akngeke tyampite antere mwerre ntyentye akngerre-akerte, antere impene anthurre. Rarle altywere-ileke-arle-iperre tyampite ikwerenge antere theleke Jesus akaperteke-arleke.

⁸ Apententye akngerre Jesus-kenhe areyele renhe aremele itne ahele-irrerreke. Itne angkerreke, “Iwenhenge-arle-ame re antere mwerre ntyentye akngerre akngetyeke ipmentye altyelpe-altyiwetyeke? ⁹ Re apeke-arle selleme-ileke, kele re apwerte ngkweltye akngerre inemere tyerrtye alhengkeye areye anthetyen-henge.”

¹⁰ Kenhe Jesus-ele itelareke nthakenhe-arle itne angkerreme, imerte itneke angkemele. “Iwenhe ikwerenge-ame arrantherre ikwere akengentye angkerrirreme? Renhe imperrirraye. Re kwenhe atyenye mwerre anthurre mpwarerne. ¹¹ The arrenhantherrenhe irlpangkelhe-ileme, nhenge tyerrtye alhengkeye areye ar-

rekantherrenge akwetethenhe anerlenge, arrantherre itnenhe arntarnte-aretyeke, nhenge arrantherre ahentye-anemele. Kenhe ayenge akenhe arrekantherrenge akwete anetyakenhe-arle. Alakenhenge re mwerre atyenge mpwareke, imernemele rarle atyenge akangkentye aneme. ¹² Nhenge re antere mwerre yanhe atyenge akaperteke-arleke theleke, re apeke-arle itelarekenge ayenge-arle ingwenthe ware ilwetyenhe. Re yanhe mpwareke, nhenge ayenge iperteke artetyeke-arteke akwele. ¹³ Arrantherre ingkirrekele itelarerriarraye, tyerrtye arrpenhe areyele angkentye mwerre ilerremele ahelhe anteke nhenhele itne alakenhe-arle itelaretyenhe arelhe nhenhe ikwere-akerte angketyenhe.”

Judas yewe angkeme rarle Jesus iltye anthetyenhenge

¹⁴ Yanhe ikwerenge Judas Iscariot, apententye akngerre akwele re, kwertengerle akngerrepate tyatye-arenye areye-werne alheke. ¹⁵ Re itneke angkeke, “The apeke arrekantherre ileke nthenehele-arle Jesus aneme, mane nthakentye-ame arrantherre ayenge anthetyenhe, arrantherre renhe arntirrkwetyenhenge?” Kele tyatye-arenye akngerrepate areyele akenhe silver apwerte ngkweltye 30-pele-arle Judas renhe antherlenge. ¹⁶ Kenhe Judas anteme arelhetyarte ilengare-arle re Jesus itnenhe iltye anthetyenheke itne-arle renhe arntwirrke warretyenhenge.

*Jesus-ele merne Passover-eke arlkweme apententye akngerre ikwerenhe areyenge
 (Mark 14:12-21; Luke 22:7-13,21-23; John 13:21-30)*

¹⁷ Arlte arrekwele arrawe-irrentye akngerre Passover-enge, nhenge merne tampe ilperre-ilperre arlkwetyenhenge, yanhenge apententye akngerre areyele Jesus apayuthnerrirreke, “Nthenhe-werne-ame unte awernenhe yerneytenhe merne-arlke kere-arlke ngkwenge ite-tyeke Passover-eke irlpangkemele?”

¹⁸ Kele, Jesus anteme angkeke apententye akngerre ikwerenhe areyeke, “Apmere akngerre Jerusalem-werne alherlte-iwaye, kele arrantherre kwene-werne alhemele, arrpenhe anyenteke araye. Ikwere ilaye ayenge, akaltyele-anthenhe-anthenhe, kwenhe kele ilwetyeke anteme aneme. Ikwere ilaye tharle yepe-yepe arlkwetyenhe Passover-ele-ureke apmere ikwerenhele apententye akngerre atyinhe areye-akertele. Alakenhe artwe ikwere angkaye.”

¹⁹ Kele itne Jerusalem-werne alhemele mpwareke nthakenhe-arle Jesus-ele itnenhe ileke-arteke akwete. Kele itne merne tampe ilperre-ilperre renhe iteke kere-arlke imerte ingwele arlkwetyeke arrernemele.

²⁰ Uterne-arle irrpeke-iperrele, Jesus, apententye akngerre twelve pele ikwerenhe areye-akerte alheke, apmerekere irrpemele arrernelhemele merne arlkwetyeke. ²¹ Itne anemele arlkwetyame Jesus angkeke, “Awerrirraye. Anyente ayenge iltyle atnerte anthetyenhe, anyente

anwernenhe-arle nhenhele arlkweme, arrpenhe areyele ayenge arntirrkwetyeke.”

²² Itne aweke-arle-iperrele itne atnerte akurne anthurre awelheke. Itne anyenteke-anyente ikwere angkeke, “Ngkarte anwerneke-artweye! Ayenge-eye?”

²³ Kenhe Jesus itneke angkirtneke, “Twelve pele nhenhele aneme, kenhe anyente nhenhele aneme, ilerne apurtele merne tampe urtneke thweke-eme-ilemele arlkwetyenhe. Anyente yanhe rarle ayenge iltye anthetyenhe. ²⁴ Yewe, ayenge, Alere alkere-arenye apmere ahelhe nhenhele-arle akweke intekte, ilwetyenhe, alakenhe re arrule aneke intelhe-ileke-arle Bible-le inteme. Kenhe ayenge alhwarrpe awelheme artwe nhenheke ayenge-arle iltye anthetyenheke. Ikwere akurne anthurre anetyenhe rarle ayenge iltye anthemenge. Mwerre apeke-arle anetyeke aneke artwe yanhe apeke-arle intetyakenhe aneke.”

²⁵ Kenhe Judas, iltye-arle anthetyenhe re, Jesus apayuthneke, “Akaltyele-anthenhe-anthenhe-aye, ayenge-eye?”

Jesus ikwere angkirtnerlenga, “Unte-arle alakenhe angkeme.”

Jesus-ele merne atyeperre renhe itnekenge arlkweme

(Mark 14:22-26; Luke 22:14-20; 1 Corinthians 11:23-25)

²⁶ Nhenge itne-arle arlkwetyamenge, Jesus-ele merne tampe ilperre-ilperre renhe ineke, imerte Ngkarteke tnakemele. Ngkarteke-arle

utyernemele tnameke iperre, tampe renhe ultakirtnanemele, re imerte apententye akngerre areye anthemele. Re anteme itneke angkeke, “Nhenhe kwenhe tyerrtye atyinhe. Nhenhe renhe inemele arlkwaye.”

²⁷ Re imerte tyampite ngkwarle-akerte anteme akertne-ilemele Ngkarte tnakemele. Ngkarte-arle utyernemele tnameke iperre ngkwarle ikwere, re apententye akngerre ikwerenhe areye antheke imerte angkemele, “Ingkirrenyekele, inemele antywaye. ²⁸ Nhenhe-arle alhwe atyinhe-arle tyerrtye areyeke thelelhetyenhe-arle. Nhenge ayenge ilwerlenga alhwe atyinhe thelelhemele, Ngkartele akenhe alhileme anyente-irretyeke tyerrtye areyenje itnenhe ilpernetyakenhe anemele itne-arle akurne mpwarekenge. ²⁹ The arrekantherre arratyte ileme, ahelhe nhenhenge the awethe ngkwarle antywetyeke arrangkwe. Kele urreke Akngeye atyinhele tyerrtye areye apurtelhe-ilemele itnenhe akngerrepatete-arteke arntarnte-aretyenhe. Yanhenge anteme-arle the arrekantherrenge ngkwarle awethe antywetyenhe ngkwarle arrpenhe anteme.” Alakenhe-arle Jesus itneke angkeke.

³⁰ Kele itne-arle arlkweke iperre antyweke-arlke iperre anyente-ngare alyelheke iperre-arlke itne arratemele alheke apmere renhe iwerlte-alhemele alheke Apwerte Arne Olive areye-akerte-werne.

Jesus-ele Peter-akerte ileme

31 Jesus itneke angkeke, “Ingwe nhenhele arrantherre ingkirrekele ayenge impemele unterlte-iwetyenhe. Nhenge Bible-nge arrule anthurre intelhe-ileke angkentye akngerre anthurre alakenhe,

‘Ngkartele irrerlknge atwetyenhe yepe-yepe arntarnte-arentye akngerre anyente.

Yepe-yepe areye irrarnpe-irremele unterlte-
unterlte-iwetyenhe.’ *Zechariah 13:7.*

32 “Irrelnge-arle inteme-iperre Ngkartele ayenge itethe-ilirtnetyenhe. Ayenge arrwekele alhetyenhe Galilee-werne. Kenhe arrantherre urreke apentemele apurte-irretyenhe atyengenge.”

33 Kenhe Peter akenhe angkeke, “Arrangkwe! Nhenhe areyele apeke-arle ngenhe impemele alhetyenhe, kenhe the ngenhe impetyakenhe-arle anetyenhe.”

34 Kenhe Jesus ikwere angkeke, “Peter ayenge awaye. Lyete ingwele, urreke tyweke-tyweke arlketyenhenge unte angketyenhe urrpetye-ngare unte atyenge akutne aneme.”

35 Re aweke-arle iperre Jesus alakenhe angkerlenge, Peter angkeke, “Arrangkwe, the iletyakenhe urrtyirremele alakenhe, itne apeke-arle ayenge atwetyeke apetyemele ngenhe-arteke, yanhe ikwerele ayenge angketyakenhe ayenge-arle ngkwenge akutne.”

Apententye akngerre ikwerenhe areye ingkirreke anthurre alakenhe angkerrirreke.

*Jesus angkeme Akngeyeke apmere garden
Gethsemane arritnyenge
(Mark 14:32-42; Luke 22:39-46)*

³⁶ Kele itne imerte apmere Gethsemane ikwere-werne irremele, Jesus apententye akngerre ikwerenhe areyeke angkeke, “Nhenhele anerrirraye urrekeke ayenge nhakwe-urrke-arle alhemenge Ngkartek angketyeke.” ³⁷ Kele re antangkeke apententye akngerre urrpetyeke, Peter-eke, alere Zebedeenkenhe atherreke James uthene John uthene re itnenhe ikwerenge akngeke. Kele re itnekenge irntwarre ulkere anteme alhemele, alhwarrpe-irremele, arrakele-akele anthurre anteme irreke. ³⁸ Kele re anteme angkeke apententye akngerre urrpetye itneke, “Ayenge arrakele-akele anthurre anteme irreke, iwenhe apeke rarle utnenge ultherlenge-arteke, kele ayenge ilwetyeke anteme aneke-arteke. Nhenhele akwete anerrirraye, atyengenge akarre anemele!”

³⁹ Kele-arle re angkeke iperre re akeme-irremele alheke irntwarre ulkere apmere arrpenhe-werne. Re anteme inngerre ahelhe-werne-atheke intemele angkeke Ngkartek alhwarrpe akngerre-akerte imerte alakenhe angkemele, “Akngeye atyinhe-aye! Unte atyenge ileke, ayenge-arle ilwetyenhe, ayenge uye anthurre itirretyeke mpwareme. Unte angkentye yanhe akngarte-iwaye, ayenge rlkerte awelhetyakenhe anetyenhenge. Kenhe arrangkwe-arle, iwenhe apeke ikwere unte ahentye-anemele mpware, iwenhe

apeke ikwere-arle ayenge ahentye-aneme mpwaretyale!"

40 Kele Jesus akeme-irremele alpeke apententye akngerre urrpetye itne-arle aneke-werne ahelhe akethe-werne. Re itnenhe aretye-alpeke ankwe-interrirrerlenge. Kele, re itnenhe akemelhe-ilemele alakenhe Peter-cke angkeke, "Peter, arrantherre-ame akarre anetyakenhe atyengenge akweke ware apeke?"

41 Re itneke awethe angkeke, "Ameke-arelhewarraye, Ngkarteke angkemele rarle arrenhantherrenhe atnyenetyeke, arrentye Satan-ele arrenhantherrenhe uterne-ketye ayenge imperle-alhetyeke. Arrantherre mpwaretyeke ahentye-anemele iwenhe the ilerlenge, kenhe arrantherre arewampe aneme." **42** Kele itneke-arle re angkeke iperre re alpeke Ngkarteke awethe angketyeke, "Akngeye atyinhe-aye! Unte ayenge ileke ilwetyeke, yanhele ayenge uye anthurre itirretyeke mpwareme. Unte angkentye yanhe akngarte-iweye ayenge rlkerte awelhetyakenhe anetyenhenge. Kenhe arrangkwe-arle, iwenhe apeke ikwere unte ahentye-anemele mpware, iwenhe apeke ikwere-arle ayenge ahentye-aneme mpwaretyale!" **43** Kele rarle Ngkarteke angkeke iperre re alpemele itnenhe areke ankwe-interlte-anerlenge alkngé itnekenhe akenhe arratyé apurrke anthurre anteme aneke.

44 Re itnenhe impemele alpeke Ngkarteke angketyeke awethe-ame awethe. **45-46** Kele-arle Ngkarteke angkeke iperre re apetyalpemele itneke angkeke, "Arrantherre-ame ankwe ak-

wete inteme? Kele-arle arrantherre intekte ltyerremele. Akeme-irremele araye. Judas-ele itnenhe nhenhe-werne akngetyeme, tyerrtye atyenge-arle ahele-irreke itnenhe, kele re anteme ayenge, Alere alkere-arenye apmere ahelhe nhenhele-arle akweke intekte, iltye atnerte an-thetyenhe. Artwe akurne yanhe areyele anteme ayenge arntwirrkemele ayenge akngerlte-iwetyenhe. Iparrpe akeme-irraye anwerne it-neke ineke-anare alhetyenhenge.”

Itne Jesus arntwirrkeme

(Mark 14:43-50; Luke 22:47-53; John 18:3-12)

47-48 Nhenge Jesus-arle apententye akngerre ikwerenhe areyeke angketyamenge, Judas apententye akngerre arrpenhe nhenge, artwe arrpenhe atningkenge apetyeke. Apententye akngerre Judas-ele ileke kwertengerle tyeperre tyatye-arenye areye nthenheke Jesus aretye-alhetyeke, re itneke angkeke, “Unte ayenge arerlenge renhe arrelyenngé arrwantyerlenge, renhe akwele arrantherre arntwirrketyeke.” Kele kwertengerle akngerrepate tyatye-arenye areyele itnenhene yerneke arrpenhe atningke-akerte nayepe uthene arne kwetere-arlke-arteke-akerte Jesus renhe arntirrkwetyeke. **49** Kele, Judas irrpenheke apmere Gethsemane-ke, re Jesus areke imerte ikwere alakenhe angkemele, “Wertaye? Akaltyele-anthenhe-anthenhe-aye?” Re imerte Jesus arrelyenngé arrwantyemele.

50 Jesus anteme Judas-eke angkeke, “Kele atyewe, iparrpele mpwaraye iwenhe apeke-arle

unte ahentye-anemenge” Kenhe itne areke Judas-ele renhe arrwantyelenge, itne Jesus arntwirke-warreke, lterrke anthurre arntirrkwemele.

⁵¹ Itne-arle Jesus arntirrkwetyamenge, yanhe ikwerenge apententye akngerre anyentele nayepe akngerre ikwerenhe tyerreke belt ikwerenhe-ngentyele, re irlpe ultakeke urrkapentye akngerre anyente-kenhe kwertengerle tyeperre tyatye-arenye Caiaphase-ke-arle warrke-irremeke. ⁵² Kele Jesus ikwere alakenhe-arle angkerlenge, “Nayepe yanhe arrernirtnaye belt ngkwinheke-arle! Angwenhele apeke tyerrtye arrpenhe nayepele akemele renhe nayepele-arle akirtneme.

⁵³ Arrantherre-arle ayenge itelareme. Ayenge apeke ahentye-aneme Akngeye atyinheke angketyeke ayenge arntarnte-aretyeke. Kele re utnenge alkere-arenye atningke anthurre-arle yerneme, kele itne apetyerlenge thultye areye-arteke ayenge arntarnte-aretyeke, kele mwerre-arle. ⁵⁴ Bible-nge inteme, ayenge tyerrtye areyeke ilwetyeke. Kenhe utnenge alkere-arenye areye apeke apetyerlenge ayenge arntarnte-aretyeke, kele angkentye Bible yanhe-arle urrtyirremele-arle aneme. Alakenhenge anteme the Akngeye atyinhe apayuthnetyakenhe ayenge arntarnte-aretyeke.”

⁵⁵ Jesus awethe itneke angkeke, “Ayenge anyelngalthe anetyakenhe! Iwenheke-ame arrantherre nhenhe-werne apetyewarreke akwetere-arlke irryarte-arlke-akerte ayenge arntirrkewarretyeke? Arlte arrpe-anenhele rarle ayenge arrekantherre-akerte Tyatye

Akngerre ikwerekerele anetyarte akwetethenhe-akwetethe, arrenhantherrenhe akaltyele-anthetyarte, kenhe arrantherre akenhe iwenhenge-arle yanhe ikwerekerele ayenge arntirrkewarretyleyakenhe? ⁵⁶ Kenhe arrule anthurre iwenhe-arle itne Bible-nge intelhe-ileke atyenge-akerte arratye-arle irreme.”

Ikwerenge apententye akngerre Jesus-kenhe areye atere-irremele unterlte-iweke.

Itne Jesus court Jew areye-kenhe-werne akngeme

⁵⁷ Thulye areyele Jesus akngetyeke apmere Caiaphas-kenhe-werne, artwe nhenge kwertengerle tyeperre tyatye-arenye. Apmere ikwerekerele tyatye-arenye akngerrepatte arrpenhe areye-arlke, angkentye Moses-kenhe akaltyele-anthenhe-anthenhe areye-arlke apurte-irremele anerrirreke. ⁵⁸ Kenhe Peter-ele renhe apenterleapeke arlengenge-ulkere. Re irrpenheke yarte kwene-werne apmere ikwerenge. Re thulye areyenge apurte-irremele anetyame, akarelhemele aretyeke nthakenhe-arle-irretyenhenge.

⁵⁹ Kenhe kwertengerle akngerrepatte tyatye-arenye areye, akngerrepatte Jew-kenhe areye-arlke anetyame kwenele. Itne aretyame tyerrtye angwenhe apeke apetyemele iletyeke nthakenhe-arle Jesus irreke-akerte nhenge itne renhe irrerlkngae atwetyenhenge. ⁶⁰ Tyerrtye atningke apetyetyame Ngkarte Jesus-akerte urtyirremele iletyeke. Akngerrepatte areyele uyarne arelheke tyerrtye atherrele angkentye

anyente ileyteke. Kele artwe atherre arratetye-alherreke. ⁶¹ Ratherre alakenhe angkerle-anerreke, “Ilerne awerle-anerreke artwe nhenhe re akwele alakenhe angkerlenga. ‘The tyatye nhenhe ulyeyele ataketyeke, renhe awethe arte-tyenhe ingwe atherre-ipperole.’”

⁶² Kenhe kwertengerle tyeperre tyatye-arenye akeme-irremele Jesus-eke angkeke, “Unte-ame aweme nthakenhe-arle artwe nhenhe atherre angkerne? Arrkngente-iwelhaye! Ratherre-arle arratye angkeke apeke urrtyirremele apeke?”

⁶³ Kenhe Jesus akenhe nterte akwete tnetyame. Kenhe kwertengerle tyeperre tyatye-arenyele renhe alakenhe apayuthneke, “Ngkarte-arle akwete-ante aneme! Re aweme anwerne angkerrirrerlenga. Arratye ilaye! Unte-ame Christ, Alere Ngkarte-kenhe?”

⁶⁴ Jesus angkirtneke, “Arrantherre-arle alakenhe angkeme. Kenhe the akenhe arrekantherre ileme. Urreke arrantherre aretyenhe ayenge, Alere alkere-arenye apmere ahelhe nhenhele-arle akweke intek, Ngkarte Angkeye akwe-arratye itwele akngerrepate anerlenga. Arrantherre ayenge aretyenhe angkulye artepenge apetyalperlenga.”

⁶⁵ Nhenge kwertengerle tyeperre tyatye-arenyele angkentye nhenhe awemele re ahele anthurre irreke imerte mantere ikwerenhe alterremele re angkeke kwertengerle tyatye-arenye arrpenhe areyeke, “Araye! Artwe nhenhele-arle Ngkarte-arle angwareme. Iwenhenge-arle-ame anwerne artwe arrpenheke unthetyenhe ikwere-akerte apale angketyeke

court-enge? Kele lyetenge anwerne awerne rarle angkerne rarle Ngkarte akwele. Re akenhe artwe ware-arle aneme. ⁶⁶ Kele nthakenhe anteme arrantherre ingkirreke itirreme?”

Kele itne angkirtnerlenga, “Nhenhele atywerrenge anwerne-kenhe ultakeke! Kele renhe yernetyekaye itne renhe atwerrirretyeke?”

⁶⁷ Kenhe arrpenhe areyele Jesus-ekarleke pelhe-iwerreke, inngerre-arlke atwemele, itne alkngé mantere ayerneke, ⁶⁸ ikwere angkerrirremele, “Unte akwele Christ aneme! Kele anwerneke ilaye, angwenhele-ame ngenhe atwerne?”

Ayeye nhenhe Peter-akerte rarle angkeke re Jesus-eke akutne

⁶⁹ Kenhe Peter re yanhe aketheli anekenge, yarte kwenele, marle mpwarentyé akngerre anyentele renhe arintyeke imerte ikwere angkemele, “Unte-arlke akwele Jesus ikwerek-arlenga aneke, artwe nhenge Galilee-arenyengel!”

⁷⁰ Kenhe Peter re arelhe wenke ikwere apale angkirtnerlenga, “Ayenge akutne iwenhe-arlle unte angkeme!”

⁷¹ Peter akeme-irremele, arriwe-werne-athike alhetyame, arelhe arrpenhele renhe areke yanhele tnerlenga, re artwe areyeke ileke, “Ayenge awerrirraye, artwe yanhe arriwe itwele tnerlen-anelenga araye, artwe yanhe Jesus Nazareth-arenye ikwerek-arlenga aneke.”

⁷² Peter re apale angkirtneke awethe, “Ngkartele awerlenga ayenge angkeme,

the arrekantherre arratyeyarle ileme, arrangkweyaye, ayenge artwe yanheke akutne!"

⁷³ Kenhe arrpenhe areye apurtele tnetyame Peter renhe areke, ikwere angkemele, "Arratyeyapelaye! Unte-arle Galilee-arenaye-arteke angkentye anthurre-arle, unte anteme apmere yanhe-arenaye antime Jesus-arteke. Unte apententye akngerre ikwerenhe arratyeyarle aneme!"

⁷⁴ Kenhe Peter itneke awethe apale angkirtneke, "Ayenge akutne artwe angwenheke-arle arrantherre angkeme. The kwenhe arrekantherre arratyeyarle ileme. Ayenge apeke urrtyirreme, kele Ngkartele apeke ayenge artimperre-iwetyeke!"

Rarle angkeke ikwerekere-anteye, tyweke-tyweke iparrpe arlkeke. ⁷⁵ Kenhe iparrpe Peter-ele itelareke nthakenhe-arle Jesus-ele ikwere arrekwele ileke, "Urreke tyweke-tyweke arlketyen-henge, unte angketyenhe urrpetye-ngare unte-arle atyenge akutne aneme." Kenhe Peter re anteme akethe-werne alhememe arnterre anthurre artneke.

27

Jew akngerrepare areyele Jesus apmere Pilate-kenhe-werne akngeme

(Mark 15:1; Luke 23:1-2; John 18:28-32)

¹ Kenhe ingweleme anthurre arrpenhe attningke areye apurte-irrerirremele Jesus ikwere-akerte angkerretyeke, kwertengerle akngerrepare tyatye-arenaye areye, akngerrepare areye-arlke angkerretyame nthakenhe-akenhe itne Jesus renhe atwerrirretyenhe. ² Itne akwete

anthurre angkerretyame, itne yewe angkerreke Jesus renhe Pilate-werne akngetyeke, re nhenge apmere Rome-arenye alartetye anerlenge. Ayerneke-arle iperrele, itne renhe akngetyemele akngerrepate renhe iltye antheke.

*Judas re-arrpe irrerlknge atwelheke
(Acts 1:18-19)*

³ Kenhe Judas akenhe, rarle nhenge Jesus iltye antheke-arle iperre, re anteme aweke itne Jesus ilpernerlenge irrerlknge atwetyeke, Judas anteme apure anthurre awelheke re mpwarekenge-arle. Re silver ngkweltye 30 pele ineke akngirtnemele kwertengerle akngerrepate tyatye-arenye areyeke akngerrepate arrpenhe areyeke. ⁴ Re alhememele itneke angkeke, “Jesus kwenhe arratyne mwerre aneme, re kwenhe arne akurne mpwaretyakenhe. Itne anteme lyete renhe-werne irrerlknge atweme! Ayenge apetyetyakenhe-tetye-arle arrekantherre. The Jesus arrenhantherrenhe iltye anthetyeke arrangkwe-arle!”

Kenhe akngerrepate Jew-kenhe areye akenhe ikwere angkirtnerlenge, “Anwerne-arle akutne-arle! Yanhe-arle unte-arrpe-arle angkerne!”

⁵ Judas-ele anteme ngkweltye ahelheke iwemele Tyatye ikwerenge-ntyele arrateke. Nthenhewerne apeke rarle alheke, rope-le ayernelhetyeke ikwere-iperre anteme ilweke-arle irlpare anetyame.

⁶ Nhenge Judas-ele ngkweltye iweke-arle Tyatye kweneke, kwertengerle akngerrepate tyatye-arenye areyele ngkweltye itnenhene

kutyemele angkeke, “Artwe kwenhe ilwetyenhe, anwerne-arle ngkweltye nhenhe areye anthekenge. Angkentye anwerne-kenhele ileme anwerne-arle mane nhenhe-arteke Tyatye bank- eke arrernetyeke arrangkwe. Nthakenhe-ame anwerne irreye?” ⁷ Itne angkerreke imerte yewe angkerremele, “Anwerne ngkweltye nhenhele ahelhe inetyeke anwerne-arle ipenye areye artetyeke apmere anwerne-kenheke ilwerlenga.” Kele itne anteme ahelhe akweke ineke artwe- ngentyele-arle arne areye ahelhe urte-ngentyele mpwaretyartenge. ⁸ Alakenhe ikwerenge lyete apmere yanhe renhe ileme. “Ahelhe alhwe- akerte.” ⁹⁻¹⁰ Alakenhenge anteme Ngkartele arrule ileke Jeremiah-eke, angkentye Ikwerenhe awemele ilderle-apentye akngerre-arle, arratyе anetyenhe. Alakenhe re intelhe-ileke, “Israel-arenyeke-artweye arrpenheme kwenhe angkeke itne-arle ngkweltye silver 30 pele anthetyenhe anetyeke artwe yanheke.

Ngkweltye yanhele itne imerte ahelhe ak- weke inemele artwe nhenge arne ar- eye ahelhe urte-ngentyele mpwarentyе akngerrenge-ntyele. Itne mpwarerlenga Ngkartele ayenge ileke-arteke.” *Zechariah 11:12-13.*

Alakenhe re kwenhe Jeremiah angkeke.

*Pilate-le Jesus apayuthnetyame
(Mark 15:2-5; Luke 23:3-5; John 18:33-38)*

¹¹ Kenhe akngerrepate areyele Jesus akngemele apmere Pilate-kenhe-werne, renhe ikwerenge ngkerneke. Kenhe Pilate-le Jesus

apayuthneke, “Unte-ame Jew-arenye areyeke Akngerrepare anthurre?”

Jesus ikwere angkirtnerlenge, “Unte-arle alakenhe angkerne.”

¹² Kwertengerle akngerrepare tyatye-arenye areye uthene, akngerrepare arrpenhe areye uthenele Jesus ilperneke, angkemele rarle akwele arne arrpenhe akurne areye mpwarekenge. Jesus-ele awemele impeke, Re yanhe ikwerekere nterte anthurre tnetyame, arrkngenteke impetyakenhe.

¹³ Alakenhe ikwerengen anteme Pilate-le renhe awethe apayuthneke, “Iwenhe ikwerekere ame unte akwete yanhe tnerle-aneme nterte anthurre, angketyakenhe? Unte aweme itne-arle angkerre, arne areye unte-arle akwele mpwareke.”

¹⁴ Kenhe Jesus akenhe akwete anthurre-arle nterte tnetyame. Nhenge Pilate-le aremele apteke anthurre.

Pilate-le thulye areye ileme Jesus irrerlknge atwetyeke

(Mark 15:6-15; Luke 23:13-25; John 18:39—19:16)

¹⁵ Year arrpe-anenhele nhenge arrawei-rentye iperre Passover anekenge, artwe Pilate-le, akngerrepare-arle Rome-arenye, akweteth artwe anyente apmere jail-ngentyele ipmentye aywepetyarte tyerrtye areye ahentye-anerlenge-arteke.

¹⁶ Ikwerekere ureke artwe anyente Barabbas arritnye aneke jail-le. Tyerrtye areyele itelareke rarle akurne anthurre aneke.

¹⁷ Arlte ikwerekere, tyerrtye atningke anthurre

arriwe-werne apetyewarremele apmere Pilate-kenhe aketheli tnerirreke, “Artwe jail-iperre angwenhe-ame the arrekantherre tyerrelhe-ileme, Barabbas apeke Jesus apeke, artwe nhenge arrantherre-arle itirreke Ngkartele-arle alhilekenge?” ¹⁸ Pilate-le itelareke Jew akngerrepate areye-arle Jesus-eke ingkerte-irrerlenga, alakenhenge athewe itne renhe apmere Pilate-kenhe-werne akngetyewarreke.

¹⁹ Pilate anetyame chair akngerre ikwerenhele, arrantherre itelareme rarle chair ikwerele aneme tyerrtye angwenhe apeke ikwere itirreme nthakenhe renhe mpwaretyeke. Nhenge re angkemele anetyame chair ikwerele, anewe ikwerenhele ikwere-werne angkentye nhenhe yerneke, “Artwe Jesus nhenhe impaye re kwenhe arratyae-arle aneke. Ingwele kwenhe the ikwere-akerte altyerre areke ayenge anteme atere-irremele arreweke. Kele renhe impaye, renhe awetyeke uternetyale.”

²⁰ Yanhe-ngentyele, kwertengerle akngerrepate tyatye-arenye areye uthene akngerrepate arrpenhe areye uthenele atningke arrpenhe areye uterneke Pilate apayuthnetyeke Barabbas anyente-ante jail-nge arratelhe-iletyeke, Jesus-ante awetyeke! ²¹ Kele Pilate-le itnenhe awethe apayuthneke, “Artwe jail-iperre nhenhe atherrenge-ame, the angwenhe arratelhe-ileme alhetyeke?”

Kele itne akenhe angkirtnerlenga “Barabbas anwernenhe anthaye!”

²² Kele Pilate-le itnenhe awethe apayuthneke, “Nthakenhe anteme the ileye artwe nhenhe

arrantherre-arle Ngkarte Messiah ileme?”

Ingkirreke akenhe alakenhe-arle angkerlenga, “Renhe akanthatweme arne arntarlkwake-arleke irlpare arrernaye!”

23 Kele Pilate itneke alakenhe-arle angkerlenga. “Kele nthakenhe anteme re akurne mpwareke?”

Itne renhe alakenhe angkerlenga awemele itne arnterre anthurre arlkemele angkeke, “Renhe nail-ele arne arntarlkwake-arleke irlpare arrernaye!”

24 Kele, Pilate-le itnenhe areke angkelhe-angkelhe angkerrerlenga impememe apeke renhe re itirreke, “Tyerrtye nhenhe areye apeke ahele-irrerirremele atwerreketye.” Kele re kwatye inemele iltye alhewelheke tyerrtye areyele arerlenga imerte angkemenge, “Ayenge nhenhe iltye alhewelhemele arrantherre ayenge ilpernetyale, arrantherre-arle renhe atwetyeke ahentye-aneme, ayenge kwenye. Arrantherre kwenhe ayenge uterneme thultye atyinhe areye ileyteke renhe akngemele atwetyeke.”

25 Kele tyerrtye areye ikwere angkirtnerrirreke, “Unte akenhe angkeme renhe atwetyeke anwerne-arle ahentye-anemenge. Anwerne apeke nhenhe alakenhe akurne mpwaremele, kele mwerre-arle Ngkartele apeke anwernenhe atwemele-arle, ampe anwerne-kenhe areye-arlke, ampe itnekenhe areye-arlke, ngenhe kwenye.”

26 Nhenge Pilate-le aweke tyerrtye areye alakenhe arlkerrirrerlenga, re Barabbas apmere jailngentyele tyarrelhe-ileke imerte tyerrtye areye

iltye anthirtnemele. Yanhe-ngentyele, Pilate-le Jesus ilyte antheke thultye ikwerenhe areye. Re anteme thultye ikwerenhe areye ileke Jesus whip-ele atwetyeke imerte nail-ele arne arntarlkwake-arleke irlpare arrernemele.

*Thultye areyele Jesus-eke anyurre-irreme
(Mark 15:16-20; John 19:2-3)*

²⁷ Thultye areyele Jesus akngeke arrernetyeke yarte-ke apmere Pilate-kenheke. Thultye arrpenhe areyeke arlkeke iperre, itne apurte-irreke ingkirreke apmere yanhe ikwerele. ²⁸ Itne Jesus-nge mantere ilyweke-arle-iperre, itne mantere athetheke ikwere-karleke arrerneke. ²⁹ Itne irrkarlpe walye lyeke-lyeke-akerte-ngentyele mpwareke akaperte ikwerenheke-arleke arrerneke. Itne arne akwe-arratyeye arrerneke, arne nhenge akngerrepate-kenhe-arteke, ikwerenge arrekwelele kwene-irremele, anhelhewarretyeke, ikwere anyurre-irremele renhe tnaketyame-arteke, angkemele, “Unte kwenhe Jew-arenye areyeke akngerrepate mwerre anthurre.” ³⁰ Arne nhenge ineke-iperrele itne akwete anthurre akaperte ikwerenhe atwetyame, ikwere-karleke pelhei-wetyame. ³¹ Renhe akwele tnakemele. Itne ikwere anhelhewarreke akwete, kele itne mantere athetheke ikwerenge inirtneke. Itne renhe mantere ikwerenheke-arrpe akwernirtneke. Itne renhe akngeke apmere-werne nthenehele-arle renhe nail-ele arne arntarlkwake-arleke irlpare arrernetyeke.

*Thultye areyele Jesus nail-ele arne arntarlkwake-arleke irlpare arrernewarreme
(Mark 15:21-23; Luke 23:26-43; John 19:17-27)*

³² Jesus-ele arne arntarlkwwe renhe re-arrpe akweke-ulkerre ware akngetyeke iperre, thultye areyele imerte arerrirreke artwe anyente Simon arritnye apmere Cyrene-arenye apetyer-lenge. Itne renhe-arle uternewarreke arne arntarlkwwe ulthentye nhenge akngernerle-apetyeke. ³³ Kenhe itne apwerte Golgotha yanheke irreke, renhe “Akaperte Ngkwerne” ileme. ³⁴ Yanhe ikwerenge, itne ngkwarle-arlke arne irrkerteye-arlke anyentelhe-ilemele, Jesus renhe antheke. Kenhe re akenhe arrkerneke-arle, ayenelhe-ileke antywetyale.

³⁵ Kele thultye areyele renhe nail-ele arne arntarlkwake-arleke akertnelhe-ileke irlpare arrernemele, yanhenge anteme itne mantere ikwerenheke arrkene-irrereke itne mantere renhe impetyeke. ³⁶ Yanhe-ngentyele itne anemele arrirretyame arne arntarlkwwe renhe inetyeke apetyeme-ketye. ³⁷ Akapertenge akertnele itne intelhe-ileke renhe ilpernemele, “NHENHE JESUS, JEW AREYEKE AKNGERREPATE.” Alakenhe ikwerenge-arle itne renhe nail-ele arne arntarlkwake-arleke irlpare arrerneke.

³⁸ Itne artwe anyelkngalthe atherre-arlke nail-ele arne arntarlkwake-arleke arrpenhe atherre-arlke akertneke irlpare arrerneke ikwere itweke, anyente itepeke-ante-atherre.

³⁹ Tyerrtye areye anpere alhememele, ikwere atherremele-arlke anyurre-irreke. ⁴⁰ “Unte

kwenhe angkeke tyatye akngerre anwernekenhe ataketyeke. Unte akwele angkeke arlte atherre iperrele artirtnetyenhenge! Unte apeke Alere Ngkarte-kenhe, arne arntarlkwengentyele atnarnpaye!”

41 Kwertengerle akngerrepaty atyate-arenye areye, angkentye Moses-kenhe akaltyele-anthenhe-anthenhe areye-arlke, akngerrepaty arrpenhe areye-arlke ikwere-akerte rante-rante angkeke. Itne alakenhe tyele angkerrirreke,

42 “Nhenhele tyerrtye arrpenhe areye itetheke mpwareme, kenhe re-arrpe itetheke mpwarelhetyakenhe. Re akwele Israel-arenye areyeke akngerrepaty akelheme. Re apeke arne arntarlkwengentyele atnarnperlenge kele imernte anwerne renhe aremele arratyetitelaremere. **43** Rarle akwele angkeke renhe-arlke Ngkartele mwantye atnyenemele re ilelheke re Alere Ngkarte-kenhe-arlke. Kele nhenhe anthurrele akarelhemele aretyeke renhe apeke-arlke Ngkartele arntarnte-aremeke re ilweketyenge.”

44 Kele artwe anyelkngalthe atherre ikwere itwele-arlke aneke atherre ikwere anhelhetyame anteye.

*Jesus arne arntarlkwake ilweme
(Mark 15:33-41; Luke 23:44-49; John 19:28-30)*

45 Kenhe arlte yanhe ikwerele, arlte mpepele uterne ingwemerte-irreke. Kenhe re ingwemerte akwete angwerreke-atwetye. Kenhe tyerrtye ingkirrekele alernnge arerrirretyakenhe,

arrangkwe akwete. ⁴⁶ Kele uterne anteme pwar-
rtyeke awethe Jesus arlkeke arnterre anthurre
arne arntarlkwé ikwerenge-ntyele, “Eloi, Eloi,
lama Sabachtani!” Alakenhe-arle re angkeke,
“Akngeye, Akngeye! Iwenhenge-ame unte
ayenge anyente-kenheke iweke, ayenge im-
pemele?”

⁴⁷ Kenhe tyerrtye arrpenhe areyele renhe
awemele angkerreke, “Renhe awaye, re arlk-
erlenge Elijah-eke apetyetyeke renhe arntarnte-
aretyeke.” ⁴⁸ Kenhe artwe anyente akenhe arrek-
wele untemele mantere akweke ineke-iperrele
ngkwarle irrkerteyeke irrpelhe-ilemele. Arneke-
arleke ayerneke iperrele, re arntwirrkeke Jesus
akwele anthetyeke. ⁴⁹ Kenhe arrpenhe areye an-
teme angkeke, “Urrekaye, anwerne aretyekaye
Elijah-ele apeke-arle renhe inetyeke apetyemeke
renhenhe atnarnpelhe-ilemele.”

⁵⁰ Kele Jesus awethe-ngare arnterre arlkeke
imerte angkentye uyerremele ilwemele anteme.

⁵¹ Rarle ilwekenge, antyame-arteke-arle
anetyarte tyatye akngerre ikwerekere irlpare
anemele alterrelheke mpwepenye akertne-
ngentyele kwene-atheke kele apmere ameke-
ameke renhe anteme akethelhe-anthurre-
ileke. Ahelhe akenhe arnterre anthurre-
arle akngelheke, apwerte akngerre-apenhe
arrpenheme alhe mpwepenye ultakelheke.
⁵²⁻⁵⁴ Thultye areye angathele-arle tnetyamele
areke ahelhe akngelhelenge uterne-arlke
ingwemerte-irrerlenge, apwerte-arlke
mpwepenye ultakelhe-ilerlenge arne arrpenhe
areye-arlke, kele yanhe-ngentyele itne atere

anthurre irremele angkeke, “Ayekaye! Artwe nhenhe kwenhe Alere Ngkarte-kenhe arratye-arle aneke.”

Inteye artelheke-arle-arlke altywere-irreke, kele anteme Jesus-arle itethe akeme-irrintyalpeke ilweke-arle iperre Ngkarte-kenhe areye arrekwele-arle ilweke areye itethe akeme-irrereke inteye-ngentyele itethe-irrerirremele. Itne apmere Jerusalem-werne irrpenherlte-iwemele untherrirreke, tyerrtye atningkele itnenhe areke.

⁵⁵⁻⁵⁶ Kenhe arelhe areye yanhe ikwerele tnetyame arerlte-anemele arlenge-ngentyele. Mary Magdala-arenye, Mary mikwe James uthene Joseph utheneke, mikwe James uthene John utheneke, ratherre-arle alerikwe Zebedee-kenhe, arrpenhe atningke-arlke. Itne Jesus-nge apetyewarreke apmere Galilee-ngentyele apmere Jerusalem-werne. Arelhe nhenge areye Jesus-akerte alhetyarte re nhenge Galilee-le anekenge merne mpenge-ilemele ikwere.

Itne Jesus inteye kwenike arteme

(Mark 15:42-47; Luke 23:50-56; John 19:38-42)

⁵⁷ Arlte angwerre-angwerrele anteme irreke, artwe Joseph arritnye, apmere Arimathea-arenye, yanhe ikwere irretye-alheke. Artwe yanhe mane akngerre atnyeneke, re apententye akngerre Jesus-kenhe anemele. ⁵⁸ Artwe nhenhe Pilate-werne alheke renhe apayuthnetyeke tyerrtye atyalangke Jesus-kenheke.

Pilate-le ileke thultye akngerrepatke Joseph renhe anthetyeke.

59 Thultye areyele imerte alhemele atyalangke Jesus-kenhe arne arntarlkwengentyele atnarnpelhe-iletyeke, imerte Joseph anthemele. Re atyalangke Jesus-kenhe mantere alkarlele imarteye-iwemele, **60** ikwerenhe inteye-werne akngeke, kwene ikwere atheneke, tyerrtye arrwekelenge inteyeke athenetyakenhe. Inteye nhenge urrkapentye akngerre Joseph-kenhe areyele arrekwele tnyeke ikwere-arrpe akwele. Kenhe Joseph-ele atyalangke Jesus-kenhe inteye ikwere atheneke-iperre, kele imerte re ankerte-iwemele apwertele arriwe martemele arrerneke, yanhe-ngentyele alheke anteme.

61 Kenhe Mary Magdala-arenye kenhe Mary uthenele inteye mwantyele arntarnte-arerle-anerreke arrpenhe ampinyenge anerle-anerremele.

Thultye areyele inteye arntarnte-arerlte-anemele nthenhele-arle atyalangke Jesus-kenhe aneme

62 Arlte ingweleme arrpenhele anteme Arlte Apurrke Jew areye-kenhele, kwertengerle akngerrepate tyatye-arenye areye uthene Pharisee areye-arlke, itne Pilate-werne alhemele angkeke. **63** Itne ikwere alakenhe angkeke, “Akngerrepataye, anwerne itelareme nthakenhe-arle Jesus urrtyirreke rarle itethe akwete anekenge. Re angkeke rarle ilweke-arle iperre ingwe atherreke, Ngkartele renhe inemele itethe-ilemele. **64** Unte thultye ngkwinhe areye ileyteke inteye ikwerenhe arntarnte-aretyeke arlte atherreke-atwetye, apententye

akngerre ikwerenhe areyele inteye ikwere-werne apetyeme-ketyenge atyalangke Jesus-kenhe ineme-ketyenge. Nhenge Jesus-arle itethe aneke-arle re urrtiyirremele angkeke alakenhe, ‘Ayenge-arle Ngkartele-arle alhileke-arle.’ Akurne-arle alakenhe re angkeke! Kenhe apententye akngerre ikwerenhe areyele apeke ilemele Ngkartele-arle renhe itethe-ilirtneke kele akurne anthurre-arle kwenhe!”

⁶⁵ Kele, Pilate itneke angkirtnerlenge, “Kele alherlte-iwaye thultye atyinhe areye inetyeke itne inteye renhe mwantyele arntarnte-aretyenhenge.”

⁶⁶ Kele, akngerrepat Jew-kenhe areye alheke, imerte thultye inemele, inteye ikwere-werne anteme itne alheke. Itne rope akweke lterrke anthurre arrerneke apwerte renhe ayernemele, kenhe tyerrtye apeke nterte-nterte apetyemele apwerte renhe ankerte-iwemele itne-arle areme-arle. Kele itne thultye areye ileke inteye yanhe arntarnte-aretyeke.

28

Ngkartele Jesus itethe-ilirtneme ilwekarlengetyele

(Mark 16:1-10; Luke 24:1-12; John 20:1-10)

¹ Ingweleme arrpenhele anteme, Arlte Apurrke Jew areye-kenhenge interte, uterne-arle arratekenge, Mary Magdala-arenye uthene Mary arrpenhe uthene inteye-werne aretyeke alher-reke.

² Ratherre-arle alhetyamenge ahelhe iparpe akngerre anthurre akngelheke, alkere-arenye Ngkarte-kenhe anteme akertne-ngentyele kwene-akerle apetyeke. Re inteye ikwere irreme re anteme apwerte akngerre renhe ankerte-iweme arriwe-ngentyele, re yanhele apwerte ikwere akertnele aneke. ³ Utnenge alkere-arenye alharrkentye-arteke pwarryeke, mantere rarle irrpeke-arle akenhe mperlkere pwarryerlenge anthurre. ⁴ Kenhe thultye areyele inteye renhe-arle arntarnte-arerlte-anetyame, nhenge itne utnenge alkere-arenye renhe apetyerlenge areke, itne arrewemele atere anthurre irremele ahelherne itne atnyerrirreke ilwekarle-arteke.

⁵ Utnenge alkere-arenye anteme arelhe ikwere-atherre angkeke, “Atere-irretyalaye! The itelareme mpwele-arle Jesus-eke apale untheme, mpwele itelareme itne renhe nail-ele arne arntarlkwake-arleke irlpore arrerneke. ⁶ Ikwere arrangkwe! Rarle itethe-irrirtneke akeme-irremele. Itelaraye, re mpweleke arrekwele ileke, rarle ilweke iperrele, itethe-irremele akeme-irretyenhe. Aretyeke apetyaye rarle intek.” Ratherre arratyeyeye-aye! Nhenhe-arle arrangkwe-arle!” ⁷ Utnenge alkere-arenye re anteme ikwere-atherre alakenhe angkeke, “Iparpe alperraye apententye akngerre ikwerenhe areyeke iletyeyeke alakenhe, ‘Re ilweke-arle iperre itethe akeme-irreke. Re Galilee-werne alheme arrekantherrenge arrekwele, kele arrantherre renhe yanheke-arle aretyenhe.’ Alakenhe itneke iletyeyeke alherraye! Irlpangkelhe-ilerraye

iwenhe-arle the mpweleke ilekenge.”

8 Kele ratherre inteye-ngentyele iparrpe unterreke apententye akngerre itneke ileyteke nthakenhe-arle-irrekenge. Ratherre atere awelheke, akangkemele anthurre-arlke.

9 Ratherre alherrerle-apemele arerle-anerreke Jesus ikwere-atherre arneke-anare-irrerlenga. Re apetyemele ikwere-atherre angkeke, “Aye! Arelhe atherraye, akangkerle-anerremele anetyeke!” Kele ratherre angathe-irremele kweneirreke ikwerenge arrekwele ingke ikwerenhe arntwirrkemele renhe utsyerneke tnakemele.
10 Kele Jesus ikwere-atherre angkeke, “Atere-irrerle-anerretyalaye, akwenpe anaye, imerte apententye akngerre atyinhe areye ilemele Galilee-werne alhetyeke, itne ayenge yanheke aretyenhenge.”

Thultye areyele kwertengerle tyatye-kenhe areyeke ileyteke alheme iwenhe-arle itne inteyeke areke

11 Kele arelhe ratherre-arle alhekenge thultye urrpetye mwantyele-arle arntarnte-aretyame nhenge areye akeme-irremele apmere akngerre-werne alheke imerte ilemele kwertengerle akngerrepatye tyatye-arenye areyeke nthakenhe-arle-irreke. **12** Kenhe itne akenhe nhenhe awemele, itne akngerrepatye arrpenhe areyenge apurte-irremele aneke angkerretyleke iwenhe apeke ileyteke inteye ikwere-akerte nhenge arltwe-arle aneme. Kele itne angkerremele yewe angkerreke thultye areye mane akngerre

anthetyeke itne-arle angkentye arrpenhe iletyenhenge angkentye urrtyirrentyele nhenge.

¹³ Itne anteme itneke alakenhe angkeke, “Nhenheyaye! Mane nhenhe inemele atnyenaye, arrpenhele apeke arrenhantherrenhe apayuthnerlenge atyalangke Jesus-kenhe-akerte alakenhe angkaye, ‘Anwerne-arle ankwe-arle inteka, ingwe mpwepele apententye akngerre ikwerenhe areye apetyemele atyalangke Jesus-kenhe akngerlte-iweke.’ Alakenhe ware angkaye.

¹⁴ Kele akngerrepate arrekantherrenhe Pilatele apeke angkentye yanhe aweme, arrantherre ankwe-arle inteka-akerte, re apeke ahele anthurre irretyenhe arrekantherre. Kele atereirretyle anaye, anwerne-arle arrekantherre arkngerte angketyenhe.” Alakenhe-arle itne itneke angkeke.

¹⁵ Kele thultye areyele mane inemele alheke imerte angkentye renhe ilerlte-apemele nhenge apententye akngerre areyele-arle atyalangke Jesus-kenhe akngerlte-iweke anyelkngele. Angkentye nhenhe anteme anteke-irreke apmere arrpe-anenhe-werne, lyeteulkere angkentye renhe anteme Jew areyele akwete ileme.

Jesus imernelheme apententye akngerre ikwerenhe areyeke apmere Galilee-nge

(Mark 16:14-18; Luke 24:36-49; John 20:19-23; Acts 1:6-8)

¹⁶ Yanhe-ngentyele, apententye akngerre 11 pele itne apmere ayerrere Galilee-werne alherlte-iweke. Apmere yanheke irremele,

apwerteke antyeke Jesus-ele-arle itneke ileke-akerte-werne. ¹⁷ Kele yanhe ikwerele anteme itne Jesus areke, ikwere kwene-irremele renhe akangkemele tnakewarreke. Kele arrpenhe areyele akenhe renhe aremele angkeke, “Kweye! Nhakwe araye!”

¹⁸ Jesus itneke-werne angathe-irremele angkeke, “Ngkartele ayenge akngakemele arrerneke the arne ingkirrenyeke anthurre arntarnte-aretyeke Akngerrepatele-arteke anteme alkere akertne nhakwenge uthene apmere ahelhe nhenhenge uthene. ¹⁹ Kele alherlte-iwaye apmere arrpe-anenhe-werne tyerrtye areye angkentye atyinheke akaltyele-anthemele, itnenhe akaltyele-anthemele itne apententye akngerre atyinhe areye anetyeke. Itne apententye akngerre atyinhe areye irrerlenge, itnenhe kwayteke akwernemele Akngeye-kenhe arritnye atniwemele, Alerikwenkenhe-arlke, Utnenge Akngerre-kenhe-arlke. ²⁰ Kele itne apententye akngerre atyinhe areye anteme anemele, itnenhe akaltyele-anthaye ingkirreke tharle arrenhantherrenhe akaltyele-antheke itne ingkirreke akangkwe-irretyeke aywerrkele mpwaremele anetyenhenge. Nhenhe itelarerrirraye: Ayenge-arle arrekantherrenge akwetethe-arle anerle-anetyenhe, ahelhe nhenhe uyerretyeke-atwetye!”

**Angkentye Mwerre
Portions of the Holy Bible in the Central and Eastern
Arrente language of Australia**

copyright © 2002-2014 Wycliffe Bible Translators

Language: Eastern Arrente (Arrernte, Eastern)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 11 Nov 2022 from source files dated 22 Nov 2019

26bd077a-984c-5596-a099-f37f2651f363